

T5466/7910

1<sup>st</sup>



CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

OCT 4 1960

241



敝帚集序

詩文小技也然古今來兼美盡善者代不多得非特資性互有短長而工力或有至有不至故張說徐堅共論近世詩文瑕瑜不掩使倣慕者有所取裁焉况吾輩少習舉子業窮年矻矻何暇問詩古文詞卽頗能旁及者大率習之不專則所致亦淺便聲律者以華辭害義嗜詮解者以陳義害辭昔蘇長公云凡人精力有限不能兼收盡取譬之入海而市百貨蓋誠身試之而知其難也然資敏而篤好者積日累歲造之無不可至於兼善余遊於四方獲見先生大人之詩文多矣顧皆見之於成

哈佛大學  
圖書館  
珍藏印



名之後臆測其少時之資性工力必有大過人者而吾乾齋陳子則親見其幼而敏長而好學積之二十年而始得有今日之詩文也乾齋解悟神警能柔克沉思年十三善屬文十五事場屋專心爲制舉藝者十年而舉於鄉其後驅馳南北與所善諸名碩登臨贈答發爲歌詩篇什甚富猶自謂未善不以示人遲之今秋乃悉發所秘手自去取僅存若干首將以問世而屬余一言噫嘻余不知詩而獲交能詩者之人余不能詩而竊聞作詩者之論論者曰詩有體裁有骨力有風神弘斯三義琢句鍊字歸於大雅詩之至也余執是說以觀古人

之詩起魏建安迄晉永嘉又由東晉建武逮唐之元和雖體裁數變風骨小殊而其間崛起振拔各極所詣江左未嘗無魏晉之音中晚有高出初盛之句同揆大雅殆無間然迨宋元明季分宗定派嗜憎淆雜嗟乎詩言志耳聚腋成裘範金爲器以我運古成一家言豈不甚快而徇他人之憎嗜以累古人固矣今讀乾齋之詩俯仰正變升降之際抽靈發蒙烟霏雲動始知笑曹劉者不盡非學鮑謝者不盡是也非其資性開敏烏能於從事制義之暇深知篤好工力兼到如此耶今乾齋偕計北行矣際



右文之代如揚綰故事於制舉外加試詩賦冠領士林作千古佳話不亦偉哉乾齋於余爲內兄弟其詩文具在識者當自知之諒不以崔昂婦弟見譏思道云爾昔康熙甲子九日弟葉映樞拜題於鴛湖舟次

愛日堂詩序

兼三尊而并四科史難其人今乃親見之若宮傅相國陳公蓄德敷政以其餘事著愛日堂詩是也公自應科入仕以迄

賜告而詩必與俱隨其時事以名其集凡十餘種愛日堂詩其總稱也公昔歸養

聖祖御題堂額以賜故名其詩不忘君父焉子編修君釐爲若干卷鐫梨以行世公以之雋及門久頗能識其所以爲詩者授簡俾書其末公之詩之雋誦而習之矣學有本言有物蘊諸道德性命之腴而吐其忠貞經濟之華者也是故應制之詩麗而



法紀頌之詩閱而摯遊覽行旅之詩章而遠閒適  
遣懷之詩暢而真贈答讌會之詩恬而至紀時詠  
物之詩典而切清廟明堂黃鐘大呂之音既如此  
其洋洋也山川風月清談幽賞之懷又如此其渺  
渺也其時昌其遇隆故其詩有美而無刺有正而  
無變其於出處之道也正君父昆朋之倫也盡故  
其詩溫柔敦厚醇乎風雅而劑以唐人之體裁節  
族焉於戲盛哉周公之爲風耕甿桑女園叟獵夫  
征人思婦一一挹眉睫而抉肺肝召公之爲雅軍  
田土宇之大厲鍛饕濯之細流光於阿風振華於  
梧鳳二公洵宰輔中之詩人也歷事文武成王齒

皆踰百紀於論衡若漢相張蒼雖著書然無詩匡  
衡說詩而不能作唐相燕公曲江郁然爲詩宗然  
皆末年七十宋相文潞公最壽而詩不名公今年  
八十有五矣前一二年謁公於遂初園惠貽五言  
長篇和七言絕句親見公之興騰舉而思泉涌也  
因憶前三二十年從遊觴詠親見公之鵷掌象渡  
而餘子之汗流而走僵也金玉之堅其響必永麀  
鳳之神其彩必緝日月之古其光景必新公之精  
氣充固而發揮不窮亦若是矣且以公之耆碩爲  
兩朝國老處則東山洛社出則安車蒲輪遇

新天子仁明首出宇宙太和入覲而繪星雲之容矢



愛日堂詩集  
詩而發韶鈞之聲若周召風雅作於成周聖子神  
孫之世知不以林泉集而止之雋雖白紛尚能誦  
習之乾隆元年春正月上元日門人華亭黃之雋  
謹識

愛日堂詩集目

敝帚集四卷

登瀛集一卷

却掃集一卷

環召集五卷

南陔集三卷

重徵集一卷

宜人集二卷

肆觀集一卷

還朝集二卷

蘭峪前集一卷



重臨集一卷

蘭峪後集二卷

黃扉集三卷

愛日堂詩卷一

敝帚集一

壬子至戊午八月

余少時困躓六踏省門三上公車始得售  
智慮光陰磨耗於制舉業中未暇旁及詩  
賦詞章也偶有感觸姑試爲之旋即棄置  
雲間葉蒼巖先生余姊壻也見余詩亟加  
稱賞因從敗簏中重爲裒次名曰敝帚集  
凡四卷

將進酒

當其吾未我洪荒迄今爲人有迨夫吾得我元會  
不獨爲爾壽功名竹帛事偶然編摩著述隨所宣



無爲形厄厄心懸懸宇宙厠汝於其間甕中醢雞  
袴中蝨得失彼此奚有焉一杯將進莫蹉跎來日  
未必少去日未必多人生行樂只在今何必問西  
去之日與東逝之波秋至月成規春回花滿柯無  
疑相對酒一笑醉顏酡落落造化與俱悠悠太古  
爲徒亦曰堯千鍾孔百觚酒亡人國定已妄伐性  
斧矛豈非誣問君不飲何爲乎

楊白花

楊白花可奈何夜間春暖夢蹉跎皎月當空照綺  
羅連臂雙雙蹋地歌楊白花恨無涯一去江南春  
萬里隨風飄蕩落誰家攪起愁腸天欲曉洛陽宮

樹亂啼鴉

羅敷行

道旁多策馬陌上競采桑採桑天日暮策馬道路  
長此營非若務彼意非吾將詎有舊親識何事立  
傍徨整衣前致詞停鞭懼有妨使君天上偶金屋  
耀明璫羅敷草間女荆扉約布裳恩愛各成配形  
影自相當曾是縞若綦可共姬與姜願言早迴車  
告絕急提筐歸遲蠶恐饑去晚露已灑無令使君  
婦獨夜撫空牀

長相思

手中軋軋絲難盡停機默坐如有疾一燈照壁深



夜熒寒螢啼急淒風緊爲憶當年未嫁時如雲綢  
髮瓊花姿舉世見者誰不愛歡情輸與良人知自  
從離別損紅顏纖盡迴文往復還席可卷兮石可  
轉不改朝朝暮暮閒夢有時斷死必從鏡匣遞消  
憔悴容縱然肉盡徒畱骨待與良人手自封

虞美人曲

黑雲夜暝帳中燭喚起殘粧淚如續君王善戰不  
曾疑鴻溝未割垓下感呂姬笑挾食其歸羞顏更  
伴漢王宿掌握中物慣負恩遂使烏騅困難逐一  
闕悲歌半夜風紅顏薄命怨何窮莫爲虞兮空短  
氣百戰已成蓋世雄默憶今宵王與妾何異昔年

睢水東王不能敗妾不辱誓死不落漢軍中

對酒當歌

對酒當歌斯言謂何樂務及時孰知其佗百年猶  
瞬七尺易磨倏童而卯亦弁以戔功豈可強名不  
貴多自古雄傑蓋世則那橫矛注槊月皎明河分  
香賣履氣淹沈疴而况所營塗鴉篆蝸放情脫略  
搔首婆娑五斗解醒其氣甫和一石徑醉撫案長  
哦幕天席地櫛風沐波俗累非嬰禮法不苛陶然  
適然道爲未頗

種蘭歌效東飛伯勞體

鷓鴣啼晴鳩喚雨春風草綠搖南浦誰家女兒愛



種蘭獨立瀟湘九畹間  
手把花枝不忍擲  
盈盈一水芬芳隔  
可憐春露湛明珠  
可憐花開人不如  
春殘露晞花未歇  
顏色明明照初月

壬子除夕侍外舅同諸公宴集分韻得陽字  
燈火千門接孟陽  
共看淑景啟春王  
辛盤賜出金莖露  
仙果擎來玉椀香  
更有新詩驚座上  
不勞繁管沸筵傍  
追隨彩袞申三祝  
曉漏還催捧玉牀

春日南苑大閱

嚴蹕平明下九天  
雲移萬騎出城邊  
旌旗暖拂春風轉  
綵仗晴臨曉日懸  
山近金鑾開積翠  
花明玉帳繞流泉  
緣知

聖主綢繆切爲頌車攻吉日篇

初夏豐臺觀芍藥遇雨

郊原烟靄斷芳叢  
尊酒攜來曲徑通  
消盡塵埃忘冀北  
欲將風物奪江東  
樹沾驟雨低迷綠  
花帶輕陰淺淡紅  
莫怯滂沱人早散  
便拚老却醉鄉中

二

雨後風光轉鬪妍  
憑欄一望更嫣然  
亭中遙挹千山翠  
樹面平鋪萬頃烟  
不分花前誰是主  
暫來林下醉差賢  
衣冠倒著從沾濕  
羸馬何妨緩著鞭

德州田太師母六十壽詩

毓質名門世澤深  
家聲珍重比南金  
文才雅擅閨



房秀圃範還垂女史箴作配梁鴻勤舉案姓名同  
入高賢傳旋賜紅綾宴曲江却紆紫綬來花縣半  
載循聲滿越州勞心早赴玉樓頭一官落拓風塵  
暗數口艱辛涕泗流盡室扶攜難就道清釐錢穀  
知尤要民間圖籍手親稽國帑錙銖躬自較贏得  
清貧感上官人欽智勇膽先寒并無廉石孤舟載  
剩有殘書數卷看間關千里家山隔脫驂助麥歸  
方得風前課讀杵聲愁花下乘輿淚痕濕韶華彈  
指六年餘晝荻丸熊志不虛玉樹堦前重繼武榮  
膺翟第耀門閭雙鳳聯翩得雲路荆花嘯詠全家  
具春燈秋卷下帷時盡是殷勤慈教處喜逢甲子

又重廻朋酒長筵向暖開鸞掖絲綸分寵命鳳池  
花柳映深杯樗材幸忝門牆侍欲捧霞觴愧無自  
盛德先將銀管書還看彤史芳徽記見說蓬萊青  
鳥過神芝更植祖洲多聊吟松柏南山句譜作高  
堂介壽歌

遊仙詩

并序

余偃蹇功名車塵馬足僕僕未已思欲藐  
焉輕舉恨骨體不靈變化無術聊擬爲遊  
仙詩十五首以寄懷雖身滯有方之內而  
心則游於無方之外矣昔漢武帝讀司馬  
大人賦飄飄有凌雲欲仙意予才愧相如



然酒後耳熱隨意取一篇吟覽亦可忘其  
身在塵埃中耳其爲仙也不旣多乎

日月空周復流光豈駐顏紅雲聚少室紫氣及函  
關萬里騎牛去千年化鶴還自應嗤漢武蓬島路  
何艱

二

稊米中州地闐風大海東調笙騎鶴背乘筏過鮫  
宮樓閣飄飄似仙靈裊裊同容顏常美好年紀入  
無窮

三

地假鼇頭力山餘蜃氣重日華騰焞焞水色激溶

溶遠使憑三鳥奇齡邁五龍靈芝共異草無處不  
葦茸

四

滄海奚堪蹈河源自可求乘槎緣漢轉脫舄入雲  
浮樂憶鈞天奏壺聞玉女投東王延石室應得恣  
遨遊

五

獨倚天門望翻深下土愁銅駝三市迥金秋五更  
幽渾沌幾回鑿滄桑屢握籌無因攝萬類共入太  
清游

六



夢日堂詩卷一  
天風吹萬里振策獨翛然道挾參同契書畱上下  
篇襄城遵七聖姑射會羣仙綽約離塵垢逍遙不  
記年

七

偶厭天庭住還來地上遊匿形依半壁策蓋向中  
流符與長房握桃容方朔偷騰身尋宵渺頃刻歷  
中州

八

挾術工靈變搜奇盡宵冥清風淪玉液白日啟金  
經壺裏藏三島餅中掩七星行遊遍六合斷竹漫  
畱形

九

神仙故可學幻術豈堪猜酒向人前割魚從席上  
迴還同大父射更抱小兒來雲氣茫茫遠騎驢去  
不回

十

天地終消毀三元任頡頏化生觀浩劫默坐想洪  
荒聞道隨軒后懸符待穆王音容還髣髴赤日素  
霓裳

十一

崑崙馳八駿浩渺入無雲握髓酬人飲吹笙送客  
聞衣垂雙鳳彩冠制九星文穢惡蠲除盡相攜上



紫氛

十二

瑤池觴客後無日不氤氲東主翔龍駕西王履豹  
文瓊居迴曉日仙液泛流雲更有丹山鳳啼鳴夜  
夜聞

十三

徐市蓬萊望扁舟去絕還桑麻栽日色男女足童  
顏大海藏身易洪流策石艱坑儒共謫戍禍不到  
三山

十四

黃白鑪堪守清虛道不肥昌容工染色木羽坐忘

機石煉須三轉丹成會七飛行看雞犬食雲裏弄  
清暉

十五

鶴髮年年在颶風夜夜狂吞流徙渤海揭日倚扶  
桑桂葉雲霞潤棗花雨露長仙游無不可隨處得  
昂藏

送人歸里

木落風高九月天鳳城秋老贈歸鞭哀鳴何處鴻  
初度怨別誰家笛可憐野店霜凝沙漠漠孤舟水  
冷月娟娟明朝應過桑乾渡回首京華隔暮烟

二



長安把臂正依依寂寞秋光又唱驪莫歎蛾眉終  
見妬羞將高髻學趨時寒雲狼藉迷鴻路衰草淒  
其送馬蹄君到江南逢驛使梅花好寄慰相思

上德州田夫子十六韻

山左文章自古推英靈鍾瑞獨吾師璘珣閥閱家  
聲舊清白風流世澤貽當代才名高綵筆幾年翰  
墨重丹墀鸞坡日暖催裁詔鳳閣花濃伴賦詩座  
右韋弦真不朽牀頭著述自堪垂蕭疎官舍唯書  
卷寂寞閒庭類隱居不厭清貧存直道肯同競進  
學逢時揮豪梧掖恒多暇較士秋闈獨不私玉尺  
持衡懸藻鑒冰壺勵節映丰姿竊慙草莽菰蒲質

叨附門牆桃李枝席上訓辭長疊疊樽前慰藉復  
孜孜憐才止乏同心侶見黜寧忘一日知幸值華  
堂歌介壽欣持朋酒獻瑤池榴花爛漫紅侵几柏  
樹陰濃碧映卮縹緲鳳笙圍帳低迷象板唱青  
詞感恩倍切彌觴志願頌岡陵比祝釐

送王成博南歸

萍跡相逢已兩霜姓名真愧說行藏浮雲世態濃  
偏險似水交情淡自長話到深衷忘夜永別當失  
意倍神傷最憐客館驪歌發錯認燕臺作故鄉

二

書劍同君賦北遊今君歸去我還畱愁中惜別常



思雨醉裏悲歌不爲秋吳水潮平人倚棹燕山月  
滿客登樓料應後會還過此莫對西風歎敝裘

三

十載聲華動帝州雄文麗句孰堪儔徵歌紅袞低  
銀燭泥飲朱樓繫紫驕任誕從人嗤傲世數奇那  
敢必封侯多才自古還多恨滿目雲山入望悠

四

屋梁落月白於霜送客逢秋黯自傷然諾由來推  
季布風流誰不識王昌青門共酌離筵酒雒下爭  
傳贈別章多少舊交看紫綬遲君襍被返江鄉

裘大文招集城西祖園觀荷

出郭舒遐矚招攜得一邱軟沙經雨潤密樹鎖風  
悠地勝形骸曠天空眺望周名園依曲徑小閣俯  
清流愛客移尊遠談心載酒稠華筵開錦繡綺席  
列珍羞仙果金爲椀瓊漿玉作甌穿簾藏乳燕翻  
藻起輕鷗柳浪當窗靜荷香隔檻浮葡萄縈架滿  
薜荔繞牆抽夾岸深陰合平橋宿霧收松聲度水  
細漁唱過溪幽低亞花欹石參差樹映樓緣堤一  
釣叟環沼幾蓮舟更有繁華子羣來爛漫遊明璫  
飾劍珮錦障照驪驪林外俄飛彈堤邊競繫毬香  
車攜趙女寶帶拂吳鉤粉頰光搖渚紅裙色奪榴  
舞翻金屈膝曲罷錦纏頭佳麗雖堪羨清狂得自



由莓苔隨意坐藤屋好長畱據地思何壯飛觴興  
未休臬廬移坐次酬酢雜觥籌高會非逃暑良辰  
乍入秋棲禽喧茂澤暮靄卷潭湫古道斜曛晚遙  
山翠黛愁塵埃何日棄泉石孰爲儔便欲忘歸去  
翻令觸緒憂儻能終避此與世復何求

贈吳維申中翰

忠孝流芳騎省家仲容今復繼聲華閤門舊事司  
呈奏禁近新銜號判花吟罷詩篇春草麗傳來書  
法朶雲誇鳳池占得真堪羨從古才人領詔麻

南歸過黃河有感

黃河流水疾如矢頃刻奔回數千里有時狂風拂

地來洪濤巨浪粘天起修堤築口走丁夫官司日  
夕迫迫呼百萬金錢填溝壑誰爲永久建良謨前  
年過此今又歸孤舟飄泊欲何依四野無人沙漠  
漠滿目唯見黃塵飛旅夜青燈魂惻惻回首關河  
淚霑臆非有乘風破浪才胡爲枉費驅馳力憶從  
幼齡賦壯遊書劍頻年向帝州十載三獻荆山玉  
不于風塵未肯休楊雄文藻無人薦知交又乏金  
張援誰能抱策叫天聞放黜歸來嗟鰲面聞道鄉  
關復苦兵夢回中夜客心驚廟堂孰進匡時策頓  
使遐方息戰爭吁嗟乎男兒意氣凌宇宙豈肯偃  
蹇居人後不如投筆事從戎會見匣裏蛟龍吼君



不見河水奔流不復還紅顏白髮須臾間人生富貴當及早此日青春不可攀

燕

歸時秋八月來及百花明銜食兼風度尋巢繞戶鳴高襟存祀典少皞識官名挾子翻飛後呢喃話客程

南歸畱別田夫子

荏苒三年侍杏壇客中節物又辛盤最懷張禹師資切自歎虞翻骨相寒報乏隋珠銜豈易質非楚玉獻應難絳帷咫尺連閭闔珍重平生立雪看

二

奚囊襆被久飄零深幸龍門忝執經顧影每憐舌尚在感恩獨記眼偏青心依衛水縈如帶夢落燕山倚若屏欲慰吾師無別語問奇還到子雲亭

出都感懷

蕭然策蹇踏春芳歸去非關戀故鄉浪跡已甘長作客還家無計慰高堂十年書劍霑新淚一路風塵識舊裝回首京華何限恨暮雲落日思蒼涼

二

荻簾土銼怯春寒不寐披衣坐夜闌濁酒難消千斛恨殘書猶剩一編看荒雞催舞空驚聽野馬知途已力殫莫道天涯歸去好此身容易到長安



留別王成博

月滿天街笑語清  
論交久見古人情  
雞壇自昔推才藻  
鳳閣今應屬老成  
策馬江城隨落雁  
鳴騶上苑聽啼鶯  
他年何處重相晤  
還對芳尊話五更

春園漫興示同學

林花乍欲放  
林鳥漸知鳴  
澹爾欣時變  
悠然悟物情  
花開容樹樹  
鳥和亦聲聲  
念我同心者  
能忘策厲并

靜觀

靜觀萬象表  
吾道試端倪  
蛛向虛簷織  
蟬依綠蔭啼  
風連滄海外  
雲捲夕陽西  
一笑將何事  
忘懷與

物齊

蟬

細簟疎簾接晚涼  
蟬聲何處度垂楊  
栖烟吸露藏偏穩  
帶月迎風韻自長  
爭逐不隨蜂蝶侶  
清高時伴芰荷香  
披襟我亦忘機者  
靜聽何須讀老莊

二

歸鳥栖林寂不喧  
芙蓉塘外數聲蟬  
淒清不減湘靈瑟  
斷續還同蜀國弦  
竹爲風多頻助響  
苔因雨洗穰幽眠  
高懷未許他人識  
獨對疎星詠晚天

咏並頭蓮

芙蓉一種號嘉蓮  
名字多情已可憐  
未展含英同



繡被徐開嫩蕊並香肩低垂映水羞雙照倚醉搖  
風喜共妍天若有情應護惜莫教冷露濕幽眠

二

婀娜凌波鬪晚粧清芬徐引到蓮房雙頭挹露紅  
英重一榦迎風翠帶長草號相思空怨別花傳夜  
合未聞香移根若在深宮裏多少蛾眉淚染裳

三

多情身似蕊宮仙謫向人間作瑞蓮玉井漫誇花  
十丈沙瀾空羨實千年一莖引綠凌風舉兩頰分  
紅助粉妍若令涉江遊女見權歌應唱想夫憐

寒夜小飲口占

兩行旗鼓正相當酒海花枝傍笛牀風雪填門無  
箇事從他失日也何妨

二

喧喧糺酒間清謳百罰頻催濕臂鞢卻笑獨醒餘  
小戶猶能堅坐記觥籌

登樓望雪

一夜風威勁登樓望若何幽蘭分雅曲黃竹共悲  
歌銀海千泓渺瓊花萬樹多同雲封遠照寒影遍  
山河

瓶中早梅一枝

折得東風第一枝攜來小几任斜欹忽疑水驛春



前路空憶山家雪滿時  
漠漠冷香清俗夢離離疎  
影伴題詩閒窗聽雨愁  
零落畱取銅鉸護玉姿

友人以詩見貽次韻答贈

作者還今昔江河日向東  
文名輕蛺蝶賦體薄雕蟲  
有意從先進誰堪表大風  
糟醨知未醒賴爾起羣蒙

詠蘭

空谷標寒秀清風拂素襟  
幽人當獨寐芳草有同心  
嶺月迴高照溪雲泛夕陰  
浸淫名利客軌轍莫相尋

梅花

素衣縞袂出塵姿冰雪爲魂玉作肌  
夢到瑤臺仙路杳客逢江店故園思  
嫩寒薄暝疎鐘夜淡月微雲斷角時  
寂莫閉門春似海春愁盡在最南枝

蝴蝶花

石罅牆垣草帶長枝枝撲粉不尋芳  
絕非輕薄還嗤魏好共蹁躑欲夢莊  
戢影更愁沾雨重倦飛只恨舞風狂  
一羣繞砌閒如許惹得晴蜂更幾行

景州旅店和徐健菴夫子題壁原韻

冒暑旋來北衝寒昨始南雄心畱草  
舍鄉思落江潭得失應先定牢愁只  
自諳題詩存土堊恍聽子雲談



二  
有心空冀北無夢到江南殘月籠深樹疎星散小  
潭路近憂偏遠途荒味久諳遙瞻丹闕迥抵掌莫  
輕談

商家霖早行口占

催行頻問夜欹枕未成眠野渡迷朝霧荒村逗曉  
烟荷鋤羣趁早策蹇漫爭先咫尺蓬瀛近紅霞隔  
九天

雪後黑龍潭讌集和陸予敬韻

暖雪初融潤軟沙招攜聯騎踏瓊花凝暉遙挹西  
山爽落照橫分北闕霞虬榦蒼松能隱鶴龍湫碧

宇但栖鴉城頭霧散春歸早曙色晴含百萬家

二

境僻乍疑塵世遠興豪非是客心閒望中咫尺逃  
雙闕醉裏家鄉隔萬山洞口波澄烟縹緲齋壇雲  
擁氣斑斕暫將倦眼憑高放莫笑籃輿倒載還

立春夜聲求寓齋觀燈讌集分韻得陽字

芳飈拂坐肇初陽送臘筵開燭萬行月散華燈低  
度影春浮彩障暗生香探鉤促席金尊換擊鉢分  
題玉漏長客裏頻驚佳節改乍疑歡賞到家鄉

歸途感懷

春遲二月尚寒衣僕馬蕭然賦遠歸隴畔微霜凝



愛日堂詩卷一  
細草嶺頭殘雪帶朝暉重來渡口知岐路舊宿村  
家識短屏少小馳驅今十載朱顏潦到寸心違

過蒙陰

東蒙山下十經過澗水依然繞曲阿草店漫勞供  
糗秣荒城何處問弦歌崎嶇歷慣經心少伴侶同  
歸失意多二月江南春正好紅塵何事負烟蘿

題紅花鋪旅舍北上時曾宿此

來時憶昨正炎天草舍披襟白日眠重過兒童猶  
識面相看僕馬豈如前春回夾道將舒柳水漲平  
溪好放船倦羽不堪重拂拭璩璫飛去此盤旋

過宿遷

狂瀾遷徙忽西東一望蒼茫目未窮樹杪乍浮隄  
影外人烟半冷水聲中無家野老栖荒草荷畚官  
夫泣曉風見說河臣謀永奠巨靈應此佐神工

楚霸王

五年成霸業百戰想雄名烈火秦中樹歸心江外  
城繡衣仍故里縞素逐東兵陸海還天府詞臣頌  
漢京

羽得關中分之三降王以  
爲漢資失策莫過於此

韓淮陰

跨下登壇拜雷行掃疾風重瞳因自刎隆準遂成  
功一飯懷漂母三分謝蒯通何當高鳥盡不獨怨  
藏弓



二

部署專征後多多益擅長漢家已業帝齊地失封

王絳灌還同列黥彭亦後亡須知禍倚伏終始一

張良

捐關東地子房計餌三人亦族三人之機阱也

枕上聞泉聲

雨過溪流急緣堦更繞城潺潺驅客夢午夜一心

清

北窗倦卧

病暑貪高枕荷香過北窗問誰排闥至蝶舞自雙雙

投竿

適有投竿慕非關志在魚無如貪得餌失水更憐渠

哭謝侯弟

否泰無定形事變非所意差池兩月前棘闥影相比似先馬齒長倖捷偶得利汝亦意欣然不嫌已垂翅歸來曾幾時二豎遽爲祟哽咽別尊親悲聲溢姜被恩深命不永訣絕目猶視痛哉俯仰間福輕禍何熾

二

吾父艱得子中年育微躬自後雁行輩聯翩獲四雄予爾實肩隨嬉戲必相從叔季雖異母誼均愛



亦同雛伏雙親側庶以慰深衷荆花紛照映墳簞  
氣融融此樂寧有極歿折遽爾蒙如何孝友業不  
得諧始終

三

弱齡就外傳伊唔共晨夕有字向予問有疑待予  
釋叔也猶鱗次授受同一席不畏繩督嚴得閒羣  
作劇偏強氣軒昂等輩間辟易虎子隨地走生驥  
未伏軛豈若乃兄愚繩趨步咫尺跳擲總角年回  
憶摧胸膈

四

門庭昔構難百端逢肆兀破家尚欲殺遠避向京

闕予汝方髫鬣漂搖風雨厄老父勉提攜翼卵心  
力竭往復萬里遙寒暑屢衝突江檣颶風舉山橋  
冰雪沒負笈肆成均擔簦反林樾共爾足艱辛死  
爾痛徹骨

五

緬維予何能汝有丈夫概一往自無前直氣罕與  
對非以鰥寡侮不因強禦退顧盼足肆應折節頗  
知愛疎財兼好義性行鮮蕪穢藝事類能工聲伎  
亦時佩好友杯盤間佳辰花月內勝事汝能爲歡  
情今不再

六



愛日堂詩卷一  
結襁未再期好合正宜家庶幾諧老願百年詎有  
涯云何一朝乖血淚迸交加生兒甫鬢髮啼聲雜  
呱呱顧此孤嫠痛成立事悠遐死者竟已矣生何  
爲情耶念之更茫然端緒殊紛拏遂令白髮親瘦  
影日槎枒

七

古云立孤難遐遠非一日所以義俠士兢兢未敢  
必伊子實寡昧心諾敢不卒彼此寧有間始終視  
如一愛之慮生驕嚴之懼致疾不嚴不愛間隨方  
教無失力學道其源能文相其質亦冀勉薄躬無  
忘所表率

八

生子望有成顯揚名不朽不則了家事詩禮還世  
守尋常父母懷此亦豈爲忸世德自高曾亭毒况  
已久爰及祖與父善嗜惡否否砥志直道行不爲  
習俗徇汝亦矢兢兢天意真難剖運極必終反遙  
遙待汝後



愛日堂詩卷二

敝帚集二

戊午巳未庚申

戊午京邸除夕

柏葉椒盤逼歲新燕臺兩度未歸人

丁巳亦於都門度歲

依尺五羈愁少

除夕宴外舅廣平公寓親知並集忘其爲客也

話到更殘

客思眞酒瀉銀缸良夜醉寒消旅舍隔年春老親

少弟團圞處遊子何堪入夢頻

二

人世蜉蝣敢問天傷心弟妹一潸然

余丁巳秋喪一妹戊午秋

復喪一弟

池塘夢斷添新淚柳絮吟殘憶並肩生死俄

分驚歲月年華惜換坐流連回思往事情懷惡辜



愛日堂詩卷二  
負春風入雒年

三

非關游俠誤平生少小空羸蕩子名醉逐酒人翻  
博局狂從劍客聽鳴箏燭因坐久花頻落詩爲愁  
多句不成慙愧青袍隨上計曾無詞賦比金聲

四

聖

主憂民議息兵傳柑曲奏凱歌聲將軍闔外橐弓  
卧子弟朝中拜節行才拙不須愁棘路時清還喜  
重儒生只今海內徵車集片檄俄看下蜀城

送吳大馮歸松陵

相逢忽漫起離愁對酒何須歎敝裘三獻誰憐和

氏玉五年空倚仲宣樓梅花驛路應停馬柳色江  
城好繫舟羸得劉蕡名早著臨軒他日爲君收

二

春風惜別欲悲秋一曲驪歌脫蒯緱姓氏暫隨高  
士隱歸裝不爲故人畱笑他絳灌羞爲伍肯踞鄒  
枚最上頭櫻筍初肥春釀熟扁舟且作五湖游

蝶

風飄芳樹裏花氣遠相聞佛助輕堪比蒙莊夢不  
分亦知肌撲粉漫儼翼垂雲蜂蠆何愁毒踣躔不  
亂羣

王咸中石鵑山房



避世應知入世難故園招隱且垂竿人貪野老機  
關少地愛深山出處寬飛瀑千峰歛枕聽澄湖萬  
頃撥簾看林泉不爲逃名計但得身閒到處安

二

新開別墅踞湖山靜鎖蒼苔白晝閒繞徑古梅數  
十樹枕溪小屋兩三間種花偏耐凌晨起採藥時  
逢薄暮還更喜歸來山閣近招攜踏月扣柴關

山閣汪鈍翁齋名

三

萬疊青山畫裏看當階流水更潺湲風經絕巘回  
茅屋月渡深潭護藥欄策杖閒吟清石骨倚崖長

嘯入雲端隔隣禪侶時相過日落溪橋幕影寒

四

烏衣門第孰如君不愛青雲愛白雲潑研山光臨  
裊帖縈窗茶氣讀移文園蔬新剪堪供客桑柘初  
栽恰掩門歸去扁舟深過訪秋山紅樹醉斜曛

和惠蔚廬韻贈陸子載

青門又見柳初肥來卻逡巡去似飛三度相逢猶  
席帽何當結伴好同歸

二

珥筆晨趨到集賢五年心事最堪憐歸家不爲無  
官去進退從容只釣船



三

不須世外問長生但得仙緣道便成海上三山應  
有路且從子晉學吹笙

四

升沈閱盡乞閒身蹤跡無妨暫隱淪多少交遊京  
雒滿薦雄文似待何人

送顧尼備南歸壽母

敢於

聖世傲樵漁將母情深暫隱居卻愧懷金能捧檄不  
貪微祿負牽裾酒翻彩袖親供饌花覆春衫自擁  
輿多少宦遊歸未得較量出處竟何如

五日齊河道中遇雨

征途令節雨偏侵策馬衝泥思不禁屋角葵花紅  
照眼籬旁蒲草綠驚心燎衣便向壚邊醉失路羞  
爲隴上吟千載湘靈猶有恨無媒應自悔懷琛

蒙陰早發

心冷偏愁熱催行欲曉天一村雞喚曙數樹鳥驚  
眠溪漲喧爭渡山荒怯整鞭淒涼古巖色落落地  
晨烟

過友人邨居

雅俗將何辨忘懷入自然書藏塵榻後客過板橋  
邊綠蔭多周屋河流故繞田閒來無一事得句立



風前

新柳

青門憶昨送歸人又見長條拂水新抽盡人間何  
限恨逗殘天上一分春生來蕩漾元無力占得風  
光別有神張緒當年憔悴易任君攀折莫教頻

晚梅

玉臺春寂笛聲哀畱得殘枝獨後開不是幽人尋  
豈到故應寒谷煖方回春穠桃樹從他占月映梨  
花任客猜車馬城南爭逐豔晚香誰解一徘徊

杏花

聞道午橋誇碎錦每從野店挹芳姿色經雨白村

容改塵輾香紅路影移馬過繁條隨意穩燕尋舊  
壘入林疑曲江萬樹空搖曳不及多情陌上枝

桃花

誰向花蹊剪絳綃輕翻錦浪暈紅潮洞邊迷却仙  
人棹苑裏曾添妃子嬌抹雨拖烟愁欲絕窺牆映  
水解相邀最憐片片隨人舞不逐東風過小橋

清明曲

著處新烟拂曙輕遊人芳草正清明半春卧度鶯  
花月令節欣逢物候晴挈伴閒行出城郭卻驚風  
景殊非昨北里南隣靜少人天桃烟柳都蕭索行  
過深村憩草廬惟聞野老泣荒墟向前借問未敢



說逡巡欲訴更歛歛爲言比歲遭荒旱經春三月  
晨炊斷屋畔柔桑葉未舒滿地追呼刻不緩縣符  
如雷吏如虎露肘捉頭羅拜俯并無冷食餉官差  
那得青蚨贖鞭苦社穀盈倉飽吏胥賑荒重複斂  
州間無錢難入饑民冊寧死休逢長吏車塚墓纍  
纍郭門前拜掃無人飄紙錢鷓鴣自鳴春水渡棠  
梨空發白楊邊兒啼婦哭聲徒悵誰恤流離悲瑣  
尾忍餓那能更浴蠶老農轉盼爲新鬼我聞此語  
不勝憂強向村夫爲解愁藜藿暫延須旦夕會看  
麥隴早移秋况復

聖朝威德普東南指日休聲鼓檄書昨已定川秦滇

黔瞬息魚游釜

九重宵旰軫民依恩綸佇看下丹墀澄清酷吏聞風  
去豐年還及太平時重見清明景象新含哺行樂  
趁芳辰桑田夜灑千村雨榆火晨開萬井春鬪草  
兒童爭撲蝶踏青婦女春衫濕蹋鞠羣喧古道傍  
鞦韆小映垂楊出畱得香餚和杏酪家家戶戶相  
酬酢鬪雞錦袖廣場譁走馬香毬行處落說到繁  
華重黯然人事天時日轉旋且喜今朝風日好豫  
欣秋雨足耕田閒殺韶光讓農叟人生富貴復何  
有力田會有逢年時花前且醉醪醪酒

初霽



夢見言卷二  
歲占欣得雨春事喜新晴細溜通花徑繁枝亂鳥  
聲飼蠶忙小婦賽社走蚩氓試著春衣好尋芳遶  
舍行

上巳

暮節韶光改猶傳晉永和無筵開曲水有柳蘸晴  
波俗病禳難去春愁袞愈多祇應偕少長泥飲復  
狂歌

得惠蔚廬都門書并見懷四律率爾和答

閉戶蕭閒午睡餘忽傳天外到雙魚幽棲久已辭  
聞達良友何煩慰索居短札殷勤勞遠意新詩珍  
重足相於知予怕說京華事只問生涯幾卷書

二

一春風雨對寒釭猶喜消磨氣未降趁雨移花低  
傍牖侵晨讀易早臨窗相憐驥櫪壺空缺漫道龍  
文筆可扛花發慈恩詩句好遠勞清夢落吳江

三

客情真悔世情疎翻羨蓬門百不如勸我無須愁  
短褐嗟君底事曳長裾舊交車笠應非昔故里鶯  
花樂有餘最是冥鴻偏得路莫將才調壓應徐

四

人間到處有蓬瀛總領烟霞位未輕看破畏途真  
欲隱苦緣薄俗強求名鹿門只恐眠難穩谷口從



茲夢不驚遲爾歸來春事晚漁磯柳浪正藏鶯

武原張子由爲予畫乘風破浪圖率筆奉贈  
回首經游處側身圖畫中棘途真是浪萍跡歎如  
蓬崑石形嫌穢烟波興畧同嗟君意良厚倦翮已  
矰矰

端午卽事

五日長爲客裏身翻驚景物故園新槐陰轉午清  
湘簟梅雨當窗潤草茵菰黍相遺餘舊俗朱符競  
貼應芳辰那堪蒲酒依然綠兄弟傳觴少一人

二

葛衣新試角巾偏紫槿紅榴照眼前詞客詩畱千

載恨內家花競五時鮮越巫不信能驅惡楚俗何  
緣只學仙且喜繭絲堪續命無須綵縷繫延年

三月十八日

萬壽節甘露降於安國寺暨縣治前柏樹三日許西

山明府屬賦恭紀三首

瞳矐佳氣日邊來榮露初凝拜舞回霜幹乍疑珠  
綴葉虬枝爭訝玉爲苔偏隅何幸霑仁澤授筆空  
慚作賦才願挹神漿浮寶甕雙鳧遙進萬年杯

二

聖朝膏澤徧耆英天乳流精叶玉衡曉氣澄鮮蒼色  
潤晚霞煥彩寶花瑩官衙紀瑞歸神宰梵刹呈祥



頌太平感召由來關至德柏梁何用擢金莖

三

嵩呼萬國共茲辰偏幸靈脂降海濱天以昌時不  
愛道地逢仙令有殊珍漫誇虎渡寧爲異總說鸞  
棲未是神記取庥徵畱古柏甘棠千載頌聲新

又排律十四韻

海角旁敷地春陽美豫時劬勞廻

帝

眷宴會卻彤墀不數華封祝能無金鑒思宸居遠  
亦拱壽域普何私分土民無外輸忠願不遲嵩呼  
大慶節瑞應後凋姿沆瀣疑仙掌璿璣想舜儀珠  
聯淨土樹花綴訟庭枝三日流膏澍一時蘇病黎

政成下邑久老得上尊遺日靄舒能照波恬近欲  
窺早知六轡謹遠副萬方期拜舞元如許嘉祥又  
若斯敢忘泥首頌併入慶雲詩

贈徐他山

生綃點染到瀟湘藝苑騷情獨擅塲耻向朱門誇  
上客閒將黛筆教蕭娘當風放葉空岳暖著意添  
花小砌香且把知音託紅粉莫因搖落怨秋霜

長至後大雪浹旬辰山巨高兩弟賦詩見示

率爾奉和

五更曙色滿庭隅密雪無聲著意鋪衰草已甘隨  
處沒危枝終不倩人扶花開頃刻看愁落閣爲高



寒坐賞孤愛殺清光堪照讀一甌新茗撥殘爐

二

低罩凍雲畱不住斜侵旭日暗相欺掃殘碎玉姿  
仍潔畫盡寒灰候已遲詩律漸荒嗟學退酒杯無  
分任人嗤相看又逐年華去過眼青春可得追

雪霽

霽雪澄鮮萬象佳光搖銀海眩空齋爭喧鳥啄枝  
頭玉含凍簷垂燕子釵陌上晴泥初沒屐庭前細  
草欲生芰烘窗日暖冰消研矮紙斜行足騁懷

立春夜

臘鼓聲中早報春高燒樺燭待芳辰綵幡入手飛

雙燕紅縷堆盤薦五辛鴛瓦雪銷俄作雨獸爐香  
煖暗生塵簾前月色明如晝又見年光點綴新

二

東皇向曉迎佳節窮律今宵送舊愁待鬪名花移  
檻內先分春色上釵頭重幃護煖條風淺小院深  
陰淑氣浮只有陽和披拂徧已看景物動南疇

柏

挺然餘獨秀寒暑豈分明樑棟空畱望山林自得  
榮竹承帝女淚松有大夫名似爾渾難定風柯雲  
外聲

梅



愛日堂詩卷二  
蒼龍幾日駕報歲識王正覆額能無意調羹故有  
名花疎應樹老香遠覺風清可是春林雪爭陽不  
避晴

長門怨

金屋憑君許曾聞寵阿嬌容顏非異昔形影獨終  
宵望遠君王貴恩深儲嗣遙那能全不省翻恨妾  
心驕武帝以配大長公主女得立  
爲嗣長門譴斥真爲負恩矣

婕妤怨

同輦曾辭寵離居敢負恩怨誹元不有忠眷復誰  
論細雨閒宮館淒風到寢園獨憐團扇妾何處問  
皇孫班妃賢而見棄疑歎心事故宜爾  
爾一作妬寵戀恩語便非其質矣

雨中梅花

春林盡日雨花氣濕氤氲一樹寒餘瘦孤標淡不  
羣宓妃纔出水神女漫隨雲小閣清風轉悠然何  
處芬

水仙花

嫩比庭萱臭若蘭幾枝玉豔碧團欒江臯神女珠  
偏隨湘浦靈妃淚未殘蕩滌塵埃沾薄潤破除凡  
俗弄輕寒芳姿不少珊珊佩信否凌波與駕鸞

蠅

驅除吾亦得飛動爾何能聊可營藩棘奚堪掛弋  
繒薰風容雜沓秋氣失憑陵形影知消滅天寒十



月冰

螢

照入晨烏渺明同夜魄來時能點几案間復守蒿  
菜篋裏珠偏隋毬中火乍開清輝如可借展卷共  
徘徊

上田夫子時視學江南

聖朝文教普南躔慎簡持衡眷獨專題柱明光推重  
望除官

御筆特親傳

夫子視學之命出自  
特簡不由銓曹除擬

青縑赤管清風舊

玉尺冰壺映日懸無限幽沈盡迴首一時遭遇至  
公年

二

閩外初傳奏凱歌泮池新沐舊恩波

此番科試仍  
復十五名舊

額何當盛世崇儒日更遇宗工秉鑒過德潤山川

成物色文干斗象列森羅洪鑪鑄盡東南美不羨  
宣公得士多

三

大雅於今久不親先生獨爲破埃塵長蛾廣袖從  
時好流水高山賞絕倫一代文章歸橐籥百年理  
學荷陶甄懸知太史占星處斗分年來氣象新

四

遙傳鳳舉下長安襍被蕭蕭似冷官禮樂南州新



建節詩文東國舊登壇風清幕府雙旌肅只照長  
江萬象寒只爲憐才親較閱景陽鐘報五更殘

五

絳幃晴對絳巖開選勝還招鄴下才幕裏賓僚趨  
屈宋席前弟子侍鄒枚新亭弔古時分韻舊苑看  
花數舉杯他日承明奏最後好將詞賦獻新裁

六

薊門秋月共春風幾度臨岐意轉隆慚荷品題追  
几杖喜分雨露近併幃桃蹊共羨遷鶯近朱戶誰  
憐歸燕窮最是恩深酬未得強將搖落伴芳叢

元正謁田夫子於句曲署中畱飲賦謝

條風飴蕩韶光鮮家喧市寂慶新年匆匆倣裝何  
所適短裘襜被衝晴烟水漲吳江倚孤檝日斜山  
徑拂輕鞭擔簦來謁扶風帳戟門晝靜殊暄妍樞  
衣再拜春風裏簷禽上下相飛旋殷勤欸曲情何  
摯攜手深入槐堂偏案帙從容人肅穆軒楹窈窕  
樹鉤連爲言較閱心良苦欲挽頽波障百川不信  
人才虛大地時無子期徒棄捐閒出奇文共欣賞  
拍案快讀連百篇變化雲霞生夏岫縱橫奔瀉迸  
春泉須臾開樽召賓從官廚供饌羅華筵風雅續  
紛疎禮節狂呼浮白無拘攣畫卷棋枰消絳蠟酒  
酣脫帽思騰騫笑語侯芭老弟子人生巧拙總由



天丈夫貧賤分定耳奔蹄走轂漫爭先讀書要當  
窮二酉飾名釣采耻並肩致身青雲會有時暫栖  
谷口學種田文章豈屑逢人炫寧使畱藏太華巔  
俛首受教長歎息何名何實重惘然鈴閣寂寥漏  
聲絕燈青燭燼明星懸來朝別去空惆悵絳幃縹  
緲暮雲邊

西子

妙絕吳宮豔恩深范大夫鴟夷空抉眼烏喙遂雄  
圖

二

自古傾人國憑誰識禍機教成歌舞去直待沼吳

歸

三

父死仇能報何難更始終立庭呼未遠響屨步偏  
工

詠梅花次少陵秋興八首韻

春入條風雪滿林靜粧幽韻足蕭森寒凝庭院標  
清豔日落溪山淡夕陰照眼還嗤敷粉陋成詩具  
見出塵心亦知笛怨聲淒切錯認江城聽搗砧

二

一樹盤空覆影斜陡驚陋巷逼瑤華蕊繁爭似西  
王勝幹老如同上漢槎寡和重翻春後曲思歸空



愛日堂詩卷二  
憶月中筵朝來辨得分明甚不斷寒香五出花

三

枝頭帶月淨輝輝靜倚遙山映翠微疎淡星畱幾  
點在和鳴鵲作一羣飛看來墨客爭知妙臥足高  
人願不違一笑天真真絕異世間大半失癡肥

四

突兀庭前一小山藐姑仙子絕人間香迴客夢宜  
呼酒照入蓬屏莫上關豈少芳姿無勁質更堪俗  
豔有羞顏若將此後花如織只恐塵凡未足班

五

一杯清茗坐彈棋寧必相逢客路悲花好頓縈塵

外想春迴最愛月明時輪他雪影枝偏重待得蜂  
喧節又遲閒卻空山無個伴撩人詩句有餘思

六

花栽已得十年功錯落橫斜曲徑中澹爾寒輝迴  
夕照悠然清韻動微風孤根老幹經霜碧別種新  
枝暈酒紅標格不殊顏色異商山醉否白頭翁

七

鄰窺宋玉隔牆頭絕似寒蟾淡素秋香並椒花移  
舊臘尊陪柏葉解新愁乍驚學舞翻清鶴豈爲忘  
機狎素鷗是處粗堪成一賞不教庾嶺擅南州

八



學士堂詩卷二  
五  
挈伴尋芳興不遲  
槎枒間有列清陂  
藏雲鳥踏山  
邊樹病雪風低  
水面枝花滿  
羅衣攀欲盡  
香清蠟  
屐賞能移春林  
一別空回首  
岼柳微黃細  
縷垂

支硎道中

恐礙春光好  
輜輶不隱簾  
緣溪驚影隨  
度嶺任衣  
褰小婢攀藤  
黠嬌娘擁  
袂偏山腰  
風太急  
裙縐可  
畱仙

二

巧拭斜紅靨  
平分倒暈眉  
避人蟬雀薄  
穿樹鬢鴉  
欹閣峻將登  
怯橋迴欲過  
遲芳塵不到  
處笑語隔  
林知

三

妙相莊嚴地  
虔登白玉墀  
逢僧惟膜拜  
禮佛亦心  
思供養辭條  
脫修齋解臂  
支人前唯默  
禱猶恐侍  
兒知

四

倩人扶不得  
獨立逞妖嬈  
寶屨飛頭窄  
宮粧鬧掃  
嬌落花縈繡  
縠香汗濕紅  
綃芳草應堪  
藉無須步  
折腰

五

倚風疑欲上  
流盼若爲情  
香迹畱塵淺  
釵茸著地  
輕似應憐叔  
寶故意笑然  
明歸去愁奔  
月空餘漢



佩珩

垂釣

幽偏最喜絕埃塵凝睇斜欄曲水濱若使六鼇容  
易得垂綸豈肯讓閒人

二

人爲貪多寧惜餌魚因馴狎不疑鉤若將人意猜  
魚意塵網浮漚總未休

三

只疑淺水難藏影豈識深淵更有機隔岸鳴蟬真  
得計不愁繒嫩嘒斜暉

無題

宿醒殢粉未全銷強起臨粧態更嬌巧畫雙蛾千  
度拭輕攏鬆鬢百般描花光入鏡搖釵燄曙色窺  
窗暈臉潮莫訝蘭閨春事早衣香扇月暗相招

園居偶成

無端驚剝啄分破一窗眠豈合勞軒蓋知應索酒  
錢野花封徑曲山鳥護苔鮮僕病同余懶朦朧足  
不前

凌霄花

不識孤藤發異葩殷紅的爍赤城霞可憐枉負凌  
霄號漫倚婆娑一樹斜

二



朱萼偏迎旭日開  
杜鵑榴火莫相猜  
傷心不及閒  
花草得拂珠簾上玉臺

愛日堂詩卷三

敝帚集三 辛酉壬戌

初夏園居積雨

靜處偏宜雨  
松扉閉不敲  
氣蒸魚逆水  
晝暗燕歸巢  
漏隙懸簷補  
低簷任網交  
忘機垂釣叟  
一笠坐塘坳

二

喜涼從雨釀  
畏濕厭雲癡  
蛙吹真無謂  
蚊雷亦太奇  
竹鞭穿屋嫩  
苔蘚上階滋  
嬾任衣冠廢  
林泉誤壯時

三



水檻枕池隅波平齧舄孤芡盤沈碧玉荷柄瀉明珠壓徑烟梢合欹籬霧蔓紆溪毛清可擷晚供足充廚

四

雨聲聽不歇餘響雜銅餅短榻流雲潤薰爐一簞馨蟻羣穿樹腹蝸篆遶窗櫺蠟屐無勞著開簾好放船

早行

參旗將轉露華鮮畏暑宵征獨倚舷白板漁標殘月裏青扉村舍曉烟邊交加樹影緣橋合蕩漾萍花拂棹圓只有農家勤作苦晨炊未動早耕田

贈富陽令錢方來

十載才華重帝州雷封初試展風流不妨案牘勞裴榻豈必琴尊讓庾樓夾舥江花開錦障窺簾山鳥學清謳放衙晝靜攤書卷門外濤聲帶雨秋

二

記得京華共酒卮圍爐剪燭雪深時多君墨綬能分蔭愧我青袍負舊知叢桂故園空作賦雙松小隱好題詩稚川丹竈今何在應笑仙翁藥轉遲

雨

城晚雲深覆薜蘿殷雷閃電欲翻河客愁舊雨同今雨世事千波復萬波一枕游仙來霧帳扁舟招



隱寄烟蓑夷猶杜若洲邊意底事當風喚奈何

秋海棠五首

結綺臨春瑤草荒江南無地不心傷更堪豔舞隨風散畱得輕盈占海棠

二

花花葉葉正相當紅袖翩反翡翠裳曾向玉階誇獨立又隨秋露泣寒螿

三

芙蓉浪喚拒霜花尚有瓊枝裊露華夜夜月明君不見東牆那得比西家

四

嬌分顏色淺深中脉脉情牽裊裊風腸斷勿因遺下體上林玉樹本青蔥

五

胭脂著雨復垂絲爛漫春情又一時多少東風吹折盡猶煩珍重九秋期

古意四首

綠苔如錦草芊綿閣迴廊深漠漠烟尚覺輕寒來月幌微聞香氣度風筵露桃自傍銀牀冷熏鴨虛籠翠被眠愁絕斑騅曾繫處豔陽一曲損湘絃

右春夜

雲母屏疎受月深曲瓊不卷夜沈沈藕莖寸折絲



難絕蠟炬風多淚欲淋羅幕悄疑波蕩漾鸞綃薄  
畏露陰森莫將團扇輕拋擲愁入新秋更不禁

右夏夜

銀河耿耿斗初橫鶴怨蟬淒雜雁聲閣悄篆烟縈  
帳暗樓寒燈火隔簾明露濃桂葉秋容靜月轉蘿  
陰夜氣清黃耳不來消息斷并刀難剪最柔情

右秋夜

燭房煖閣罌恩轉斗帳溫幃翡翠裝悵望持頤搯  
寶柱朦朧注睇倚牙牀銀缸墜燼無多燄錦段生  
寒尚有香牢合金魚街鼓急不知鴛瓦早凝霜

右冬夜

舟中夜雨

隨計重來愧壯遊天教苦雨更添愁蓬窗坐聽閒  
搯枕似向心頭滴未休

渡河

問渡黃河記昔年乘風一任浪黏天而今慣見翻  
驚怯老大江河獨自憐

宿罄陽爲余初度日

三十青袍劇可憐歲華頻向客中捐半生詩句多  
驢背一夜鄉心落雁前縱有長繩能繫日坐看短  
褐惜流年葭灰將轉春光近又買春愁易水邊

杜庄逆旅和壁間女子詩

女子姓張氏自署  
延平著族夫死於



兵被掠  
過此

金鉦鼙鼓海風哀爭擁如花馬上回錦帕蒙頭勞  
悵望難傳消息到泉臺

二

再整蘭膏拭淚痕郵亭憩馬近黃昏鏡臺重赴襄  
王夢瘴海空啼杜宇魂

三

散亂清光碎玉臺孤鸞罷舞重徘徊鴛鴦綺帶恩  
如海忍效文姬贖後回

四

一死拋酬轉念難偷將紅淚背人彈輕衫窄袖新

梳掃一樣弓彎跨繡鞍

五

料得秦嘉得意初小窗鬪墨正歡娛傷心一旦風  
流盡不及豪家有綠珠

自羊流店至泰安遇大風寒甚

嵯峨又過嶺千盤旋折西風打面寒莫漫攢頭如  
縮蝟奔雲閃翠好誰看

二

霜意全侵旅鬢殘風威偏入敝裘寬青冥健翮憑  
誰假祗覺崎嶇行路難

望岱



千巖奔赴勢旋分  
劣削鬼峯迴絕羣  
石掌撐天能蔽日  
山根湧地自生雲  
金錢萬國輸香火  
玉檢千年紀赤文  
愧我去來牽率甚  
停車悵望對斜曛

早發泰安

扶桑淹日出知爲  
白雲深地已高千  
仞峰猶隔百尋山  
禽棲莽麓陂雁下  
層陰安得孫登侶  
一聞長嘯音

二

驅車度靈嶽目曠  
意旁皇凍合溪流  
細寒深苔蘚蒼巉  
崖行處險平楚望  
中荒辛苦頻經此  
前遊迹未忘

明妃故里

漢宮遺恨不堪論  
故里流傳迹尚存  
玉質銷沈埋紫塞  
香魂歸去近黃昏  
空餘易水聞哀咽  
難覓湘篁記淚痕  
落日停車憑弔處  
長堤衰柳繞荒村

偶見

軟紅深處玉橋邊  
繡轂朱輪玳瑁鞭  
不夜珠懸常滿月  
辟塵犀好惜遺鈿  
紫驪枉自能追電  
青鳥何曾解寄牋  
腸斷鄂君無限意  
捲簾凝望夕陽天

李夫子招飲寓齋卽席賦謝二首

寒宵文酒設重茵  
促席圍爐笑語親  
如向春風深欸洽  
卻慚立雪更逡巡  
官高著述偏宜冷  
座滿圖



書不厭貧安得金丹爲換骨漫從唐舉問前津時

六吉  
在坐

二

城頭疊鼓話偏殷簾幙深垂靜夜分盛世何妨論  
直道匡時還合藉斯文飄零才盡慚何遜獎挹恩  
隆愧范雲疊疊訓辭濃似酒敢將噓植負東君

贈吳漢槎和徐夫子原韻

廿年遷客隔榆關天外交情想像間生死總能歌  
至德笑啼一爲識清顏乍辭塞北翻離淚重到江  
南是夢還萬事從頭難問取空餘溝水尚潺湲

二

沙明水黑入重關風景全非隔世間不遣羈愁窮  
地角誰令詞賦動天顏身叅輪趣逃三縛骨換冰  
霜勝九還

聖代遭逢多異數莫嗟金贖更潺湲

李倚崗先生招飲以疾不得赴賦謝二首

橫經三載忝追陪偏幸陽和及冷灰別去蒿萊餘  
雪涕重趨門館傍雲栽何當慰勞停軒蓋更與殷  
勤命酒杯悵望開筵逢屬疾朔風秋雨總同哀

二

鳳城寒盡暖初回蹙蹙旋來歲月催名豈謝莊虛  
見疾遇同何遜媿憐才春風披拂心先醉霜雪經



卷三  
摧穎未頽見說昇平多

聖澤可容小草及時栽

病起

僦得蝸居喜絕喧青瑣斗帳坐朝昏窗臨積雪通  
宵白絮擁殘爐到曉溫病裏無慘鄉思劇靜中作  
惡客愁掀簷前鵲啁頻驚問應有南車急打門

聖傳  
不至

寄家書

病客音書後老親望眼酸敢言常伏枕只是說加  
餐歲向他鄉去春違盡室歡殷勤煩驛使到日及  
辛盤

辛酉除夕

春光破臘未全舒商陸頻添賦子虛才盡可隨花  
再發愁牽肯與歲俱除消磨壯氣辜題柱潦倒功  
名愧倚閭甲子平分今已半挑燈旅館意何如

壬戌元旦

時際昇平景象新桃符爆竹肇元辰不愁霜滑騎  
朝馬喜對春暄臥客茵無夢可占拚得失隨緣且  
過任亨屯年華流水憑誰挽巧拙休論付大鈞

送陸翼王南歸

歸然遺彥比靈光雒社風流舊擅場萬卷消磨餘  
白髮千秋事業有縹囊終南名重空爲累桑苧風



高得允臧誰識紅塵車馬外青冥深處一鴻翔

二

從今老去五湖偏乞得閒身勝仲宣爲愛異書摩  
眼讀喜聞佳士向人傳撐腸拄腹時寬帶買月移  
花不用錢愧殺忘年空見賞春風惜別倍流連

上巳日總憲徐夫子招集城南祝氏莊修禊  
傲蘭亭體卽席分賦

祈祈靈雨霑我郊原駕言從遊樂彼之園輕莢被  
阪嘉木蔭堂池水漣漪可以汎觴沃沃卉敷關關  
鳥鳴覽彼萬彙疇不向榮

徐健菴夫子招集城西馮氏莊卽席分韻得

映字

淑景散餘寒人意樂佳令飛蓋出晴郊開筵向芳  
徑油油細草香娟娟嘉木靜空庭曠望深曲磴躋  
攀勝名流咸萃止懽情發清興洗觴流水來笑語  
幽禽應疎花檻外明遠岫林間映撫茲風物美若  
使煩紆屏浩然天地寬魚鳥各翔泳胡爲自縈牽  
憂喜紛相競

有感

夜夜燈花虛報喜朝朝雀啁在迎人早知上苑花  
狼藉辜負家鄉二月春

出都口占



豈爲逢時拙羞慙去國顏含情年少士幾輩列鵷班

二

去來驢背影席帽不風流晚就非無謂雙親已白頭

途次遣懷

熟梅時候恰還家好去垂綸向水涯只恐被他隣叟笑塵容唐突故園花

二

碧浮雷莢青磁盃紅綻楊梅白定甌歸到江鄉幽事足浮名何用苦淹留

三

春歸花事已闌珊猶及荼蘼架未殘試問曲江銀飴餅何如櫻笋正堆盤

四

花園書屋鳥當壚遙憶家園似畫圖此福天公知客與故教憔悴老征途

五日卽席次敬之韻

歸來自悔不如人令節何當舉酒頻倦我風塵餘席帽逢君高隱岼烏巾團圞笑語傳家舊狼藉杯盤得句新名輩半從閒處老且拚午醉莫爲賓

七夕



爲有黃姑七日期人間此夕坐移時風清碧落星  
初轉雲接銀河駕每遲天巧可憑蛛乞與靈歡應  
許鵲先知君平卜肆今何在欲訪仙槎路所之

和朱人遠七夕木芙蓉試花之作

晚風漾暑過迴塘碧幹參差試靚妝靈匹乘秋初  
整馭名花隔水欲褰裳錦舒織室從分巧豔逼針  
樓枉斷腸采擷何當投贈意幾回悵望愧雕章

重修烟雨樓詩

萬頃汪洋湧畫樓崔嵬重煥舊雕鏤光連市堞囂  
還靜浪帶春林碧共浮窈窕焚檠通貝闕朦朧簾  
箔接瀛洲不須五里迷人霧隔斷紅塵最上頭

二

迴薄蒼涼境是仙蛟宮鼉窟恍相連塔沈倒影愁  
無地帆挾飛雲欲到天游女去來應夢雨繁花開  
落總蒙烟到來不異凌虛步何事乘槎霄漢邊

三

勞勞案牘有誰賢佐郡風流勝事傳燕語乍來尋  
舊壘游魚驚舞聽繁絃牀因庾亮塵頻拂堤擬蘇  
公柳更眠眼底廢興何限意空餘雙浦自年年

四

青簾白舫冶遊時雨霽烟銷景亦宜不遣山光遮  
眼界欲翻河底淨襟期渡來短楫迎桃葉醉蹴層



波舞柘枝詩滿不須紗籠壁禽魚應爲護軒墀

詠烟雨樓八景

春

綠漲鴛湖浸遠天驚添朱碧映郊廬窺簾乳燕營  
新壘渡水蘭橈覓舊緣絃管推移朝暮景鶯花斷  
續古今年有時抹野拖雲裏閒逗晴光溢大川

夏

浴罷乘流興不窮飄飄樓閣馭清風卧拋炎暑虛  
無際坐閱晴陰變換中雷電頃時迷向背虹霓一  
水燦西東得非夏日疑冬日不盡蒼涼漾碧空

秋

騷人墨客忽驚秋指點頻移出郭舟八月疑從霄  
漢轉三更似續廣寒游登臨最愛晴霜候嘯傲還  
添舊日樓豈乏淒清繚繞致金天不礙豁雙眸

冬

分明翬革出雲端雨盡青冥烟亦殘靜倚冰天頻  
醉酒慣看凍日落驚湍標齊隔岸雙輪迴影逐臨  
波萬堞寒點綴漁燈街市燭可容暝色一憑欄

花

偶從剪棘更除蕭拂檻垂隄破寂寥濃淡賞移詞  
客句芳菲豔逐美人嬌尋來灼灼多仙種別去亭  
亭遠市囂回首那堪臨水望微茫疑隔幾重綃



風

最是无風亦有風朝朝暮暮遞征蓬中流時覺颿  
颿滿孤影爭看裊裊同蓬島不須論近遠蘭臺何  
必辨雌雄亦知舊額題名在只爲干霄幾陣空

月

銜流濯魄倚高寒境自能幽興未闌照逼春元燈  
焰小光涵秋半露華團去來鴻雁當軒聽歷亂兼  
葭帶雪看閒有微濛蒼翠色一輪吞吐夜漫漫

雪

絕非浙瀝與青蒼幻作梅花五出粧粉撲危樓驚  
蛺蝶眼迷寒渚失鴛鴦低昂萬屋銀濤湧宛轉孤

城匹練長一望豈知烟雨地詩成八韻最淒涼

武林寓中與葉蒼巖夜話

客館今宵共酒杯酡顏深夜話徘徊宦遊君已驚  
華髮溲落誰憐久曝顙池日升沈無定影嶺雲變  
幻儘教猜回思童稚追陪日那得長繩挽日回

偕蒼巖夜泊湖心亭

四望諸山失翠微君來應訝是耶非并無樹色畱  
殘黛賸有波光浸落暉縹緲漁舟隨雁沒淒涼佛  
火帶星稀湖心夜泊空憑眺畫舫笙歌何處歸

偕蒼巖遊西山靈隱韜光諸勝

不矜軒冕愛登臨筍屐籃輿恣遠尋靜聽齋鐘來



古寺行隨飛鳥入霜林前溪目斷雲初隔複嶺人  
歸日半沈覽勝莫愁無勝具吳山未似隴山深

二

迴巒曲磴足躋攀招隱何須更買山斫竹分泉歸  
丈室燒松煮茗護雲關遙臨城郭疑天外俯瞰江  
峯隔世間解事山僧能乞句畱題薜石不應慳

蒼巖過舍別後貽詩見示依韻奉酬

暫迴使節到江鄉解橐攤書共一牀文溯河源歸  
藻鑑詩成灞岸溢緇囊獨畱風雅司壇坫好蘊經  
綸待棟梁早晚鋒車應促駕拂衣未許訪高陽

二

白菊黃蘆海畔鄉高軒重過下懸牀官容直道休  
嫌組技拙逢時愧處囊對酒不須繩禮法論文卻  
喜得津梁五年別緒連宵話又送輕帆下夕陽

壽顧輿山郡伯

江左才名第一流三懸虎竹古諸侯朝瞻北海推  
公望時倚荊州仰大猷浙水黃龍迎建隼吳山白  
鹿夾鳴騶吏民不用歌來暮數月仁風遍綠疇

二

香水渡頭虛借寇玉津園畔喜來蘇威行旁郡雲  
連越家近隣封澤徧吳絃誦一時喧比戶柘榆半  
載滿平蕪不妨卧理聞清嘯檻外江山映玉壺



三

漢廷求治藉分憂劇郡東南更借籌已見政成移  
猛虎還看俗易狎馴鷗聽潮閉閣霜侵戟解榻畱  
賓月在鉤此日陽和歸壽域恩膏無限暗隨輶

四

寒花紅樹滿湖邊千騎雍容上畫船詞賦才人何  
水部風流太守謝臨川無須法曲喧繁管好譜興  
歌傍錦筵治行早居天下最二泉亭水是廉泉

湖上十詠

雷峰塔

兩山烟樹望來空塔影孤懸落照中無數遊人齊

駐馬白雲片片散西風

鳳凰嶺

宮闕當年起百層空畱荒草問遺僧長江一片飛  
明鏡獨照興亡到六陵

放鶴亭

幾樹梅花一草亭兩湖寒逼萬山青南來我亦扁  
舟客獨鶴凌風不忍聽

蘇小墓

寶馬香車又一時春風彊半負佳期西陵松柏今  
枯盡枉結同心問阿誰

翻經臺



愛日堂詩卷三  
翻經片石擁高臺雨點春泥繡碧苔千載謝公畱  
勝跡風流今日幾人來

冷泉亭

蒼藤絕壁影重重百道飛泉倒萬峰若箇亭邊吹  
鐵笛醉乘明月弄芙蓉

靈鷲閣

石磴岧嶇百尺樓無邊江海入窗流松雲竹翠疑  
天半更有高人住上頭

呼猿洞

陰崖倒壑萬松寒人道呼猿竟不還白日山精披  
草立卻教風雨暗空山

三生石

三生石畔足幽尋面面藤蘿挂夕陰歎息牧牛人  
去後春風花落到於今

澗西橋

曲曲溪橋古木遮飛流天際走龍蛇臨風散作千  
巖雨開遍山南山北花




夢卜堂言卷三

共




東

印









T5466/7910

2



OCT 4 1960

雙日堂詩卷四

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡

蘇東坡



愛日堂詩卷四

敝帚集四

癸亥甲子

哈佛大學漢和  
圖書館珍藏印

立春前一日賦得日麗綺窗梅擬右丞體

日麗綺窗梅佳人步徘徊乍展枝頭雪春風與俱  
來年華空歎息將花擲鏡臺鏡臺盤龍柱皎潔如  
春露盛衰光不朽可惜花非故寄語陌頭人莫負  
春光曙

立春日賦得春風東來忽相過倣太白前有  
尊酒行體

春風東來忽相過柳顰鶯嬌奈樂何主人飲我金  
叵羅吳姬豔舞揚修蛾聲迴采菱復陽阿盛年交



歡寧蹉跎步青門戀芳節焉得魯陽七尺戈爲我  
倒駐扶桑日

人日詩八首

人日強題詩欲寄天邊去美人凌紫氛佯羞不肯  
顧

二

願言遵海澨遙望三神山風來引我去惜哉無羽  
翰

三

蹀躞春風前馬蹄驕不度愁殺草青青江北江南  
路

四

初日麗紅樓晴花熏紫陌宛轉春遊人春光輕一  
擲

五

誰家女如玉剪綵持作人婀娜斜鬢插占得歲華  
新

六

郎言歲喜新儂言不如故新歲盛年華故人心所  
慕

七

鑄成黃金鏡照面不照心照郎無定準儂心正如



金

八

顏色可憐姝翠袖翩然舉春風日暮生落花笑無語

上元辭效妾薄命體

春風三五盈盈陌上草薰細生遊者何人踏青玉  
車攜手傾城新粧炫服極情洞開金屋銀屏熒熒  
七綵華燈華燈妍製非常火齊木難夜光蘇家織  
錦機張燦若天孫七襄山河日月流長中夜徘徊  
滿堂攬持春輝未央更展仙人玉壺授色詔爵中  
廚彈箏鼓瑟吹竽左攜綠珠舞裾青琴玉女右俱

促尊合席交娛沈姿譎態何都樂哉萬歲千秋君  
家綺麗難儔爛爛天漢上浮五城十二紅樓金波  
若彩遍周誰信朱顏白頭世間樂事悠悠

許時菴館選後有寄

丈夫讀書未致身屈首殘編不得伸一旦聲名滿  
天下文壇張幟空古人時流拱手稱弟子籍籍交  
游若有神盛名造物偏相忌白眼還逢薄俗戲解  
嘲罵鬼空自嗟曳裾漫刺非吾志憐才狗監今并  
無相如寂寞終淪棄其餘達者何紛紛繇輦團師  
勢欲熏文章箇箇誇無敵意氣人人矯不羣宮錦  
坊中頻換樣勒帛劉幾旋首唱暗中但說點頭頻



夢裏誰知糊眼狀君也雄文早擅名姓氏流傳海  
內驚廣授生徒多雋傑壯游卿相有逢迎三謁春  
官今始遇矯矯如君真獨步片玉能增玄圃光一  
聲披卻青霄霧神物由來會合奇彤廷交薦更無  
私璠璣要合登廊廟羽翼欣看到鳳池不羨君才  
森噴薄不羨君名日照灼羨君苦志竟逢時遂使  
吾徒不廢學定交卻憶十年前百尺樓頭絳帳懸  
二三兄弟兼師友文課時盈數百篇臯比坐講垂  
寬帶恍叩鐘鏞驚戶外倒瀉經笥似貫珠晰疑往  
往開蒙昧有時狂叫賞奇文月白霜清到夜分酒  
闌慷慨談匡濟作健旋思把研焚忘年磨斲情良

厚兩度燕關重沽酒君今雲鵠我轅駒話到當年  
君記否楊柳垂垂四月天青門分手各潸然掉頭  
喜我猶存舌一笑輸君先著鞭男兒生不憂貧賤  
干鎔肯隨利鈍變已分飛沈應自疎知君尚識平  
生面直廬歸處散鳴珂賜纈恩深奈若何明年再  
踏長安陌攜手燈前一放歌

訪敬之步巨高弟韻

移舟出郭趁栖霞深樹藏扉靜不譁谷口風光成  
隱遁桃源景物自柔嘉草玄盡識楊雄宅乘興還  
尋阮籍家朱實含霜堪餉客東隣酒熟不須賒

李制府內晉中樞恭呈四十韻



乾象中台峻坤維五嶽崇挺生扶太極間氣闡鴻  
濛望族分關隴高名仰岱嵩十年卿月近千里節  
旄隆

帝念痼瘵隱公嗟杼軸空方需循牧績更委敵人衝  
逆節猶屯蟻壯猷類卜熊天潢領虎竹禁旅下矚  
鱗竟失當關險誰支半壁雄孤城控斗絕吉日戒  
車攻徑欲迴飛鳥如同遠避驄神謀讐閫外威信  
播寰中下馬歸羊祜投戈讓孔融八閩收版籍兩  
浙起疲瘵取笠軍無犯投壺度愈冲濟時勲赫赫  
憂國念忡忡下令宣

皇澤飛書慰

聖衷時危勞汗馬戰定撫哀鴻臣績畱銘鼎  
君恩有賜弓德星銷孛霖雨沐蒼穹饒吹班師靜  
棠陰舊府叢錢江春潏灩滄海曉瞳矐樹映鳴鞞  
綠花迎綵纛紅洗兵到河漢倚劍並崆峒廓定襄  
昌運艱貞篤匪躬龍門唯一柱嶧嶺聳孤桐戀闕  
常依北爲藩久在東策勳遲錫土寵命謝臨戎啟  
沃思裴度經綸憶召公殊褒傳

特詔異數出深宮曳履班聯絕垂裳燕喜同中樞資  
偉略右相倚純忠已見三苗格還期九譯通嚴轅  
攀父老樂社走兒童畫戟畱晴雪鋒車促曉風中  
朝需柱石南國失帡幪變理符真宰陶鈞協化工



勳名青史紀姓氏碧紗籠願保無疆福彌弘百世  
功沙堤早晚築玉曆莫無窮

宋聲求招同孫紫籙裘用貞鄧尉看梅大雪  
竟日次早歷西山諸勝還飲董潯陽宗伯祠  
前花下卽事雜成六首

輕帆細雨過橫塘恐後花期著屐忙公子畱賓多  
逸興才人寄傲盡文章雲低疊嶺開奇景月黑疎  
林有暗香到處湖山堪燕賞清門何必午橋莊

二

相逢浪泊到湖邊恰似山陰夜放船只有梅心饒  
冷趣故教雪意淨塵緣粧明姑射冰同潔人在瑤

臺骨是仙驅使風光供勝賞正宜靜好薄寒天

三

虎山橋畔駐蘭橈閣迴湖寬敞沈寥碧嶂千層開  
玉宇澄波萬頃卷冰綃清光妬月爭寒魄冷豔迎  
芳壓凍條霑醉憑欄休睥眄一聲長嘯徹重霄

四

探奇迤邐衆山西沾濕何辭共杖藜低亞最憐臨  
水影橫斜苦愛出牆枝雲蒸樹樹超凡格春破山  
山發異姿一望晶明迷客眼如花似雪兩參差

五

花海真成雪海如朝曦恰映洗粧初迴翔落蕊停



卷四  
六  
杯後飄瞥幽香拂袖餘山鳥試銜寒玉片野蜂怖  
傍水晶居不將熱意迎人面管領春風覆草廬

宗伯祠前列萬株朝元閣下命行廚人居花杪疑  
香國雲斷山腰失具區醉嚼飛英清肺腑坐眠芳  
草勝氍毹來遊惆悵歸期促眼底羅浮入夢無

玉蘭

兩樹玲瓏近拂簷蕊宮通籍不知年罽囊春解搖  
珠珮羽帳寒輕試玉鈿抱素自明無月夜高擎徐  
漾欲風天瑤池阿母應相接何必唐昌境是仙

二

承露花房挺勁枝森森粉筆拂雲姿曾於天上修  
仙籍又向人間引麗詞兀傲不隨人俛仰幽芳常  
共月紛披只應譜就瓊花曲雲母屏間教雪兒

三

聳幹亭亭出繚牆臨風直欲壓梅粧如蘭香合依  
蘭砌似玉花宜傍玉堂不染心情存我潔易摧風  
雨任他狂長畱皓魄朝天去月馭雲車路渺茫

上巳

積雨冥冥潑火時永和觴詠更誰期花逢閏歲遲  
遲發節遇陰寒寂寂移古研生雲臨禊帖枯碁坐  
雨睹梅詩陽和未必遺衡泌祈祉何須驚洛湄



二

去歲茲辰重黯然龍潭高會愧羣賢

去年是日東海夫子招同

諸公集黑龍潭  
值初下第時

燕歸社後安巢舊人到春深昨夢

牽流水繁華隨俗賞晚花靜好背人妍乘和不用  
愁天漏畱取年芳待禁烟

送張球仲任烏程廣文

茂先才藻舊名家入雒翩翩擁絳紗俸薄聊當江  
浦橘官閒恰試洞山茶才高對策遲前席年少傳  
經富五車最是公餘堪眺訪白蘋紅蓼足烟霞

二

終南除目競鶯遷獨愛清高滯一羶峴首晴峰環

帳外苕溪春水瀉堦前諸生罷講傳新句好客開  
尊擘舊箋暫借鱸堂同吏隱文光昨夜映珠淵

張昆貽石霞研歌

人生嗜好亦何有寶器流傳誰世守世間奇物不  
遇知周鼎商彝同土缶物無貴賤總因人珍惜護  
持誠不偶吾友張子雅好古研田日夜墨光黝一  
片端溪號石霞握之如珪不盈手千年水底粹英  
華寒精沁骨光初剖朦朧碧眼帶烟舒隱現彩虹  
驚電走墨色霞光交映明篆香茶氣相縈受吁嗟  
此石非凡材玉德金聲蘊已厚蘇公鳳味徒自誇  
龍尾於今信牛後錦茵玉匣深閤藏棐几疎簾淨



無垢繭紙斜行倣晉唐蠻箋小楷摩鐘白奚囊什  
襲自相隨一生唯爾周旋久攜向彤庭草萬言著  
作承明垂不朽君愛此研若有神研亦於君良不  
負愧無畫馬換仇池敢投木李博瓊玖墨癖書淫  
吾輩態整衣再拜呼石友此研逢君賞識奇光怪  
蒸雲繞軒牖獺髓香浮發雋思揮毫還聽蛟龍吼  
閏六月立秋前一夕偕敬之暨辰山巨高兩  
弟乘月觀荷與允大允文同飲池上

荷香縹緲接東垣踏月相攜再合尊俄聽秋聲來  
子夜共驚閨暑散黃昏風翻碧葉疑藏鶯醉吐清  
池欲化鯢法護僧彌能手並蛩吟遮莫向雷門

允大

允文俱以  
詩賦擅場

### 再和敬之韻

促坐分題曲沼前驚人端合讓華顛狂歌須倚三  
分醉秋月先添一度圓把酒問花誰是主清談捉  
麈漫爭賢空齋歸臥牽吟興清夢騰騰斷復連  
閏六月初七夜與敬之飲庭中和敬之韻

莫嫌塵污障元規欲裂荷衣悔已遲共愛涼宵闌  
暑後誰憐末路好秋時衣冠綺季空驚俗章句康  
成暫作師休逐少年爭一著白頭應早悟殘棋

### 雨後晚涼和敬之韻

新蟬兩度故園愁高隱輸君傲白頭共畏炎歊欣



變律漸成蕭颯欲驚秋波添銀漢雲初合月試金  
波雨乍收書滿蒲葵多好句非時莫歎久淹畱

初秋夜飲和敬之韻

糟邱便擬學陳暄對酒何辭玉露繁往往夢中來  
好句時時醉裏得奇言芭蕉聲急涼侵榻薜荔陰  
濃月在垣滿紙新詩頻悵望巢由底事亦論冤

戲詠乳腐

本與黃蘗共棄捐卻隨鹽豉傍尊前縱饒風味形  
仍腐耐得炎蒸性自堅一握申椒香不散經時醉  
酒色逾鮮攜來儘足供彊飯枉費何家日萬錢

吳門陸予載新除本郡教授奉贈十八韻

十載羈栖傍十洲一時才調駕應劉絲毫不作唐  
供奉香草難邀楚蹇修書就銀鉤多進御賦成白  
璧若爲酬禁林錯落虛畱藻末路淒涼惜暗投世  
事只今工變幻文章自古泣雕鏤道逢九折姑廻  
馭價重連城豈易售搖首京華雙鬢改戢身鄉國  
一羶畱亦知尺水鱗難隱聊借卑枝迹自由結綬  
卻欣歸計得攤書暫解壯心憂江都授業幃仍下  
通德傳經地頗侔松菊肯因微祿棄參苓好借一  
官收攜將子弟叅奇字乍進生徒半舊遊冠帶休  
嫌隨俗吏宮牆且喜長名流高懷元自清如玉折  
節何妨曲似鉤一別青門勞夢寐相逢茂苑話沉



浮行藏心事渾難辨聚散交情黯欲愁休共故園  
嗟伏櫪終期大道騁華輶明年燕市重沽酒會有  
文星貫斗牛

贈耿孝伯憲副

久寄澄清領外臺東南更借濟時才共聽畫角迎  
秋肅喜見朱轡帶雨來海甸風高鷹正疾江城日  
暖雁初迴銀毫判牒還多暇烟舫清尊向晚開

二

法冠猶帶隴頭霜千騎西來七月涼此後福星連  
震澤古來勝事半錢塘湖山按部時停馭賓從登  
樓獨據牀好時家聲重接武識韓更詠召南棠

賀宋聲求移居百花西里

城東舊識鄭公鄉西里新瞻鳳羽翔久宦曾無旋  
馬地清門僅闢讀書堂不施丹蘄貽師儉徧列箴  
銘紀義方元老門庭仍寂寂垂簾攤卷日舒長

二

不矜畫棟與雕梁買宅唯施虞愿牀倚脊未教營  
綠野貽謀再啟舊青緇閨堂絲竹原輪靜滿架圖  
書自有香公子意深存簡樸畱將世澤肇蕃昌

三

尺五聲名比杜韋闐門賓客看人圍廣平奕葉還  
餘慶安石蒼生未易歸朝野昇平多樂事家庭燕



喜溢恩輝天香滿座秋光好努力長風待奮飛

四

三吳大厦似星繁獨有槐堂靜不喧風度喬松傳  
玉珮雨餘芳草長蘭蓀樽疊北海今宵醉花木平  
泉異日恩踵武登朝看隔坐一時盛事在高門

七月十八夜飲顧筆堆嘉樹堂卽席二首

夏木清陰俯畫堂明鐙促席夜初涼金波忽吐林  
間影碧沼俄飄檻外香樹幟分曹飛玉盃解衣消  
醉進冰漿偏余小戶慚齊贅那得風懷換酒腸

飲興甚豪余  
獨不勝杯杓

二

畱歡不盡主人情履舄交加一座傾移席漸從紅  
袖密占星只有酒旗明好風徐送秋聲度嘉樹旋  
看素影橫淥水名園今夜別輕帆曉隔闔閭城

張昆貽以雁字詩見示依韻奉和

界破層雲點碧空杜陵秋思託賓鴻迴翔關塞詞  
鋒勁嘹唳江湘筆陣雄綴就帛書憑寄遠織來錦  
字爲誰工年年哀怨畱題處漫滅寒烟落照中

二

誰將健筆掃清穹一幅橫斜匹練空直欲凌雲書  
鳳鳥有時映月注魚蟲蒼涼科斗秦灰後佶屈蟬  
聯漢草同碧海青天畱素影詞人指點有無中



再疊前韻

鸞翔鳳翥欲橫空幾度驚弦惜曉鴻失侶最憐書  
斷續隨風那辨賦雌雄揮毫映月濃還淡點筆衝  
霜亂未工不爲稻梁頻戢翼肯迴體勢落雲中

二

刷羽聯翩拂紫穹從教點染遍秋空上清綠字書  
仍烏碧落銀函篆是蟲影散江湖千里合文歸遼  
海六書同銜蘆歲歲編雲物盡入天池一網中

崑山王甫瞻將買舟作浮家計賦詩見示依  
韻奉贈

獨客淒涼落葉風天涯心事更誰同家隨釣艇身

真隱詩滿奚囊道未窮豈必時清無蹈海不妨世  
外有飄蓬蕭蕭蘆荻秋江冷一雁孤飛夕照中

二

萍蹤投老任秋風難較行藏說異同天與閒身長  
作客人憎傲骨不辭窮牽船寧必還依岸避世無  
須歎轉蓬他日烟波何處訪月明夢落棹歌中

中秋對月和敬之韻

纖雲四卷淨冥蒙碧海浮精漾遠空此夜驚鴻羣  
望北隔年隋鏡又升東心隨一照人人異節怨頻  
遷歲歲同翫賞宵分頻得句追歡只有白頭翁

二



又逢秋半十分圓依舊清光冷一瓊泥飲狂吟成  
底事閒身好景更誰全寒砧非客還驚聽皓月生  
愁恨轉妍玉宇瓊樓原有路不關醉後語尤顛

中秋文讌詩

弱齡浪跡長安陌二十年來駒過隙秋月春花惜  
別多每出良辰增咄咄歡樂無端讌會開絳蠟高  
燒照綺席不遐棄予遠過存月皎正當三五夕新  
知投分話神交舊好披襟看莫逆聯翩入座雁行  
舒縹緲天香浮皓魄吾家兄弟恰三人第五聲名  
尤辟易蘭肴不讓五侯鯖幾疊新聲狂更劇歌舞  
教成總絕倫鼓掌掀髯親按拍梁塵欲落綵雲停

月明依舊平津宅

是夕集寄齋兄弟家

酒酣忽漫起離愁有

客蒼茫遠行役燕雲漠漠楚江寒一門二妙分雙  
屐丈夫落落不受羈天涯是處多遊跡懷刺羞分  
幕府金曳裾肯作諸侯客遭逢

聖

世莫吁嗟正值求賢四門闢無限冥鴻入網羅纔

離疏屬登仙掖聲華一旦動朝端珪璋特達無常  
格話劇歌停夜漸闌洗尊促席蠻箋劈冷露溥溥  
北斗橫清光一片琉璃碧埴篴膠漆各風流絕勝  
良宵莫輕擲窮通聚散那可期對酒當歌胡不懌  
盛名遭忌拙違時材不材間智所擇同調於今更  
幾人燭短星高情脉脉誰作前茅孰後勁他年共



奮冲天翻秋風震蕩拂滄溟乘空直上凌千尺章  
皎銀河機七襄廣寒宮裏蟾枝摘

哭辰山弟

雁行中斷隕驚弦洒淚西風悵昔年怪是吾家才  
子厄修文天上復聯翩

二

黃菊花開暗不香憑誰促席酒盃狂五年一瞬重  
陽後記得分明枉斷腸

兩弟俱於九月間去世

三

軒眉白晢美書生灑灑烏髭丰格清兄弟行中驚  
秀出定云法不愧公卿

四

多少中懷鬱未伸從前屬望負雙親科名是汝囊  
中物屈指明年少一人

五

重埋玉樹出塵姿不謂斯人竟若斯滿篋遺文無  
限恨風簷辛苦問誰知

六

能酒能棋數六壬通懷具有古今心從來制勝兵  
家訣手錄成書半夜吟

七

崩城一慟可能支判隔幽明總未知無奈生難從



豈易淒涼娣姒兩孤兒

兩弟各遺一子

八

愛弟誠心一巨高襟期落落亦人豪輸他天性由來摯不憚孤遺撫字勞

九

阿兄纖弱竟誰堪咄咄空餘萬古慙雙淚頻含生死寄何方終不愧兒男

與敬之約二月西溪看梅花事已闌久待不至走筆寄訊兼訂後遊

二月遲君共杖藜西溪梅已報空枝寒香寂莫虛幽賞積雨淒淒迷怨後期作客心情貪客過避人花

意少人知休嫌晚晚春光老猶及蘭亭祓禊時

二

寂寂春深楊子居閉門生事近何如書從眼耗供磨耗徑任苔封未破除酒熟呼將鄰叟醉句成口授稚孫書花村大有桃源樂辜負湖山舊約虛

三

聞說新年苦折腰豈因趨走困塵囂空教赤脚扶新杖何似長須理舊船老興逢春應不減晚花待客未全銷風流白袷非吾事古貌方袍任爾驕

四

鏡檻城隅未寂寥小紅淺碧足招邀卻憎花氣當



樓近偏愛山光入檻遙  
摒擋軟茵開曲徑商量釣  
石整危橋牀頭短甕封題好  
待滌詩腸與共澆

寒食湖上作

酒甕茶鐺壓兩頭  
筆牀研席在中流  
烟深鶯浦聞菱唱  
月落吳江發棹謳  
何事客心爭去住  
但逢好景任夷猶  
江州司馬原多恨  
夜泊休依估客舟

贈殷性原

青鳥秘授得真詮  
閱盡滄桑雪滿顛  
是處名山娛吾老  
不撓塵網受人牽  
徵來卻悔高名累  
歸卧惟餘傲骨便  
一卷圖經幾兩屐  
相逢共識地行仙

二

不信人間有倥傯  
方瞳鶴髮耳垂肩  
莫嗤古貌騎官馬  
畱得蒼顏泛野船  
禍福荒唐難問地  
機關巧合總由天  
青囊秘笈休輕授  
妙理須游象數先

無題

別館春歸不送愁  
生憎新月照牀頭  
峽雲縹緲渾難定  
溝水東西各自流  
此去五湖成泛宅  
他時千里訝同舟  
風多燭短銅荷濕  
細細清霄靜一樓

二

情騰無奈欲逃禪  
天女維摩也惘然  
刺史腸迴愁斷續  
司勳句好苦纏綿  
鳥憐同命唯梁燕  
花到關心是杜鵑  
密雨溫風梅漸熟  
紙窗消受送春天



三

絲繁絮亂總牽愁  
冶葉倡條暗碧流  
雲氣未消甄后枕  
烟波旋隔鄂君舟  
那知夢去隨莊蝶  
已分魂飛化石尤  
便向壺中逃浩劫  
傷春傷別不曾休

四

濃陰如幕俯圓池  
懊惱風光不自持  
纔聽流鶯魂已斷  
不須泛蟻醉多時  
沈郎堤畔錢初落  
謝女庭前雪又吹  
漫說神方能駐景  
蓬萊清淺憶前期

與敬之論詩述懷時將北上兼以誌別

論才海角地騷雅  
孰憑陵豈乏聯鑣  
起終難拔幟登望  
容連白葦竅或引  
蒼蠅藉有先驅力  
從多拙

匠能聲名小阮獨  
制作大巫憑有幾  
家門望無雙國士  
稱幼甘豹霧隱老  
忘鶴書徵孝友全  
張仲楷模峻李膺  
經明非慕祿酒嗜  
不求丞流水彈清  
操浮雲枕曲肱迷  
花兼弄月凜雪復  
懷冰然諾成名俠  
修持苦行僧衣冠  
世態異面目俗情  
憎蠟屐荒郊雨披  
襟古道朋冲懷時  
有託高寄境何曾  
僻與喧如一理將  
跡共弘宗風衍世  
好蒙塾忝師承孤  
姪瓜延颺童心木  
受繩坐羶髀輒飢  
覆卷髮鬍髯咭嗶  
晨昏暇嚶吟帷帳  
凝光窺常拭硯膏  
繼屢挑燈桃李紅  
霞爛星河白露澄  
命題爭絕構分韻  
各閒凭義手篇還  
就舒顏徑不恒漫  
言詩是史可許



墨能蒸聚土開孤塚藏山局一滕好將千古業聊  
把寸心仍學更衰年砥交惟薄俗懲不才需偃蹇  
已壯怯飛騰棧櫪常嘶驥絛鞵待放鷹劇憐同翰  
墨粗欲別淄澠射法穿楊並詞源倒峽崩珠寧求  
罔象璧定探姑繪賭墅希追謝齊盟敢後滕那能  
免捉鼻又復去擔簦咄咄遼東豕勞勞海上鵬塵  
奔衝積霰風勁挾寒凌席帽書生舊金臺馬齒增  
功名嗤鄧禹溫飽薄王曾敝帚終難棄遊鱗雅自  
矜虛傳江令筆終愧剡溪藤薊北雲千樹江南錦  
萬層相期重握手共爾泛觚稜

愛日堂詩卷五

登瀛集

初入翰林多館中肄業之作因以登瀛名  
之

乙丑會試

皇上親自命題主司閱卷畢以元魁十卷密封進呈  
御筆親定甲乙元龍倖列第二名榜發恭紀  
御筆緘封命試題五雲深護棘闈低文場千古添佳  
話努力摘詞應聚奎

二

慎選真才仰



聖心主司鄭重辨璆琳闈中未敢輕書榜捧進黃封  
候

玉音

三

不才何意壓羣英甲乙標題自

聖明一榜十人恩更重只今

天子有門生

三月二十三日

皇上陞太和殿傳臚元龍蒙

恩賜第一甲第二名及第謝

恩禮畢卽隨金榜由

午門中道而出順天府備上馬宴於東長安門外大

京兆親爲簪花披紅具黃蓋儀從遊街至順

天府署中

賜恩榮宴京兆親送歸寓恭紀

仙仗森嚴旭日明丹墀深處集羣英姓名幸近魁  
三象臚唱初傳第二聲疏屨乍離千載遇圭璋特  
達寸心驚雲呈五色慙虛譽御道欣隨榜後行

二

公卿環問一書生年齒家門與細評黃蓋綵旗煩  
導引青衫白面戴

恩榮敢將溫飽虛初志豈有文章報



聖明白髮高堂庭訓在綵衣南望不勝情

送邵樾生南還

高會良宵餞客行知交海內有逢迎奚囊剩得詩  
千首珍重良朋贈處情

二

莫倚聲華久壓羣對人敢說愧劉蕡上都名輩知  
多少把酒青門盡送君

三

俗情底事苦相撓得失何關我重輕造物恐因庸  
福誤故將磨折老才名

四

馬首層冰歷苦辛到家又見歲華新輞川梅信遲  
歸棹却稱王維畫裏人

堅齋內兄二姬並載南來戲贈

曲屏新縛映窗紗臨罷黃庭自灌花忽報南來人  
已到故教門外且停車

二

自傳好語報秦嘉喜溢眉間暗自誇昨夜計程三  
日後到來疑夢乍還家

三

芍藥千枝鬪豔開滿堂香氣獨徘徊那知十丈黃  
塵裏桃葉桃根並載來



四

燕姬吳女却同車遠近鄉關路總賒少小不知何處住相看各自憶娘家

五

雕文羽帳暗生春小語低聲話苦辛匝地塵埃迷繡轂爲郎消受已經旬

六

秘殿揮毫晚晚歸香篝暖護欲更衣玉壺傳點金魚合一璣新羅靜掩幃

七

墨妙臨池日幾行琉璃硯匣鏡臺傍近來新學羊

欣體婢作夫人也不妨

八

曲江半臂愧殷勤鳳尾香羅換夕熏何事生愁還捧腹解人應只憶朝雲

五月三十日

召入乾清宮出

御筆四給尚方金泥命書小楷進呈蒙

溫旨褒勉復

賜御饌出宮時漏下三刻矣卽事紀恩四首

勤政偏宜纁夏長早隨奏事入明光觚稜影直班初

散硬碱風多立久涼珥筆候時宣



聖製離疏旋幸觀

天章未諳禮法憐新進徒倚宮門倍悚惶

二

宮司徐引上椒除研几清嚴傍綺疏

詔給金泥濡兔穎內傳統扇寫蠅書濃纖欲合心先

正波磔將成腕漸舒

天語聽來兼獎勵愧無筆札擬相如

三

含毫永日侍

丹宸饌出天廚味八珍初碾冰芽香沁骨新嘗圓米  
滑於蓴風清殿閣原無暑地近蓬瀛自絕塵却笑

漢家恩禮薄曾無莖露賜儒臣

四

未央鐘動又黃昏秘殿陳經尚討論聯步乍辭青  
瑣闥占星却望紫微垣香縈懷袖應常滿樹植宮  
庭未敢言信馬曰歸思底事恐將溫飽負殊恩

許時菴前輩招集雙林禪院觀荷次堅齋內  
兄韻

客況何須憶灤西偶離塵市得蓮溪涼生雨後添  
新漲晴斂花光鬪彩霓彷彿歸家逢野渡商量布  
席坐平堤斑駁似解遊人意不向垂楊岸外嘶

二



愛日堂詩卷五  
五  
暫借僧寮作醉鄉喜寬禮法任疎狂遠公沾酒原  
無染坡老當筵興倍長晚雨何妨沾客袂白雲只  
自繞方塘新荷折得休攜贈恐妬君家十二行

再次葯洲內兄韻

地當孔道絕纖埃休暇相攜載酒來淥水人家依  
寺隱蓮花世界傍城開雨賒紅暈含香醉風定清  
漪到檻迴此日名流逢勝會敢辭沾濕後追陪

二

忽對濃陰悵落暉江村清夏正芳菲波平沙岸開  
明鏡雲聳奇峰見翠微公子未諳鄉國路客心錯  
認泛舟歸他年一條塵纓後可許同君上釣磯

又次葉蒼巖姊丈韻

雨潤纖塵淨陰濃翠蓋張寺深藏徑曲樹隙見池  
光花好從人醉僧迎笑客狂不知家遠近風景是  
江鄉

二

出郭尋林麓開尊命范張荷房含雨重柳岸漏晴  
光興劇愁將去吟成醒亦狂冰牀容借臥日對水  
雲鄉

七夕

自陳瓜果媚盤飧獨酌移燈傍小闌銀漢一泓秋  
早到玉堂雙眼夜深看蛛因鬪巧絲空織鵲爲填



夢日堂詩卷五  
河羽未乾最是針樓凝望處露華濕透不知寒

瀛洲亭秋霽八韻

高雲浮玉署靈鵲報新晴地擬蓬壺靜波分太液  
清槐陰含雨氣桐葉引秋聲風定圖書淨塵消衣  
袂輕八牕迎爽灝四照愛虛明永晝聯長句涼宵  
就短檠蛩鳴驚節換雁過動詩情翹首榆關外商  
颺拂翠旌

首秋館課卽事書懷十六韻呈孫徐兩館師  
南宮新造士西掖首儲英俗豔登仙侶私慙特奏  
名讀書逢盛世通籍際昇平選溢丹臺額師推內  
相行問奇開積愆立雪荷殊榮絳帳雙懸峻冰壺

並映清春風溫合座秋樹肅無聲局戶鈴常靜窺  
簾雀不驚論詩追正始講學抑爭鳴摹篆鉤碑細  
分題擊鉢成雲臨書幌碧日迴硯池明數仞恩門  
近千秋

聖澤宏敢希唐學士深愧魯諸生噦鳳當年夢登龍  
此日情捲簾憐舊燕刷羽喜遷鶯報國憑柔翰長  
宵一短檠

銀河篇

一杵驚寒玉露繁衝天月浪濕無痕飛來匹練橫  
秋直界破青溟亘九闔南斗斜經北斗貫宿海分  
流光漫漶空濛初轉鳳凰城皎潔乍含鵲鵲觀影



瀉中庭鵲夜飛玉盤欲落曉星稀靈虬聲咽金魚  
寂清淺何年說別離齊諧荒誕傳靈偶乞巧還嗤  
柳州柳迢迢一水果關情雙星化石人間久仙家  
相遇輒千春即使經年轉瞬頻惟有人生殊冉冉  
一度金風一愴神敢挽天潢水萬斛洗淨塵埃窮  
遠日清輝直欲隨懷中四射光芒不可掬河直如  
繩得道昌不用乘槎問渺茫好分織女天孫錦繡  
作山龍

聖主裳

文華殿告成恭紀

書殿平臨禁閣東雕鏤新煥映瞳矐落成早奏重

光瑞進講初瞻列聖崇夾陛楓槐承曉露翔空燕  
雀御微風應知廣廈陳經日定有嘉謨答

聖衷

賦得東閣官梅動詩興

近南開放百花頭官閣垂垂想更稠一種暗香憑  
漏洩數枝疎影自清幽折從庾嶺春前寄吟向孤  
山句裏收對雪尚思題詠處便應飛夢到楊州

擬上元應制

宴啓逢元夕羣歌

聖德滋案分龍鳳饌樂和鼓鐘詞地軸蟠燈樹天階  
漾酒旗不教芸閣上劉向獨然藜



二

帝京元夕盛錫宴奉

宸暉爵共傾三雅燈還熱九微玉蜍芳曜滿金鴨瑞  
烟飛飲罷仍歸直天階露未晞

三

極拱辰樞北春隨斗柄東星橋迴焰紫火樹吐芒  
紅五夜嬋娟影千門綺靨風昇平多擊壤樂與萬  
方同

四

元夕宮庭宴及時光風湛露轉歲蕤金吾禁撤雲  
輶合碧落祥開月駕移供出仙廚調六膳燭明春

殿熱千枝微臣幸沐恩波裏

聖壽齊天效祝釐

五

上元春靄夜風微特敕羣臣宴禁闈鼎賜堯羹知  
味古座聆夔樂識聲希魚龍戲海連宵逞烟火燈  
山達曙輝飲罷傳柑歸騎促氤氲香氣滿朝衣

六

碧天雲淨月華昇綺陌風光似水澄百和乍飄宮  
內篆九枝先熱殿中燈笙簫匝匝攔街和珠翠續  
紛入夜矜酺宴賜來人共醉萬年有道頌歌興

擬春日應制



條風回暖律好鳥報春時日麗采恩殿冰融太液  
池晴光新柳覺花信早梅知共沐陽和澤應吟復  
旦詩

二

帝城初展豔陽春日麗風柔儘殢人梅爲點妝紅  
欲綻草因承輦碧初勻蓬萊地近花光爛闐闔天  
高雨澤新邳治休和民氣樂萬方同戴發生仁

曉望西山十四韻

春城景融融風日喜朗暢凌晨試憑眺使我心目  
曠鳳闕高嵯峨歷歷

皇居壯西山峙其右勢若列屏障天青沆瀣合氣暖

露華釀草樹鬱蔥蒨巖嵐分背嚮朝霞淡猶明初  
旭藹未上或時紫嶙峋或時青滉漾或時見山腰  
瑩靚却塵埃或時露峰頂微茫翳雲浪名勝杳難  
窮變幻不可狀神功蓄雷雨巖內含寶藏千秋衛  
帝京環拱屹相向卧遊致足樂時來一騁望

院中古槐

玉堂晝掩風日晴翻堦紅藥姿盈盈古槐扶疎蔽  
庭院枝柯磊砢相却迎開華建始沃土產結根永  
昌虛宿精坡翁詩中美交翠楊子賦裏誇蔥青何  
年移種向此地來伴學士琴書清深沈鈴索莫教  
護周阿欄檻不受擎龍升南陸炎景逼館閣漸苦



多鬱蒸靚茲垂垂清蔭滿奚啻習習涼颺生繽紛  
黃花金縷亂盤拏素幹玉樹明苔莓祇合共承藉  
蔦蘿何事空纏紫天街兩旁植已遍國學幾區栽  
亦成朱輪碾香輾輾過青袍挾冊蹢躅行何如院  
內獨閒倩餐霞浥露潛滋榮撲刺枝頭藏宿鳥間  
關葉底流新鶯曾傳此木音響出省中入相惟休  
徵近來月白風輕夜可有冷然絲竹聲

擬陳正字薊邱覽古四首

昭王師郭隗築此黃金臺千秋豔買駿遺跡空秦  
灰何如舜闢門四海羅英才

郭隗臺

二

司空晉元臣博物世所難豈知憐才念弘獎及單  
寒不見三都賦一日傾長安

張華宅

三

賈詩雖寒餓中唐一雋人推敲慎隻字蹢躅京華  
塵世無韓昌黎髡緇終其身

賈島谷

四

去華對策戇瓦礫同棄捐椽人嗟已矣媚竈亦徒  
然一第縱未得高名至今傳

劉蕡祠

送友南歸

嗟君久行役去住倍關情髮向天涯短鬚從客裏  
生關河消歲月晴雨數郵程歸到江南日秋蟾分



外明

二

茂苑城西去何人獨倚樓已判長繡佛不悔覓封  
侯露白銀牀冷風高玉杵愁翻憐深夜坐簾外見  
歸舟

題馬玉振小照

秋水風神映玉山一編坐挾愛蕭閒書生縱有鳶  
肩相不向常何覓往還

二

畫筍琴囊清有餘常將六藝當畋漁兔園冊子休  
相溷學到忘名是讀書

侯大年鳳梧山房

白鶴江頭楊子居美髭坐擁五車書疎桐聳幹秋  
陰靜却悔黃塵拂袖餘

二

據梧嘯詠足棲遲新露晨流潤墨池雛鳳才名看  
日上龍門還欲待孫枝

題孟聿修小照

落帽風流憶孟嘉金鞭玉勒控青騮萬言指顧飛  
書檄倚馬文成日未斜

二

短袞烏紗卸急裝堤邊閒駐紫絲韁平原芳草看



盤馬不遣樓頭笑庾郎

送同年張昆貽南還

城頭吹角正銷魂  
况聽驪歌對酒尊  
才調如君猶失意  
文章自古不須論  
久諳世味身將隱  
肯傲時流舌尚存  
十載衣痕多舊淚  
今朝送爾又添痕

二

三張入雒自翩翩  
兩度分離意惘然  
豈戀京塵歸較晚  
恰逢水漲去如仙

銜盃落日辭靈運  
義手成詩憶惠連

令弟恂安善詩最敏捷

嗟我金門寥寂甚  
肯逢驛使寄新篇

使寄新篇

三

塵世升沈事總虛  
難兄咄咄意何如

謂繩其令兄

非無

公道翻除籍  
羸得閒身且著書  
蘭杜開時人到後

塤箎奏處酒行徐  
燈窗更憶重泉友

大占令兄與余同研席最

久美才早世小阮相期振翮初

大占令郎時方就試故云

四

重作書郎鬢似潘  
自嫌舌本展舒難  
冰銜初授貧方始

磚影頻移懶未安  
鄉思最憐秋月皎  
客程更念曉風寒

荷衣出拜當年事  
寄語雲亭愧冷官

業師

許秋佩即令表叔故及之

送友人南歸

滹沱積雨漲寒流  
一幅蒲帆下九秋  
爲客塵埃憎



夢日堂詩卷五  
三  
兩袖到家風景豁雙眸登高酒向南皮買下瀨風  
從北固收十月江干春色好丹楓深處聽晴鳩

贈宋牧仲憲副

槐鼎高風在家聲尺五天笏傳由魏相經授自韋  
賢中外盤根劇勳名弈葉連山川左輔重鎖鑰北  
門專地並扶風近才因屏翰宣舟車喧水陸襟帶  
控幽燕鈴閣傳符肅檐帷露冕褰旬畿收穗秬內  
府裕金錢散帙投壺暇吟詩刻燭便法書倒薤字  
麗句浣花箋旄鉞功須展藩方望孰先贊皇看繼  
述伊陟竚登延齊鄭原非耦潘楊幸托緣王凝知  
孟浪謝傳喜周旋似鸛真慙貌如鳶敢比肩肯容

瞻榮戟情話共纏綿

瀛臺引見恭紀

堤轉平橋柳萬絲芰荷深處建華旗人間有路來  
蓬島天上何緣到玉墀山翠遠浮仙仗外水光欲  
上

御屏時欣隨引奏歌靈沼冉冉林香步委蛇

二

承明通籍恰經年花影頻看過八磚敢說冰銜容  
嬾放恐於

聖世負陶甄奏名近覩

天顏喜得



旨欣承

御座前太液池頭多雨露不才獨荷

主恩偏

舊例鼎甲方在教習一應衙門職掌槩不開列充補是番講官郭榮缺出奉特旨將新

見蒙

鼎甲并二甲傳臚四人引恩點補蓋異數也

初充起居注官侍直恭紀

日照觚稜淑氣浮濡毫早立殿西頭萬幾剖決聞

天語元老疇咨識廟謀仗下仍畱恩更渥案前親切

古無侔

聖朝舉動千秋法愧乏鴻文紀大猷

二

避暑瀛洲別殿開

鑾輿乍說問安迴

夏日上移蹕瀛臺卽勤政殿聽政是日因詣

御瀛臺兩宮問

安仍御乾清門

班移苑柳晴光動影轉宮槐晝漏催啟

事羣看循左城記言獨許上重陔叨陪上相聞機

密新進承恩媿史才

奉

旨恭寫

御製古文淵鑒評語

恩賚五爪蟒緞廣紗綾綺各一恭紀

近臣偏得沐

恩光珍賜還看出尚方細楷微茫慙鳳翥雙縑燦爛

煥龍章製衣巧借宮雲色啟帙猶分



御幄香

聖世不須煩補袞長將翰墨奉垂裳

壽孫太夫子十六韻

岡陵今介壽河嶽昔鍾英尺五家聲舊奎三氣象

明高名楊伯起經術鄭康成神姬傳天策漢何少卿居家

天雨有老嫗到門探懷出策云公有陰德天賜公

子孫世享爵祿如此策數後子孫果累世貴盛出

後漢書注于公拓里閼王槐曾手植謝樹近庭生照乘

三珠秀摩霄一鳳鳴光華依日月才望冠蓬瀛掄

選持冰鑑延登近火城省歸行在許就養板輿迎

福豈臞仙並恩叅代國榮唐世爲宰相二親並上

尊良醞酒珍膳御廚羹銀漢星初度金波月正晴

刻鳩扶國老斟雉祝錢鏗卽聽宣麻下還看授杖

行公門叨厦庇侍席捧橋衡置酒於陵宅師生兩

世情唐楊嗣復知貢舉率門生迎其父于於陵里第中置酒時人謂之楊氏上下門生

和錢宸安自題半舫齋原韻

纔放湘簾藻影橫市喧不到卽蒼瀛坐看細雨圖

書潤卧愛微風枕簟清客夢半篙春水渡鄉心一

曲棹歌行濟川大費經綸手莫道中流一葦輕

壽同年劉資生太翁二首

公幹才名鄴下長中原耆德鬢毛蒼著書不記松

生甲設賑常教鶴減糧水飲讓廉張氏宅人耕詩

禮鄭公鄉琴樽洛社風流在佳會重開五老堂



二

駟馬門高玉樹清仙郎省覲下蓬瀛天香染得惟  
萊綵內饌攜歸是頴羹載酒登山藜杖健尋花出  
郭筍輶輕遙知鶴蓋稱觴日槐柳新陰夾道迎

哭同年吳萬子進士

楊雄芳譽滿公車王烈嘉修著里閭一第未酬文  
苑業半通猶待選人除亭空族譜憂時記篋鎖河  
渠治國書周此英賢才莫試悠悠天意復何如

輓苦孝張童子二首

童子爲同年楚中石虹  
令郎以哭母而殤石虹

有苦孝張童子  
子行畧徵詩

弱歲肫天性傷心玉樹傾秦綿甘殉母謝蘭竟捐

生隕絕杯棬痛相從草土情他年獨行傳死孝爲  
誰名

二

勤學張童子生知洵宿因人悲飛鵬鳥天酷葬麒  
麟血淚衣猶漬丹鉛帙尚新王戎情倍切我輩亦  
沾巾

題丁員外齋奉三廟

御書圖手卷

至尊緬欽聖闡道盛丕揚刻石表模楷擬金煥文章  
適皇謨典鉅宛委龍蚪蒼貞珉琢瑤巘舟車致璆  
琅銜



命出重臣遠道肅奉將駸駸驛駟獵獵旂旌颺仙仗引

綸綍軒蓋生榮光威遲旣勤瘁相度矧周詳鬱蔥鄒魯地豐碑屹相望初倬載雲漢餘輝帶秋陽皇華繁有徒盛事尠所當披圖壯遐矚感企思奮翔

方母貞烈崇祀詩

一慟悲城淚欲枯霑糜強起爲存孤九原飲茹分鸞侶廿載辛勤育鳳雛仲郢家風九苦膽歐陽慈教畫寒鑪禮宗俎豆輿評協更看

綸褒錫號殊

送高素侯侍講督學江南

才名北地擅空羣年少揮毫玉殿芬韓愈文章唐代闢薛包孝友漢庭聞冰壺曉映函關月絳帳秋高華嶽雲新拜持衡懸使節東南竹箭復輸君

二

寶劍宵騰虎氣浮先生藻鑑對清秋三都聲價高詞苑六代才華入選樓碧閨烟霞觀海得青箱珠玉過江收囊中脫穎多佳士竚看彤廷異數優

送周雅楫宮贊督學浙江

給札爭傳賦上林近推冰鑑使車臨大風乍見搜齊語白雪尋看變越吟台嶺烟雲騰綵筆西泠泉石炯清心絳紗春暖湖山曲桃李垂垂結晝陰



二

衣錦山川古帝鄉持衡羣喜得歐陽百年人物追  
南宋八代文章起盛唐絕學金華傳閩窻異書苑  
委探璆琅

聖

朝雅化崇儒術早見三鱣下講堂

送沈雨施令南川

昨夜除書出相看萬里行莫嗟雲棧遠猶喜繭絲  
輕吏事山城簡官心峽水清近來生聚久僻壤盡  
春耕

二

蜀道多奇賞蠻方有別春山花環馬首巖翠滴車

茵舞習巴渝舊歌翻曼衍新宦遊殊不惡惠政及  
賓民

三

攜家歸去近過峽及春前

雨施將從武林攜家入蜀趁春水未發時過峽

也水落江船穩裝輕驛路便貧能甘薄俸志可酌  
貪泉到日青疇暖田歌起暮烟

四

舊說西川好詩篇杜老傳滿籠朱橘美入饌白魚  
鮮筇杖供尋勝丹砂可駐年此中成吏隱仙綬自  
翩翩

五



聖朝勤撫字加意在遐方野闢無增賦時平有宿糧  
放衙竹簟冷行部荔枝香早晚徵循卓遲君入廟  
廊

四月十七日以

文皇后忌辰庶司例不啓事

上因江蘇巡撫員缺緊要

特召閣臣至

乾清宮西煖閣諮商

臣

元龍以記注官侍側啟奏畢

上顧閣臣宋德宜曰卿素善書可在朕前書大字一

幅又

顧

臣

元龍曰爾精於楷書朕素知之亦可寫大字一

幅因令就

御案作書諸內侍濡毫伸紙

上降座立案前觀書書畢荷蒙

嘉獎出

御書闕里碑文賜觀

上復親灑宸翰書月落烏啼霜滿天絕句一首卽

賜閣臣宋德宜出宮時晝漏已頻移矣伏念

臣

元龍

海澨鄙儒草茅新進幸陪

講幄得覩

宸章就玉几而揮毫傍

袞衣而拂素鼠鬚龍尾出自



御牀寶墨鸞牋分從甲帳沐

恩賜之優渥承

顧問之從容備極寵榮彌深惶悚退至直廬既記注

備書謹賦長句以紀一時之異數云

槐序開修景薰風扇早涼玉階輒影度金闕漏聲  
長暫輟諸司奏羣歌庶事康東南需嶽牧鎮撫選  
巖廊慎簡紆

宸念疇咨費審詳特宣元老入聯步侍臣忙肅穆趨  
仙掖從容捧

御牀記言聞密勿載筆許迴翔黼座箴銘滿縑屏訓  
誥彰牆非緣藻繡帷或集書囊萬卷分題躋千秋

鑑縹緗珠簾不動影寶篆自凝香似立蓬瀛上親  
依日月傍已欣登

秘殿何幸覩

宸章體格卑虞褚風神邁晉唐蛟龍形變化鸞鳳勢  
軒昂綠字昭雲漢穹碑煥廟堂光華常爛爛謨典  
倍洋洋闕里聞聲振尼山藉表章崇文歸斗極明  
道仰奎光

主聖彌謙抑臣愚莫頌颺

天顏瞻咫尺

溫旨聽琳琅末學邀

褒賞殊恩愧對揚紙煩中貴拂袖接宰臣行玉几容



憑藉銀鉤法渺茫觀書

親降座染翰傍

垂裳蛇蚓難舒腕虬蟄不自量汗顏心凜凜

恩意露瀼瀼翰苑誇榮遇文章慶耀芒退朝繙卷帙  
歸院紀明良人訝槎歸漢詩歌鳳噉岡千秋青史  
載異數豈尋常

壽座主平原董夫子四十韻

泰岱蒸雲合滄溟浴日新爲霖方夢傳間氣必生  
申濟上鍾殊傑朝端倚重臣襟期淵湛澹風度嶽  
嶙峋哲匠才華鉅儒宗學問醇豫章梁棟器弘璧  
廟廊珍遷固方先駕曹劉肯後塵揮毫千氣象看

劍動星辰深夜來前席亨衢躡要津愷陳謨誨切  
密贊論思勤選駿推燕市掄才借郢斤冰心懸曉  
旭霜氣肅秋旻學校才逾奮單寒志獲伸刮摩旋  
改色超擢定殊倫宗伯惇庸敘司徒底賦均持籌  
逢李絳操鑑得韋純亞相端風紀中台領搢紳直  
堪膺虎乳忠不避龍鱗獨立孤懷迥交孚一德親  
三臺兼要職兩制出溫綸獬廌旌旗肅騶虞草木  
仁澄清初攬轡感激欲埋輪羊帖惟安楚蕭何恰  
鎮秦官方風振古草野俗還淳碩畫垂天壤丹衷  
質鬼神東郊仍召畢南國尚歌郇邃密絲綸地端  
凝獻納身吹噓回橐籥指顧秉洪鈞物望韓休介



人知杜衍貧庭容中廐馬門尠後堂賓魏笏馨相  
繼楊環兆有因科名誇奪幟經術羨傳薪材質歸  
陶鑄顓蒙分隱淪剪毛收病顓礪玉到頑珉品置  
慙蘇軾搜揚廁却說升堂偏繾綣納履敢逡巡吟  
棠寒蟲晚芳榮小草春望山高莫歧測海濶無垠  
道大知天日祥開降嶽晨丹青勲業壯黑髮照麒麟

西苑勤政殿奏事應制二十韻

輦路薰風度天門曉仗移賡歌喜起日敷奏治平  
時地敞甘泉苑波涵太液池錦鱗牽荇藻翡翠戲  
漣漪文石苔千疊平橋柳萬絲照渠紅菡萏作架

白醪醺樓觀雲縹緲房櫳月蔽虧有花皆瑞聖無  
草不葳蕤味道深宮可娛神別殿宜堯階規最樸  
禹室製還卑素豈茅茨剪華仍丹雘施常懷峻宇  
戒每厓露臺思古聖羹牆接羣工几席咨憂勞存  
政事軫恤在嘉師

宸翰輝相映

皇情雅自怡詩書陳孔孟圖畫列軒義選樹啼鶯迥  
窺簾語燕遲露華仙掌浥霧氣采旄滋警設期門  
護香添侍女知梧岡看集鳳願矢卷阿詩

新秋雨霽

雲物值新秋澄鮮霽景浮沈寥看雁過宛轉聽鳴



鳩草際涼風動林間宿靄收日涵鵙鵲觀月映鳳  
凰樓碧落虛如拭青山潤欲流共占農慶早歌吹  
滿皇州

二

天外斷虹生窺簾却報晴嫩涼羣鳥語殘暑一蟬  
鳴風細遊絲颺雲開旭日明觚稜金的爍仙掌玉  
晶瑩楊柳樓臺色梧桐院落聲西山多爽氣大半  
入蓬瀛

秋日宴荷蘭安南貢使於禮部十二韻

聖主當陽日殊方職貢時文身瀚海舊椎結日南遺  
嶼險鼃鼃出林深狒狒窺賚琛通浪泊鞮譯致支

維琥珀青松夜珊瑚碧樹枝獻歸天府物誠歎外  
藩私光祿催開宴容臺敕典儀桂香堯酒泛菊醇  
舜樽移廣樂鈞天奏

皇恩湛露滋帑鞫看卉服呼祝聽侏離彷彿歌汾曲  
分明宴鎬詩遠人懷畏切歲歲舞丹墀

賦得紅藥當階翻

紫禁春歸後穠芳晚更妍豔分宮錦色香拂御爐  
烟地密迎風靜恩深裛露鮮文心同的的丰度自  
翩翩漿可供調鼎花宜傍御筵銅螽遲永晝得句  
玉階前

秋日瀛洲亭公讌十二韻限書字



玉宇粲涼候銀臺下直初九秋人乍爽三昧縛旋  
舒嘉會垂清暇高懷映碧虛沈沈仙署杳肅肅綺  
窗疎露畹新培菊寒池已覆藻井泉隨手汲苔蘚  
不教除蓬鱸供華饌松醪發舊儲官清原似水地  
冷喜連茹絳幕憐孤燕丹霄愧散樗鈴懸心敢醉  
鵲集酒行徐待月還分韻挑燈更校書晨趨誠恐  
後深夜戒朝車

送同年張昆貽進士南歸祝兩尊人壽

燕喜堂開奏鼓鐘少微星並女媁逢蒿園仲蔚推  
高隱絳帳宣文識禮宗綵袞階前新燦爛鹿車花  
下舊從容阿鴻早已摩天去接翅還看有二龍

二

曾共賢郎聽鹿鳴又陪圍棘見成名攜歸賜餅紅  
綾美介壽仙醪白隋清伏臘娛親懷洛涘田園養  
志卽蓬瀛偏余寂莫金門客三復南陔愧此情

雪

密舞斜侵點綴濃憑將玉戲破頑冬俄驚石化千  
年鶴乍聽風號百尺松牽惹詩腸呵凍研勾連酒  
興到殘鐘曉來怕踏銀臺路寫就寒吟著意封

贈徐筠臯

仙令符連剖歸來志早成文章孝穆貴風度偉長  
清魯甸遺賢績堯都得治聲一官鳬舄駐千里鶴



觴傾黃菊新邀寵青山舊締盟烟波尋侶伴松石  
傲公卿著述期偏大琴樽樂自盈遂初應有賦寄  
託在江蘅

送查聲山庶常請假南歸

殿陛揮毫衆所驚才華籍甚壓羣英自慚和范誇  
衣鉢却喜郊祁換奏名聲山已定一甲第一一人及  
讀卷至二甲第一乃荆州  
名上問爲誰中堂奏查某之叔  
不便居姪後特易置之與郊祁事頗相類親老  
欣逢三釜養家貧贏得一官清相看同有循陔慕  
羨爾先歸意轉榮

二

昨日

新綸下玉墀舉朝喜得荷恩私擎來紫誥泥猶濕賜  
出黃盤錦更奇法醞攜添春酒色宮花却傍綵幡  
移高堂聞說猶強飯早返春明答

主知

送前輩彭訪濂侍講請假終養

論思前席重名儒愛日承歡綵服趨拜表初歸玉  
仲寶講筵應憶范淳夫雉羹鼎畔稱觴獻鳩杖花  
前帶醉扶忠孝一心能兩盡不徒逮養羨庭烏

二

陳情初許下

綸音異數殊榮動士林錫類此時伸寸草許身當日



比雙金優閒堪陋安仁賦潔白何慙束皙吟惟有  
丹心頻戀闕只緣遭遇

主恩深

送萬貞一之五湖令

詎厭承明珥筆頻恰紆墨綬颺鳬新編書望久虛  
詞席隨牒名偏隸選人彭澤之官聊縱酒廬江捧  
檄祇娛親莫嫌五斗霑微祿却勝金門索米貧

二

花木連牆屬比鄰官曹接跡數同羣問奇恰悵元  
亭遠授簡還驚綵筆分野戍淮南烟入樹秋筵泗  
上水侵雲相思森森江天濶珍重循良最早聞

馬丹谷待詔七十

蕊榜才高棣萼馨耆英早入鬢還青東華一踏金  
門雪南國雙傳絳帳經膝下龍鸞王氏集階前蘭  
玉謝家庭清資大隱神仙是臣朔何疑說歲星

壽前輩吳西李封翁七十

百尺樓高氣軼羣長揚久擬薦雄文聲華鸞掖資  
先業著述雞林綴舊聞入社衣冠圖九老登堂羔  
雁禮三君仙郎珥筆方前席丹地遙瞻五色雲

送卞令之按察浙江

八龍門第玉嶙峋荀儉魁梧更軼倫詩興梅花登  
閣在原籍揚州頌聲棠樹過江新冠彈獬豸風霜肅幡



畫騶虞草木仁槐棘早儲公輔器坦夫人物宋名

臣

呂夷簡曾任  
浙江提刑

二

錢塘建業昔王居並挹高暉駐露車東晉風流春  
屐後西陵烟水暮鐘餘歐公雅鑒搜金石坡老閒  
情放鳥魚兩制家聲傳棨戟庾樓清嘯復何如

送同年劉海觀假旋十韻

玉署官曹接三年喜盍羣孝威兄弟重公幹友朋  
殷謝璧連牀倚荀香促坐熏鏤冰看疊詠鋸屑賞  
論文客夢燕南樹鄉心渭北雲綵衣頻憶舞征袂  
却愁分別路天難曙離筵酒易醺馬嘶過嶺失雞

唱入關聞隴月秋砧亂秦山晚葉紛京華依伯氏  
聽雁定思君

送錢燕穀南歸

西風刮面記同行四載相過話旅情騎馬慣來成  
久客授經到處識先生樽前別緒驚驪唱驛路歸  
心聽雁鳴此後相思烟樹隔霜華共照寸心明

二

每逢皎月增歸思却對秋雲薄宦情藥墅花源懷  
小隱漁磯柳岸足平生何當好友臨岐別又聽寒  
蟬繞砌鳴到日蟹肥香稻熟菊花籬畔羨淵明

送佟國光之延平別駕任



愛日堂詩卷五  
三  
鐔州司馬麟鳳姿貂蟬甲第生雲楣周之號鄭漢  
許史天家肺腑邦藩維淵渟嶽峙年正少風骨磊  
砢才魁奇雅懷稽古愛儒素不向裘馬矜光儀東  
華停蓋意相善迂疎竊訝蒙心知尊君開府懋嘉  
績西江羊杜騰謳思褒終

諭祭備盛典宰木刻石蟠蛟螭

天語悱惻義嚴重却呼薊筆書其詞捧持再拜貺稠  
疊細旃輕綺雲雷彝歌鐘八部開燕饗嗟此隆禮  
當非宜君身堂堂公輔器暫典遠郡綏烝黎延津  
龍劍破空躍天矯變化會有期五侯家世壯棨戟  
竚看八座張旌麾他年使相盛勳業爲公更寫平

淮碑

錢介邱壽

一瓊需次小遲回且傍鄉園息影來窺戶鳥聲全  
竹樹入簾花氣半池臺賓朋鄒氏雕龍譽子弟曹  
家繡虎才練水盈盈南極燦鶴觴千里爲君開

謝封翁壽

著述東臯歲月移弘微高行里間知遺經魯國傳  
公輔名士河汾出帝師掃徑攜琴偕客醉尋山著  
屐共僧基庭階玉樹輝萊綵蓬膾天香好介眉

壽同年沈芷岸太翁

織簾高躅世應稀握麈移牀對客揮王氏東廂推



逸少謝家比舍重弘微一琴窗下清風度八詠樓  
中白雪飛投老林園供晏息西山泉乳藥苗肥

二

鯉庭蹀躞起龍媒片玉能兼八桂才李泌家聲千  
帙擁韋賢世德一經開春風蠟鳳牽衣舞秋水銀  
鱸入饌來猶子通門慙繫跡登堂羔雁憶傳杯

蔣裕菴少司農封翁崇祀鄉賢詩十六韻

三晉儒宗鉅千秋祀典新遺經傳魯國絕學繼河  
津綵筆波瀾濶潛修德業醇名家森禮法前輩刷  
精神豁達衷披雪吹噓氣釀春望風消鬪螳分水  
活枯鱗杖屨安時俗鬚眉逼古人綿延深後澤蘊

積起名臣夫子龍彫彥清時柱石身緒餘開遠大  
根柢出經綸禹甸山川古堯封里井淳故鄉草野  
直清議士林真磊落瞻嵩岱輝光指鳳麟殊恩高  
隱德盛事錫明禋上序歌絃在諸生俎豆陳西河  
節槩地今昔振芳塵

己巳正月初八日扈從

聖駕南巡由

午門乘馬出

大清門恭紀

未央鐘動曙星移

聖主巡方早及時間闔曉懸金縷帖觚稜日照翠雲



旗寒隨豹尾麾前散春向龍媒足下滋珥筆班中  
叨扈從身依尺五下彤墀

二

六龍南幸及春正新進隨

鑾荷寵榮白面金鞭陪後乘短衣窄裋笑書生塵消  
馬首和風暖路轉霓旌旭照明計日江南春色滿  
到家真是錦衣行

隨

駕由南苑行圍出南紅門

城南廡廡是周原路轉橋橫入苑門旆擁三辰環  
日馭營分五校列雲屯馬馳朱汗圍初合兔帶青莖

草乍翻日暮晾鷹臺畔過香塵匝地不聞喧

十三日立春

駕駐德州

斗柄初隨

玉輅東春神捧日曉瞳矐條風乍拂朱旗上瑞靄先  
回翠幄中衛水冰消微隱綠平原草暖暗生紅  
豫遊到處恩膏沛歡洽青疇樂未窮

十四日

駕至平原縣七里舖特頒

諭旨蠲免東省明年正賦

青齊重見度



金輿省俗重煩問里閭共慶民風安作息還傳  
天語沛蠲除推恩寧待回

鑾日草

詔頻催下馬餘聞

命濡毫先拜舞從今汗簡不勝書

二

帝咨民瘼厪如傷欲令崇朝愷澤滂中使飛馳催進  
草侍臣呵凍未成章周廬靜處燒官燭

行殿歸遲染御香爲待嚴程須早發夜深不敢解衣  
裳

駕幸濟南府巡撫署內觀珍珠泉

命從官善書者各書泉亭匾額元龍與焉諸臣公請  
御書畱題

上親洒宸翰書作霖二大字諸臣環立瞻仰敬賡二  
律以誌榮遇

鵲峰晴雪映龍旌

日馭飛臨歷下城紫氣乍從珠溜涌青陽初向碧潭  
生虛能鑒物迴

天眷清可澄懷悅

聖情一自亭邊排綵仗靈湫千古被榮名

二

寶翰



親揮煥斗牛效靈川谷佐

皇猷銀鉤健筆垂珠露玉藻新恩映錦流共仰

天章同日麗長畱

聖澤與春浮叨隨

巡幸觀名勝此日真同霄漢遊

珍珠泉

珍珠舊有名官署一泓清似沸光無定無風影不  
平溯源知壤潤俯鑒覺心清今日邀

宸賞澄瀾被寵榮

二

濟北泉源廣斯泉衆所驚澄鮮稱上善瀾澳擅嘉

名蟹眼千重泛珠光萬顆明畱題瞻

寶翰潤物萬年清

聖駕登濟南城閱視畢

回輦將下城從官皆控馬立女牆傍

上顧元龍曰爾書生可卽乘馬隨朕而行勿落後擁

擠可慮隨令中使扶元龍上馬感

恩恭紀

懦弱偏邀

聖主憐亟呼乘馬女牆邊親依豹尾垂鞭穩近侍龍  
媒得路先峻坂緩行忘駑劣崇墉徐度任廻旋共  
誇新進邀



殊寵自是崇儒

德意偏

二十九日

駕駐清河縣特頒

諭旨蠲免江南積欠錢糧恭紀

龍舟如駛下清河列隊天吳候

駕過

明詔載頒弘德意積逋全豁渙恩波太平有象農桑  
足造化無私雨露多民物總歸亭育內歡騰江左  
起謳歌

二十九日渡江

金焦離立隱樓臺照耀鸞旌淑氣迴旭日光浮

天仗外彩霞暖護

御舸來嵩呼夾岸濤聲應羽衛臨江練影開一望澄  
波涵萬象倚舷欲賦愧非才

二

五年不渡大江濱何意重來作侍臣偶上漁舟原  
近日却依豹尾試垂綸滄洲乍到疑歸夢樵叟相  
逢似故人不是

君恩憐久客鄉關那有未閒身

二月初二日夜泊梁溪

碧山如畫是梁溪綵幔華燈簇簇齊百和香風迎



愛日堂詩卷五  
三  
柅度千條銀燭隔林迷霏烟徹夜圍黃幄微雨明  
朝潤綠萸不是江南晴日少隨

鑾膏澤沛春畦

愛日堂詩卷六

却掃集

余自己巳正月扈從

南巡至吳門聞先慈之訃徒跣奔還居廬守制是年  
九月憲臣郭琇疏劾官詹高士奇并指大  
司空王鴻緒侍講學士王頊齡給事中何  
璉及元龍爲黨人蓋寒家系出渤海與官  
詹爲叔姪遂牽引及之疏上奉

旨五人皆休致回籍時余方在籍讀禮旣奉休致杜  
門却掃不出戶庭祥琴之後偶有唱和感  
懷之什名曰却掃集



中秋前一日江村宮詹寄示和仇山村吟卷  
詩四首依韻奉答

不才只合作閒人曾向京華滯幾春  
世路艱危渾是幻交情反覆更誰真  
乘車夢境忘因想却掃心情絕喜  
嗔紅蓼白蘋何處好腰鎌已辦可全身

二

雨過秋堂颯颯風緇塵應不到牆東  
上竿終遂江湖志曳尾難忘造化功  
薄俗人情從首鼠故鄉節物又賓鴻  
長畱公論千秋在得失何妨擬塞翁

三

噩夢頻驚在疚身敢嗟搖落不逢春  
無端黑白紛

朝論自笑迂疎號黨人磨耗光陰憑  
蠹簡料量生計問禾困

君恩未報慙知己剩有孤懷一寸真

四

便脫朝衫換葛巾幸逢

聖世早投簪匡時默運鹽梅手去國  
彌堅鐵石心遠寄新詩傳尺素漫將里  
曲和鳴琴蒼生屬望遲公出容我安居  
抱膝吟

倒用前韻再和奉寄

寂寞空階蟋蟀吟銷憂未忍聽鳴琴  
緘貽篇什憐同病畫贈溪山愜素心

江村示詩兼貽小畫

削迹何妨長抱



繭休官那復戀遺簪中天日皎飛蛾散一笑風前  
整角巾

二

高卧烟霞得性真笑他雀鼠開空困路旁總任挪  
揄鬼道險甘爲放棄人物候蕭條初換節秋容閒  
澹不爭春一枝尚有漂搖懼容易歸田說保身

三

且作垂綸江上翁笑看寥廓指翔鴻赤心誰識調  
和苦丹地頻思啟沃功禍福機關從倚伏盈虛門  
館任西東沙蟲變化渾無定快聽窗前落葉風

四

清時那敢傲抽身蘭蕙當門總被嗔蘇氏辨奸方  
識僞歐陽描畫豈成真相期冰雪貞寒節已分繁  
華讓早春滿地駭機惟塞戶漫勞殘客慰陳人

贈錢遵王三十六韻

入夏困炎熱索居寡徒偶况當讀禮日枯寂惟墨  
守扁舟造吳門畱滯苦弗久遂鼓琴川棹一葉迤  
北走齊女門宛然宣公墓依舊田歌響桔槔漁具  
掛簪笏雨餘蛙噪岸日落蟬鳴柳虞山墮而峻青  
巒方蚴蟉尚湖衍以泓綠波正清瀏却來訪親串  
相對快聚首何期邂逅間得遇素心友負郭田幾  
頃環堵宮一畝邀我長林傍坐我蕭齋右鼎彝富



三代圖書誇二酉堆牀縑與緗羅几尊共占欵識  
辨真贗跋尾別誰某名花眼界供妙香鼻觀受雅  
懷等班荆逸興同剪韭釀法昔真一食經古牢九  
席地聊縱意談天亦侈口羨君老名士譜系出錢  
後讀破書萬卷養就才八斗親承宗伯公緒論發  
蒙蔀僞體旣別裁奧旨復擊扣獨樹藝苑幟盡薙  
詞壇莠蝸蟾息沸羹狐狸斂蹠瓜衣鉢付克荷辦  
香祝不朽荒江抱經處瞥見靈光陡文筆漆園生  
詩篇少陵叟在昔尚所無于今豈堪有接座喜傾  
心迴船惆分手縞紵幸有託雞黍期莫負秋深楓  
葉丹錦綺被陵阜未識樂樂者此際得暇否塵埃

須擺落精神務抖搜君如許過從玄亭重載酒

幼孜兄下第後見示五絕句依韻奉和

浮名君莫歎無成世事於今幾變更落第休官同  
况味相看枯坐聽秋聲

二

寥廓江天任所之轅駒局促豈堪支杜門新得真  
人訣鍊就癡頑未老時

三

宿業消除十二緣茶烟禪榻自蕭然遊魚若悟深  
潭樂肯逐浮漚上竹竿

四



抹月批風從吾好  
絡頭牽鼻笑他忙  
知兄雅度容卿輩  
萬斛澄波不可量

五

行藏蹭蹬古來難  
泥飲清宵且盡歡  
仙佛要須真性在  
漫爭蝸角爲求官

幼孜兄疊前韻見示再和奉答

早達由來讓晚成  
共嗟身事話深更  
流光代謝知何定  
又聽秋空一雁聲

二

當前清福誰能享  
半世勞人強自支  
但使有兒從巧拙  
兩翁共樂耦耕時

來詩有輸與兩街屠販子團樂兒女夜深時之句蓋

傷得子之晚也余與兄同病故云

三

折髀獲駿總隨緣  
著就潛夫自韞然  
一幅畫圖須妙手  
菰烟蘆雪兩垂竿

四

長吟小飲堪成醉  
採藥栽花也自忙  
贏得秋宵清夢穩  
曉來無事費商量

五

揮戈挽日事誠難  
一笑懜騰醉後歡  
攬鏡莫嫌青鬢改  
丹臺有分賴無官

二月旣望堅齋藥  
洲相繼北發兼攜幼弟入



都就試停舟虎阜親知言別是日瞻拜先外  
父文恪公祠感懷悵別共得八章贈堅齋兄  
弟并示同行王弘導惠蔚廬兩兄

廿年蹤跡屢分離此別何當黯自思萬事暗隨青  
鬢改幾人未易寸心期沙堤省踏當時路玉署重  
尋舊日題觸緒低徊難盡說班騅任隔綠楊嘶

二

昔年京雒去如歸今日辭家事總違攜得賜書餘  
手澤捧來

宸翰睹恩輝家風只合循恭謹世路無須問是非故  
笏甘棠存別榻他時認取舊黃扉

三

光風習習拂征鞍兄弟才名洵二難典誥文章推  
紫禁晉唐書畫重金鑾昇平相業畱清節珍重家  
聲耐冷官最是

九重頻念舊酬恩未惜寸心殫

四

紅樓綠舫映雙旌黯黯春心爲送行幼弟相攜驚  
客路名師共載見交情一經繼武知源遠六翮冲  
霄待養成極目天涯芳草路知交何處費逢迎

五

新祠瞻拜暫停舟儼對儀型隔絳幃一代鼎鐘垂



偉烈千秋俎豆見詒謀教忠庭訓聽猶在遺愛鄉  
人淚未收相送諸孤堦下別於今虎阜是西州

六

西山鬱鬱草芊綿萬樹穠芳一抹烟舊雨蓬萊來  
二妙晚晴廣石別羣賢好花偏隔離人袂弱柳頻  
牽送客船到日京華春晚晚滿籠芍藥出塵鮮

七

龍鬬江雲幾變遷蝦蟇却自笑牽連三休於我真  
相稱五噫憑君莫浪傳午夜趁朝成昨夢丁年學  
道得前緣行行何事勞頻憶樊上相遲二十年

八

紛紜棊局置身難堅坐何妨袖手觀願學冥鴻翔  
宇外愁聽反舌及春殘巢痕新掃江天濶農具初  
成歲月寬不是

君恩深似海吾生端不憶長安

中秋後一日幼孜兄招同陟齋丙齋寄齋子  
榮大年諸兄嘉賓觀華佑昆諸姪同集隅園  
和幼孜兄原韻

乍到家園似夢中小橋流水昔年同殘荷冷落香  
仍遠叢竹欹斜月半籠列坐恰如歸雁影暫來重  
整釣魚筒便同洛涘思招隱蟹舍漁莊也是宮

二



博塞樗蒲盡日歡旁觀勝負箇中難論詩肯便輸  
前輩行酒無妨作熱官月窟待分明歲桂霜林好  
護隔年蘭綠尊濫濫清光滿又聽啼蜚起石闌

十八日陟齋兄招諸兄弟小集隅園時兄將  
之官楚南

鴻雁參差二載中一尊詎意故園同懸符意氣看  
迎刃却掃心情似觸籠爲政明應如酒律輟琴懶  
并謝詩筒行藏蹤跡知何定坐聽鐘聲起梵宮

二

衣冠純素強追歡兄弟天涯此會難海岱歸人初  
報最勿齋兄行池塘別緒又之官陟齋兄將至秋  
取初歸安仁令任

分閬苑將舒桂春暖湘江待採蘭林外斑騅催月  
落共扶殘醉倚危闌

十九日再集子榮兄齋

平分時序素商中嘉會連宵勝地同海蟹早肥初  
入饌池蓮晚擷尚盈籠二參醉不饒長甕三雅傾  
還進碧筒坐久波光連月色分明身在水晶宮

二

呼盧倩手強爲歡壯氣消磨喝采難自愛漁磯思  
結隱不貪良醞更輕官漸涼池上生紅蓼餘暖林  
間動紫蘭却羨沙鷗閒適甚不堪戢羽入雕闌

廿二日再集寄齋兄齋



新成小築似壺中丹竈茶鑪迥不同鶴使凌晨歸  
坐帳鵝羣傍晚上池籠澆書常執長匏柄攤飯親  
攜汲水筒重整平泉懷世德不容旋馬自成宮

二

射覆分曹恣劇歡人生出處事皆難強尋蕉鹿還  
爭夢未悟通苓却愛官上藥可春供服食遺經能  
讀羨芝蘭白波快卷觥頻換月午參斜興未闌

廿五日再集丙齋兄齋

相望登瀛二紀中蕭閒宦況後先同校書歲月甘  
投閣野鶴心情不愛籠深澗千秋畱石室酒鎗鎮  
日伴詩筒家門全盛藏迂拙兩版衡門五畝宮

二

文酒招攜且盡歡津途今日致身難敢期民譽追  
前輩恐隋家聲耐冷官清蔭窗前環夏木晚香庭  
內發秋蘭嘉肴疊進杯頻洗燭短星高話未闌

庚午花朝幼孜兄招同丙齋寄齋子榮大年  
諸兄暨姪允文嘉賓幼鯤步出北郊至范園

小飲

散步城陰遠市譁相攜出郭爲尋花平鋪抹綠穠  
于錦點綴繁紅爛似霞勝地但隨樵客路春光先  
到野人家塵纓已滌甘棲遯好放浮生向水涯

二



憂患中年興寂寥驚心物候又花朝閒看歸燕尋  
荒壘偶聽啼鳩過小橋解事老僧煩問訊忘機近  
局許招邀人生最有田園樂萬斛愁腸到此消

三

野水疎籬一徑斜種桑隙處卽栽花幾經護惜成  
幽築得遂徜徉把釣車池畔仙葩餘豔魄壁間題  
句笑籠紗周雅輯宮贊昔年過此有題贈詩篇主人新加裝潢示客莫嫌桃李  
皆粗俗畱得殘枝記歲華

四

爲愛春郊景物饒行廚載酒不辭遙平疇草軟堪  
扶杖密樹風輕好掛瓢朋舊交疎耽懶放弟兄興

劇喜頻招酒酣踏月尋歸路又聽嚴更起麗譙

題朱三英小照

柳岸披襟理釣絲破除塵事久忘機半篙春水波  
長息一抹烟巒態不移待月歸遲攜昔酒趁涼起  
早得新詩任他華轂矜來往未及磯頭坐穩時

二

不著僧衣不道裝科頭箕踞對滄浪吞鉤那識深  
潛樂結網何須羨得忙懶較輸贏拋弈局能寬歲  
月愛漁莊此中大有經綸手高隱清時未是狂

座主司空孫師

賜葬陽山執紼之餘感賦四首



陽山四面擁層巒

賜葬崔嵬勢鬱盤當墓清泉心共潔遶垣翠柏歲同寒  
崇碑眷舊垂

天語桐酒澆哀出大官多少勲名傳史冊君臣終始  
古今難

二

吾師重望壓朝班豈意騎箕杳莫攀十載訐謨成  
主德兩年胼胝軫民艱官清去位無遺橐典備褒忠  
有賜山幾度西州空洒淚酬恩何日擬雙環

三

記得隨

鑾下玉墀五更執手話忘疲

已巳正月八日余扈從

言別余至吳門聞先慈之訃

歸里是歲八月師卒于位 豈知禁掖分攜日便

是門牆訣別時青史尚餘公論在丹心只有

聖人知台星顯晦關消長不獨銜哀弟子私

四

堂封寂寂閤音塵當代羣推社稷臣壯歲神枯因  
報

主九原腸斷爲思親橫經馬帳真如夢立雪程門愧

此身直道敢違夫子訓自甘迂拙老沈淪

贈杭州蘇太守

餘杭勝事話坡仙典郡從來是宿緣一代才名尊



世系千秋治績邇前賢放衙舊識湖山美隨轂新  
霑雨露鮮見說官清公事簡不妨風采寄雲烟

二

昨歲曾經翠輦遊恩波萬頃溢湖流光生草樹春  
常駐澤潤山川暖欲浮易俗頻煩

聖主念醇風還藉使君收畫船鼉鼓成熙皞始信東

南第一州

三

盛世分符樂有餘仙才暫借賜高車風流異代遙  
相映遭遇前人羨不如禱祝猶傳放鵠俗畱題爭  
乞換羊書高懷朗照湖心水萬象包涵入太虛

四

從來雅化期無擾簿領從容晝自長換屐登山皆  
政事據牀判牒亦文章方輿定合添名蹟斗分還  
應耀宿芒只恐璽書徵召速鋒車又趣舍人裝

五

恩許歸田學耦耕已埋姓氏濯塵纓忽傳才子塞  
帷過也逐州民夾道迎滌硯試臨坡老帖題詩真  
見野人情願公節鎮長畱此永爲江山錫令名

王咸中先生以王石谷所畫青門送行圖屬

題四首

猶憶南宮上計時平津邸畔把離卮七年人事都



遷改話到青門淚滿頤

二

重踏緇塵事總非歸鞭又逐片雲飛  
舅甥繾綣應難別恐後花朝旋拂衣

三

小阮才名滿帝都臨岐不語意如何  
最憐筆墨難摹處間指驪駒白玉珂

四

休休亭異短長亭歸卧江鄉笑獨醒  
一幅畫圖驚昔夢如君真不愧冥鴻

立春

條風解凍轉青陽萬彙昭蘇日漸長  
菜薦五辛更節序莫舒六葉得春光  
牆東偏藉清輝照舍北從他積雪妨  
雲物不關田野事歲占也要問農祥

二

晨興那復撥爐灰萬事從頭總放開  
終見寒威隨歲盡又邀和煦自天迴  
新枝花發原無定舊畹蘭滋不用催  
含凍疎香猶好在他時繁豔莫相猜

壽周蓉湖太翁

青宮賓榻久迴翔兩度衡文出建章  
絳帳看垂萊子袖板輿迎養鄭公鄉  
越江父老爭扶杖魯國諸生半躋堂  
樂志惟餘清節在士林歌頌祝無疆



二

玉署稱觴奏鼓鐘少微星並女嬋逢花封舊績推  
循吏璇闥芳型擅禮宗梅蕊衝寒瑤席啟椒盤獻  
歲上尊濃耆英洛社宣文帳仙賚還同錫命重

送當湖朱令行取北上

近接棠陰帶水通歸耕隣壤拂仁風幾年輿頌騰  
南國此日徵書出漢宮境上鳴騶爭截鐙朝端威  
鳳待棲桐從今大展經綸手定有謨猷達聖聰

二

憶昔秋風附驥時廿年人事幾遷移憑君正直持  
朝論愧我迂疎負

主知月皎南湖縈別緒霜明北闕仰丰儀新詩投贈  
情何限不爲行藏意便岐

題張洵安小照

富貴從來憎讀書達人只合守蝸廬短衣策馬何  
爲者一編自抱上公車君不見紛紛焚硯致通顯  
不脫青衫乍軒冕屋頭炙手擁高貲却笑腐儒徒  
偃蹇又不見大羅天上選羣英一朝得路羨登瀛  
俛首汗青頭盡白臣饑欲死思歸耕丈夫通塞會  
有時得志要當銘鼎彝登車攬轡有深意區區東  
塗西抹何能爲吁嗟乎張子驚才世無兩屢躋春  
官意自廣甘貧不易樂道心俯視一切成獨往自




愛日堂詩卷二  
十四  
圖席帽走風塵雄姿顧盼誇九垓他年大展經綸  
手肯將榮利齷齪終其身



圖席帽走風塵雄姿頗盼的九垓他年大展經綸  
手肯將榮利離離終其身







T5466/7910

3



CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

OCT . 4 1960

愛日堂詩卷七  
瑞名集一  
余頃聞家岳被命休致自計將老海濱不  
作春明之夢久矣未卜一丹忽蒙  
特旨以原官起用重玷清列自士申至甲申而史官  
辭歷層累再展  
謹將月重  
北極星中門  
南極星中門  
西極星中門  
東極星中門



愛日堂詩卷七

環召集一

辛未壬申  
癸酉

哈佛大學漢和  
圖書館珍藏印

余讀禮家居被論休致自甘終老海濱不  
作春明之夢矣辛未十一月忽蒙

特旨以原官起用重玷清班自壬申至甲申由史官  
洊歷詹事再厠

講幄日直

禁廷中間

北征朔漠

南巡西巡無不扈行凡官於朝者十三載所得之詩

釐爲五卷名曰環召集



伏處田里驚聞

恩旨召還戒塗北土感懷紀恩兼別同里親知八首  
不材只合老田園何意寒灰乍轉暄縱使腰鎌皆  
聖澤重驚繫組是

殊恩全身術愧當年昧守拙心堪此日捫拂拭巢痕  
猶好在

九重親與護孤根

二

寵命俄傳淚不禁微臣偏荷

主知深陽回暖律開亨象日皎中天散積陰敢說林  
泉耽野服終慙麋鹿負華簪相看蹙蹙誠何補剩

有酬恩一寸心

三

趨庭命促歸丹陛望闕心懸戀白雲教子却憐成  
拙宦課孫猶喜並能文

謂世南尚一兩孤姪

十洲著述才難

稱三載行藏跡豈分但願遂初他日早蓬頭椎髻  
樂耕耘

四

王程敦迫意恩恩幾度陳情未許通

力懇當事以親老代題不

允僚友共傳良訊遠交親翻戀別樽同春歸漸覺

寒威散日近行瞻淑景融最是鄉心爭去住非關

鱸膾憶秋風



五

河漸初解恰逢春  
檢點奚囊拂舊塵  
豈有文章酬聖主  
漫將行李累衰親  
重趨玉陛難醫懶  
自耐冰銜不厭貧  
到及上元燈火盛  
泰階景象一時新

六

樂志閒居性久安  
夢魂那復憶彈冠  
花南屋可容雙膝  
硯北田能寄一簞  
再跨征鞍髀肉改  
重披賜錦帶圍寬  
故園朋舊如相念  
爲我磯頭貯釣竿

七

知交勗勉趣登程  
捧日還牽愛日情  
自是臣心同寸草  
難言子職愧躬耕  
瞻天載拜新

恩命昭雪重披舊  
綢誠垂白老親含  
淚別矢將貞白  
答離明

八

讀書無術愧爲儒  
寡合從人笑我迂  
草野餘生原再造  
玉階何幸得重趨  
官叨清秩誠多忝

帝鑒愚誠自不孤  
報國文章成底事  
感恩猶有未捐軀

壬申秋日偕講筵諸先生集宋葑洲編修之  
眞香亭泥飲徵歌連日達旦時葑洲新充講  
官余以原銜再充周廣菴前輩請假將歸同  
年黃硯芝編修賦二詩以紀一時盛事次韻



奉酬

堂構依然杜曲間，簪裾廣席許追攀。  
芳時幸際昇平日，嘉會欣陪供奉班。  
沸耳笙歌人語悄，繞簷銀燭月光閒。  
如蘭臭味判泥飲，若箇顏唐倒玉山。

二

笑向秋河望海槎，  
惓惓雙眼醉生花。  
祗憐節序時頻換，  
共羨尊鱸計未賒。  
謂廣菴先生  
滴漏漸稀魚鑰動，  
飄燈欲去帽簷斜。  
明朝贏得兒童語，  
又說山公過習家。

題錢宸菴侍御早朝圖

突兀班心迥不羣，  
鸞旂仙仗護氤氲。  
三端更直推

公望雙闕常叅對

聖君待漏月籠金，  
掌露趨朝日麗碧。  
天雲繙經要進倪，  
寬議熏歇朝衣待夜分。

二

觚稜金爵俯蒼茫，  
天上烟雲異故鄉。  
少日江山挾才調，  
頻年臺閣動風霜。  
文章久識經綸業，  
風度羣瞻領袖長。  
汝穎歸來期尚早，  
幾容清夢得徜徉。

題黃硯芝編修黃山採芝圖

一丈霜紈六六峰，  
分明曹阮有仙蹤。  
湯池丹竈皆靈境，  
今日尋常眼底逢。

二



不知何處是塵寰  
櫺笕芒鞋水石間  
自是謝公邱壑意  
仙山看遍又黃山

三

頻年冰署鎮相親  
此日輸君畫裏身  
憑仗丹青顧陸手  
爲儂添箇採芝人

送吳商志遊汴梁

玉河柳色蘸春流  
惆悵都亭送客遊  
去國舊聞吳季子  
入梁今謁漢諸侯  
奚囊琴劍催行色  
驛路鶯花浣旅愁  
萬井提封如畫裏  
登臨應上夕陽樓

二

中州陳迹劫灰平  
弔古懸知百感生  
窮路至今悲

阮籍監門無處覓  
侯嬴金明池淺餘  
荒水廣武山空有  
故城詞賦卽看枚  
叟是好將新句寫  
羈情

題王麓臺給諫做大癡畫

大癡吹笛車箱去  
粉本零殘半有無  
妙手今推王給事  
人間重見富春圖

送華子千南歸

眼底知君旅思寬  
飄然襆被出長安  
曉風殘月人行早  
淺水春冰馬渡寒  
驛路逶迤供入畫  
客程登涉好加餐  
到時遙憶蓉湖上  
一舸漁灣把釣竿

臘雪

六出喜先春  
同雲布九垓  
流膏能潤物  
應候及蕭



辰盈尺知呈瑞班形總獻珍林欹珠錯落岫迴玉  
璘珣入地蝗蝻盡依簷鳥雀馴向暝漆弱線測景  
動清塵陰沍冰花合陽生大澤均旣霑方奏雅于  
耜待吹豳宜麥逢三極占年慰兆人映書欣皎潔  
披覽愧丰神棐几寒光淨疎窗曙色新時和蘇品  
彙靜對感洪鈞

癸酉春日

上御西煖閣每日宣翰林官四人輪班入內於

御前賜几硯賜坐

上親命題或古人詩或

御製詩拈示一句各賦詩一首臣元龍於輪直之外

偶聞一題輒擬爲之凡得十八首

賦得世間不但山中好

掩關堅坐得清娛白石青雲趣未殊能向金門成  
大隱何須碧落訪名區卷中邱壑供遊眺句裏烟  
霞勝畫圖但使安心塵事外人間隨處是蓬壺

賦得曠然塵慮清

矍圃延清曠亭臯禮射餘心冥棲鵠外志正樹侯  
初埃埽開明鏡雲霞淨太虛煩襟從此滌審固意  
何如

賦得內正外自直

澄懷徵射義觀德意良深志定無偏倚容端儼對



臨采蘋歌有節舍拔巧從心遊藝誠非易長思五  
字箴

賦得梅須遜雪三分白

銀海瓊花照眼新凌寒一樹倍精神三分素影寧  
輸潔一段香名已染塵豈爲調和畱世用終教顏  
色讓天真共知造物非無意看取容華冠早春

二

積素凝華孰比倫南枝初放正當門瑤階細辨橫  
斜影玉宇微窺淺淡痕已傲孤標辭俗豔猶餘芳  
意待春溫平章未敢分誰勝潔白心期本素存

三

生枝翦刻費閒吟敢信雙清共此心萬頃寒光迷  
倩影一痕春意點遙岑詩成想像知開落畫到微  
茫意淺深若是名花空色相瑤臺仙跡杳難尋

四

縹緲瓊姿映玉山佩環清韻落人間鉛華洗後丰  
神在笛管吹來素影閒擬向寒林尋臭味先從冰  
海問容顏茫茫誰道春無迹畱與多情著意攀

賦得芳氣有無中

西蜀傳名種當春品是仙無香非馥郁有韻自清  
妍縹緲紛紅靄氤氲散紫烟花前閒味想倚檻自  
翛然



賦得雨洗亭臯千畝綠

一夜甘霖萬彙新輕寒薄暝暗生春雲容乍染山頭翠烟靄全消陌上塵麥浪高低光欲動桑陰濃淡色初勻花村晝靜耕農樂好景應思造化仁

二

遙望郊原宿霧含半篙新漲乍盈潭水田積潤開澄碧繡隴浮光接蔚藍晝裏陰晴難設色詩情清曠恣幽探泥香草嫩青無限靜賞還將野趣耽

賦得潤物細無聲

廉纖初應候風定灑千絲但覺雲陰重旋看樹影垂一犁霑足處萬彙發生時不到春郊外恩膏那

得知

賦得萬物靜觀皆自得

會心隨境是佳辰景物年年入目新草木斂舒由性定禽魚游泳盡天真細推胞與原同量要識施生總至仁品彙流行供靜賞聖賢於此悟經綸

賦得我愛夏日長

槐陰晝永惜居諸游藝怡情事未虛展卷不知花影度臨池乍聽漏聲徐頓忘煩暑心無擾喜對清光興有餘閒步庭除占表影好風旋覺動輕裾

賦得清如玉壺冰

洞徹疑無質晶瑩自有真虛明能鑒物貞潔不生



塵寒色交相映清姿可共珍當筵能辟暑表裏見  
璘珣

賦得靜有圖史樂

長夏欣無事開筵見性原觀圖窮彖繫讀史慕義  
軒嘉樹陰常滿幽禽語不喧悠然千載上得意已  
忘言

賦得窗戶貯清陰

夏木窗前繞重重葢遠張展書浮翠影拂硯借清  
光有日簾常捲無風座已涼寸陰須寶惜聖誠豈  
容忘

賦得雲氣滿前峰

漸覺炎歊斂濃雲疊幾重含英方觸石噓氣總隨  
龍芳樹看難辨遙山乍已封歡欣歌有滄嘉慶慰  
三農

賦得閒看玉表驗分差

銅律會先辨葭灰莫暗吹占時分晷刻測影計毫  
釐消息閒中見盈虛靜裏知分明堯典在敬授有  
成規

上巳後二日真香亭雅集卽事

綠暗紅肥正暮春公餘宴賞及良辰畏途喜得忘  
機侶情話相攜不速賓綸閣晝長多逸興諫垣事  
少趁閒人形骸略盡成真率後會重招莫厭頻



二

裊後風光轉更妍雨晴榆莢蔚藍天亭臯淨洗無  
塵到簾閣虛涵任客眠宦海升沈消幾擲奕場勝  
負漫爭先酒闌忽聽嚴城鼓殘醉相扶怯整鞭

偕同館諸公遊大定菴次宋葑洲編修韻

惜春無計恣幽探鳩羽差池燕語喃名輩位尊情  
自逸騷人老去興猶慙酒杯狼藉忙中趣禪榻婆  
娑物外談那得塵緣都謝却掩關終日坐精藍

次日葑洲復招出遊余未及偕行倒用前韻

奉酬

徑入招提草似藍興來載酒得深談客因地僻遊

成趣花到春深態轉慙窺戶小桃猶爛漫認巢舊  
燕自呢喃慙余心事闌珊甚堅坐蕭齋懶再探

送錢再亭給諫假歸省親

巖廊方倚濟川才忽漫陳情歸去來數載訐謨畱  
禁掖一函綸誥慰循陔清風却喜行裝便丹悃還  
因戀闕迴相送青門珍重別不堪離緒照深杯

二

鶴髮方瞳佩玉琚錦衣花下侍籃輿駐顏新賜官  
廚醞養志猶懸屬掾魚去日瓊階翻芍藥到時銀  
沼長芙蕖臣心子職能兼盡樂事天倫慶有餘

三



崇班已逼台垣近綵服歸趨愛日遲愧我一枝重  
寄日逢君三戟欲開時石交鄭重憐同調萍跡參  
差歎索居最是通門情更切鵲鴿原上不勝悲弟令  
戊辰出余本  
房早逝可傷

四

暫辭丹陛到家鄉十賚文懸畫錦堂座上菖蒲生  
九節窗前夏木列千章香山几杖神仙並洛溪園  
亭歲月長只恐

聖恩宣召迫秋風旋趣舍人裝

茗上沈子起東屬題尊人天菴先生遺像

寒飈迴空林凍雲釀成雪挑燈坐長夜遺照肅展

閱悄然起三歎儼若晤往哲先生經人師學術比  
毛薛憶昔啓函丈吾家諸弟列談經如懸河論文  
鄙瑣屑六藝供畋漁百家恣採擷身範更光霽步  
趨中行綴時或逞顏放今古縱陳說予時雖別館  
杖屨每提挈咳唾聞霏霏溫恭奉歡悅殷勤十餘  
載無間寒與熱歲月疾如馳浮雲轉眼瞥鵲鴿飛  
邱原仲叔痛蹉跌先生亦夢奠年未躋耄耄人琴  
杳難攀臯比記空設緬想存典型中心矢黯結先  
生有令子人文並卓絕入洛才名多清芬頌前轍  
丹青忽見示啟卷淚頻咽音容宛如生神理肖無  
別慷慨溯曩徽蜚鳴望英傑珍重返行笥什襲勿



輕褰輾轉話寒更明霜漏聲迭

惠研溪庶常以哭蘭英詩十首見示蘭英與  
研溪有訂目成而未嫁者也依韻和答

柳蕊氤氳杏子黃風光惡劣守空牀三生石上知  
真假一段因緣枉斷腸

二

願效雙飛病強支那知雲散不多時鏡臺一去無  
消息淚濕紅箋半幅詞

三

聘錢早已製香纓身許才人慧眼明底事郎心渾  
不定矢將匪石結來生

四

雲階月地本清嚴暫謫人間傍短檐解識愛才先  
解珮目成那復待褰簾

五

才命相妨事幾般悔教詩禮少時嫺白頭省得他  
年賦畱取泉臺認好顏

六

決絕臨危短札傳癡情未了也由天傷心執手償  
虛願典却朝衣買紙錢

七

聞說佳期有洞房筆牀硯匣鏡臺傍無端月墮西



巖去銀漢迢迢隔絳牆

八

茫茫何路向泉臺一卷蕉心尚未開縱使返魂香  
可得相思骨已變寒灰

九

越水吳山忍自歸情緣不斷願相依黃塵深處青  
青塚耐罷愁看一蜨飛

十

同心同命定誰愆樹異榮枯理自連博得一編貞  
女傳芳名千古傍儂邊

農蠶雜詩十首

淑氣開菖葉春風動杏花青陽方應序黃茂漸抽  
芽黛耜翻膏野瓊縻落淺沙人和占歲稔經始事  
菑畬

右播穀

良法傳區種田歌重立苗水車爭蹴踏秧馬欲騰  
驍翠毯香風細青疇曉露饒幾時看沒鶴溝水正  
齊腰

右插秧

根弱須培土苗多怕雜稊溝塍如刻鏤簞笠忽高  
低灑面分龍雨霑身戲鴨泥壺漿思解渴餉婦綠  
楊西



右耘耔

多稼雲千頃深渠水一篙草人司土化駿馬沛天  
膏蒸發看茶蓼掀騰試桔槔

聖朝多雨露翻笑漢陰勞

右糞種

禹貢聞收秬幽風重築塲人逢豐歲健田比去年  
穰白粲連倉積紅鮮出甌香日斜桑柘影簫鼓賽  
神忙

右收穫

近川初築室再浴及春晴遺種棲籩薄清泉汲玉  
罌直辰同馬氣得水化龍精纍黍休嫌小蠕蠕看

始生

右浴蠶

牆下濃陰合城南小徑偏葉高愁露腕枝動恐妨  
鈿競挈青絲籠羞看白玉鞭還聞風戾食勤儉六  
宮先

右採桑

戢戢千頭卧春風閉短扉眠隨人柳倦摘破女桑  
稀皮蛻光逾瑩餐多體漸肥應知栩栩夢待想化  
蛾飛

右蠶眠

柔軟生香細纏綿引緒長冰綃輸沁雪火浣愧涵



霜盆手盤銀縷縑車曳練光時清崇潔白爲詠素  
絲章

右縑絲

蟋蟀吟東壁鳴機鴉軋聞金梭織手滑錦段巧心  
分泉客裁新樣天孫布縑紋承平方罷戍誰復寫  
迴文

右紡織

送婁東王弘道偕令弟憲尹之會稽太守任  
重入春明尋昔夢喜逢良友慰離思何當蹤跡同  
鴻雁又向西風把別卮

二

薄俗論交孰久要唯君不逐歲寒凋無端落葉催  
歸思誰與金門共寂寥

三

愛弟雙旌下會稽難兄歸興恰相攜一家都向樓  
臺住徧和前人舊日題

四

罨畫溪山入座收埧簷官閣競風流微之誇示香  
山老未必家庭足唱酬

五

到來名勝恣幽探酒錢詩筒共一擔可憶紅塵最  
深處有人高唱望江南



六

酒杯重碧菊花黃清漏沉沉月影涼不信明朝旋  
欲別判將泥飲滯行裝

七

欲贈將離重惘然人生聚散豈由天平津閣裏相

逢日回首追思二十年

弘道昔館於外  
舅宋文恪公家

八

霜壓簾衣燭炬欹停杯珍重問來期上林花信君  
休忘待折春風第一枝

婁江錢瞿亭五十

皇覽欣初度彭鏗後裔傳孔標知命歲禮重服官

年榮戟門風貴文章世澤延郎官蘭玉並卿尹萼  
柎聯避俗身疑隱匡居跡似偏宅還方履道園亦  
類平泉劇飲便千日高吟每百篇鼎彝歐氏錄書  
畫米家船選勝邀花月徵歌沸管絃人皆誇第祿  
我亦羨神仙恰值生申會頻開介壽筵成羣羔雁  
列溢架縹緗懸金瓊長春酒華燈不夜天婁江佳  
氣合輝映斗牛邊

送嘉芑內兄之京口叅戎任

早從玉陛聽臚傳除授初看鳳勅宣舊臘衣裘衝  
雨雪新秋笳鼓出江天雄誇分閫韜鈴富近喜循  
陔祿養全家世戴筐占相業將星復燦斗牛邊



二

長江天塹自昏朝細柳營開部伍調刁斗夜明京  
口月樓船秋擁海門潮指麾鵝鵲容初肅約束魚  
龍氣不驕何日扁舟憑過訪與君醺酒泛金焦

贈王石谷

胸中邱壑自蕭閒筆底烟雲共往還漫道宋元名  
繪好只今能事屬虞山

二

不作蒼顏不秀眉精彊應過少年時方平已占仙  
家籍話到滄桑一舉卮

送前輩王鶴汀學士假歸省親

西清學士賦蘭陔待漏金門拜表回聞闔曉曉初  
日啟太行縹緲片雲開身同令伯陳情去心自封  
人錫類來擁笏垂魚前省覲背參光氣燭三台

二

謝恩復覩寵恩邀

宸翰新頒自九霄將母心情猶戀闕格天事業在還  
朝庭萱色映盤雕燦官柳絲飄宛馬驕館閣幾年  
陪後乘可堪祖道向河橋

賦得嘉禾四穗

聖朝多瑞應靈稼吐奇葩蔽野驚繁穰周阿布綺霞  
如雲紛蔭蓋浥露重交加四照華滋茂千原秀實



客言詩卷七  
賒一莖欣滿握數穎便盈車灌溉寧人力禎祥式  
寵嘉種應輕鳳粟飯豈貴胡麻不羨芝如掌還輕  
棗似瓜汗青惇史紀擊壤老農誇重本來天貺勤  
民福正遐

題曹渭符採藥圖

風流約略似斜川一片秋光白雁天坐對南山思  
隱伴同心只有傅延年

二

五色豪鮮蘸綺霞三清路穩拾瓊花誰言雲裏仙  
人宅不及潯陽處士家

三

此中真意只君傳菊淡如人人似仙欲發錦囊彈  
綠綺背橫蛇跼久無絃

四

賜第周垣近禁庭玉泉曉灌菊畦馨長將金錯琳  
琅字把酒分題山海經

題王石谷畫竹

隔斷烟巒數十莖晚風交戛雜泉聲茅亭恰俯清  
溪畔寒韻蕭騷意倍清

二

一簇琅玕森似束風枝露葉凝寒綠溪邊幽徑淨  
無塵倚杖閒吟看不足



雪

蕭瑟深山歲暮時寒花一夜發新枝瑤臺靈境原  
無路瓊圃仙蹤未有期樵使晚歸迷洞壑漁舟夜  
泛暗琉璃高人最愛清光好閒把王恭鶴氅披

二

凍雲朔氣滿山川六出花飄下晚天翠巘雙高銀  
漢裏蒼松橫壓玉樓前高懷欲奏幽蘭曲逸興還  
吟秋水篇山店無人門晝掩長空一縷是炊烟

座主王總憲袁夫人壽詩

蘭臺作述重班揚伉儷羣推令德長列戟家門傳  
鳳吹種槐庭院叶鸞鏘絳紗曉映雲霞色紫帔榮

分翰墨香解說瑤池風物好冰桃雪藕共成行

二

宮牆幸許侍彭宣並祝岡陵恰後先正喜甫申調  
玉曆乍看鍾郝展瑤編春秋歲運逢三臘甲子星  
週待十年預聽笙簧賡既醉沙堤柳色漸芊芊

題錢訥齋小照

婁江風氣最完密簪纓舊德推彭城中丞峩峩柏  
臺望都諫諤梧垣聲先生蔭藉雖高華克繩祖  
武齊難兄讀書青熒燈火共下筆颺拉風雨驚七  
踏省門不見錄窮探經史業大成五車四部胷貫  
串一入含咀皆華英生平雅好在山水疏泉疊石



愛日堂詩卷八  
位置精沁香居前花藥暗靜逸菴裏琴尊清鄴侯  
但喜書插架韋相豈愛金滿籬周貧有如剝膚急  
讓產奚啻鴻毛輕投老心情守抑戒招隱蹤跡逃  
榮名史占穎川德星聚人奉汝南月旦評晚年快  
覩令子貴黃門載擢官清卿不修竿牘向州府祇  
庀文酒羅賓朋爐香茗椀供嘯傲詩筒畫笥煩經  
營何人寫照妙入神銀臺攜之來帝京圖中鬚眉  
儼誰似應是斟雉饗帝八百商錢鏗

愛日堂詩卷八

環召集二 甲戌

李厚菴館師太夫人八十壽詩

牛女垂芒處名媛啟七閩珩璜師氏教綦縞禮宗  
身鳳叶初占吉雞鳴亦警晨少君賢作婦冀缺敬  
如賓志自門閭切躬還井臼親熊丸資讀久翟茀  
拜恩頻問寢趨簪笏升軒列錦茵六卿少司馬八  
座太夫人正值傳柑會言逢設悅辰醪仍郢水美  
饌悉大官珍羔雁儀紛錯笙歌宴雜陳有花皆燭  
夜無草不長春壽母方添算樞臣竚秉鈞肩輿看  
上殿圖頌一時新



錢葭湄以五十自壽詩四律索和因次其韻  
盤錯何妨歷試艱已看簪笏領鵷班文高繁露卿  
雲上名在釣衡大斗間龍尾趁朝恒早入羔皮退  
食每遲還玉壺掩映冰心潔贏得蕭齋一味閒

二

清卿門第盡華纓前輩風流更老成短鋌自銛何  
用礪大弔已殼不須漿酒傾玉璣過千日書擁牙  
籤勝百城曰艾正當聞國政早傳弘濟到蒼生

三

漫將仙籍訪丹邱少壯登朝願已酬弼亮祗應陪  
稷卨孤高端合笑巢由人間隨遇醒和醉天下關

心樂共憂夙昔本無溫飽志城南二頃未遑謀

四

豈有平生與道違任他伯玉歎知非鶯花帝里今  
吾在松菊家山昔夢稀獨鶴應時來紫府雙藤數  
日到黃扉請看雲母屏風下周魯從容共禁闈

陳伊水將之兗州太守任以詩見示和韻奉

酬

紫薇花署枕書眠東郡新除五馬前瑣闥文章餘  
往事泮宮芹藻憶當年堂皇露冕三宵迴齋閣牙  
籤午夜編惆悵昔遊今歷歷南樓縱目接雲天

二



溪堂流水昔時園勝集遺蹤今尚存常爲駿奔瞻  
闕里每因仰止到橋門異時報政三年最此日鳴  
騶四國藩自是玉皇香案吏暫教儒雅試溫溫

三

彤檐出牧到雄疆民瘼關心自軫傷齊魯遺風沾  
化雨奎婁分野布春陽諸生東國傳絃誦萬畝西  
成足稻糧遲爾承明應計日臨岐攜手轉徬徨

四

極目秋光正可親雙旌懸發向蕭晨嶧陽桐老先  
飄葉雩水風生漸起鱗憑眺管教歸太守山川自  
合屬詩人秦碑魯殿堪乘興彩筆應知倍有神

贈友

孝德推儒行清風邁等倫可應循至性甘與樂天  
眞風樹嗟瞻岷荆山秘席珍庭闈時眷戀色養日  
逡巡篠發霜前笋冰開水底鱗枝榮交讓木花映  
綵衣春浩氣侵瓊岳虛心養谷神學窮三匣秘身  
逐五湖濱驥足高名邵鴛雛令器淳宮袍閒畫繡  
壽母頌靈椿不但銜恩重緣知送喜頻覽揆周甲  
子問道守庚申玉露涼秋夕金天爽氣晨流霞將  
進酒飛瓊酌冰輪

朱亶菴五十舉次雄徵詩應之

析木津開建隼旗名棠郁雨映寰區大人久協魁



三象英物新誇第二雛湯餅筵前金鵲印蟠桃會上玉麟符薰風鈴閣笙歌沸清酒須教送百壺

王石谷過寓齋爲余作園亭景大幅賦贈

玉河西畔春城邊宮樹杳紗籠輕烟故人相見在客邸把袂一笑情藹然招邀閒過書屋坐急探佳茗烹新泉宿世畫師并詞客此事今獨推琴川源流直追顧陸上品格方駕董巨前是時青陽初謝律微雨霰霏清和天開縑爲我寫橫幅園亭景物欲鬪妍山根白石自齒齒波面碧荇方田田稍雲修竹且萬個透空喬木將百年平橋鳬鴨戲凌亂曲徑花草縈便娟意到筆隨天趣溢白描何必誇

龍眠從來神妙丹青家強半紫府謫隋仙快逢翰墨恰點染聊借文酒相資緣他年角巾許歸里煩君再圖香山池上篇

送大司成吳楞香前輩請假歸省二首

官重師儒絳帳懸橋門設教已三年坐臨槐市光風轉人在桃谿化雨偏書帶定生緣砌草銜魚應見講堂鱣諸生正喜登龍近却又陳情去日邊

二

月駕星輶出

帝畿黻山雲海望依稀不緣定省添鄉思肯爲尊鱸遽乞歸詩補白華春入句舞同萊子綵爲衣亦知



夢日堂詩卷八  
未許東山卧早晚承恩侍禁扉

輓同年趙園庵侍御

逝川東去日西徂琴鶴清風一旦無空有諫書畱  
白簡猶傳讜論伏青蒲羸蹄欵段嘶驄馬古柏凋  
零咽府烏最是平生蘭譜誼不辭雙淚爲君枯

送友之山左邑令任

判袂都亭下教人悵路岐翠條空贈別紅藥怨將  
離潘岳栽花滿王喬飛舄遲隨車甘雨好騎竹走  
童兒

二

聞道之罍麓秦皇舊蹟多鞭橋渡滄海銘石紀巖

阿眺覽隨裾展琴書足嘯歌風流今茂宰詎道拙  
催科

初夏西苑觀麥應制

苑柳陰濃散景風來牟牆外鬱蔥蔥隴雲低罩青  
油幕浪影頻翻碧玉叢雨露近承

天澤渥溝塍遙與醴泉通晝長  
幾暇懷農事步輦時臨喜歲豐

棗花

木蜜花宜夏因風氣似蘭氤氳清影動蓓蕾綠珠  
攢葉布千層碧心懷一寸丹年豐從可卜靜賞倚  
闌干



仲夏卽事二十韻

律應蕤賓候星迴大火移含桃初薦後木槿正榮  
時長養薰風暖煩蒸畏景遲隴頭將刈麥庭際見  
傾葵露掌朝恒滿雲峰晚更奇桐花旋覆徑蓮葉  
漸盈池密蔭看成幕甘霖待濯枝開軒來曉氣深  
雨隔炎曦窗爲迎涼啟簾因避暑垂息心常默坐  
永日自堪怡綠影圖書淨清風卷帙披道情能去  
躁靜賞不知疲雲繞千行墨風生數首詩漏聲分  
晷刻表影較參差陽極凝神好陰微養氣宜潛通  
消長理冥悟發生慈埃壒閒中遠澄虛靜者知義  
皇寧寄傲周孔有深思交扇勞驅熱披襟笑不羈

澹然塵慮外鎮日對書帷

恭和

御製麥秋盈野志喜詩應制

隔歲瓊華卜有年三春時雨慶安全來牟夏半將  
登廟莖穗雲鋪已蔽阡

別苑經過看國寶

齋宮清暇灑瑤箋喜瞻

聖藻勤民切日影遲遲過八磚

榴花

安石舊移根含英翠葉繁如霞明早夏似火映朝  
暎乍吐紅巾感全舒綵袖翻綠陰清絕處濃豔獨



當軒

蜀葵花

本異園葵種同名借蜀傳  
繽紛宜夏令爛漫在秋  
前比槿多殊豔如麻自解妍  
緣階披五色碧幹錦  
初纏

端午詞

池館重重隔水精瑤山  
雨過午風清龍舟齊唱昇  
平曲畫鼓喧傳萬歲聲

二

臨流玉砌長新蒲夏木陰濃自可娛  
正是銷兵無事日不須更佩五靈符

三

朱索施門色映榴更傳艾虎上釵頭  
太平樂事逢佳節別苑風光勝十洲

四

薰風簾影動清漪坐看槐陰日轉遲  
共慶八方登壽域朱絲長命繫多時

贈沈仲翁

南國推耆宿東陽獨典型珠囊傳舊業  
縹筆授遺經短髮蒙頭白方瞳對客青  
高門多隱德問歲羨稀齡槐蔭依王砌  
蘭芬襲謝庭垂天薄霄漢擊水躍滄溟  
學術侔曾鞏科名比衛涇源流何滉漾奕



葉正芳馨天上鸞書下門前鶴蓋停春風開畫閣  
遲日映雲屏過海來安棗浮江薦楚萍好傾花釀  
酒爲祝老人星

送同年王文在請假歸養

赤芾官袍畫繡歸倚門遙望自因依冰魚春笋供  
朝膳鵠峙鸞停問夕闈壽酒宛函三秀草酡顏聯  
映五銖衣歸心已逐湘江水雅志陳情願不違

閏五月四日

召試詞臣於西苑之豐澤園

聖恩優渥恭紀四十韻

并序

欽惟我

皇上握符御宇風動時雍民物阜亨雨暘咸若文思

光乎四表德化式於九圍而猶側席靡遑  
求寧恐後宵衣旰食彌勤無逸之懷重道  
崇儒益廣右文之治茲者歲次闕逢支當  
闔茂閏居夏五佳節再值天中律應蕤賓  
測候正占星火特開禁掖

召試詞臣維時梅雨乍晴麥秋方熟雞人曉唱魚鑰  
晨鳴肅侯傳呼循虹橋而宛轉徐聽警蹕  
望月地以趨蹌

翠蓋儼臨

青旌爰載芙蓉池畔羽衛鳬飛楊柳陰中衣冠鵠立



夢筆堂詩卷八  
俄傳泛楫並許登舟覩烟樹之參差拂荷  
香之縹緲疑從銀漢共上仙槎似到蓬壺  
忽登水殿斯時也槐陰日轉竹院風微班  
肅魚鱗筵排雁翅陳珍羞於雕俎頒法膳  
於行廚餅裹紅綾羹名錦帶南產之金齏  
玉膾未足多誇仙家之琅菜碧芝寧堪比  
數正欣厭飫復荷

溫綸謂清晝之方長須當筵之既飽  
恩斯渥矣

寵孰厚焉於是轉華屏排曲闥臨蕙圃過蘭塘蔭陌  
柔桑濃陰似葢緣隄嘉穀吐秀如雲望禾

黍之油油見水田之漠漠乃識

皇居之側別有花村益知

宸賞之餘不忘農事近川築室悉蠶織之勤劬區種  
分苗念亞旅之作苦是以園名豐澤不啻  
圖繪幽風爰就林臯用開文囿瑤箋旣給  
鏤管載分花榭風亭遍陳棐几水邊林下  
盡設華茵井上新梧葉娟娟其忘暑籬間  
翠篠枝冉冉以生香遂乃

命題作賦列坐摘章去僞存誠感

聖心之勗勉重農務本頌

帝德之崇閎固已援筆多慙濡毫難罄矣無何



恩膏稠疊中使頻仍細核芳鮮盛來玉盃紫梨津潤  
擎出品盤竹裏茶香露滴仙人之掌花間  
酒碧霞生玉女之漿莫不嘗珍味而齒芬  
飫琳腴而腹果旣而義輪斜度蟾魄將升  
再上蘭橈出歸畫省歷金門之窸窣渾疑  
重到人間遵紫陌之逶迤盡訝來從天上  
雖復潘江陸海紙落雲烟宋豔班香研橫  
河漢無以形茲盛事頌此昌期小臣忝綴  
清班幸叨殊渥才慙夢錦技愧鏤冰戴山  
嶽之鴻慈感如蚊負歌洪鈞之大造聲類  
蠅鳴詞不成章聊同窺管云爾

上苑侵晨啟臨波翠幄張迎涼開藝圃選勝作詞  
塲羽蓋來三殿華紳夾兩坊良辰逢閏夏令節又  
端陽登麥風初暖頒冰日正長蓬山霞漾彩瀛海  
練凝光鷺序排沙岸鴛行列錦塘俄瞻停

鳳輦並許上仙航荷芰香侵袂菰蒲色映裳柳陰環  
碧宇樹影蔽瑤房舒雁班齊肅呼嵩喜欲狂花磚  
容列坐玉砌得迴翔

賜饌傳中使珍羞出尚方蘭肴同六膳芳醕勝三漿  
飯覺青精美羹和石髓香

溫綸宣咫尺異數度尋常授簡趨丹陛揆幽轉曲廊  
乍看耕綠野不是賦長楊阡陌鋪雲稼溝塍覆女



桑枯棹傳響遠耒耜及時忙民事

宸衷切田功

睿慮詳欲生濠濮想真到水雲鄉禹室卑堪範堯階  
儉不忘更無丹飾棟但見綠連牆隨意分湘簟從  
人倚石牀風篁森萬个夏木蔭千章几案緣溪淨  
烟霞拂坐涼澄懷消溽暑澡德濯滄浪

主聖明真僞臣愚忝拜颺捧題彌悚惕握管自徬徨  
燥渴寧憂吻膏流可滌腸盤堆縹蒂果奩簇絳紗  
囊竹裏烹龍餅林間酌羽觴洪慈誠浩浩湛露益  
灑灑散處臨斜日歸途帶晚芳承

恩同海嶽礪石愧珪璋重本

皇綱遠崇文

聖道昌小臣無以報億載祝無疆

七月二十四日

上奉

皇太后巡幸塞北平明

法駕出東直門

臣

元龍荷蒙

特旨扈從恭紀二首

仙蹕凌晨出建章雲旗羽蓋肅嚴裝

天威遠震原無外

神武時巡自有方爽氣西來明警衛關山北去控遐  
荒呼嵩夾道瞻雲近歲歲川塗荷寵光



龍馭親陪

鳳輦行喜傳

大孝溢寰瀛豫遊從識

天家禮色養緣知

聖主誠曉露草香承畫軫午晴嵐翠上霓旌儒臣獨  
許隨行幄載筆鉤陳分外榮

二十五日渡潮河

駐蹕密雲縣

白檀山接紅螺近驅馬平沙渡急流塞上泉源通  
運道峰頭藩障護神州雙城自昔誇雄鎮一統於

今快壯遊幸奉屬車才思拙難將形勝錦囊收

晚登密雲舊城望塞上山色及潮河白河諸  
勝

登陴晚眺正秋空都市邊關一望中二水交流縈  
宛轉千峰環拱氣龍從羽林列帳分營肅華實盈  
疇識歲豐塞外早寒如未信試從天末數歸鴻

二十七日早經石匣城

原隰高低轉翠旌長城自古漫崢嶸亂山峻險疑  
無路曲澗盤紆若有情近塞漸看增戶口傍營時  
復見農耕

聖朝德溥烽烟輟野戍空傳石匣名



是日

駐蹕古北口總兵署中

天險嚴關自古誇崇山環衛徑紆斜大榆河畔開  
平壤紙柳營中駐

翠華秋半邊城先挾纊時清塞上不聞笳飽騰卒伍  
閒超距中外提封總一家

贈凱功

從獵還邀

聖澤偏身依韋杜許隨肩借騎良驥慙才驚飽飫行  
廚愧腹便友誼更兼

君命重詩篇好向客途聯多才公子虛懷甚擬効他

山爲執鞭

二十八日合圍

上親射一熊初二日又

親射二熊恭紀

秋獮由來重武功騰驤天馬若行空銀麋月兔縱  
橫集赤羽青莖氣象雄峻壁俄登如坦道蒙茸草  
樹窮危峭青熊驚走出崖間衛士喧呼山谷嘯

玉勒從容舉六鈞洞胷沒羽隋荒榛卽看猛獸崇朝  
驚盡委載盈車血染輪校獵長楊何足數遠人稽首

神武不須罟網自彌山豈必金機發連弩愧殺書生



夢日堂詩卷八  
十三  
託後塵目搖心悸馬逡巡除殘要識安人意

大勇由來本至仁

廿八日過青石嶺恭紀

天際風清黛色饒重關深鎖列嶠堯紆迴鳥道盤  
青嶂縹緲鸞旗拂紫霄直視流雲衣袖接俯看積  
翠馬頭飄臨高磨石應深刻輦路新開記

聖朝

出口數日皆蒙古部落久歸

王化近多伐木爲柵列舍成村有學耕種通貿易者  
漸類編氓非復外藩故習矣恭紀  
伐木爲籬啟華門蓋茅築舍也成村

化行漸改羶廬習

德普咸知衽席恩畜牧閒時師種植牛羊隊裏雜雞  
豚從今殊俗皆編戶不用輿圖別外藩

八月初二日以後連朝有霜草木尚未黃落  
蓋由

聖駕經臨陽和及物也恭紀

邊庭八月見繁霜壓幕生寒換客裳不是陽和隨  
輦到如何草木未全黃

初三日

上率扈從諸臣前行射獵

命臣元龍隨大營後感



恩恭紀

從官夙夜侍周廬獨

許詞臣奉後車懦弱偏承

恩意渥還思策駑敢徐徐

晚歸幕中偶就所見恭紀

疎林紅樹自堪娛陡壑巉巖態總殊安得大癡真  
好手寫來塞外早秋圖

二

烟墟歷歷影參差却似江南刈稻時只少數聲牛  
背笛斜陽深處繫人思

出口旬日山川景物觸目賞心各就所見恭

紀十首

土美從人說身經始稔知清泉甘似醴豐草滑如  
脂不信風霜厲還看物產滋小臣誠厚幸策馬自  
忘疲

二

山行深更好恍在畫圖中絕巘千尋碧疎林萬樹  
紅原禽棲茂草仙鹿出芳叢目賞真難給朝朝景  
不同

三

靈液不知源涓涓遠石根臨流清可鑒潤物氣常  
暄沁骨能祛疾充腸便滌煩南陽空記異菊水漫



愛日堂詩卷八  
稱尊

四

綿亘山無極鳴鞭入紫烟凌寒花自滿映日翠逾妍  
妍樹杪雙旌出雲中六轡連巨靈何日擘

巡幸待堯年

五

奇花難問種珍果不知名豔若鋪霞錦香疑襲杜  
蘅金光隨手摘火實傍車迎漫道江南好霜柑幾  
樹盈

六

紫塞羊初美秋原雉正肥芳鮮欣適口鹽豉漫勞

譏珍豈誇婁膳貧還笑朔飢徒縈蝦菜慕嘗此味  
全非

七

旦暮寒暄異終朝備四時午風初夏好斜日晚秋  
宜春服隨人著冬裘入夜披自然安作息雲外不  
須疑

八

青崖多植黍蔥鬱自成叢不費耘耔力無勞灌溉  
功餘糧栖畝畔滯穗樂年豐擊壤皆熙皞猶存上  
古風

九



夢月堂詩卷八  
誰言沙漠地鎮日作山遊嵐翠侵衣濕溪聲傍枕  
流汲泉烹茗茗撥火試新茗自愧詩篇拙難題塞  
上秋

十

堯封不可極禹貢未曾收漫自分三壤於今隴九  
州山從高掌拓水載廣輪浮不是陪

仙蹕誰能快壯遊

玲瓏山

雲外奇峰一鏡懸五丁開鑿是何年誰言洞府原  
無路應識仙家別有天巖隱義輪光半度桂餘殘  
魄影常圓遭逢

宸賞題名好兩字玲瓏萬古傳

二

羣山萬壑瀉鳴泉仰見玲瓏百仞巔峭壁似懸將  
落月隔巖乍漏一輪天藤蘿路絕應難至猿鶴心  
驚未敢穿一自嘉名邀

寵錫還應洞口遇神仙

賦得寒山靜秋塞

商飈萬象斂一望絕纖翳山色連沙磧泉聲斷冷  
溪氣森斜日淡天濶暮雲低平隰時驚兔疎林不  
掩麝摩風鷹下疾怯渡馬頻嘶谷響迴旌度烟寒  
覆幙齊燒原多宿燼偃草漸成蹊寒廓真無際橫



雲見綵霓

觀獵

五校分馳儼列星  
緣山越澗走金鈴  
雲中仰見飛鳶墜  
雪爪騰空捷似霆

二

列騎山頭乍合圍  
千羣雉兔雜封豨  
雕弓明月初開處  
雨血風毛映落暉

三

動地殷天望羽旄  
爭馳血汗響烏號  
崇巒疊嶂如飛度  
馬首旋看塞月高

四

羽林宿衛競鳴弦  
一矢雙鵬墮馬前  
賈勇不知林麓遠  
射熊搏虎過山巔

中秋大雪是夜月色倍皎寒甚不寐有作

雪月交輝擁敝裘  
不知今夕是中秋  
冰輪影瀉瑤峯動  
玉宇光寒寶鏡收  
枚叟乍逢梁苑霽  
王恭更作廣寒遊  
良宵皓魄人皆望  
此景千門迥不侔

送友人下第南歸

彈指相看十六年  
青燈猶自理殘編  
縋環赤仄皆施用  
偏擲人間萬選錢

二

抱璞荆山踽踽行  
豈知和璧本連城  
壯懷莫漫消



磨盡到底龍頭屬老成

送顧闓若之長興丞任

甲族江東記晉時才名京雒盡人知已推清操如  
君孝又說風流似愷之小試何妨分美錦承恩會  
見拜丹墀都亭此日驪歌斷遙望行旌拂柳絲  
王石谷以漢陽相國贈詩屬和次韻四首  
揮毫潑墨盡淋漓文采風流興味長贏得塵埃車  
馬日小軒展卷自清涼

二

尚湖烟水日滄浪柳色牽風翠帶長不分毫端收  
拾得穿雲接竹盡清涼

三

雲山濃淡墨浪浪萬壑千巖咫尺長怪底丹青如  
顧陸高堂素壁轉生涼

四

萬鈞筆力足聊浪畫史詩神那許長剩喜玉堂春  
晝永郭熙山水自然涼

寄錢燕穀

詩家標格在人共說錢郎延月開書幌畱雲伴筆  
牀槐分三徑綠菊繞一籬黃不用求丹訣壺中日  
正長

二



縞紵論交日燕臺憶舊歡得花誰獨醉遇竹便同  
看別久鴻書少風高鶴夢寒羨君依雒社鐵笛響  
雲端

題楊子鶴所畫王葭游小照葭游石谷長君  
也

乃翁鬚髮如秋霜袖攜山水游帝鄉君今白哲身  
未老胡爲只道林泉好君家乃在尚湖之旁虞山  
之麓水瀾瀾兮垂楊林修修兮菜竹羗脫帽兮科  
頭任雲封兮茅屋中有懷兮未敢言野鶴知心繪  
成軸人生得此良堪娛誰能局促轅下駒乃翁見  
此心踟躕此子瀟灑將無愚桃源一曲網川一區

他年就養山之隅楊生楊生會須更尋百尺絹補  
作義獻偕游圖

題馬見五撫軍小照

廉泉憶酌西湖水曾奉行塵對芝宇忽從毫素挹  
清風尺幅恍如鈴閣裏虎頭燕領世所稀劍眉山  
鼻誰能擬經營辛苦費匠心想見憑几拂繭紙突  
開生面動精神從官却立屬僚喜南荒銅柱霾風  
烟東觀牙籤擁經史公家舊事將毋同文章政績  
真濟美鷺湖鶴嶺多遊蹤滕閣孺亭尋故址與人  
之歌徧豫章帝用作霖從此始丹青會見畫凌烟  
褒鄂何曾數餘子



送龔節孫別駕之官錦州

地方豐沛數名州喜見才賢樹遠猷驥足騰霄推  
半刺屏星行縣領諸侯西連薊鎮雄邊鎖北枕凌  
河接戍樓遙識楚龔名下士抽毫載酒擅風流

送同年金道騶之官秦中

除書特下紫泥封沙苑川原瑞靄中路上翠旂霑  
渭雨馬頭黃葉捲秦風久知辭賦輕前輩肯把功  
名讓長公他日諸生排兩序中和樂職聽絲桐

贈

待月停杯共倚闌涼風嫋嫋燭光殘雙娥忽湧冰  
輪現坐客羣驚到廣寒

二

虛室生輝人似月湘簾弄影月窺人生憎興劇宵  
偏短街鼓頻催酒數巡

三

來似升東去墜西秋河耿耿玉繩低夜深露重天  
街濶解贈慙無蜀錦綈

又贈

昨夜逡巡月下逢酒杯狼籍語匆匆情知更有今  
朝約偏咽烏啼到曉風

二

當關又報客侵晨茗椀香爐次第陳底事車音翻



寂寂銀河咫尺隔紅塵

三

聞說多情病轉多才名自古受消磨勸君珍惜迴  
風曲減却腰圍可奈何

又贈

莫道三冬漏正長客窗相對坐焚香名花能助文  
心妙行卷先應貴洛陽

二

寒齋小語進霞觴麗質仙才兩擅場取次明年攀  
桂子天香還帶口脂香

三

管領春光早占先鄂君長伴玉堂仙他時聞喜開  
筵後名紙紅箋肯浪傳

無題

異香繞室降雲英偶向珠胎誤化生弧輓何妨看  
並設神膚真合號雙清琪花吐豔原無種仙子隨  
緣自有情促席明鐙爭倚玉今宵同醉亦三生

二

前生原是掌書仙似欠人間未了緣昨日藍田纔  
產玉今朝陸地早生蓮燈前絮語寒宵短月下深  
盟再世堅後甲香烟難續穗無因把琰到卿前

雪



夢日堂言卷八  
蕭瑟深山歲暮時寒花一夜發新枝瑤臺靈境原  
無路瓊圃仙蹤未有期樵使晚歸迷洞壑漁舟夜  
泛暗琉璃高人最愛清光好閒把王恭鶴氅披

二

凍雲朔氣滿山川六出花飄下晚天翠巘雙高銀  
漢裏蒼松橫壓玉樓前孤懷欲奏幽蘭曲逸興還  
吟秋水篇山店無人門晝掩長空一縷是炊烟

愛日堂詩卷九

環召集三

乙亥丙子  
丁丑

上元前一夕寓齋小集

千門似晝薄烟凝喜趁良宵集友朋短甕尚餘殘  
臘味荒齋重拭舊春燈風懷老去癡猶在觴政嚴  
時氣倍增黃韭青蒿難醉客踏歌人散月如水

題前輩王瑁湖學士小照

泉石巖廊迥不羣前生金粟記傳聞人間霖雨應  
相望笑指閒雲是喬雲

二

花暖瀛洲別殿開鵠文綾自九天裁他年第二圖



中見認取香山白傳來

白傳生平有二照其一爲集賢學士時奉旨所圖其

一則九老會中畫於香山寺者

三

蕉鹿曾同觸駭機紅泉碧樹轉依依巢痕記取

君恩重回首驚沙靜不飛

余與先生曾同被論

庭前小桃先開

紫甲青條未展痕小紅灼灼映朝暾牆陰已破三分寂窗外先看半角繁豈必成蹊尋錦幄何須泛棹訪仙源叢枝斜倚春風好花信庭前第一番

金雀花

柔枝拂地復緣牆耐取輕寒試早芳林下乍窺宮

女額風前初裏道家裝扶持弱蔓參差碧點綴新英次第黃自倚南榮多靜好秋容却冠豔春香

白桃花

淨洗鉛華謝俗喧妖紅隊裏結瓊根梨雲一片曾同夢梅雪三分與借魂人面相看春有恨漁舟重過月無痕不逢幽賞誰知重漠漠含情晝掩門

二

紅霞錦浪豔春時一種繽紛擅逸姿度索峰頭冰碎影崑崙山上玉交枝助嬌直欲迷雲母醜面真應號雪兒翻笑隔江惟見李後人錯信退之詩

韓詩

花不見桃惟見李楊誠齋云登澄碧堂隔江桃皆暗而李獨明方信韓詩之妙



三

玉立離羣漫斂眸微雲淡月意相勾非關傅粉臨  
風皎却勝嬌紅著雨休移植霜林誇別種托根天  
上本清流都空色相尋難見前度劉郎枉自愁

四

偶下雲堦影暫畱莫將放誕想風流色因絕豔仍  
歸淡情到難消只是愁玉珮珊珊風定後冰魂冉  
冉月當頭不知露井寒多少曾到瑤臺憶舊遊

五

莫倚寒梅壓衆姿桃溪春色有新枝

林和靖梅花詩慙愧黃鸝

與蝴蝶祗知春色在桃溪

神仙本是多情種香豔難禁半老時

天與風流開逸品人憐澹蕩結幽思寫生縱有徐  
熙手想像空描點筆遲

六

懶尋紅豔趁芳朝靜對冰容慰寂寥不信花光如  
我澹可憐綺習爲君消柳絲妬影飄難定蜨粉迷  
藏夢正遙轉眼紅英飛似雪一般面目認根苗

狄向濤庶常請假將歸以五舫圖屬題各賦

一絕

縹緲歌聲不繫船半篙春水一帆烟天邊風月元  
無主乞得閒身便是仙

右風月家鄉圖列管絃數部



夢日堂詩卷九  
三  
虛艇真成小洞房華清出浴泛新粧史公況得清  
娛伴莫恨無香却有香

右海棠船圖列海棠數本二女奴侍側  
懶向銀臺策馬行羨君歸去片帆輕水窗無事焚  
香坐靜看春雲處處生

右春帆圖

荷香柳浪過迴塘正好移舟五月涼雞犬圖書來  
去便烟波可許遂徜徉

右泛爽圖

秋風江上不勝思好月隨人到處宜幾度蓴鱸虛  
負却輸君素舸早題詩

右小月隨圖

三月二十八日伏蒙

恩賜

御書鳳池良彥四大字堂額恭紀二首

通籍承明上細旃重經湔滌矢貞堅

主知特達恩如海

御筆褒嘉寵自天揮灑龍鸞紅旭裏捧持球璧紫雲  
邊退朝歸院榮光滿鏤碧雕金鄭重鐫

二

鳳凰池上久迴翔出入朝朝惹御香豈有經綸稱  
碩彥慚無獻納愧明良仰瞻



寶墨常加勉欲報

深恩不自量堂額高懸蓬華燦

奎光夜夜射空梁

史耕巖前輩以春陰詩二首見示依韻奉和  
平蕪杳靄疑無路望遠天低水一涯露重催將齊  
著葉寒多畱得晚開花臨池拂硯流雲散展畫看  
山積霧遮隱隱車聲塵不動坐看歸燕帶風斜

二

雲影乍浮春幾許簾波不動思無涯王孫空怨迷  
離草少女微吹蘊藉花遙翠幾重渾欲滴蔚藍半  
角漏還遮鳴鳩忽憶江南好桑柘閒閒麥隴斜

爲友人題小照

只合移家住此鄉芭蕉影裏菱荷香人間熱境知  
多少獨占桃笙一角涼

二

曾記飛書草檄時閒來掃石且題詩一官司馬非  
君意想是南遊爲荔枝

題王石谷小畫

釣絲影裏雨蕭騷靜覺秋聲響漸高一鏡溪光寒  
不動纔知空際落松濤

綠陰

花事闌珊暑漸侵風光最好是濃陰暗香漠漠簾



櫳靜清蔭沉沉院宇深白裕臨風疑染柳碧紗無  
雨欲生蟬愛他晝永苔茵軟一縷茶烟倚樹吟

題梅太僕撫琴圖

偶抱琴材老益堅五音齊上七條絃人間不識陀  
羅木知是汧公舊響泉

二

汾亭何處有知音廊廟山林一寸心不信天閑三  
十萬一時仰秣爲聽琴

丙子正月扈從

聖駕親征沙漠恭紀三首

并序

時厄魯特噶爾丹恃險逆命侵擾外藩

皇上赫然震怒獨斷親征分三路進兵

上親總六師從中路前進舊例凡

車駕巡幸講官司起居注者具名以奏候

欽點隨行是役也先於歲前奏請

上以漢官不諳軍旅不必隨往正月初三日復

諭掌院桐城張公曰朕思記注究不可無人可傳旨

令陳元龍及爾子張廷瓚二人隨侍時內

廷詹事江村高公亦隨行大學士京江張

公與少司馬南荅胡公又自請隨行漢文

臣扈從者共五人

聖皇神武詔親征珥筆詞臣亦扈行身佩弓刀儒服



愛日堂詩卷九  
換橐攜甲冑壯心生一聲鼓角軍徐動萬駟旌麾  
色倍明安內由來先攘外義聲遙播早澄清

二

千官夾道送

金輿爭訝戎行有秘書擬學挽弓愁力弱矢懷磨盾  
愧才疎雷霆震駭窮沙外風日晴明建旆初軍令  
未諳瞻豹尾幸陪上相馬行徐

三

典衣買馬治嚴裝檢點奚囊自裹糧

日馭親隨寧畏遠書生賈勇本知方從今版籍應無  
外始信乾坤詎有疆

天討崇朝清絕漠汗青紀事竊榮光

出居庸關過彈琴峽

嚴關直上路紆盤峻峽徐行各據鞍忽訝琴聲來  
入耳溪流千古未曾乾

出塞後

上慮運糧不繼下令軍中日食一餐

御饍亦止進一次俯同甘苦恭紀

御饌無兼味終朝進一餐驚聞甘苦共不異飽騰歡

士氣投膠厲軍行轉粟難

勤勞親減膳欲使萬方安

過明成祖勒石紀功處

并序



夢見堂詩卷九  
出口四旬餘約計三千餘里皆平岡沙磧  
並無山巒至此有一小山山皆白石高僅  
二丈許就石平正處隨其高下委曲鐫字  
云瀚海爲鐔天山爲鏑一掃胡塵永清沙  
漠永樂年月日御駕北征至此乃明成祖  
勒石紀功至此班師之地也  
漠北窮沙不見山一堆白石獨當關昔年成祖誇  
神武至此磨崖紀績還

二

行師自古未曾經下馬徐看石上銘今日

天威寧有外要窮極北到滄溟

塞外雜咏十首

石爛沙深一望空更無飛鳥點蒼穹雲霞忽換旌  
旗色地軸今朝似發矇

出獨石口外皆沙磧不能  
生殖無林木并無鳥獸

二

牛羊畜牧傍穹廬遷徙長依水草居林木不生無  
雉兔古稱射獵亦全虛

口外皆蒙古部落依水  
草而遷移居無定所

三

師行日遠路難窮欲記程途昧八鴻分野瞻星難  
辨識驚看北斗在天中

四

沙磧高低上下坡曉行又見暮雲多不知部落歸



何處胡婦胡兒共跨駝

五

解鞍放秣問東西路黑沙明信馬蹄夜半嘶聲歸

帳外披衣亟起聽征鼙

下營放馬在二十里之外易於散逸五更牧馬人歸

心始慰也

六

千營曉發禁炊烟永日忘饑各著鞭捫腹空空君

莫鄙孝先猶自詡便便

軍令下營後始造飯晨發不敢炊也

七

行裝分隊曉隨行匹馬終朝傍翠旌日落星高輜

重遠沙場露坐意怍怍

軍令奴僕行囊皆按旗在後駝馬疲困每至二更方

到

八

就水安營一淺渦千軍爭汲已無多革囊攜致非

容易馬矢徐炊喚奈何

九

強將乾糗飽枯腸羶穢都忘飲酪漿今日方知葵

藿美囊中尚有菜根香

十

斗粟珍於照乘珠一甌糜鬻勝醍醐平生溫飽何

當戀况是

王師北伐胡



神功聖德詩

并序

臣聞聖王之德無遠弗届仁人之勇一怒而安我

皇上法天握極統御中外無一民一物不容保于覆載之中六服八荒承流順序獨有厄魯特噶爾丹者恃其險遠擾我外藩

皇上弘好生之仁不卽加誅以爲聲教所敷頑梗斯化乃自絕生成怙終弗率

皇上赫然震怒親統六師一舉而撲滅之爲期僅八十日遠涉踰三千里邊境廓清遐邇寧謐從來用兵殲寇之烈未有如今日之極盛

者也初

車駕之將發京師也一時在廷諸臣竊疑窮荒苦寒之地難以立奏膚功具疏請畱交章陳懇皇上神機默運念切除殘謂非躬蒞行間無以相機制勝於是發

天心之至仁成

聖謀之獨斷禡牙禱馬諏吉遄征及

乘輿出塞百神效順風雨以時泉甘草美士飽馬騰

此則

皇上至誠仰格以致

天心之僉應也惟時人思自奮士百其勇此則



皇上拊循備至甘苦與均感入人心致戎行之踴躍  
也迨九伐震臨賊徒膽破又分道遣兵絕  
其遁逸草薶禽獮崇朝立盡此皆

皇上廟謨周悉智出幾先定百尅之計而成一舉之  
功也捷書旣布

六馭凱旋羣臣百姓咸歌舞忭蹈感戴我

皇上聖神文武勞一身以寧兆民勤一時以安萬禩  
歡聲匝地喜氣敷天臣學殖弁陋愧無以  
賡颺謨烈敬賦千言仰頌萬一云爾

聖德開三統

神功振八埏顯仁由出震行健本乘乾

睿算紆籌遠

王師奏凱遄威宣沙漠外慶溢廟堂前已邁軒黃烈  
行垂雅頌傳維

皇膺寶籙建極運璣璿格被光天壤哲謀濬廣淵三  
推先稼穡四望告牲牷流服分條赦租庸屢

詔蠲文思擊石奏武略汗青編蛇豕殲巴國鯨鯢靖  
海堧省方鳴玉會重譯獻琛虔怙冒均遐邇朝宗  
悉沂浴豈知逢此日尚有絕於天蠱毒頻搖尾蝸  
爭漫吐涎負嵎憑險阻升木恃輕猥荒服狼烽舉  
蕃畿妖沴纏飛梟難卵翼頑鐵棄陶甄宥罪真無  
外孤恩更不悛的應膏鈇鉞那可偃戈鋌



仁者思除暴臣工並進箋敢親勞輦輅競欲效鷹鷂  
獨斷排羣議

神機出萬全義和扶

日馭弧矢耀星躔十萬元戎啟三千突騎先夾鐘方  
應律

天子自行邊鳳葆雲爲色鸞旂柳共妍雄鉤欺雪豔  
組甲奪霞鮮距躍龍驤奮糾桓虎旅闐翠華臨大  
漠黃纛主中權自迓神庥至須知瑞應駢清塵風  
細細洒道雨濺濺石迸泉如醴沙明草似鈿橫衝  
齊唱舞腰裏盡騰騫甘苦

宸居共韜鈴

廟略專行廚先減膳寢鐵爲裝綿令一謀前定幾研  
道屢遷我行爭鼓銳敵壘已無堅分部供捫乳諸  
蕃並獻豳戈及趨帳殿衽席過居延馬自千盤熟  
楊從百步穿挈壺先令井游騎間蒐田賊穴來偵  
謀軍容自靜便鸛鶩排玉帳貔虎驟金鞭羽衛千  
牛列雲屯萬駟聯陰山渾欲撼瀚海已平填角犄  
遙分閫顏行盡控弦長驅吞朔漠轉石落層巔亡  
命猶烏合偷生尚蟻緣忽聞金鼓震陡遇礮車燂  
霆擊從天降狼奔覺地偏窮追同霧卷迅掃似風  
旋甲仗遑收顧輜糧忽棄捐鳥驚翻觸繳魚駭轉  
投筌勝算先張翼奇謀早搯咽楚猿空跳踉班馬



困屯遭獸盾東西合神鎗子母連劍鉞蓮峯峒弓  
勢月嬋娟偏伍承魚麗蜿蜒布率然前鋒分隊密  
四野合圍圓颺發山疑壓塵飛幟已舉逆渠咸破  
膽待死孰張拳長狄春喉吭蚩尤裂臂肩執俘囚  
纍纍漂杵血涓涓骨訝專車載頭看太白懸六年  
寬漏網一旦掃除羶妻子同時戮牛羊塞路牽曩  
何夜郎大今少隻輪還搗窟獼魑魅稽圖廣幅幘  
銀河兵可洗石鼓字應鐫部曲聲靈赫要荒氛祲  
湔總由

萬乘慮不忍一夫顛

帝軫黎元切天教王道平歡聲騰種落喜氣滿山川

塞外安都護車前拜左賢捧觴金鑿落效馬錦連  
錢襁負擔行幄壺漿獻細旃向風爭舉踵賜食並  
加邊在昔戈常枕于今燧不燃回師旗獵獵振旅  
鼓齎齎玉靶加韞服銀鞍帖繡韉布沙除虎落殷  
血匣龍泉捷奏旬逾七軍行路幾千屢經穿截業  
頻見渡潺湲掃蕩寰區謐廻環寒暑嬾青蛙低覆  
雉綠樹遠鳴蟬壓岸垂紅蓼凌波綻碧蓮共歌螽  
趯趯誰詠蠋蛸蛸團蓋雲占慶迎鑾仗是仙扶攜  
紛雜沓舞蹈各蹁躑近日開儀衛呼嵩隘市廛豈  
予勤遠馭貽爾得安眠雁塞無傳箭龍沙罷戍烟待  
邊嗤漢武命將陋周宣事異平庸蜀功高定益滇



普天同擊壤率土叶揮絃

神武超前躅謨猷仰

睿篇小臣恩莫報奉職分多愆駿烈輝金石蜚吟愧

槩鉛昇平來景福

萬壽祝堯年

除夕前一日蒙

恩賜兔恭紀

內殿追趨荷

聖情金階拜捧玉衡精獵從朔野肥鮮異

賜及辛盤節物榮熟薦登筵光禴祭分嘗舉室訝珍

烹霜毫空吮慙無補祇祝同文頌太平

二

邊庭三月待和鑿記得頒禽壓錦鞍春間扈從北

賜出塞兩番勞

聖武分鮮重疊愧偷安冬間塞未及扈從身依霄漢霑

恩近賜比公卿欲報難漢官蒙賜者惟宛平合

城大宗伯雲間總憲奉常勵公張隨齋史耕巖二

學士尚有盤餐堪詡客莫將岑寂笑儒酸

除夕感懷

五度長安臘蹉跎歲又闌冰心難就熱梅信不辭

寒老尚荒三徑貧因守一官門符煩再換面目舊

時看



二

半載龍沙夢嚴冬兩度賒流光拋暑月隔歲憶春  
華短鬢名心澹勞生宦計差敝裘重拂拭遮莫染  
邊沙

三

能文憐愛弟拙宦愧難兄辛苦寒宵話團圞卒歲  
情世方欺冷局天亦賤華纓歎爾篝燈讀吾今已  
悔名時巨高弟公車方至  
每咿唔達旦不已

四

南望親闈遠長虛菽水情上竿慙久仕乞米笑謀  
生商陸銷寒盡屠蘇餞臘傾邊氛應早淨好去學

躬耕

送江村詹事三扈

聖駕北征

玉斧三千丈金甌億萬年

朝廷勤遠略帷幄藉名賢學本天人貫才推將相全  
賦詩當甲冑聚米識山川憶昨征沙漠

行宮武接聯

初次北征江村  
與余同扈從

軍裝宜短後驚馬亦爭

先夜指旄頭落朝隨豹尾穿黃雲低接地白草遠  
粘天凍裂衣裳脆飢分湏酪羶俄傳露布至遠道  
屬車還再出賢勞異微忠去住偏有才肱獨倚無  
補足應跼刺促衝寒別倉皇逼歲旋終思磨礪石



誓欲掃居延膽爲酬恩壯身惟致命偏禁中師復  
出夜半席頻前重淬新裝劍還騎舊賜羈往來經  
幾度咫尺視三邊畫陣風雲合論兵草木宣時時  
符

睿算歷歷倚中權會見名王縛應看太白懸磧寒陽  
雁少春閨柳條妍夢只高堂戀情惟

聖主憐論功誰比績屢出最孤肩盛事君臣際佳名  
史冊傳瀛洲風貌在移畫在凌烟

三月下澣偕前輩胡南荅司馬史耕巖學士  
孫樹峰祭酒假高陽相國園亭邀桐城館師  
張公隨齋學士昆仲遊讌竟日

春光不改午橋莊花事侵尋到海棠相國遺風傳  
水石尚書休暇接壺觴青雲通貴推蕭李玉筍師  
門愧薛唐父老猶能誇盛事鳴珂接路有輝光

二

石磴雲廊次第過西山遙翠拂簾波承平故事流  
傳美觴詠閒情館閣多花影晚宜明醉眼鶯聲晴  
欲和新歌定知元白詩難壓得句爭如最晚何

孫兩先生詩  
先成見示

紫丁香

豔影垂垂傍曲廊朦朧何處認花光宮中舊識昭  
容袖階畔初含侍史香曉露正濃欹半樹流雲欲



夢窗詩集卷九  
墮壓千房春風簾幙應深護不逐楊花到處狂

二

交枝接葉影參差十五盈盈斂翠眉偏惜芳名同  
豆蔻未將豔色傍金龜羅囊風度香難辨繡結光  
搖重每垂便擬移牀依錦幄夜深花氣少人知

邀王顓菴司農顧觀廬學士二前輩暨澄溪

堅齋葯洲嘉升諸內兄小集丁香花下葯洲

枉詩見示依韻和答

蕭寂門庭春事幽花枝漫擬錦爲毬暗香入座多

飄瞥昔酒邀賓愧拍浮塵土虛名真是夢邊沙回

首尚生愁

去年偕葯洲  
從征沙漠

山雲已笑吾歸晚莫向尊

前話八騶

來詩有座上  
鳴騶之句

閏三月十三日堅齋招集萬柳堂送春羣賢

畢至盡歡永日得詩四首

休暇招攜浣俗塵尋幽莫遣負良辰閏逢三月畱

餘景節過明朝又送春裙屐遺風追洛涘池臺舊

路憶平津

萬柳堂創自  
益都馮相國

橋邊柳外停車處帽影鞭

絲照水新

二

越水新迴使者車蘭亭重換右軍書

堅齋奉  
修建蘭亭初

風流異代遙相映觴詠幽情尚有餘白石論心

同縞紵青雲飛蓋接應徐他年圖畫流傳好金谷



西園恐弗如

三

暮春好景兩回看  
望遠畱連欲別難  
乍見陰濃千樹合  
可堪風定一枝殘  
春憐人老如相慰  
人惜春歸且盡歡  
今日尊前誰最少  
酒兵辟易破愁端

四

林泉近傍

帝城東戚里羣瞻退  
讓風醒酒不須奇  
石貴穿花別有小橋通  
泛舟客醉還盤馬  
較射人喧更據桐  
得句仍教題壁去  
重遊頻許探花叢

題曹希文送別三圖

不知長養幾春風  
纔得蓂蓂綠一叢  
可惜人情易攀折  
笛中吹罷又圖中

右春明折柳圖

纔經出谷又春殘  
欲鬪新簧興已闌  
好向濃陰最深處  
五陵年少有金丸

右客店聽鶯圖

劉郎堰畔憶吾廬  
碧筍朱櫻入夢虛  
未免被他雞肋誤  
棘針漁網護全疎

右故鄉櫻筍圖

葉甥來青忠節葉公長子也  
以難蔭授鬱林州守將出京之官  
王山人石谷爲作贈行三



圖一曰蘆溝送別一曰鬱林山署一曰鳳城  
春曉昔年曾與忠節遊者皆題詩以送之余  
覽之慨然因各題一絕句

登車莫忘白華篇送爾蘆溝月又圓記得雙旌南  
去日魂銷橋影十三年乙丑冬送忠節公赴任武  
昌於橋畔分手今十三年  
矣

右蘆溝送別圖

瘴嶺嵯峨碧幾尋山城政簡

主恩深他時載石歸舟穩好慰高堂却鮮心甥以道  
遠不能

奉母之任爲憾望其  
有賢聲以慰母心也

右鬱林山署圖

壯歲何辭萬里行傳家端不負真清還朝報最

天顏喜重憶居庸道左迎甥謁選時值  
凱旋跪迎居庸關道左奏

係葉某之子  
上垂  
問年齒及家事甚悉

右鳳城春曉圖
















T5466/7910

4



CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

OCT 4 1960

神武平北詩

環侶笑四

愛日堂詩卷十

天地無私恩恩賜於我帝王有

道氣吾輩高尊親是以憂危併憂為

王阿母本無恙或化此舉然而歷年

逃匿前誠恐致誤治平中幸得城守

趙城縣令高烈自吉和群推我

乾戈東望補闕正原也承三教力使

年分長收大岸於南順江都領二

同知縣定應



愛日堂詩卷十

環召集四

戊寅己卯

哈佛大學漢和  
圖書館珍藏印

神武平北詩

并序

臣聞天地無私遐邇悉歸於覆載帝王有道血氣皆奉爲尊親是以要荒僻遠盡屬王圖草木昆蟲咸成化理然而歷稽往史  
逖覽前猷聲教縱洽于中華德威鮮孚於  
絕域於今爲烈自古稱難惟我

皇上執契乘權握圖正象道承三統功被八埏擒察  
罕於東陲收水犀於南服烟江瘴嶺三孽  
同鋤鼇穴鮫宮臺灣遠闢俄羅斯頓顙而



納欵喀爾喀銜璧而歸誠可謂羣邪惕息  
萬類傾心矣乃春風向暖忽有背陽之禽  
化日重輪突起吠形之犬如厄魯特葛爾  
丹者習多桀驚性本兇殘開庭於鴻雁池  
邊營窟於鷓鴣泉上雞矜善鬪屢喋血於  
廣場鴟逞無良偏佔巢於異族虎視西北  
者六七八載蠶食遠近者千二百城恃彼  
狡頑不信乾坤之有

主負其險遠并忘

覆載之無涯乘久靖之邊圉侵依歸之部落

詔書切責怙惡不悛是用

赫然加諸蠹爾韓王聚議或爭深入之難衛霍矜能  
或逞成功之易而我

皇上智徹幾先慮周物表九邊地勢既熟悉於諮諏  
三窟情形亦盡收於指掌謂欲驅猛獸必  
烈火以焚山將戮長蛇須迅雷之震穴爰  
施碩畫遂決

親征于是披圖授略聚米指途飛內廐之芻不起三  
農貢賦選周廬之士毋煩六郡良家將軍  
悉熊虎之姿戰馬亦驍驍之最先聲義問  
韜略不藉於陰符決勝摧鋒機宜咸秉乎  
獨斷誓衆而風霆激烈禡牙而日月昭明太史占星



夢月堂詩卷一  
載陽值候春官奏日剛午逢辰雲霓曉散  
於天門韎韐朝臨於武帳五營合月勢集  
魚鱗八陣連雲影分雁翼陰磧有發生之  
氣荒陬回長養之風草豐泉潔疑載路之  
壺漿雪霽冰開知百神之環衛一鼓而驟  
踰瀚海長驅而直蹴天山降若從空順天  
機之左轉迴看不斷乘地軸以右旋鉦聲  
揭沙石俱飛鞭影指河流欲却前軍甫接  
已觸不周之頭後殿將奔復蹈常山之尾  
彼師其遁班馬無聲我武維揚長虹亘氣  
降旗塞路棄甲齊山適當偃覆之辰復發

皇上綢祝翔禽穽畱困獸收來老穉示不殺之恩諭  
追亡之騎焚巢取卵盡僇其妻孥裂骨專  
車輒殲其渠帥晷寒漏急命促途窮而我  
彼獷愚開自新之路旋師瀉水返旆禺山  
諒當面縛而來歸豈尚尸居而偷息纔歌  
杖杜再賦攻車遠涉不毛直尋窮髮溯河  
流之九曲恍探支機覽套外之三城如看  
列壘鳥飛不到之處

車駕遙臨斗杓可捫之鄉沍寒倍冽霜凝馬尾凍鐵  
時鳴風急雕翎驚絃欲折素冰彌澤未停  
十驥之蹄白雪盈山猶駕六龍之轡人懷



夢月堂詩卷一  
三  
挾纊那知塞上星迴士感投醪不覺回中  
歲暮臣民遙戀節序將新

俯慰輿情暫回

曦馭然而

聖心籌遠益勤宵旰之思

神智乘機恐貽毫髮之間夾鐘轉律

玉輦重巡綿亘長邊遠踰西塞崎嶇朔漠直度陰山  
九伐昭宣三犁迅疾瞰狼居之險臨賀蘭  
之巔徧諭諸蕃旁招屬國示以禍福之故  
明其順逆之形八種生羗後先芟面五庭  
可汗絡繹輸誠喉吭塞而肩臂已殘唇齒

亡而腹背受敵彼昏罔革尚稽膏斧之期  
愛子無知先繫長纓之末飛走之途已絕  
尅日掃除擒縱之法無遺隨機調遣千軍  
超距僉欲卽取以甘心萬馬騰騫佇待滅  
此而朝食而

皇上好生無已止殺如初曲成以誘其衷持久以觀

其變俄傳瓦解族類相仇旋見貫盈神人  
共殛還師早期於席上游魂待盡於釜中  
天網殊寬自絕逃生之路鬼誅已迫惟餘  
送死之邱十姓斬突厥之頭三方奏隴西  
之捷日邊喜氣先忻



九廟之靈風際揚灰行快萬人之目于是滌山川之  
餘穢廓宇宙之弘模四塞銷兵七關罷戍  
桑河永靜不興瞭遠之城柳水長清高揭  
銘功之石四海與戶庭作沼百蠻與冠帶  
同倫萬三千里陋漢室之規模三十四州  
笑唐家之羈靡揆之往古實未有此幅幘  
載在詩書應獨隆夫謨烈小臣勇不任夫  
荷戈書并慙於磨盾仰觀

君王之允武早知氛眚之必消茲者元惡旣除大勳  
克立適合

九重之成算遂爲千古之貞符惟有載述抒情頌揚

見志書祥聖策歸美祕圖庶幾上詠

皇猷下垂奕禩從此普天同軌比戶可封騰瑞氣而  
布祥風披卿雲而捧瑞日赤雁與斑麟並  
煥醴泉與甘露同滋紀曆萬年聲施百世  
謹拜手稽首作詩十六章以獻

祥開寶曆應璇樞翕闢

神功煥

帝圖九譯環裘歸正朔兩階千羽叶元符久知薄海  
恩皆渥豈有殊荒教未孚天末一星餘畢昴重煩  
玉弩振威弧

二



借箸盈庭總未工天開祕略自

宸衷青邱丹浦書空紀洛水徐方事不同七萃有聲  
知禁旅五雲無際是

行宮莫言萬里流沙遠只在

皇綱咫尺中

三

捷遣牙璋誓出郊奎星十二指前茅先聲似電能  
搜窟勝氣連雲必擣巢苜蓿未青踰瀚海龍驤有  
血是蒲梢凱歌要及秋前唱不待西風驗折膠

四

天心仁愛佑成功河嶽諸靈效職同旱磧隨營泉自

涌窮沙傍輦草初豐照臨忍棄殊方遠雨露無私  
絕幕通羌笛於今休悵望玉門關外有春風

五

陣雲不散結黃埃箭落驚看候騎迴十萬蛇鱗新  
浴日三千鼉鼓競鳴雷峰盤束馬從天降路轉懸  
車鑿空來設險早知三覆在前軍已掃白雲堆

六

邏些城邊月一彎霜天吹角暮雲間已收屈射騎  
羊地更奪祁連牧馬山林際亡猿空狡獪草間脫  
兔亦孤孱從今塞草花顏色疑是闕氏血染斑

七



雨雪遄歸又出車依依楊柳映

鑾輿王庭坐待三犁後別部爭收七縱餘宛轉黑河  
人渡急崔嵬陰嶺馬行徐

盛朝不是勤雄略直爲蒼生鮮定居

八

忽報軍書夜刺閨朱旗已過五庭西指麾俄見旄  
頭落談笑翻驚太白低礪盡戈矛人共怒蹋平關  
塞馬猶嘶拂雲祠下年年酒從此秋高罷鼓聲

九

虎落魚鈴勢接聯天青百道起狼烟縫開鐵甲風  
吹裂色暗凋旗雪射穿縛虎人歸喧玉帳分營角

起響金天長纓自繫單于頸先縛狂童馬上懸

十

有征不殺是王師屢納降酋示

聖慈狐兔漸亡唇齒國虎狼翻効爪牙資乞身頓顙  
來何暮戀草貪泉悔已遲却笑迷恩窮默啜偏尋  
斧鉞托膏脂

十一

妖星昨夜落蒼霄狐尾爭懸通鶴軍旃帳一時烟  
盡起拋樓七具火先焚冥誅自取淪亡速法網應  
知順逆分從此烏鳶歌入塞紛紛怪獸亦珍羣

十二



卷一  
振旅狼山度翠旛龍舟天外溯河源大荒自古無人渡斷岸從今有棹痕斗象南看皆奉朔流沙西去亦稱藩穹廬悚息同編戶不用黃雲塞上屯

十三

閒盡墩臺見月輪賀蘭山外斷驚塵邊關不唱從軍曲蕃長新爲守土臣聲教已看周地軸威靈直欲逼天垠從來異域書難信今日輿圖遠更真

十四

永掃邊方萬古愁遙傳佳氣入

皇州盡翻戰角爲鐃吹好脫戎衣換錦裘就日扶攜寬警蹕呼嵩忭躍隘平疇長安酒價應增倍壯士

歸來十日游

十五

神機默運廣諮諏邊勢遙從指掌收三度馳驅踰萬里經年櫛沐奠千秋誰能慮始窺

成算終信圖難本

哲謀泰運無疆人共樂那知獨荷

聖人憂

十六

倒傾銀漢洗天兵更覺乾坤氣象明不用披圖橫玉斧盡收絕塞作金城山川一氣歸仁壽雲物千年紀太平陬溍有知齊擊壤好將歌頌佐咸英



敬觀

御書嵩嶽廟淮瀆廟禹王臺孟子游梁祠四扁恭紀  
聖皇端拱垂衣裳載稽典訓臻虞唐發舒心畫煥  
天章嶽瀆褒崇賢聖揚禁扁賁錫傳無疆丹書綠字  
金玉相乾端坤倪元氣長虹光照耀翰墨香天門  
誅蕩開紫閭羣工肅拜分兩行微臣瞻仰喜氣洋  
聖學天縱詎可量四幅大字如截肪美哉明德首夏  
王九州奠定安懷襄吾無間然功不忘先聖後聖  
遙相望今古一致永焜煌扁榜峩峩冠昊蒼昭倬  
金薤披琳琅尼山道統誰扶將縱橫押闔仁義戕  
七篇有作扶綱常浩然之氣至大剛至今游夏同

升堂華袞褒標櫺栢張遂令聖道從茲彰嵩高惟  
嶽峙中央導淮桐柏接混茫吐雲觸石金醴漿洪  
源靈濤此濫觴寶題翠琰鸞鳳翔義圖頡迹真頡  
頤高臨日月輦苞桑風雲長護在兩旁瀾淪宇宙  
鎮八荒車書萬里來梯航

萬歲嵩呼頌壽昌晶熒五色昭榮光有若東壁窺寒  
芒神搖目眩驚欲狂濡筆獻頌敢迴遑願將下里  
效柏梁拜手作歌敬賡颺

五月十六日

特賜

御書手卷一軸感



恩恭紀二十四韻

曝直明光裏濡毫玉案前班行瞻日近

寵錫荷恩專

睿藻含元氣

宸章運化權珠繩分象緯香靄散雲烟波磔心先正  
釵痕體自妍毫端橫宇宙墨瀋吸淵泉紫鳳丹青  
翥蒼龍碧落騫晉唐俱避舍義頡敢稱先形若山  
河界神難琬琰鐫補戈嗤固陋書永笑拘牽舒卷  
風生練光華月滿箋多能書是聖游藝筆疑仙

賜得從三殿擎來下九天感深渾欲泣喜極幾成顛  
照室熊光映迎門鶴蓋連百僚齊動色萬口已喧

傳自愧真凡猥逢時謬採甄撫躬常惴惴捫腹詎  
便便學未窺堂奧文寧辨陌阡塗鴉聊點抹結蚓  
竟蜿蜒忽捧星辰麗何當雨露偏雙鉤容髣髴八  
法任搜研什襲畱貽永裝潢制度虔華門騰寶氣  
萬古耀坤乾

題畫

窈窕林巒勢絕奇赤城山接兩溫池是中定有神  
仙窟曾見溪堂七字詩

二

石笋嵯峨迥隔塵大松應紀八千春不知好景誰  
消受付與看山倚杖人



題錢再亭給諫寄園圖

規復林亭雅願成依然邱壑舊經營池邊荻長魚  
苗出樓半花飛燕子迎誅憶荊州文惻愴月留崇  
讓夜昏明畫圖烟靄蒼茫處無限臨風點筆情

送查德尹之蘭州

衝寒結束佩吳鉤書紀翩翩紫塞遊要識壯心難  
自己新詩一卷續邊愁

二

舊雨心知跡總岐半年客邸慰相思無端幕府徵  
書急一曲陽關又遠離

三

臯蘭山外絕驚塵蘆管停吹滿地春閒上塞原方  
得句儒冠笑隋射鵬人

四

蹤跡東西任所之酒場騷壘總堪思時平不用籌  
邊策蓮幕新翻訝鼓詞

五

牛炙駝峰入饌肥諸侯上客願非違從今淨洗虀  
鹽氣腸胃文章別有輝

六

渝歌楚舞幾銷愁曾踏炎荒汗漫遊此去西陲休  
悵望紅裙小隊按涼州



七

篋底端溪硯似規小窗曾畫遠山眉燕支山下經年住能忘銀鐙擁髻時

八

金城戰壘憶嫖姚萬里邊風刮敝袍諭蜀文章收異俗封侯豈必藉弓刀

九

自笑頭銜冷未休百年麤糲愧交遊公卿不少憐才意難遣征鞍爲小畱

十

暫向邊城度歲華上林春色待看花郵亭是處多

題句畱與他年護碧紗

叩謁

孝陵恭紀

疊翠層巒幾萬重石門雙峙護蒼龍忽開陸海規無外總攝乾坤氣可容障列諸山皆拱極潭通瀚海盡朝宗

皇家陵寢千秋奠天半遙瞻瑞靄封

扈從

聖駕南巡恭進詩二十首

并序

欽惟我

皇上御極三十有八年膏澤殷流德風遐暢文思光



被武烈昭宣五典慎而百度貞七政齊而  
九功敘懷生含氣均被太和喙息跂行並  
霑汪濊聲教暨訖罔不率俾回面受吏者  
越漠而踰沙執贄貢琛者棧山而航海比  
歲肅清甌脫迅掃欃槍剷壁壘於遐荒熄  
烽烟於邊徼關山萬里長無橫草之驚區  
夏億年永絕鳴虓之擾中外禔福神人洽  
和惟是淮揚諸郡漕輓攸關歲委金錢時  
聞衝決用疏用塞徒傳賈讓之言治委治  
源莫定桓譚之議

俯允臣僚之陳請

親御玉輅以巡行更以吳會清嘉東南奧壤兼行補  
助加意撫綏河嶽懷柔百神從令憚嫠歌  
舞萬姓慕恩而我

皇上治功久洽於寰區孝德彌隆於宮寢慮省方之  
將出或視膳之久虛海宴河清喜奉

慈闈而養志途吟野忭敬扶

寶幄以觀風維時惠風條暢淑景舒遲妍卉敷榮新  
萸挺秀桑鳴戴勝正虞書觀嶽之辰水涵  
桃花值禹橈濬川之日言從淮右屈乎平  
江乃自浙西歷於建業所至條狼之士弗  
唱辟除戴鶚之倫罷傳警蹕炷香夾道設



綵連衢士女頒斌連襪而瞻豹尾髦倪雜  
還企踵而仰

龍顏正屬三春恭逢

萬壽卿雲翔而捧日神光起而燭天里溢弦歌塗交  
酒醴我

皇上布天澤宣綽音法網解而囹圄空田賦蠲而閭  
閻阜關征鹽筴並沐恩波耆老秀民咸霑  
湛露弘多士登進之額開長吏自新之門  
民事艱難無微不照田間淪棄有美必收  
王言如絲下應猶草農蠶賓旅泛習習之凱風吳越  
青齊被祁祁之甘雨三辰合慶九宇同歡

惟我

皇上體休戚於窮檐通寒暑於丹禁夙興宵寐念切  
痼瘼立政用人計安黎庶俯臨淮海親辨  
疏濬之宜細察黃流指示決排之策

神謨廣運

厚澤沾濡夏長春生顯仁藏用瞻依愛戴者真如赤  
子之慕庭闈蹈舞謳歌者幾忘

至尊之臨愚賤自唐虞而降未覩此風卽開闢以還  
罕聞其盛臣西清末品東觀庸才幸叨侍  
從之班親覩

時巡之典擬濡毫而作賦莫能名



聖人之仁願擗管以攄詞詎足揚

天子之孝欣逢盛事聊效衢歌謹撰七言近體二十

章拜手以獻

萬年有道啟昌期化洽垂裳庶類熙周雅戢戈橐  
矢日虞廷覲嶽省方時烽沉關塞農桑盛春徧江  
淮雨露滋正值青陽行慶候曉看九野協風披

二

廟謨永靖塞垣塵九有同風萬物春獨儆河流頻汎  
濫更虞漕輓漸艱辛臣隣祗自陳三策飢溺還思  
在

一人臨視俯從中外請陽侯迎棹向江濱

三

興朝孝治被寰瀛此日巡方盛事并長樂宮開移畫  
扇金根車動出層城綠波晴泛牙樯遠香苻風迴  
鳳鷁輕養志怡顏隆

聖母神廚應見蓬蒲生

四

雲罕諏辰出

九重鮫冰初泮水溶溶祗看畫戟雙龍護不用琯戈  
萬騎從包匭勿通長吏謁行廚自勅大官供經過  
盡却牙盤獻肅穆

天行雨露濃



五

黃流勢與運渠連衝決常縻太府錢禹橈昔曾行  
水土

舜瞳今復閱山川源流一覽

宸謨定修築隨宜

睿算全從此河宗長效順千檣漕舸往來便

六

聖心最是念窮氓水若迎鑾勢乍平

詔許停漕畱玉粒

恩教減糶濟蒼生備荒更貯他年策賑患仍捐昨歲  
征災沴已回驚浪息好修錢鎛事春耕

七

平江一水卽吳趨風會清嘉實奧區文物總由陶  
鑄盛桑麻憑仗雨暘扶十年心憶鸞旂幸三度恩  
邀

法駕紆虎士前驅除警蹕萬民齊仰

睿容愉

八

雞翹豹尾泛安流

周覽郊原庶彙稠宮扇晴搖桑日麗

天衣暖上麥風柔祗循繡陌移青雀不許雕鞍破綠  
疇自是



聖心憐稼穡扶犁野老拜龍旂

九

祥開南極壽無疆  
闔行宮淑氣翔五色日懸天上瑞萬年人進

御前觴班文錦綴交衢  
幕鵲尾爐焚夾道香民力從來勞軫恤不教父老費壺漿

十

鑾輿本爲省封疆  
大吏趨朝接鷺行玉府衣裳榮錫賚農家絲穀賴循良旌庸垂惠捐瑕垢澄品維公見激揚共仰洪鑪陶鑄德百城鼓舞戀清光

十一

雲罕巡行

大澤宣尚憐逋稅困茅椽租庸

天府蠲三載蓄積田家得九年  
化雨新霑浴種後惠風恰被養花天

恩施不獨優吳越喜氣龍蔥海岱連

十二

喜見珠旒駕六飛

溫綸朝降帶晴暉刑清豈漫施  
丹筆德盛還勞泣赭衣祥引金雞臨廣陌春廻幽籥動圓扉從茲祝網深仁徧囹圄空虛綠草肥

十三



臨安望幸動謳歌鳳舸乘流倚棹過百里湖山瞻  
化日六橋花柳颺恩波西陵近眺吳封盡南鎮遙  
看禹績多風物恰當修禊後蘭亭

天藻發烟蘿

十四

未作辛勤亦可憐

皇心軫恤次農田關門澤逮輕輶算鹽筴恩流減籍  
錢商舶賈帆羈滯少水郵山驛踏歌連紅亭鼓吹  
喧闐處甲煎香濃結紫烟

十五

時巡閱武簇橐鞬魚甲雲鑣布綠原聲揭雷霆鼉鼓

動光開日月繡旗繙帛移錦市天波渥酒瀉銀罌  
士氣暄日暮謝恩呼

萬歲十年重喜覲龍輜

十六

肄雅弦歌萬國同

恩加吳越更無窮誰言竹箭東南美自荷菁莪化澤  
隆泮水芹香浮碧浪橋門柳葉舞春風更逢

親試收寒雋額手歡呼滿澤宮

十七

勾陳容衛曉駸駸比戶歡傳

法駕臨檻外綠波蕤穠秀馬前香錦菜畦深野人滿



夢日堂詩卷一  
飽天廚味耆叟分攜太府金更許蕃民還舊國佇  
聽八極徧謳吟

十八

建業臣民望不虛

迴鑾重幸駐金輿江山昔號繁華地閭里今當休養  
餘勝國舊陵勞

玉趾追褒創業錫

宸書吾

皇度量超千古杞宋行看拜殿除

十九

沃野春深景物滋

省方到處念農時杏花菖葉畱

宸矚桑扈耕犁入

睿詞筆灑龍鸞騰墨海韻鏘金玉煥文思寸陰還惜  
船窗暇風度牙籤桂棹移

二十

時巡至德播寰瀛河嶽懷柔日月明

虞孝

親安天下養

禹勤水自地中行碧梧彩鳳同聲唱黛畝嘉禾合穎  
生幸扈屬車逢盛典愧無麗筆奏鯨鏗

扈從舟行雜詩八首



忽漫歸心慰舟行漸向南挂帆晨坐穩倚楫夜深  
談烟水侵衣潤清流入齒甘陪遊多樂事那復羨  
抽簪

二

岸東猶濟北施右已江南水色澄空碧天光淨蔚  
藍好花應未半眠柳恰宜三社鼓前村急江鄉又  
浴蠶

三

堤邊楊柳月帆背杏花風客指平疇綠農驚綵仗  
紅褰裳趨貴近問渡笑村童聞說春耕足今朝慰

聖衷

四

舒雁千舟列行雲十里移竿鳥風細細檣燕舞遲  
遲擊棹吳兒疾停橈齊女窺過江程可計正及豔  
陽時

五

野曠水天青龍舟向晚停幔城環柳岸宿衛繞沙  
汀行漏波心靜漁歌仗外聽牙檣燈萬點宛轉雜  
春星

六

北客頻相問烟波可奈何君愁春水濶我愛白雲  
多柔櫓空明裏輕帆安穩過江邊花月夜還聽起



吳歌

七

遠浦漁灣畔平堤釣渚邊衣冠休共訝簑笠未無緣公輩身真隱吾曹籍亦仙他年來問渡面目可如前

八

北渚搖波綠南塘接晝陰停雲垂幔好急雨薄寒侵滌硯開行笈香篝潤客衾船窗多韻事夜坐待橫參

初秋侍直暢春園蒙

恩賜內製松花江綠石硯恭紀

松花江底產奇珉

睿賞雕磨作席珍貯水乍看烟匝匝含輝能助墨精神紅雲捧處圭璋重綠暈浮來几案春漫道玉堂新樣好爭如雅製出

丹宸

王介甫綠石硯詩  
玉堂新樣世爭傳

二

別苑朝朝染翰餘

新恩宣賜玉蟾蜍南唐龍尾名誠陋北宋端溪品未如曾侍雲霄承雨露攜歸蓬華比璠璣

高深未有涓埃助矢效堅貞一寸迂

雲間簡子南亭假館苑北讀書其中以詩見



夢窗詩集卷十  
贈依韻答之

秋河耿耿半窗虛有客挑燈夜讀書豈是機雲初  
入雒早令潘陸遜扶輿帳依尺五身仍隱象應魁  
三學有餘顧我疎慵慙史筆遲君館閣佩瓊琚  
簡南亭倣李龍眠筆意自畫其尊人遺像屬

題

蓼莪三復淚沾巾遺像親描色笑真豈學龍眠精  
畫理須知純孝可通神

苑北有古柳一株大數圍垂陰半畝吳僧廓  
如結茅其下名大樹菴乘暇偶過廓如出詩  
見示卽用南亭韻賦贈

苑牆東去草亭虛爲訪支公罷校書高柳一株成  
寶樹扶筇數武却肩輿談空相對名香繞好句傳  
來入定餘倘許鈍根叅了義從師便擬謝華裾

渡黃河入潼關

嚴關百仞俯洪流保障咸陽萬古秋舊說土饒強  
富地從來天險帝王州方舟巨櫓波橫截急浪巉  
崖勢若浮無限漢唐遺蹟在登高憑弔不勝愁

曲江

樂遊故址已無痕曲岸清流今尚存修禊登科遊  
宴處空將遺事說開元

灞橋



愛日堂詩卷十  
千古傷離在此橋西風衰柳自飄蕭若逢風雪騎  
驢者別有詩情物外招

華嶽

千仞穹崇似削成蓐收別館聳精英蓮華峰出層  
雲表玉女泉流萬壑鳴嵐影變移隨路改客程瞻  
望覺心驚九霄呼吸應相近便擬遊仙到太清

臨潼湯泉

并序

湯泉在臨潼縣治之東有館舍一區前對  
繡嶺其中大小池五六處皆引泉可浴堂  
廡齋閣俱備邑令扃鑰以待上官及使車  
之經臨者此外民間浴房甚多其上流卽

華清故址也

華清舊蹟憶唐皇靈液千年尚有香曲折餘波分  
浴室氤氲暖氣泛雲漿疑從天漢通神井似引瑤  
池入曲房想像風流猶未泯不須憑弔說興亡

二

灞岸秋風送客晨停車小憩洗征塵水光映體人  
如玉

人坐湯中體皆瑩  
白蓋水色之妙也

暖意融心地似春源出丹

砂堪療疾坐看繡嶺倍怡神畱連信宿情難忘回  
首驪山爽氣新



愛日堂詩卷十一

環召集五

庚辰至甲申三月

題王石谷騎牛還山圖

出岫無心倦卽還尚湖深處掩柴關從教墨妙歸  
天府畱取冰容返故山

賦得夢破篷窗雨

扁舟欹卧意蕭蕭忽聽鳴泉響沆寥岸際菰蒲風  
雨驟水邊烟霧夢魂遙數聲滴瀝迷蝴蝶一枕淒  
清失鹿蕉倚檝初醒人不見半篙新漲上寒潮

二

垂楊堤畔木蘭橈栩栩心隨一水遙何處寒聲千



騎擁忽驚水面萬珠跳  
離路斷應難覓縹緲情  
幽亦易銷耳目蒼涼人  
意寂枕邊清韻可憐宵

送同年張雪書編修省覲假旋

聲華館閣有誰同  
忽漫陳情感

聖

衷江左名流懷馬帳

君主試江南歸

朝端文望憶燕公  
賜

書滿載恩光重  
法酒盈尊祿養崇  
最是知心深惜  
別涼宵促席蠟燈紅

二

金鑾殿角玉階前  
接袂隨肩十四年  
越嶠白雲勞我夢  
君山螺髻待君還  
花明子舍仙壇近  
詩滿奚囊洞府鐫  
倘憶京華舊朋侶  
好憑衡雁寄蘭荃

秋夜偕給諫陟齋實齋兩兄侍御大年兄農  
部香泉兄集學士丙齋兄邸舍小酌集字各  
得詩一首次日學士兄續成疊韻凡六章見  
示奉和亦如其數

追歡每解杖頭貲  
檢曆還應避畢箕  
鬚髮相看俱老大  
生辰那復笑雄雌

兄詩用甲辰雌語

誰言官冷容迂拙  
但祝年豐慰怨咨  
瀑直多閒封事少  
遭逢

聖世正清夷

二

清貧那敢傲高貲  
贏得疎狂坐似箕  
斂手空枰忘黑白  
當風塞戶任雄雌  
漫誇儒術承家學  
豈有謀



猷答

帝咨入耳秋聲漸蕭瑟愁他蔓草概畱夷

三

仕久田園損舊貲虛糜月俸米盈箕老之將至難  
驅騖壯不如人願執雌入世未工時俗譽開編喜  
對昔賢咨莫言宦海風波惡嗜退安貧亦坦夷

四

減縮盤餐惜旅貲秋堂促席對明箕雖陪末坐難  
言少已耗雄心學守雌得句謬邀靈運賞嗜奇還  
向子雲咨公卿袞袞皆豪雋敢說吾儕舊等夷

五

清砧又戒禦寒貲搖落空階葉滿箕自笑畏人同  
縮蝟可憐拙宦類羈雌枯腸尚有詩難和冷局原  
無事可咨屏却見聞安憤憤非關學道悟希夷

六

肯負良宵貲酒貲更闌星淡失南箕陶情且共浮  
重耐儉素何妨飽伏雌愛弟不勝鄉井戀諸兄好  
副廟堂咨

君恩早遂循陔志荒徑先歸手自夷

香泉兄以桂花一枝見貽再疊前韻奉謝

一株金粟十千貲苦憶家園落滿箕色正不爭桃  
李豔香濃自壓麝蘭雌根移故土休狼籍人觸離



夢窗詩集卷十一  
思起歎咨老圃秋容頻入夢花叢深處路平夷

二

纍纍黃金月窟貫天香披拂對秋箕叢生高嶺徒  
稱傲深護重簾豈是雌漫道品花仙客貴終慙招  
隱小山咨破除岑寂勞貽贈獨秀空齋意坦夷

袁節母詩

寒松挺勁節翠柏羅貞蕤程家嬌女袁家婦冰玉  
爲骨蘭爲姿生時噩夢占明月絃望廻環記圓缺  
藁砧一別隔黃墟寶鏡塵封凝碧血素絲夜織五  
丈長凌晨藿鯉承高堂嬌兒玉秀璨瑜珥經史口  
授開青箱憶昔彈琴悲別鶴鼻柱平摧成瘵毒白

衣仙人朝叩門神丹點出無瑕玉乃知節烈能動  
天千秋彤管磨崖鐫節母之節誰比賢依稀古有  
陳堂前

初夏偕同館諸公讌集豐臺宛平相國園亭  
觀芍藥卽事

紅芍招尋恐後期城南花徑蹔逶迤石橋流水思  
前度名圃繁花又一時映日粉痕香綽約翻風舞  
態玉參差晝長漫詠當階句坐待元暉下直遲

韓院長當  
直後至

二

湖纈銀綾一望賒香畦廻抱曲欄斜平鋪百丈風



前錦高捲千層雨後霞洛下名園誰得並揚州佳品未堪誇賣花比屋誇紅紫看到平津不是花

三

繚垣十畝晝沉沉點眼穠花寄醉吟銜粉蜂聲喧永晝惜花人意想輕陰茶鑪喜傍銀牀近卧榻容眠晝閣深滿坐紗籠人物在帶圍那羨四枝金

四

生來北地擅豪奢婪尾偏能冠物華况是移栽天上種不同散落野人家倦摩醉眼驚花海喜濺飛泉運水車庭有轆轤有客獨畱清夜賞悔騎羸馬踏堤沙

次日王瑁湖前輩以絕句五首見示賦答

久伴花王獨擅場唐人底事少篇章須知絕豔難描寫工部何曾賦海棠

二

團團徑尺玉盤盂東武嘉名自大蘇

東武蘇昌公家有白芍藥

東坡名之爲玉盤盂

聞道相公深愛惜曲闌干畔短籬扶

三

千紅萬紫各分塋異種當階結綵繒照眼繁華漸消歇晚香畱取一條冰

四

殿春長得占風光別有幽情更斷腸最是廉纖微



夢日堂詩卷十一  
五  
雨後相看簾下洗新粧

五

好是花光斂更宜晚粧曉抹更多姿將離折贈頻  
惆悵不見雲疎月淡時

四月二十九日

上御便殿作榜署書

召內直翰林賜觀

諭云爾等家中各有堂名不妨自言當書以賜臣元

龍跪奏臣父年踰八十欲得愛日堂三字長

瞻

堯天舜日

臣

父藉以延年

上卽揮毫書賜一時榮幸千古罕倫恭紀四首

秘殿揮毫畫漏長賜觀侍側墨池香

天顏有喜爭求乞

恩許陳情署爾堂

二

小臣有父逼桑榆逮養私情久愧烏願藉

恩光延暮景乞

書愛日不教晡

三

御筆親題墨未乾捧持稽首重於磐

聖朝錫類恩無限移孝難酬一寸丹



四

鏤碧雕金供

御書茅堂寶氣耀鄉閭光從北斗輝南極晝錦當年  
恐不如

九日書懷

風捲空庭落葉稠冷官况味恰宜秋晚香耐久真  
吾友老樹凌霜自寡儔懶去登高惟兀坐誰能載  
酒作清遊明朝曉直寒初覺檢點衣裳拂敝裘

二

玉陞風高布錦茵邇英講罷散儒紳是日經筵雲邊雁  
過秋聲遠窗外枝空日影新懷刺熱逢新貴客榜後

新貢士垂囊寒滯未歸人下第親友過訪眼看得失年年

異欲買扁舟去採蓴

九月二十日扈從

聖駕南巡啟行

風清輦路下江南豹尾班中舊所諳會上扁舟依

鳳鷁又騎羸馬扈龍驂余三扈南巡已巳從陸路已卯從水路今壬午又

從陸路郊原大有當陽九山嶽遙呼

萬歲三爽氣澄明塵不動隨鑾到處

聖恩覃

二

喜慰蘭陔愛日私倚閭先報老親知征衣曾染天



山雪吟卷長添驛路詩豈是秘書堪顧問願同執  
戟效驅馳追思舊侶今三度白髮先人馬意遲已  
扈從者內廷則桐城張館師靜海勵師平湖高江  
村講筵則安溪李館師汪東川前輩及元龍外廷  
則鴻臚張運青舍姪給諫于敬已卯扈從內廷則  
靜海勵師講筵則顧樸園王薛澱張隨齋三學士  
宋葯洲侍講及元龍外廷則韓慕廬大宗伯胡南  
茗閣學吳匪菴副憲孫樹峰祭酒宋堅齋給諫此  
行諭德查聲山編修汪文升陳幼安勵南湖舊  
侶惟葯洲一人余以官資首列而髮已白矣

十月初三日

駐蹕景州有

旨漢從官不必在營門坐班許隨便借宿民舍

體恤恩深恭紀一首

周廬野宿擁千官霜點旌旄曉未乾軍令不驚村

店靜

聖恩先念侍臣寒馬遲隨處容棲止雨立無憂得飽  
餐

宵旰勤民真至德侍臣偃息愧何安

初四日

駐蹕德州遇雪借寓南郊慧光禪院

清蹕重臨衛水涯初冬應候灑瓊葩雙旌風定光逾  
皎千帳銀鋪靜不譁梵宇借棲窗几靜儒冠寒覺  
帽簷斜時平不用歌黃竹豫慶豐登百萬家

初五日

召扈從翰林揆敘宋大業查昇汪士鋐陳壯履勵廷



儀暨元龍七人至

行宮內徹

御膳賜食畢宣至

御前命各書綾字一幅

上親灑宸翰書雲飛北闕輕陰散雨歇南山積翠來

諸臣環立瞻仰

上指示書學奧妙各

問年齒良久始出遭逢異數恭紀五言排律十二韻

河工新底績善後厘

堯心衛水停

青馭寒花點碧潯年占千庾象瑞應

六龍臨農慶看膚合

皇情惜寸陰披圖探學海名對寵詞林

賜膳登瑤席含毫聽

玉音

天章文苑寶

聖訓侍臣箴垂露窮源遠臨池妙理深健彊歌

萬壽蒙昧啟微忱扈從依霄漢殊榮邁古今職慙簪

筆久

恩念鬢霜侵蒲柳辜

高厚驚心淚不禁

初六日



上較射德州城內之演武場

命編修陳壯履射五矢中的者三卽事恭紀

家聲珍重比南金初扈

鑾輿

寵眷深纔拂霜毫趨案側又懸象珥出班心雕弓引

滿驚名將畫鵠頻穿訝羽林盤馬風流誰得似禁

中頗牧一時欽

上行宮清暇

御書千字文大手卷

召扈從諸臣賜觀恭紀

吳綃百尺爛如銀

乾文垂象儼星陳

鑾輿偶駐衛水濱千文俄成墨彩勻

宣示旌門集從臣爭前瞻仰摩儒紳

至尊好學古無倫下馬攤書寸晷珍行漏初傳散陛

楯霜毫寶硯光琳珣米顛俛首受陶甄指腕之間

力萬鈞別本曾經刻翠珉妙兼三體藏

紫宸灤河避暑憶

恩綸大卷郵歸賜跋新

淵鑒齋法帖刻文三種昨歲

御書千字

御書千字文大卷

命內直

此日重書變化頻縱

諸臣跋其後臣元龍與焉

召對誨諄諄指示書學啟迷津何幸追隨



日月親光華近覩得其真退歸握筆倍逡巡造就長思

聖主仁

扈從紀事雜詩三十四首是行也州者二旬以天寒

回鑾

午門御道上雕鞍仙仗班中列從官昔日也曾矜意氣於今策馬笑蹢躅

二

大紅門內度霓旌沙軟風輕信馬行遙見合圍飛羽騎金環華絆手中擎是日法駕出永定門較獵南苑駐蹕南紅門內

三

羣瞻

清蹕馬頭迎塵市經過總不驚野老扶犁歌

帝力

龍顏近覩得分明有旨不嚴警蹕許沿途百姓瞻仰

四

河臣馳奏報安瀾

行殿深宵秉燭看載筆還隨元老入親聞

天語不勝歡河臣遣道員張弼詣行在報河工底定召閣臣入行幄中面奏已漏下二刻矣

五

開府清風荷眷殊為經三輔每追趨朝朝



賜膳營門外舊領鑾坡一大儒

安溪李館師時為直隸巡撫

六

微霰初零淡遠天

行宮晝靜展瑤編兔園冊子巾箱裏檢點叢殘達

御前

初三日微雪駐蹕景州命取翰林官所攜書籍呈覽

七

論思出入

聖人前上相勤勞荷寵專

御膳雕盤馳內使

玉音還就帳中宣

初四日遣中使捧御膳一盒就京江相國帳中賜之

八

長扈

鑾輿一秘書相門才子有誰如周廬夜靜方歸帳萬

卷牛腰點勘餘

凱功學士攜書籍最富

九

躍馬盤旋日幾迴儒臣班裏莫相猜弓刀曾作千

夫長身向邊庭轉粟來

謂宋葑洲侍讀

十

應制新篇倚馬裁扈遊不忝子雲才敢言衣鉢憑

君重願借餘光照駑駘

謂查聲山諭德

十一

黃絹詩篇白練書吳趨才子擬應徐翩翩更有雙



雛鳳文采風流照屬車

謂汪文升編修暨陳幼安勵令式二公子

十二

下第名流亦可哀遭逢

聖主自憐才馬前

宣召詞臣急爲有書生獻賦來

途中有新安貢生汪灝獻安瀾賦上急

召扈從詞臣示之并問其所學與爲人何如頗蒙

睿賞

十三

金盤賜自

至尊前法饌駢羅總擊鮮暖幄細旃容列坐更聞

溫旨近臣宣

以下四首紀初五日召對賜膳諸恩禮

十四

霜毫寶硯出宮奩春蚓秋蛇上

御筵環聽

玉音親指示始知八法有真詮

蒙恩旨命就御案作書并指示書學

良久

十五

講幄趨承十七年每隨

仙蹕受恩偏先秋蒲柳憂難報敢說勤勞

聖主憐

上問元龍何年補講官扈行幾次元龍一一具奏上云第一老講官矣

十六

年少承恩侍禁中只今齒落鬢如蓬酒杯自笑原無分寂寞心情達



聖聰

又蒙

問年幾何而鬚已白  
問眼昏否齒無恙否

十七

敢言書法勝家尊學就鶩羣已逼真最少詞臣還  
善射

御前挾矢樹鏃頻

勵令式學勵師書法酷  
似陳幼安善射屢中

十八

御製親書錫老臣恩流衛水亦生春堂顏更荷題寒

綠松柏長堅洛社身

上特書御製甲子南巡過德  
水詩賜侍郎田公又

書寒綠堂扁  
額以賜

十九

重整朝衣鬢雪深高風誰識白雲心

天章特賜雙縑重宿衛爭看老翰林

在籍諸臣來朝  
特賜侍講蕭公

惟豫編修田公需各  
御書一幅傳  
旨以爾二人乃老翰林故有是賜

二十

雲流日觀潤滄瀛秩祭遙煩帝子行往返一句輕  
騎疾福釐早應

聖心誠

命皇十三子  
往祭東嶽

二十一

百里來朝比部郎遺書數卷獻

天間

深恩眷念重褒卹四字

宸題萬古香

吏部郎中董思凝自平原來朝進獻故  
父董公訥所遺書籍御書眷念舊勞



四字以  
光其墓

二十二

衛士強弓倍六鈞射堂傳示共稱神讀書不信顏

高勇今日方知事有真上較射德州之演武場以  
衛士強弓示扈從諸漢

臣

二十三

外臺遙隔紫雲迷東壁光華那得窺今日宣來承

異數碧霄深處立多時上臨軒揮翰宣外臺文  
武諸臣入內賜觀

二十四

敢將蛇蚓擬龍鸞被

命揮毫拂素紈鵠立當階諸大吏環看倚案兩儒酸

上

揮翰畢命元龍暨查  
昇各書一大幅示諸臣

二十五

瓊漿玉粒錫便蕃

御座東邊入小軒何幸微臣多忝竊叨陪元老荷殊

恩

恩召偕大學士張公  
玉書入內賜膳

二十六

連朝瑞雪慰三農退食僧寮看偃松

宣召忽傳愁馬滑恩教緩轡得從容

退食慧光禪院  
忽聞宣召又

傳旨云馬滑不  
妨緩行勿太亟也

二十七

橐筆懷鉛侍



聖明深恩培養在蓬瀛妍蚩自鑒全無定敢竊清時

月旦評

恩旨有所知學問好者指名薦舉

二十八

旁求下問

聖心虛固陋如臣總不如慙愧玉堂稱學士碧山尚

負五車書

聖意求賢甚殷傳旨固問元龍與查昇同舉查慎行學問好查昇言內舉不避元龍言少時同學復問元龍比爾所學何如元龍言臣實不如即命召至考試

二十九

御榻蕭閒斗室安

宸章寶墨未曾乾

聖人心廣忘卑隘咫尺還同宇宙寬

三十

內官徐引上層軒

丹扆中間許謝

恩指點筆牀供御處簾波墨瀋動香痕

上所御寢宮甚窄隘

召詞臣入內賜觀中使指書案筆硯傳旨曰朕日以翰墨自娛忘其陋也復賜茶果即命在階上謝恩而出

三十一

青衫宣至未呈身兩首新詩動

紫宸雙捧

奎章真異數

聖朝端不歎沈淪

直撫李公光地薦舉何焯與查慎行先後傳至未及引見各試詩一



御書一幅

賜

三十二

蕭寺城南信宿畱空庭古柏愛清幽五更夢醒聞  
清梵未了塵緣已白頭

三十三

行宮牆外日徘徊不遣丁夫治草萊野老那知瞻  
豹尾負薪猶自唱歌來

行宮門外  
往來無禁

三十四

輿薪擔粟集城隈滿載青蚨歸去來入市村農爭  
鼓腹吾

皇到處阜民財

題李太常松陰讀書圖

東西畫壁舊蓬瀛鶴與蒼松骨並清今日金華承  
對罷夜涼猶夢枕濤聲

二

可是詩翁與醉翁林泉聊寄畫圖中須知文雅潘  
尼父仍是風流蘇魏公

三

朝回一卷鎮隨身史庫經倉久絕倫十二萬言誰  
典輿太常因革又更新

題畫

石徑茶烟散作雲竹風吹過亂泉分五君新詠吾



能記擬削山王置此君

癸未正月扈從

南巡至楊村登舟

衛水風寒初返旆潞河冰泮再登舟春風乍轉檣  
梢動淑氣徐迴柁底浮岍柳催芽知

聖澤沙鷗戲浴趁安流欣看一水還家便書卷茶鑪  
壓兩頭

二

春水微添細細波龍舟徐引曉風和羣黎有喜瞻  
帆影千艘無聲發棹歌雲日祥光浮岍表陽春隨  
路及人多從官半是江南客買得吳舫任逶迤

聖駕渡江

駐蹕金山恭紀

長江千頃淨無波日暖風恬鳳鷁過

駐蹕山樓凝望遠畱題梵宇

聖情多百神擁護環黃屋

萬乘光華照碧蘿自是

宸心周八極層霄無礙氣堪呵

漏下二鼓乘小艇渡江至京口

江山如畫月如銀夜半江心問渡人一葉恍從天  
上出九霄疑是夢中身水晶宮裏侵肌冷白玉盤  
中顧影頻歸宿蓬窗依鐵甕城頭鼓角已三巡



夢日堂詩卷十一  
將入浙境老父來迎

聖駕因扶持登小舟跪迎蒙

恩旨近傍

御舟

問年齒家世及子姪官於朝者甚悉

賜果餌二器卽

命元龍送歸家中恭紀四首

父子攜持覲翠旒遙傳

恩旨傍龍舟

問年下逮家門事寵渥心驚不可酬

二

筋力衰殘拜跪艱

君恩特許送親還天廚仙果重頒賜

錫類深仁可駐顏

三

侍臣班裏許歸家子舍相依信宿賒里黨皆歌

仁主德敢將恩寵向人誇

四

榮逾畫錦照門閭移孝移忠愧令譽烏烏私情難

久戀追趨

行在敢徐徐

扈從渡淮



行宮傳示會試進呈榜紙并

諭諸臣有子弟中式及素所知者各書姓名具奏元  
龍胞弟嵩胞姪邦彥堂姪世倌皆中式因書  
名奏

聞驚喜交集恭紀二首

忽傳春榜出

行宮弟姪同登似夢中

恩旨更教書姓氏一門榮遇達

宸聰

二

能文愛弟勝難兄力學孤兒壓後生今日禮闈同

擢桂翻教喜極更心驚

九月扈從

西巡恭紀

鳳輦今朝出未央西陲引領望當陽太行瑞靄連秦  
嶺

北闕恩光入晉疆秉穗多遺軍不擾塵埃徐動露初  
灑一年兩度隨

清蹕料理寒裘再束裝

二

時巡膏雨沛江南西幸還將大澤覃爽氣自天迎馬  
首商飈清路拂龍驂漸增華髮心非壯強據雕鞍



貌不堪幸得同行多舊侶垂鞭接袂恣清談

駐蹕太原府聞擢補詹事之

命恭紀

深夜傳宣降

紫綸宮端特擢懼逡巡

金華殿裏承

恩久

玉輦班中拜

命新學術荒蕪難報國趨蹌疲薊早衰身况兼三事

聞朝政備位迂儒愧等倫

至潼關將渡黃河

上親御小舟擊槳飛渡

命扈從翰林乘

御舟徐行恭紀二首

至尊擊槳截洪河遙望

飛龍頃刻過

神武天生寧習慣昆明却笑漢時歌

二

桂棹蘭橈建翠旒

御舟賜坐漾中流秦關天險今如砥侍

輦徐登是壯遊

駕幸西安城外演武場大閱時邊將畢至雄兵咸集



分營列陣如星羅碁布旌旗蔽天弓刀耀日  
上躬御甲胄乘馬巡閱文武從官皆戎裝以隨周行  
約三十里閱視畢

命衛士同諸將較射

上環甲親發五矢皆中的將士駭伏歡呼聲震山谷  
仍

御將臺

上更衣傳

旨從官及督撫提鎮皆卸甲登臺

賜宴將士分賚牛酒有差以翰林官不勝甲胄  
命衣蟒袍隨侍仍

賜宴於

御座之後元龍等得逢

盛事一時榮幸千載罕倫恭紀排律十六韻

秦隴河山壯雄兵冠八方迎

鑾來宿將帶甲爲從

王大閱陳師旅平原講武塲旌旗搖日動組練煥星

芒野曠排魚麗營分布雁行

金輿來蒞止天駟盡騰驤

親御兜鍪重周巡壁壘長軍容承

帝鑒兵法凜

乾綱下馬還親射披堅試挽彊五枝齊中的百步邁



穿楊

神武千軍悚

天威萬里揚登臺歌湛露廣宴錫瓊漿健卒分牛酒  
將軍拜驕驕感

恩懷且畏祝

聖壽而昌形勝傳都會

巡行歷漢唐鄙儒陪寵渥既醉頌無疆

甲申新正余年五十三矣偶讀東坡先生詩  
有白髮蒼顏五十三之句慨然興感因用作  
起句依韻足成之凡得五首

白髮蒼顏五十三高堂鬢雪更鬢髮宮端清秩真

成忝萊綵春暉久負慙性懶豈宜趨禁地

恩深無計謝華簪何時歸隱扶鳩杖散步柴門春水  
潭

二

白髮蒼顏五十三新年栖迹苑牆南從兒弄筆污  
書幌有婦長齋傍佛龕人事多忘從客怪交親漸  
濶任吾慙酒杯歌板原無分寂寞心情老自甘

三

白髮蒼顏五十三朝朝騎馬背如蠶形骸縛處身  
如寄田舍荒餘粟幾擔夢去常時依定省醒來只  
恐悞朝參駑駘策勵原臣分敢說稽生七不堪



四

白髮蒼顏五十三春來愁病更相叅齒衰親老難  
言退秩貴才疎詎可貪眼暗觀書遺細字耳聾對  
客悞清談苑中下直無餘事一卷殘書卧草菴

偶患  
耳聾

五

白髮蒼顏五十三宦情世味也曾探一年又見花  
枝好百歲難期蔗境甘求退寸心須賈勇人生大  
節懼貽慙巖廊田野皆

君賜還望烏私

聖度涵

元夕蒙

賜宴苑中直廬中使復傳

恩旨引至苑西

賜觀華燈烟火紀

恩二首

上元佳節寵傳柑寓直天高近蔚藍永日素餐無  
寸報芳筵飫賜更懷慙香濃法醞

堯樽溢詩詠嘉魚

帝澤涵

恩許觀燈多異數苑西好月照澄潭

二



春林隨處盡燒燈烟火參差架綵繩影伴繁星輝  
碧落光分霽月照觚稜蠟盤紅蕊霞千縷絳竹銀  
花錦萬層此日承

恩仙籙裏人間空望露華澄

蔣揚孫庶常請假三月迎母夫人入都既荷

恩許旋

賜第苑西以待詩以送之兼紀盛事

仙才遇合似君稀一載

宮庭結

主知紀事新篇頻進

御寫生小幅更題詩屬車倚馬人爭羨上苑看花出

每遲忽漫陳情將母去板輿迎養荷恩私

二

江城二月正飄梅晝錦萊衣往便回

恩旨特教乘貢舫

賜居先給近蓬萊尚湖花事重畱別

帝里鶯聲又早催我望白雲歸未得夢隨君去繞蘭

咳

工垣陟齋八兄請假將歸賦詩畱別疊韻六

首見示依韻奉和

兄真何事苦思家春雨江南濕杏花

虞集將歸緘辭故舊云報

道先生歸也杏  
花春雨江南

諫草焚餘成獨往觚稜



恩重去頻嗟告歸爭羨雲邊雁送遠空書紙上鴉黯黯離亭瞻望處一絲烟柳趁風斜

二

仕久何人不憶家蹉跎豈爲上林花乍辭華組真能勇莫以霜顛漫自嗟此日翔空同海鶴幾年待漏憶宮鴉青門執手頻珍重兄弟聯翩雁影斜

三

暇日招攜聚一家尊罍永晝坐看花宦遊兼有天倫樂良會曾無客路嗟直道掖垣傳噦鳳歸思江驛逐棲鴉從今京邸逢歡集南望懷人到日斜

四

遺榮得請好歸家又見川原幾樹花萬轉勞薪從此息七年塵事不勝嗟菲菲烟草迷行騎杳杳春城度晚鴉想見揚州移畫舫江波如鏡片帆斜

五

十畝池塘仙隱家稍餘清俸更栽花蘭叢紀瑞添新詠梧葉成陰起舊嗟蠟試僧虔曾刻鳳窗依小德會塗鴉巾車自識城隅路荷芰飄香老樹斜

寓有並頭蘭之瑞曾繪圖作詩又晚年所得兩姪尚幼故用刻鳳塗鴉事

六

天外蘭陔夢裏家春暉誰侍檻前花望雲南岫心俱遠祖餞東郊我獨嗟野水愛看先宿鷺亭臯愁



對後棲鴉陳情有喜容歸養鳩杖從過竹徑斜

三月初二日舉行

經筵盛典元龍奉

旨進講恭紀

書殿春開上細旃儒臣鵠侍

御筵前

垂衣肅穆憑綈几拜手從容展玉編魯論敷陳明政  
要虞庭咨儆見心傳曉從上苑廻

宸駕日影頻移午漏宣

是日進講論語子貢問政一節尚書帝曰咨汝二十有二

人一節皆上所親命也

二

延英舊制本殊榮啟沃從來藉老成末學綴行叨  
典禮同時進講屬師生鄉音未改塵

清聽經義終疎愧

聖明上相押班詩句好難酬獎挹矢丹誠

是日元龍偕座主王

大司空同進講澤州相國有詩云尚書水部無雙  
譽詹尹承華絕藝才贏得頭銜渾似舊押班春殿  
許徘徊獎挹過分殊滋愧悚故事尚書入相不領  
講筵澤州公以閣臣荷特旨兼領是日押班侍  
立故後二句及之




夢山堂詩卷二

三











T5466/3910

5



OCT 4 1960

Harvard University - Harvard College Library Harvard-Yenching Library / 008024780\_v0001-METS



愛日堂詩卷十二

南陔集一

甲申四月至  
乙酉四月

元龍自辛未冬蒙

特旨召自田間屢邀遷擢備官十餘年老父年逾八  
旬矣受恩深重未敢引例陳情壬申四月  
元龍以愛日堂三字乞得

御書癸未春

南巡老父迎鑾得觀

天顏蒙

垂問家世年齒小臣烏鳥之私幸已在  
睿鑒中甲申四月侍直苑中忽聞老父有疾心忤忤





不自持

內廷舊例凡有陳請當先在內奏明俟得

旨方敢具疏一日傳

旨中使至直廬元龍以親病乞歸告之中使云當具摺方可奏也次日繕摺跪奏中使云他事可奏乞歸我不敢奏也強之不可徬徨無措又一日中使忽承

旨引同直翰林查昇至他所問之云某人乞歸意者爾等同事不和耶或別有他故耶查具言非有他故特以伊父年逾八旬思歸已久近聞有疾故倉皇求歸耳查退以告且言

聖心眷念未便乞身蓋

上知查昇與元龍同里且係師生故以情實詢之方

悟昨中使之不肯轉奏者彼先已口奏

上不令代奏也越一日中使忽傳

旨云爾求歸之心

上已知之可回家具疏元龍卽入城繕疏送通政司仍赴苑中內直又越二日中使復傳

旨云爾告歸之疏已達覽閣票該部議奏俟部中具覆再下旨時幾及一月工夫爾思親念切且天氣漸熱可卽起身不必等候元龍聞

命感激涕零卽謝



恩入城治裝隨赴苑中叩辭蒙

賜人參二劬傳

旨云可攜歸奉爾父也又發下

御前歷代賦彙抄本一部傳

旨云此書原係爾所纂輯彼時因尅期告竣未必全

備今付爾攜至家中從容增益校對差人賁摺請

安時陸續進呈伏念元龍末學鄙儒備荷

殊眷茲以親老且病不得已告歸乃蒙

聖主錫類之仁至優極渥老父遙聞

恩旨病亦向愈身還子舍心戀

闕廷俾小臣得遂循陔之願真天高地厚之

洪仁也次年

南巡蒙賜

御書南陔日永堂額凡在家所得之詩名曰南陔集

告歸啓行感恩紀事八首末章畱別同朝親

舊諸公

曾將愛日乞

宸書寸草春暉早遂初隔歲迎

鑾榮授杖

去春南巡老父迎

鑾蒙

召見

今朝

將父喜登車班聯爭羨天倫樂田野長霑

聖德餘歸省寧忘圖報稱優游未敢賦閒居

二



從來館閣比蓬瀛贏得如冰夢寐清廿載

講筵稀舊侶半生未學荷殊榮有親許告邀恩禮未  
老辭官懼滿盈敢竊令名全嬾拙五雲回首不勝  
情

三

常邀

清問及迂儒禁近承恩自古無內殿垂簾侵夜直行  
宮馳道向晨趨

天章滿匣光恒燦

御膳盈盤錫每殊似此寵榮寧忍去臣心只恐媿慈  
烏

四

珥筆朝朝侍

紫宸疎愚趨走輒逡巡地親常捧紅輪近恩重頻驚  
白髮新自是

聖朝弘孝治敢從清禁乞閒身海天雲闕關懷並  
君父難兼出處倫

五

承華端尹忝崇階領袖羣賢媿等儕小器詎堪當  
大受卑棲不是寄高懷敢誇祿養期鐘鼎願潔晨  
羞足菜鮭上苑幾年畱倦翮新看集鳳正喈喈

六



尚方靈藥色香新黃帕雙擎喜奉親欲使普天全  
子道特推殊寵被儒臣駐顏遠勝胡麻飯益壽無  
須絳雪珍

眷念教忠榮錫賚膝前益勵報恩身

七

文章職業愧雕鏤

恩命重攜事校讐詞義魯魚須慎檢賦心班馬試冥  
搜擬除三徑開書局敢向千秋問選樓南面百城  
君賜重栖遲膝下又何求

八

青門祖帳枉簪裾投贈詩篇愧令譽

丹闕迴瞻遲策馬白雲在望近迎車殘書敗簾添行  
色法酒宮衣拜賜餘廊廟親知長好在故園容植  
不材樗

四月二十二日潞河登舟口占三絕句却寄  
內直蔡方麓前輩暨查聲山張衡臣查夏重  
勵令式錢亮工陳幼安諸君子

潞河頻歲上蘭舟身到烟波未自由今日片帆真  
去也一簑一笠是吾儔

二

牛腰總載輕舟便只有

君恩重不勝回首禁園同直者綠陰深樹幾層層



白雲心切紫雲迷

君父關情淚總垂  
直下長流歸路遠

恩光千頃照漣漪

五月十八日舟抵臨清待牘郡佐連符蒼枉

過敘舊述懷賦贈

予本田野質遭逢侍承明  
地密才識淺日夕心屏營  
年纔五十餘白髮添霜莖  
望雲幾引領丹禁陳私情

聖恩憐烏鳥

優詔容歸耕得請意飛越  
觸暑東南征殘書裝敗簏

輕舟溯流萍衛河遇水涸  
牘閉阻我行忽驚枉軒

蓋客路榮將迎握手重慰問  
深語傾平生緬懷舊

棠蔭廿載垂休聲

連君昔曾爲台州郡佐署篆吾邑

大才應枋用

小鮮寧足烹仕途多輻軻  
公論難爲平抱負信有

素吾道終當亨譬如牘中水  
尺寸不得盈坐守困

智力誰能與天爭一夜霖雨至  
行潦深澎湃瞬息

過千里風滿歸帆輕肯濡涸轍  
鮒且縱大壑鯨得

路無後先樹立當崢嶸與君數  
疇昔占年記同庚

早衰媿蒲柳倦仕思解醒精神  
君百倍行作濟世

英重晤知何時念別中怍怍

贈蘇河廳



太白高樓映彩霓錦箋銀筆手親攜清吟直欲驅  
金虎偉績行看鑄水犀棠樹舊陰千里近芝泥新  
詔五雲低應知能事成疏鑿從此河流不向西

七月十二日抵家率大兒拜省老父起居酒  
掃子舍摒擋行李粗畢率賦四首

觸暑川途兩月程新秋喜慰故園情登堂拜罷親  
扶杖攜幼欣看各問名時諸姪及姪孫輩男女歡  
集予皆不識及問名方知

也昨歲

賜歸難夢穩

去春扈從而南曾蒙恩  
歸省至家信宿即行

今朝得請覺身

輕只傷慈範無由見歡笑盈門淚暗傾

二

廿載晨趨傍玉墀歸來白版舊雙扉官貧菽水風  
猶昔仕倦柴桑願未違兒訝鄉音重問字妻慙命  
婦理鳴機明朝問寢聽雞早夙夜還同在禁闈

三

故人憐我鬢成絲問訊休言得意時丹禁聽鐘常  
恐後玉階待月未嫌遲目經司馬長揚賦身歷唐  
人出塞詩十餘年來每寅入酉出  
而南北扈從凡六次今日不堪重攬  
鏡可知恩重分非宜

四

寵命修書局自隨囊空未辦買山貲  
君門敢說身將隱子舍難言力已衰捧得



賜書陳棐案乞將野卉植疎籬謝  
恩亟寫蠅頭字雙眼模糊屬草遲

八月十五日侍家大人過世南姪新居庭桂

正開玩賞竟日

堂構經營白髮心十年叢桂已成陰歸依鳩杖  
君恩重喜見桐孫世澤深有穀是貽枝比玉無香可  
並粟如金故園佳節多閒適何似垂鞭苑外吟

二

一枝京洛伴蘭荃盆盎移根價十千招隱不知花  
本貴幽栖方信品居仙聯珠密蕊依低檻似蓋濃  
陰接短簷繞座天香圍鶴髮年年長此侍芳筵

十月初七日特頒

諭旨蠲免浙江全省四十四年正賦臣民感

恩望

幸詩

并序

欽惟我

皇上聖神文武治定功成上下神人德孚道洽固已  
駕堯軼舜邁漢超唐矣然猶

軫念艱難

勤求康濟旰食晏寢常籌民事於宮庭遠涉時巡親  
問田間之作息九有之春膏夏雨後先早  
達于



宸聰萬邦之東作西成諮詢必周於

天聽先時補救雖或一方偶歉而民慶更生誠意感

通遂致四海有年而農皆樂業至于什一

之賦自古常經惟正之供小民定分考之

載籍稽彼盛明不過寬舊逋弛無藝或免

常租之半或蠲儉歲之征史臣誇爲美談

奕世傳爲盛事未聞時占大有歲慶屢豐

而正賦全蠲九州遞及

洪恩廣沛八表均霑豁數千萬之金錢爲民藏富貽

億兆人之樂利比室盈寧

大德普於乾坤

深仁齊乎天地有生共戴亘古所無至於浙省南接

閩天北連吳會江湖山澤地本肥饒耕織

農桑民資生業而習俗多靡閭閻未阜一

自

翠華蒞止

黃屋遙臨景福隨

六馭以徧敷膏澤經

三巡而彌厚煌煌

帝訓洞悉葭屋之隱微藹藹

王言曲計茅簷之休戚誠之節用勗以力耕勉厥淳

龐儼其游惰如日月之無微不照如雨露



之無隙不濡用是水耨火耕力勤戴德錦  
塍繡壤作苦知恩曉烟簞笠暮靄耰鋤水  
澍稷稌喜陰晴之如願陸時稷黍趨原隰  
以爭先

至德協於太和每慶五風十雨

天心通乎民隱共歌耕九餘三茲者候值順成餘糧  
栖畝時當息饗嘉穀盈倉塲圃之旁含哺  
而樂刈穫之暇扶杖以遊忽聞渙汗之

絲綸復霑汪濊之膏澤來歲盡蠲租稅經年不識催  
科典出非常恩逾大賚家家高廩飽婦子  
而恒充戶戶儲困貽子孫以世給歌阜財

者盈于道路頌足食者溢於陌阡凡我小  
民之身家孰非

大君之賜與但覩東臯西墅旣樂且康自此億載萬  
年有豐無窶黃童白叟競稽首而雲屯桑  
隴花村聽歡聲之雷動遙瞻

北闕就日何從近倚南榮負暄難獻惟望

乾行不息再迎

鳳輦以鳧趨

聖壽無疆頻仰

龍顏而雀躍觀於江海孰喻

帝德之淵深望彼華嵩難擬



皇仁之高厚臣蒙

恩將父得請歸田聆

諭旨之遐宣隨父老而抃舞採輿人之頌禱綴以成

章集田野之謳吟譜爲短韻辭多俚鄙情

出真誠竊愧寒蛩之鳴聊附擊壤之末云

爾

休養於今六十年

盛朝雨露浩無邊郡連吳越分牛斗地接江湖足水

泉財賦均輸原定分耕耘力作舊相沿豈知

聖主勤民切

丹詔洪恩取次宣

二

海澨江濱隔九重龍章誰識

聖人容省方盛事欣頻覩補助深恩慶屢逢玉輅不

辭三度遠朱提又免一年供東南民力恒休息比

戶應教盡可封

三

釋耒春農拜

紫宸幾承

天語誨諄諄力耕莫使腴爲瘠節用常思富可貧感

泣肯教遺地利醇和相與葆天真躋堂介壽歡無

限又布



殊恩福萬民

四

天心默契

聖人心時雨和風副德音正欲飼蠶逢暖日纔看布  
穀值春陰吹豳飲蜡風殊古擊壤含哺慶最深况  
是催科無吏到月明處處起謳吟

五

珥筆頻書大有年阜財直欲邁虞絃貧家誰道無  
高廩嘉歲何曾有石田儲蓄恩膏千載厚浮華餘  
習一時悛瞻雲望幸思

明訓感戴深仁淚欲漣

六

詔書南下免輸將百萬金錢惠一方不是

至尊親節儉如何大澤沛汪洋昇平遠計舒經久熙

皞淳風足蓋藏民富由來因

主聖年年膏雨潤農桑

七

築塲納稼正蕭辰忽布陽和大地春益信爲農真  
足樂始知雨粟未爲均指困共說

天家賜鼓腹時懷

聖主仁野老相逢侈盛事千秋曠典百年身

八



羣黎何以答殊恩稽首瞻天隔九閭擬向扶桑攀  
日馭常同歸雁沐春溫先疇世世安耕鑿樂土家  
家長子孫自是

至人開泰運手操造化奠乾坤

九

從來仁政有常經曠代洪恩溢海溟

聖壽齊天長不老乾行比日幾曾停江山氣象占重

潤川嶽神祇待效靈昨歲春郊曾

駐蹕六龍經處草先青

十

野人趨走識

行宮夢寐常依旭照紅錫福自

天多瑞應湛恩滿地兆年豐翹瞻宿衛鉤陳近側耳

和鈴斗柄東水涘山陬齊拜手歡聲早已動春風

除夕侍大人宴

長安別歲十三年今日椒盤在膝前壽考須知天  
福善歡娛長侍地行仙自慚潔膳無珍味預借春  
燈當綺筵拂拭彩衣重進酒餘香猶染御爐烟

二

團圓家慶

聖恩多蠟炬無風夜氣和四世同堂圍鶴髮一門通  
籍到鑾坡趨朝不用聽清漏問寢還應待曉河仰



看星辰懷愛弟開尊粉署意如何

時巨高四弟新補部曹

元龍伏處子舍獻歲聞

聖駕南巡亟買小舟迎

鑾淮北舟中恭賦

聖主勤民詩十二首以獻

并序

臣聞川源濬滌神功垂夏后之書河嶽懷

柔時邁著周家之頌業既隆于千古事更出於萬全我

皇上德被蒸民恩覃庶物心周九有日月比夫照臨道在一勤天地同夫廣運躋斯世於仁壽彌旰食而宵衣致薄海之時雍更朝乾而

夕惕往者河流未順

日馭頻勞經畫悉出於

天心形勢每詳於

聖算是究是度至再至三清口無倒灌之虞黃水有安瀾之慶長虹隄亘版築恒閒明鏡波平桑麻徧滿啟休徵于積石延景貺於龍門固已焜耀鴻圖輝煌

帝載

皇上以成功雖奏善後是期再事親臨隨宜指示至於山東一省賑濟兩年今雖有秋猶深軫念於是紫微南映溢灝氣於三霄青旆東巡扇和



風於二月供億悉資於內府纖毫不擾於  
民間減從乘舟不居廬舍沿汶浮濟徧覽  
青齊達澤已無鴻雁之鳴黎庶盡有室家  
之樂俗方臻於既富人大異於往時感恤  
賚之多方聽歡聲之載道於是循河南下  
遂達淮揚綜四十載之或塞或疏證神圖  
於掌上貽億萬年之永安永治揭秘典於  
寰中溥零露於既濡洒甘霖於已霈於是  
吳越父老咸增慕思遠近儒紳同深忭舞  
或飛橈北覲人懷獻壽之忱或請

駕南來家製迎鑾之曲事非一致情實同殷願

翠輦之時臨撫天紘而保合頌黃流之常奠應地軸  
以安貞萬年欣有道之長億載祝無疆之  
慶臣蒙恩將父得請歸田身在衡門心依  
華闕重瞻

天表比昨歲而逾豐敬仰

聖容覺今時之更睟喜深忘寐感極涕零聽綺陌之  
謳吟序與人之歡幸言樸而野字質無文  
聊附擊壤之歌敢謂河清之頌臣不勝歡  
忭踴躍之至

澄河如鏡注春融光啟龍圖照紫宮遠慮還籌千  
載後洪流已定四巡中心營疏鑿常紆



駕烈懋平成不計功一自

宸行頒渙汗途歌巷舞萬方同

二

從來天地俟彌綸愛養蒼生在

聖神潤物正同三日雨乘時還播九州春恐居行殿  
煩華飾故遣輕舟泛碧濤供億久知攜內府荷鋤  
相慶望勾陳

三

蹇茨沉璧幾經秋四見荒隄倚

御舟廷疏漫云陳上策

天家洵自有神謀雲邊海道因心定塞外河源指掌

求

特命楊庄移仲牖永無黃水入淮流

四

河防卅載費疇咨此日安瀾應

聖期蜃跡已消無宿漲藜風時動有新漪難忘警戒  
虞廷日轉憶隨刊夏后時今夕榮光浮五老萬年  
底定是鴻規

五

運河南下閱春耕東省桑麻已漸萌保障正期今  
日事丁徭曾免舊時征煢黎生聚因官粟樂歲菑  
畬慰



聖情自是

君心同造物年來萬彙慶秋成

六

往歲鳴鴻繞近畿

皇仁資遣得生歸酬恩矢願陳三祝望幸傾心候六  
飛山縣春和花正滿烟塍風細麥初肥濟南引領  
瞻依處盎氣常凝翠羽旂

七

淮海維揚被澤深幾因濬築荷

宸臨綠楊繞徑隄常固翠菽盈疇浪不侵三塏寶珠  
通慧照一谿霜練印天心兆民祝嘏延禧處先託

江風送好音

八

諸省分年免正供曾經百萬貸吳農人因時邁沾  
恩厚稼爲天行覺露濃雪舍有衣溫父老花村無  
吏索租庸昇平試共徵前事此樂應知未易逢

九

淞水新時有

詔函地征全免惠重覃德方圓昊山非峻量比滄溟  
物共涵

聖世占風常叶五農家量食已餘三吹豳擊鼓無他  
事長溯遙天叩蔚藍



十

試向非烟測耿光景星如月映銀塘情殷就日天  
疑近望篤經時歲覺長香剎迎鑒書

萬壽綵亭當御面三陽耆年鼓腹游醇化寶曆無疆  
祝

聖皇

十一

吳鄉越水望鸞旗兩地臣民起慕思山號禹祁方

盛績

在蘇州城西南禹治震澤居此

湖稱明聖驗昌期

西湖舊名

呈祥

待貢雙岐麥獻瑞先攜八繭絲願得年年來羽衛  
五雲常是護龍墀

十二

拜辭清禁到衡門夢醒猶疑在

帝闈扈蹕三回憐舊侍寧親一載是新恩循陔蘭草

榮初膳披卷丹黃愜細論今日宮衣迎

御輦感深不覺淚添痕

渡淮恭迎

聖駕傳

旨移艇近傍御舟

上倚船窗慰問詢及爾父老年無恙否

元龍

進呈詩

冊

睿覽嘉賞賜果品二器紀恩三首



夢窗詩卷十二  
六  
溯淮北去覲龍光一葉輕浮拜舞忙跪奏姓名猶  
未竟傳呼移棹

御舟旁

二

聖人倚檻笑言溫下問衰親錫類恩來自田間民隱  
悉從容奏對不嫌煩

三

一冊雙擎擊壤歌窗前賜覽

睿顏和閒論詞翰蒙

褒賞捧出金盤錫賚多

途中傳

旨陳元龍係內廷舊臣今接駕遠來可偕扈從南書

房翰林在內行走恭紀

眷舊恩深

聖主情命移野艇侍霓旌歸家已遂烏私隱隨輦重  
陪鷺序行禁近追趨慙懶放知交契闊喜逢迎朝  
朝賜饌歸遺便將父還嘗內府羹

四月初五日

駐蹕杭州

恩賜

御書南陔日永四字扁額恭紀二首  
衡門半載侍衰親逮養餘年荷



聖仁子職自供娛老志臣心終負報恩身迎鑾幸覩  
天顏喜駐蹕重頒

御墨新自此南陔歌化日萊衣永戴百年春

二

欲隨耆叟覲和鑾未敢扶攜拜跪難錫類無窮恩  
倍渥教忠滋愧分何安

聖朝瑞應多遐壽孝治情深有潔餐

宸藻光連南極燦晨昏瞻仰五雲端

四月十四日

駐蹕蘇州

恩賜新刻

御製詩集一部恭紀二首

瑤編玉版字新鏤稽首開函仰

聖謨詠就篇章同大訓文垂典誥著鴻圖日星偕炳  
祥雲護山嶽齊貞異彩敷繕寫當年曾敬讀寵頒  
寶勝夜光珠

二

巡行翰墨每親隨田野農桑入

睿詞風靜仙舟晨命簡霜寒帳殿夜題詩千篇總是  
勤勞意兩集無非儆戒思見說

宸章新更富萬年萬卷照丹曦

恩賜新刻



皇興表一部恭紀

一統河山億萬年東西南朔浩無邊欲從前代稽沿革敢與

知興朝比幅幘禹貢要荒嗤指掌漢家土宇隘陳編共

聖化真無外披卷渾疑到八埏

十六日

恩賜臣父臣陳之闇內製砥石硯一方恭紀

砥石山臨遼水濱琢成寶硯色璘霏陰陽兩面分紅碧雲霧千年產玉珉式表端方堪勵節德含溫潤自長春捧歸介壽

君恩重願矢堅貞答紫宸

十七日

恩賜臣父臣陳之闇

御書金扇一柄恭紀

時巡到處播仁風寶箴恩頒鶴髮翁

御墨未乾春有露龍香乍拂夏初融捧持似璧恩光重舒展如規朗照同草野衰頽無寸報珍藏世世勵丹衷

閏四月初五日

駐蹕寶塢灣行宮

恩賜臣父臣陳之闇人參二觔傳



夢日堂言卷十二  
旨爾有老親在家可從此辭歸不必遠送感

恩恭紀

上藥靈根出紫宸駐顏益壽寵衰親九還未比  
君恩重十賚寧如

帝澤新採自深山來遠貢頒從內府覩殊珍從來難  
老由天錫大德栽培有大椿

是日又蒙追

賜臣母陸氏

御書慈教貽床四字扁額感

恩恭紀

慈範長違十七年重霑追卹戴堯天一生熊荻邀

褒命四字碑珉比賜阡鳳誥每頒含淚讀鸞章新煥

汗青傳許教將父恩難報况是殊榮賁九泉

二

記得隨鑾事未終渡江血淚洒春風

元龍於己巳春扈從南巡

至毘陵痛聞臣母之訃

劬勞罔極何由報教養推恩未有窮

感極銜辛鐫綠字夢回聞訓勵丹衷貽床奕世霑

仁澤

寶翰璇題亘綵虹



愛日堂詩卷十三

南陔集二

乙酉五月至  
丙戌十二月

詠白杜鵑

一枝躑躅殿春深  
別現冰容照綠陰  
已悔啼紅空  
豔影却畱質  
素伴清吟  
西川舊種常傾日  
海外新  
葩比獻琛  
異色同名應有意  
白華原不改丹心

賦得龍出曉堂雲

神物常呈瑞  
乘時自效靈  
垂空膚寸黑  
飛破半天  
青鱗甲驚明  
滅烟雲入杳冥  
簷前如可接  
彷彿想  
真形

恭和



御製賜高旻寺僧紀蔭詩

琳宮紺塔出雲中南倚長江鎮海東覺路弘開三水合

聖心朗照六塵空

現身偶駐人天護

妙諦常懸宇宙籠清磬一聲潮正上澄潭印月自昭

融

桐城相國館師自癸未春相見後別去又二載矣茲渡淮迎鑾得瞻風采每逢行宮駐蹕輒陪坐末感舊書懷率成四律

吾師雅量絕追攀千頃澄波萬仞山自是功高能

勇退非關位極却思閒怡情烟雨觀元化養素林泉得大還今日行宮陪杖履神仙慙領舊仙班

二

橫經憶昔立書堂中禁常依几研旁披拂春風今尚暖徘徊水鏡意難忘侯生漸老辜磨勵馬帳長違歎面牆進退不知何處是

君恩師訓兩徬徨

三

長公投分最情深形影相依比斷金抱志未酬千載恨遺詩猶見半生心時師方刻長公少詹幸陪先生詩集囑予作序愛弟趨丹禁還見賢郎起藝林時次公衡臣編修亦以供奉扈從且



聞少詹公諸郎  
皆能文繼起  
他日韋平誇盛事沙痕好在不須尋

四

廿年迂拙負師門將父歸田荷

主恩子舍若成終隱地萍蹤便是早歸根經營剗剗

當趨走汗漫篇章愧討論時予方奉 勅在 家校刻歷代賦彙遙望

龍眠千里近擔簦願侍笑言溫

感舊述懷四十韻贈勵南湖世兄兼以誌別

丹地依雖久師門迹本孤生成無地報知弊有誠  
輸憶昔曾懷槩承恩早濫竽乍驚天上去初聽禁  
中呼肅穆聞宮漏從容侍大儒龍香飄御座花氣

靄蓬壺几案真清絕簾櫳足靜娛更無凡跡到疑  
共列仙俱寡陋親陶冶文章辨砒砭廿年人事異  
前輩去畱殊內殿爭陳乞

天心亦勉俞溫公歸洛下疏傳出京都隻手身難退  
高年眷倍紆九霄唯一鶴中禁只雙鳬密勿尊者  
德勤勞贊

聖謨賜金常免謝上殿每教扶異數傳鸞掖新恩起

鳳雛騰空翔逸翮接武振天衢家學承朝典絲綸  
繼斗樞宮中誇濟美海外仰弘模喬嶽俄摧折風  
規乍變渝直廬思往事子影歎吾徒昧智同緣木  
忘機類守株惟師憐樸魯師病中握手曰我在朝  
二十餘年似爾爲人表



裏如一者從未有匹元龍因泣求明誨師曰守此以往縱弊小虧終無大患何處用疲  
驚微尚功名薄逢時進退迂有親虛菽水舊徑憶  
荒蕪得請鄉違鄭歸田谷就愚故園躬耒耜子舍  
近樵蘇貧未營幽墅閒堪避畏途忽聞來  
日馭買棹問前驅重伴金華客還依  
玉輦趨數旬欣浹洽聯步得懽愉坐接連城璧才皆  
照乘珠世臣真不忝倚眷信非誣勞苦年方壯忠  
誠志自孚期君能報國老我已非夫異撰辭章甫  
何傷詠舞雩鵬應搏海浪鷺自睡葭蘆別去離三  
島歸歟慕五湖難忘唯世講握手重躊躇

宿遷河干叩辭

聖駕感恩戀德恭紀七言律六首

并序

臣材本疎庸職叨侍從常多罪戾久荷矜  
容受恩有年圖報無地昨歲因臣父衰病  
冒請乞歸遠隔九重忽將一載每夢迴于  
紫闕常魂繞於丹墀頃者

聖駕南巡因得扁舟北覲幸依鳳鷁仰覩

龍顏不異枯草之遇春溫恍同黍谷之瞻化日自此

追隨六馭巡歷三吳竊見我

皇上仁政覃敷恩施廣沛重農寬賦恤老振幽廣羅  
網以作人開囹圄而肆眚一犁春雨喜見

天章曲澗山花光邀



睿詠明理學則光風霽月訓吏治則息事寧人潛德  
幽光悉表揚於寶額清修古剎亦寵錫以  
璇題德罔不周澤靡不洽六旬之內千里  
而遙士詠於郊農歌於野漁樵樂於山澤  
商賈慶於津梁婦子繞室以歡呼老幼望  
風而忭舞琳宮梵宇皆散天花唄唱鐘聲  
咸依

壽佛不知東南何幸際此昌期意者造化或私厚茲  
樂土雖攀畱遮道稍緩

天行而感戴瞻雲難畱

日馭於是隔江遙望夾岸爭趨恐後爭先旣歌且泣

蒼生之思慕無已赤子之依戀何窮至如  
臣者本屬編氓曾依禁近如玉階之寸草  
久沐恩憐擬上苑之棲禽倍經慈憫旣宥  
曠官之愆責復弘將父之深仁暫侍清塵  
備霑異數靈根上藥延垂老之衰親

宸翰殊褒逮重泉之慈母

君恩似海

帝德如天縱沒齒以難酬豈有生之可報辭

御舟而稽首淚漬朝衫返故里而銜恩榮生子舍不  
勝犬馬之戀聊同蚓蛭之鳴謹賦短章恭

呈



睿覽

金輿五度下江南民物山川大澤涵雨露只疑春  
久駐光華直與日同驂雲旗乍轉瞻霄漢斗柄旋  
迴望蔚藍最是小臣恩倍厚欲辭鳳鷁淚先含

二

天心民隱本相通隨輦風光自不同一夜雨過千頃  
綠三春晴爽百花紅麥肥蠶熟爲農樂箱滿倉盈  
比歲豐爭繞龍鱗攀未得紫雲瞻望在行宮

三

浩渺恩波澹蕩春歡聲和氣溢高旻材羅巖藪皆  
登進

德及囹圄許自新塵市貿遷多倍息漁樵擔負不知  
貧三吳自昔稱蕃庶培養淳風賴  
五巡

四

春歸青馭亦隨鑾一路韶華露正溥義馭若能畱  
斗分炎歊應不到江干瞻依但願雲霄近浩蕩難  
名宇宙寬自此年年長望幸

一人勞止萬人歡

五

樗材末學

主恩憐珥筆金階二十年塞北江南頻扈從車塵扇



影久回旋親衰許遂晨昏志曠職常懷夙夜愆兩  
月趨承慙賜賚夢魂長繞五雲邊

六

歸舟問渡正河清麥隴桑陰見耦耕野老懷恩多  
感泣微臣戴德豈勝情重臨應慰羣黎望待澤還  
期隔歲迎回首祥光環

紫極萬年有道泰階平

題徐學人雲溪草堂圖手卷和朱竹垞原韻  
仕宦途兼翰墨場青雲長負白雲鄉人間儘可尋  
瑤島天上何須問玉堂

二

多少巖廊慕釣磯恩深退早古來稀一邱一壑非  
容易況向花前著錦衣

三

洗硯池旁一片雲風流遙與昔賢分坡公歸老心  
良苦年少徜徉却讓君

雲溪草堂之旁有東坡洗硯池尚存

四

我乞閒身愧地偏烟波空憶五湖船披圖便擬移  
家近風月從君借半川

毘陵晤錢燕穀年七十矣而蒼顏如昔回憶  
二十年前京邸相聚爲之惘然有作

倦羽輸君野鶴姿歸來不是憶蓴絲廿年青鬢追



前事七十蒼顏似舊時塵夢難消千日酒雄心空  
付一宵棋清貧便是長生訣何必深山去採芝

和劉子瓠容自題所畫淡墨牡丹元韻三首  
輸他黃紫鬪妍時似影如雲點筆遲看取東風吹  
不散春光畱得在生枝

二

繁豔誰知黯淡時烟籠漠漠意遲遲徐熙也解施  
朱粉別韻生描暈墨枝

三

忘名偏在愛名時不是尋花去較遲脫盡人間穠  
豔意春歸畱得不凡枝

假館隅園開館校刻歷代賦彙一書示書局

諸君子

書局隨身爲養親數椽老屋笑官貧難求勝地供  
編輯借得荒園稱隱淪敗壁低簷成秘閣繩牀木  
几集佳賓丹黃倦後推窗看稚子無機把釣綸

二

十畝池塘舊有名百年臺榭豈勝情水沈蘚石亭  
何在廊倚危橋徑不平尚有梧陰傳畫省難畱喬  
木繼清卿借居詞客荒涼甚辜負

君恩擁百城

三



瘦竹緣堤寺角斜清風入檻不曾遮魚跳水面驚  
疎雨鳥過城頭趁晚霞最愛新荷香淡蕩待看好  
月影交加幽棲剝啄聲難到聒耳猶嫌兩部蛙

四

塵世浮漚有變遷一池風月自依然臨階洗硯人  
俱韻掃徑修書事可傳觀影每吟枯樹賦感恩常  
誦白華篇文章千古誰能信籍有奎光照簡編

五月之望侍家大人移樽隅園陪諸君子池  
上觀荷次日姪孫曙峰孝廉枉詩見示依韻  
和之

別墅蒼涼改舊觀校書假館似巢安地幽且喜塵

氛遠池曠無愁硯滴乾

山谷詩筆倒  
三江硯滴乾

入座荷風來

縹緲沿堤竹影對檀欒新晴載酒扶鳩杖疎柳陰  
中望玉盤

二

掃除荒徑挹清華拍岸池光響釣車東觀分攜天  
上事西園疑傍野人家酒欺小戶難言醉月待新  
詩尚半遮藻荇橫斜橋影亂晚來閒步意殊嘉

寄尚衣使曹子清時曹兼領兩淮漕政又新  
奉

命刻全唐詩南浙在籍詞臣被  
旨分校者九人俱集蕪城



夢月堂詩卷十三  
每從隨

輦挹丰裁子建聲華衆所推  
黼黻山龍資鉅手沃饒  
鹽筴藉鴻才金陵懷古多吟卷  
邗水尋幽幾溯洄  
公事餘閒兼勝地選樓應倚戟門開

二

七襄雋思好論文顯秩初加藝苑分

曹新晉大舊銀臺銜

主騷壇爲領袖新開書局有清芬  
唐音一代篇如海蓬島羣賢閣是芸  
我愧不才肩重任寂寥無侶却輸君

詠東洋粉紅繡毬花

名卉攜從漢使槎弄珠人倚醉容斜  
江南團粉香

成雪海外雕瓊色帶霞巧綴玲瓏排杏靨密攢枝  
萼勝桃花濃陰靜濕黃梅雨却對春姿自煮茶

二

似火朱榴入夏繁嫣紅獨自綉團圓  
吳綾舊剪多呈素鮫帕新裁薄染丹  
滿月嬌容生彩暈流霞深酌映冰盤  
一枝盈尺花如斗濃淡難分曉暮看

苦雨不止三日不至園中戲簡劉介于先生  
蘆雨菰烟日夜多衝泥屐齒怯經過  
行廚竹裏無供帳慙愧先生色未酡

二

塗乙編摩白晝長閉門不出對滄浪閒來何事堪



消遣學製荷衣也是忙

三

硯潤香縈足嘯歌只愁窗紙耗盤蝸若教六月長  
無暑倒瀉銀河不厭多

雨後偕介于硯農兩兄池上閒坐偶作

雨餘重疊起雲峰曲徑苔深鮮客蹤月沼當前迷

夜月鐘樓近倚斷晨鐘

安國寺鐘樓甚近邑令禁絕之

隣僧吹笛

當清梵童子拏葵作晚供莫笑焚魚甘寂寞高賢

朝夕得從容

題楊楚書聽雁圖小像

楚書尊人以事謫絕塞楚書每跋涉萬里

省觀圖曰聽雁思親也乃丙寅所繪於今二十載矣

萬里風霜八尺軀目隨候雁寸心俱純臣自昔由

純孝大節無慙是大儒囊有舊圖增涕淚牀餘長

劍獨跣趺莫言身隱雄懷盡麟閣終看畫美鬚

題吳門錢禹銘登樓望遠圖

閨風雲氣接高樓俯瞰天池萬象收健筆自能凌

海嶽還期博物恣冥搜

二

入窗無礙水光明浮石巘岈白浪驚便駕青虬休

息軫隨風咫尺到蓬瀛

題曙峰姪孫梅花小照

暗香疎影畫來難花下何人獨坐看同調相憐應



有意胷中玉雪映冰盤

二

獨占春光第一枝扶疎老幹有誰知安排異日調羹手正在荒寒寂寞時

題王石谷芭蕉行樂圖

綠天深處靜無塵鎮日跣趺藉草茵要識蕭閒多樂趣雨餘天氣欲涼辰

二

及門高手妙傳神鶴骨霜姿點染真便著雪中孤翠好不嫌摩詰畫中身

中秋後一日司寇大兄以園中桂花盛開走

簡相邀因侍大人移舟往遊歡賞竟日

移舟數里隔紅塵空水澄鮮爽氣新十載成陰思

往事

兄爲予言向年出門時樹尚低亞今十三年遂成陰矣

三秋好景屬歸

人風迴曲磴飄丹桂日映疎籬見白蘋江左名園應不少問誰管領得閒身

二

安排水檻補山樓靜對秋容處處幽臥聽雁聲回

鶴夢坐看雲影作天遊

園有鶴夢軒天遊閣

時清始信村居

樂身退應無世網憂喜聽鄰農歌樂歲八窗洞達

俯西疇

三



乞養歸來剩一身自憐寸草愧娛親相邀花徑供  
扶杖不遣霜顛負令辰蘚石已從移處古高松猶  
見種時人傳家耕讀情難忘指點當年話苦辛伯父  
手植數松今皆昂霄垂蔭大人與兄因追憶種松  
時且指伯父與兄課讀之地因言爾時亂離初定  
避迹田間食淡茹粗光景  
皆余未有生以前事也

四

同朝兄弟接朱輪杖履陪遊只兩人年齒遞增剛  
二百同時兄弟官於朝者共十人今家居者唯兄  
及予二人時大人年八十有六兄平頭六十  
余亦五十四合  
計共二百歲也秋光正好是中旬開樽不讓耆英  
會倚檻真成獨樂身繫艇平橋歸去晚清宵泛月  
到城闌

大兄賜和四詩再疊前韻奉酬

心跡超然絕點塵澹如秋水一般新勞神蕉鹿真  
成夢養素林泉得幾人貞潔本同巖畔桂浮沉肯  
逐渚中蘋金薤玉鱸堪相賀贏得清涼自在身皮  
美詩共君無事堪相  
賀又到金薤玉鱸時

二

雲斂前溪香滿樓蒲團竹几自清幽屏除聲妓塵  
中累堅卧烟霞物外遊味道有緣趺坐穩除詩無  
計撚髭憂放翁萬首高千古強半情懷寄綠疇

三

筇筇略約鎮隨身魚鳥忘機自可親曉起臨窗看



雁字閒來檢曆記花辰鉤繩異用存吾道茶薺分  
畦任別人益壽不須求菊水心王今已謝艱辛

四

最愛秋晴月一輪閉門自笑靜無人連篇賜和憐  
同調十里睽違又隔旬仕久方知田舍樂歲長有  
味故園身南陔夢穩期終老懶拙何堪返

帝園

爲王石谷題王麓臺畫

松飈謾謾秋烟裏老屋平橋映溪水玉堂老仙下  
直時淡墨經營寄霜紙幅間黛色羅千鬟印君萬  
疊胸中山麝煤著樹春漠漠虹髻送雨聲珊珊懸

君高堂壽君酒二老風流更誰偶巽峰亭下一房  
書靜對商顏娛白首

十月朔展謁祖墓偕司寇大兄農部六弟並  
舟宿趙家橋

展墓移舟近連朝傍野塘浴鷗深水暖刈稻老農  
忙蘆荻朝含露松楸早著霜今朝頒鳳曆兩度隔  
鴛行

二

兄弟同朝密翻疑故里賒相逢勞問訊漸老惜年  
華巷隔烏衣遠湖明雁影斜遲君歸粉署何日戒  
征車

六弟暫假歸來而以  
家居省城不能長陪



爲洞庭翁叟題畫

太湖春水深於藍晴空明鏡初出函莫釐高峰挹  
濃翠丹青獻瑞歌維南沙頭玉瓶載春酒白髮烏  
榜山中叟雪鷺千翻任溯洄蒼龍百尺驚蚴蟉翁  
年六十顏如丹未厭芳樽坐夜闌長箋試寫新蠅  
脚古墨閒磨舊馬肝庭際陰陰飛彩鳳桐花歷歷  
依文棟他年嘉慶更成圖馳封轉覺恩輝重

司寇大兄相訂郊園看梅忽降大雪終朝盈  
尺因憶郊園雪中景象詩以代柬

探梅有約待春晴作意天工散玉英暝色乍教千  
樹合寒威更助十分清暗香深斂無人過老幹欹

斜徹夜明此景最宜幽賞意陪遊却憶剡溪行

二

昨夜春燈試袷衣忽驚寒氣下重幃尋花曉起應  
迷徑把卷閒吟只掩扉硯凍撥爐開宿火窗明拂  
几勝晴暉天然圖畫應難繪舞雪飄梅萬點飛

朱素培歸自粵東旋將北上枉詩畱別依韻  
送之

懶伴承明客歸來侶釣師誰攜吟卷至自歎少人  
知游歷多新賞山川發舊思到家剛半載襤被又  
前期

二



粵嶺題詩遍奚囊一硯餘年歸謀半菽不是爲無  
魚才出風塵外胸憐玉雪如感君投贈意尺幅比  
瓊琚

三

詩史虞山老箋疏析瑰奇行囊珍拱璧重訂削繁  
枝落落無知己便便可樂飢刻成緇帙貴私淑未  
曾私

素培新刻虞山先生詩註

四

紫府多通籍青衫或校書泥塗嗟螻伏雲路待龍  
噓句好人難和才高遇未疎寄聲天上客誰爲薦  
相如

過安國寺與雁黃禪師言及前生因果事

蓮社閒過物外情碧巖烟穗話三生定中偶隋微  
塵累迷後重叅一點明解脫不須論戒律逍遙早  
已薄公卿名心吾比師還淡騎馬何妨自在行

七夕前一日隅園池荷有並蒂之瑞瓠容賦

詩見示依韻和之

平鋪池面曉霞新並蒂臨窗別有神月下參差看  
倚玉星前盟誓記前身波紋似簟歡娛夜涼意侵  
階淡蕩春獨客驚心傳麗句生綃半幅更描真

二

寂莫池頭舊草堂無端花瑞競紅粧交枝好待迎



靈駕豔影先教映玉潢並舞波心香氣重雙擎莖  
露曉風涼天工畱與詩人賞巧借天孫織錦囊

雁黃禪師六十

恒河浩劫幾時窮歲月人間笑不同誰識難生依

長者用九祖處胎中六十歲事漫將高臘祝支公相看髮白心

非白三祖示優波多語悟到身空性本空境界清涼隨處

現冰牀堅似火輪中時方盛暑

劉瓠容擬於中秋遊大尖山頂觀海玩月爲

雨所阻詩以嘲之

秋半人人望玉盤高山海上是奇觀勝遊有約逢

陰雨未許塵蹤絕頂看

二

九華山下黑雲生天柱峰頭月倍明

道士趙知微居九華山中

秋陰雨曳杖登天柱峰月色如晝下方則竟夕無月也

須識浮雲塵世隔誰

能賈勇上瑤京

十月朔侍大人至趙橋展祖墓余新製小竹

輿攜之以代大人步履丙齋大兄見而稱賞

枉詩見示依韻奉酬二首

小輿低稱竹籬州

元稹詩茅簷屋舍竹籬州

展墓攜供野畔游

白髮長依同海鶴高軒何必羨彤騶扶來乍過香

畦穩行處平看稻穗浮喜侍父兄都健好頻來郊

外聽啼鳩



二

牛眠何處訪仙州非爲尋花汗漫遊

家大人以先祖吉兆未卜

高年每親登涉故製小輿聊代杖履

聊借籃輿當著屐漫嗟日月似

馳騁秋空縱目高原見野濶扶行暖氣浮綠竹黃  
藤新樣子隨身不藉玉爲鳩

履仁姪孫屬禹尚基寫遊華山小照名曰問

天圖索題二絕句

兩經太華負躋攀阻雪趨塵往復還輸爾獨遊能

盡興抱琴著屐一身閒

予已卯奉使入秦欲登華山爲雪所阻癸未扈從經

過又未及登

二

誰人解寫華山圖但寫高懷得似無直欲騎龍登

絕頂朗吟好句徹仙都

雲間范武功舉一孫極秀慧未之見也讀其

贈詩盈冊因贈二首

角頰爭看峙玉奇阿翁戲羨有佳兒

張憑祖張蒼語八千

卷在知能讀

王度祖王顓事

會見昂霄聳壑時

二

雛鳳聲清不可量風神秀徹謝家郎垂髫見爾成名  
早笑我蒼顏大父行

咏同心蘭和黃子石牧韻

莖末奇花見幾曾引人詩思共鏤冰秋蘭倍惜幽



香吐一點芳心護九層

蘭皆五出此獨九葉重苞

二

蘭斂秋容意若何疊開嫩蕊壓柔柯分明獨抱靈  
犀睡仙掌輕舒一倍多

三

花意人心未易兼人同香和在重簾莫將楚客牢  
愁語却向吾曹句裏添

石牧又賦三首再和其韻

如蘭臭味有知音裁剪天工著意深試問雙頭稱  
並蒂何如一縷結同心

二

都梁魚魴未應誇九瓣全舒半寸芽應是花神邀  
好句故教騷客試名花

三

自愛幽香託興疎柔情綺語半消除合歡同命虞  
山句老去風懷愧不如

和石牧雨夜不寐原韻時方憂旱七旬不聞  
雨聲矣

驟雨當窗急移燈入室深可能蘇涸鮒未敢信爲  
霖餘潤從飄帙新涼欲換衾今宵多不寐同此閔  
時心

庭前桂花欲開未放呂子丹麓賦催花絕句



六首因和其韻

閒庭秋雨濕莓苔桂葉陰濃屐少來應是主人岑  
寂甚花神故意不教開

二

巡簷有客問低枝客意花情兩舊知

丹麓去秋卽下榻於此與

花蓋舊知矣

好貯十千良醞在待他三五正圓時

時距中秋

僅五日

三

金粟深含未放黃仙家不肯露全妝故教詞客多  
摹擬筆底先偷一段香

四

未消闌暑尚披襟又怕秋聲入冷吟不是催花情  
較切摩挲窗下一年心

五

催花好句月中傳綵筆雙雙共鬪妍應費品題誰  
第一嫦娥次第記瑤箋

時石牧亦有催花長篇

六

遲開早放不須驚招隱何人爲主盟好發新枝邀  
月賞還畱老幹待秋清



愛日堂詩卷十四

南陔集三

丁亥正月遭先君大故久廢筆硯秋日齋前

玉蘭忽發數花感而有作

迎春何事又迎秋乍見冰容暑盡收應與畹蘭爭

郁烈却先巖桂逞風流

宋人名玉蘭曰迎春

二

三春從未到花陰時序頻移痛轉深折取欲供靈  
几畔潔餐永負白華心

呂子丹麓和玉蘭詩再用前韻酬之

如蘭似玉幾經秋露冷瑤臺夜未收紅紫叢中



是侶孤標端合絕時流

二

滿庭綠蔭比桐陰懷玉藏珠意自深却笑成蹊人  
未見高情別有賞花心

今歲苦旱菊花少而開遲立冬後一日始從  
野外移致數十本植之齋中呂君丹麓輒賦  
四律見示依韻和之

不爲重陽待客來數枝岑寂後時開遲畱野圃無  
人見移就書堂著意栽風徑霜辰同耐久詩筒酒  
棧莫相催蕭疎要識籬邊韻束縛休教困散才

二

晚香疎影稱幽襟剪燭相看到夜深閒比歲寒無  
事客澹如人老出塵心蒲團竹几差堪共甲煎沉  
香未許侵自是獨醒真臭味漫勞把酒向花斟

三

披裘賞菊未曾逢深下簾帷護幾重風勢正凋千  
樹柏霜威已落一城蓉柔枝向晚心偏傲逸韻宜  
人興未慵不似春華矜豔色一般紅紫帶冰容

四

夜闌花氣轉霏微更倩明鐙四面圍靜趣最宜寒  
雨後殘英不逐曉風飛飲分仙液能增壽徑掃陶  
家正合歸寂莫閉門同歲暮低枝瓦缶自芬菲



十月二日至趙橋展墓與香泉四兄夜話時  
實齋三兄撫黔兄以石阡守迴避躔歸將爲  
伯父營葬

同朝十載喜肩隨翻訝家園手斲攜子姓墓前瞻  
遠客柴桑門徑記曩時霜清茅舍三更話雁落平  
蕪一夕期寒食明年重過此不知五馬更何之

二

吾兄宦迹天涯徧萬里空囊得句新棣萼多榮移  
典郡牛眠得兆好安親菰蔣覆岍同迴棹楓葉當  
門若送人出處憐予難自主得歸猶是未歸人

適齋姪九十初度雁黃禪師作黃山松石圖

爲壽屬題四絕句和丙齋大兄原韻

喬松怪石何年物好伴蒼顏鶴髮翁浩劫恒沙難  
記數此身長在畫圖中

二

無限烟霞物外情畫成謾謾聽松聲耆英會裏嫌  
塵累蓮社年來別訂盟

三

卓錫聞師憶舊蹤黃山頂上最高峰定餘有叟扶  
筇至雲海千重紫氣封

四

超然無累是清貧九十年華自了身一石一松衣



鉢好芒屨何必訪仙真

康熙四十六年自秋至冬屢頒

諭旨軫念江浙夏旱先後賑濟二百餘萬重疊蠲貸

復五百餘萬

皇仁浩蕩萬姓歡呼謹述感恩頌德詩八首

并序

竊惟救荒恤患國有常經賜復除租古稱  
曠典昔王之助耕補斂亦偶及于一方盛  
世之薄賦輕徭不聞寬夫千萬考之往籍  
水旱時傳稽厥推恩蠲除有限未有偶愆  
雨澤卽厘

宸衷大澤頻敷德音疊沛一賑再賑一蠲再蠲俾數

百萬之生靈數千里之郡縣頓忘愆歲之  
嗟坐享豐年之慶此亘古之所希觀而今  
日之獨隆者也欽惟我

皇上德並乾坤功侔化育智周庶彙仁怙萬邦普天  
之正賦常寬率土之湛恩屢被固已史不  
勝紀民無能名矣若乃江淮重地吳越要  
區屢荷

時巡倍邀睠顧固財賦之所自出而德澤之所最深  
田間作息之隱微咸紆

睿念草野葢藏之多寡洞徹

天心雖一方遠隔江河而億姓常登衽席頃者入夏



以來時雨稍後不待有司之入告早蒙

清問之下加俯詢盈庭周知農事當塞垣之駐蹕恍

田野之親臨

特旨先傳大恩旋布發千倉之積粟緩三月之催科  
望廩爭趨開困歡動扶攜入市擔負歸村  
言逢樂歲八月之禾稼未登乍散官庾萬  
室之炊烟先滿方歌

帝力共慶

堯天豈意擊壤聲中重臣至止負暄隴畔大吏忽臨

頒示

詔詞再宣德意口傳

天語備詢艱難截漕運之正供資草茅之飽食而且

悉除口算寬來歲之農時盡免田租養終  
年之民力遂見巨舟蔽岸散玉粒于窮簷  
徧野唱籌布瓊膏于僻壤不煩收穫自有  
餘糧恍樂阜成無憂力作默運陽和之氣  
黍谷回春轉旋造化之機凶年有慶韶華  
布暖燦大地之恩光玉曆新開浥九天之  
雨露觀農桑之熙皞畢歲不識公庭服襪  
襖以優游到處無非樂土在

聖世施仁之政何以加茲卽小民望澤之心豈能及

此臣身依猷猷同沐恩波聞四野之歡呼



聽羣黎之謳頌賡颺難罄採輯成章敬賦  
俚詞恭呈

睿覽

雍熙化洽古無前久慶昇平六十年海寓乂安民  
氣樂江南財賦

主恩偏

時巡六度春隨

輦大有頻書粟滿田偶爾甘霖遲數郡便宜

明詔問東阡

二

農事艱難古所同君門萬里豈能通何期晴雨田

家事盡入高深

睿照中奏牘未聞馳驛使

恩綸先降自行宮盈廷集議誰能贊籌畫民依出

聖衷

三

耕九餘三足稻梁却憐風土各殊方地因卑溼無  
儲蓄俗尚繁華鮮蓋藏民隱周知真若覩恩膏旋  
沛切如傷數行

詔旨傳宣處億萬歡聲祝

聖皇

四



朝聽鸞書夕發倉農夫擔負已成行西疇晚稻猶  
遲實南陌晨炊早有香飽食不須愁卒歲涼秋先  
已覩韶光于茅乘屋謀生足種麥還澆舍外桑

五

鼓腹含哺徧九衢誰言四境有荒蕪重臣遠蒞咨  
豐嗇

天語重宣問有無特減春流千艦運爲供茅舍萬家  
需今朝倉廩村村滿却較年時氣轉腴

六

帝心委曲代民謀終歲寬閒自有秋百萬正供咸賜  
與數千里內絕徵求爲農不踏公庭路喜雨還來

陌上遊休息重開新氣象卽今江左是丹邱

七

三日公旬分所宜丁徭盡免念農時好勤東作薰  
風裏坐待西成納稼期烟雨一簑閒婦子杏花千  
耦樂耕犁

九重體恤恩無限遊惰回心淚滿頤

八

陽和旋轉作豐年

至德真操造化權室有餘糧農有暇野無棄土稼無  
邊歲時伏臘人歌

聖稂穗倉箱澤自天唯願年年來日馭言情環繞屬



車前

和閑園司寇大兄歲暮園居雜詩二十一首  
郊園真獨樂終歲掩雙扉一徑穿黃葉全家住翠  
微雞豚頻有約猿鶴本無機知足隨緣好休論是  
與非

二

白石寒逾潔蒼松晚不凋風霜堪共老雪月好相  
招畱取真心在寧憂逝水銷置身塵網外無寐坐  
清宵

三

十畝閒閒地歸來守令名

閑園本伯父娛老所構  
今伯兄新建一堂於西

偏顏曰守閑  
堂承先志也

貧能安素業退不負蒼生廊廟時方

泰山林志已成傳家餘萬卷寒夜一燈檠

四

木落柴門迥親知鮮過從前村喧臘鼓遠寺度霜  
鐘罷讀書爲枕閒行路信筇東山如谷口一壑白  
雲封

五

好乘農暇日重葺舊茅亭歲晚烟光靜人閒草木  
靈陽生春浩浩雨歇晝冥冥鄰叟堪同醉何須歎  
獨醒

六



嘉遜情非傲投閒性所耽寒銷頻數九冬盡已過  
三月黑千枝桂霜紅數樹柑負暄裘不御移坐小  
窗南

七

閣號歸雲好無心物自疎陶公三徑意王氏一家  
書伯兄新懸一榜於小閣曰歸雲香泉四兄所書也舒卷原無定長空得  
自如笑他斜坂上日暮負鹽車

八

歲歉租如丐困空粟似珠家人愁不飽吾道腹猶  
腴俗累難除蔓奸聲畏倡竿盤餐惟守儉野岸采  
葑須

九

卒歲多人事田家未寂寥祭餘還自勞酒熟或相  
邀野燒兒童戲隣喧婦子譙漁樵來往少渡口繫  
空舠

十

秋來憂旱暵早荷

聖心憐興發頌

明詔寬閒勸力田公旬除力役正賦免輸捐謳頌家

家樂明年大有年

秋冬以來發倉截漕以賑飢民并全蠲明歲正供通省丁糧

恩綸屢沛從未有如此浩蕩者

十一



水旱尋常事疏渠古所稱周咨地利悉俯察

聖人能蓄洩規先定高低歲自登扁舟來大吏河畔

踏層冰

時漕臺偕督撫方伯奉諭旨親履畎畝講求水利以備旱災

十二

歸田方有我身世不相牽鱗躍還滄海鴻飛到遠天全真殘夢外得意晚風前造物休相妬朝朝可晏眠

十三

林下閒身少家聲濟美難喬柯撼冰雪玉筍長琅玕遶膝皆能讀循陔有潔餐百年方未艾門內足爲歡

伯兄園居諸姪侍養承歡克盡孝謹孫枝十餘人森森玉立皆能讀書備極天倫之樂

十四

昆弟同朝盛當年記十人于今思宦跡不異數家珍異地多懸綬臨風或憶尊從兄唯有我故里作

堯民

向官京朝伯兄及陟齋八兄實齋三兄勿齋大兄香泉四兄元期四兄廷益六弟巨高四

弟榮期七弟暨予共十人或居卿貳或在詞館或列臺省或官郎署一時極盛今數歷中外各各散去予與伯兄先後同歸追隨里居已四載矣

十五

僚舊多華要

恩深未許辭高官誠不易終隱未全癡冷性寧求熱

徐行不厭遲味從無味得只有兩人知

向年同官僚友多登

顯秩間承枉書問訊頗羨予兄弟家居之樂或有促予彈冠者故云



十六

天末來芳訊丹砂不易求兄才能搏象我意不驚  
鷗節鉞何時召台星最上頭遙知鈴閣裏宿雁憶  
汀洲

實齋三兄時撫黔中近  
有書來以丹砂見貽

十七

蓬瀛新五馬樓市影重重渤海傳家舊青徐待澤  
濃之官先量粟故里不聞春吏散衙齋靜還應憶  
阿儂

時廷益弟新任萊州太守聞彼處積穀陳陳  
頗費稽核而家中田租一無所入故有不聞  
春之句

十八

聲華驃騎擅官冷在山村筆健江堪吸詩豪天可

捫池塘閒入夢棣萼老逾敦苜蓿休嫌淡名高道  
更尊

淳安廣文五兄每枉書相念  
甚殷聞在署中著述日富

十九

小阮多才藻詞源萬斛傾鳳毛羣振彩鵬路遠偏  
輕老去文彌退年強譽早成機雲期爾輩我愧左  
思愴

喜諸姪皆能文  
後先振起也

二十

萬事居人後安心百不如人皆嗤寂寂我自樂徐  
徐柏酒甘村釀辛盤飽澤菹棲遲愁未穩獨立更  
躊躇

二十一



澄觀叅妙理那復計形骸得喪能齊物彭殤任坦  
懷信天皆自適與物總無乖人世徒勞攘吾心久  
已齋後二首予自謂也予自甲申乞歸於今五載  
或有惜其落人後者然非知我之言今讀禮  
家居所憂者兩年  
之後捉鼻不免耳

閑園大兄除夕賦詩見懷依韻奉酬

崢嶸節序換韶華共守田園齒又加幼弟吟髭都  
帶雪老兄健筆尚生花祭餘猶自愁腰折客散無  
須把手義哀慕終宵難就枕夢回那復憶宮鴉

二

午橋獨樂經年逸子舍團圞一夜忙

兄經年獨住  
郊園除夕暫

返城試問金貂趨曉漏何如蘭玉繞匡牀雨催梅

信迎郊墅寒結盤花燦畫堂容我閒身陪杖履家  
門華轂已相望

和莊雲湘草堂新成原韻

八窗洞啟曲欄斜人說山中宰相家堆案牙籤翻  
秘笈當階文石倚名花地因卜築真成趣興寄烟  
雲未有涯靜賞不知塵世事焚香只合著南華

二

梧竹新陰覆草堂披襟永日任相徉花前歌罷春  
生袖酒後詩成月滿牀几案琴尊多古韻茶瓜櫻  
筍有餘糧蕭閒便是神仙侶却笑人間日月忙

三



夢月堂詩卷十四  
蒲團竹几意蕭然春草春禽自可憐盡日卷簾花  
影下有時欹枕藥鑪邊霞明曲磴開圖畫風度高  
松奏管絃擬趁閒身還過訪把君詩卷聽鳴泉

中秋後三日淳安廣文五兄自署中歸偕過

大兄閑園恰值桂花將放畱連竟日

棣萼分榮聚首難故園此日暫追歡秋香有待花

遲發明月多情魄未殘今年桂花甚遲如待五兄之歸而十七夜始望十八

月尚老樹難忘初種日蒼顏重作少年看天教獨

樂供娛賞畱與溫公歲月寬

二

仕宦如兄澹有餘衙齋長對萬山居官同世外無

官樂讀到人間未讀書教子已成多早達頭銜翻

畏換新除謂五兄也白頭惟我成羝觸難向花前論卷

舒

三

素衣那敢問花期話濶從兄把酒卮有味當尋無

色處真香全在未開時秋清合共幽人賞地僻休

教熱客知座末諸郎還竊笑夜來先折最高枝時諸

姪秋圃甫竣

周子三緘製新樣花箋甚古雅見貽萬幅詩

以報之

黃荃墨妙徐熙畫一縷烟痕半幅妍我欲題詩慚



謝傳多君九萬會稽牋

二

藤雪生香素影斜不描金粉洗鉛華薛濤新樣洪  
兒紙爭似高人一片霞

周子三緘以晚菊曉睡二絕索和依韻酬之  
開殘叢桂早涼天正憶黃花晚更妍有客投詩香  
滿紙浣花溪繞短籬邊

二

閒身晏起正相宜似是宵來泥酒卮偃卧袁安非  
爲雪年來村舍減晨炊

自題傳經圖小照四首

爾生何所慕霜雪早侵髭仕久貧安分恩深退已  
遲讀書辜壯歲樹立負清時可許歸田穩沈吟只  
自知

二

僻性兼臞貌何緣竊一官早年叨蕊榜廿載直金  
鑾莫笑浮沈老須知骨相寒祇應方丈室相伴蠹  
魚乾

三

識字知成誤傳經願豈違非關求顯達於此辨幾  
希絳灌尊猶鄙侏儒飽愧饑家聲唯數卷俛首未  
全非

圖中繪稚兒橫  
經侍側故云



四

六十平頭近浮生事惘然玉門關外夢清漏禁中

天子久侍禁中又曾從征絕漢禹尚基曾爲繪圖風木終身痛龕燈夙世

緣何須尋隱地一榻坐能堅

題黃子石牧秋林枯坐小照

枯坐秋林興不枯毫端直欲掃平蕪空明心地蕭  
疎貌秋水秋山得似無

二

密葉繁花一槩刪飛鴻影沒白雲間偶來獨坐默  
無語心在高天寥廓間

三

自愛蕭辰却伴來不攜書卷不銜杯集賢學士香

山老總要胸中絕點埃白傳自題寫真詩昔爲少

居士寫貌寄香山今君將入集賢先具香山之志矣

題王子硯農柳陰牛臥圖小照

一樹垂楊綠正齊芒屨短袷立香泥朝來春雨村  
村足閒殺烏犍早脫犁

二

要將心迹溷樵漁挂角寧勞一卷書飲罷碧流春  
草軟笑他峻坂負鹽車

題呂子丹麓垂釣圖小照

修竹喬柯水一灣磯頭獨坐便忘還滄江雖好風



波惡此地無名自得閒

二

却笑璜溪與富春無心原是有心人一絲在手都  
忘却澹蕩風懷任我真

三

胷次能容十萬夫長竿直欲拂珊瑚他年身退名  
成後不向君王乞鑑湖

己丑正月以先君大祥又值先慈二十周年  
詣雲棲禪寺啟建水陸道場禮拜六首

細雨來過江上村山迴徑曲不知門一聲清磬人  
初覺四面烟霞近可捫此日炷香皈寶座當年枯

杖撥雲根叩關不爲耽幽賞欲轉金輪仗佛恩

二

憶侍慈闈覲法筵依稀二十八年僧寮猶記曾  
棲地佛火重瞻不夜天讀廢蓼莪聽梵唱痛深風  
木禮金仙此身不爲

君恩重便擬跏趺學坐禪

三

萬竹琅玕翠接天四圍山色擁飛烟深藏紺宇門  
庭肅靜守香燈法戒虔十二時中間梵誦三千世  
界識良緣須知淨土無多遠心地常空現妙蓮

四



夢日堂詩卷十四  
興廢從來歎奕碁百年無恙凜清規高門第宅誰  
家子老衲雲山異代師丈室一燈人宛在繩牀半  
席客相依若教治世真良相稽首金容有所思

五

六馭曾經過碧巖辦香能使

至尊拈山亭

御座羣靈護碑石

天章萬古瞻無色相中真色相不莊嚴處是莊嚴規

模簡樸畱

宸睠香火層層接短檐

六

久宿空山夢亦清塵心頓盡悟無生泉流百道終  
朝響寶號千聲徹夜明要識工夫皆實在不教僧  
侶有閒情禪門卽是儒門法學聖無慚學佛成

勞介巖先生過訪賦贈

五十年來舊禁林歷官中外

主恩深天垂喉舌知誰寄公領臺端衆所欽慷慨數  
論當世事忠貞不愧老臣心紫宸對罷催歸騎祖  
餞傾朝足古今

二

龍馬精神鶴髮翁渥丹顏色照人紅士林公望歸  
君實朝論清明待潞公此日邱園非寄傲他年鐘



鼎不言功洛中朋舊吾兄健同甲同遊道亦同

介

與司寇大兄同年

賦得陽春名我以烟景和丹麓韻

晴靄朦朧錦繡堆牽人如夢到蓬萊東君韶令寧  
無意大地勾畱不用媒莫倚芳年輕軟節休教遲  
日負仙才酒杯歌板渾無賴林際飛紅點點催

二

故遣鶯花聚一堆紅生萬樹綠生萊風光入眼如  
相待造物於人也自媒香徑花蹊誰是主柔腸綺  
思不論才關情共惜流年度遊屐休教落日催

賦得杏花春雨江南

用題中平字各賦六韻

水村多宛轉烟嶂自周遮積雨千林靜含顰幾樹  
斜波光飄細縠豔影隔輕紗澹蕩凝朝霧朦朧漏  
晚霞色迷漁父棹香落野人家此景應難畫陰濃  
不見花

二

韶華初鬪麗淑氣暗柔人宿潤畱香膩流膏著物  
新浣餘紅意嬾垂處綠情親長結枝頭露都消陌  
上塵晝冥疑欲暮曉睡不知晨金谷休誇豔江鄉  
別有春

三

媚景常生潤輕寒未肯降牆頭紅靄靄渡口碧淙



淙密灑絲千萬低飛燕一雙洗妝滋玉液照豔待  
銀釭花意慵臨水春心靜倚窗迷離無限景籬外  
是烟江

四

二月江村裏晴佳雨亦酣畦香隨屐齒花氣潤衣  
簪嫩綠終朝亞輕紅宿霧含胭脂難點筆螺帶欲  
飄嵐泥濕多沾蝶柔柔早問蠶青蓑聲欸乃又過  
小橋南

賦得春草碧色

萋萋不可極直接遠天青細纈光搖曳平蕪色杳  
冥無痕侵客袂有意染沙汀舊識東風面驪歌那

忍聽

二

天涯隨處有此景最關情眉黛千重皺裙腰一抹  
平王孫歸有約謝客夢初繁野燒難消恨青痕冉  
冉生

賦得春潮浮綠烟

暖氣蒸沙渚新波蕩遠洲粼粼光射岸森森霧吞  
樓未見銀濤湧先看碧靄浮蔚藍天影亂迷漫海  
門幽黛濕山增翠烟飛樹欲流須知春水色不似  
洞庭秋

查悔餘編修六十



海內知名四十年晚來供奉玉窗前宮中爭唱看  
花句塞上流傳避暑篇院長昔曾稱弟子郎君官  
已應星躔今朝甲子平頭過賜得蒲觴醉客筵

二

同直金鑾出每遲別來霜鬢各添絲乞歸我志唯

君許

予甲申乞歸同官無不勸阻惟先生不以爲非且承改定小疏嗜退君情只

我知里第開尊稱慶日先生騎馬扈行時

聞今歲五月初

即出口避暑計生申桐花乳燕家園樂愛弟偷閒

之日即扈行之初矣有所思

張韋存郡守以閱視海塘冒暑至寧賦贈

嚙岸驚濤亦偶然重勞五馬駐城邊神前拜禱懷

前度嶼隱沙明已半年欲使瀛壖同巘嶢不教間  
左費金錢炎風拂面親籌度好護西成萬頃田

二

一葉輕舠刺史來恐煩供億減輿僮憂心捍海愁  
奔馬喜雨隨車欲溯洄能格天心真柱石共襄人  
力愧涓埃秋清浪靜民安樂洗盞遲公對月開

樹堂詩

築宇據勝區堂構茲焉剏庀材選豫章運巧驗梓  
匠南榮映雲日北辟曜屏幃芝蘭繞其隅松竹蔭  
其上誠知輪奐美足爲風雨障錫之以嘉名於我  
索吟唱濡毫費擬議所樹作何狀奇種栽仁壽良




材植交讓竇氏桂固宜王家槐亦當柯亭音在椽  
藜閣先生杖更爲封植謀滋培洵無量樹穀與樹  
木未足審趨嚮樹人斯可久樹德尤所尚繁衍子  
孫庇楨幹鄉所望我暇一來登棲託兼奧曠喜爾  
落新居自成此宅相











T5466/7910



CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

OCT 4 1960



愛日堂詩卷十五

重徵集

庚寅五月至  
辛卯九月

哈佛大學漢和  
圖書館珍藏印

余性疎才拙懶於仕進自辛未冬蒙

特恩以原官召用洊歷清華者十四載甲申春以親  
老告歸栖遲子舍三歷寒暑旋遭先君子  
之變服闋逾年引疾不出年近六旬已堅  
肥遯之志豈意

聖恩深厚於庚寅五月就家擢補翰林院掌院學士  
重荷

徵召勉力趣行偶有吟詠名曰重徵集不忘初志也  
伏聞



夢日堂詩卷十五  
恩旨卽家徵擢翰林院掌院學士拜

命悚惶恭紀二首

驚傳

寵命到田間六載荷衣復

召還子職苟完難報德臣心多負敢偷閒樗材未老

原無用蒲質先秋恐更孱此日拜

恩還夙駕趨朝不是舊時顏

二

仰邀

錫類酬初志便擬投閒亦自知豈意

聖明憐棄物重教末學玷清時趨承殿陛才何補領

袖蓬瀛分豈宜記得教忠遺訓在只今正是致身  
時

舟過臨清晤同年汪文漪撫軍賦贈

作人秦晉有清風開府中州望益隆早便東山歸  
謝傳可知薄海仰溫公八年夢寐徒成濶廿載金  
蘭未敢同今日清源重問渡登堂把臂又恩恩

二

錫類恩深許放還便思藏拙在空山豈知

紫詔重催去自歎蒼顏未許閒杖履園林君獨樂文  
章鐘鼎世難攀此行若得歸歟早再向平泉一叩  
關



過濟寧牖閉不得渡會劉裕菴觀察督運北  
去因與偕行有贈

檠戟清風俯運河天儲萬艘此經過東方赤子霑  
膏雨南國行人起頌歌召伯深仁看浹洽鄴侯懋  
績仰嵯峨盈廷不待羣推轂節鉞新綸出玉坡

二

扁舟赴召老儒臣觸暑宵征獨問津已恐行程難  
奮越又逢閉牖倍逡巡使旌幸值應無阻彩鷁相  
依得所親盈耳政聲隨路遠定知公道達楓宸

題潘書原學士荷香垂釣圖小照

菱荷數頃繞桐陰塵壒都消暑不侵那得閒身來

永日釣竿在手總無心

二

禁柳陰濃下直遲湖莊清夏最堪思絲綸閣下人  
初靜恍坐磯頭把釣時

三

清涼何處訪仙都如此風光得似無欲乞鑑湖知  
未許只應畫作輞川圖

題秀甲園圖

并序

秀甲園者雲間王少宗伯琚湖先生之別  
墅也

時巡蒞止嘗一再幸



御書王右丞詩賜焉先生因繪圖作爲歌詩以紀其  
盛昔輞川別業亦嘗唱和繪寫稱絕勝矣  
而未邀宸遊之臨幸視先生之秀甲何如  
也先生屬識簡末謹次右丞詩韻仿成二  
十絕句

名花燦紅霞

御墨灑春色坐使雲間雲朝朝擁

宸極

右蒸霞榭

綠枝水同色濯濯春月柳

至尊含笑看不但靈和有

右懶柳齋

日下榮三槐泉石未暇務

九天雨露多千里潤嘉樹

右嘉樹軒

飛閣瞰無極山水發清響肅肅鳴

玉鑾遊屐不敢上

右清陰閣

園林想濠濮花裏一泓瀉

恩波自天來浩蕩雕欄下

右秋水軒

天台與武陵不如此結宇



夢日堂詩卷十五  
四  
玉輦隨春風沿溪拂紅雨

右小桃源亭

虛室常生白風月攬盈把掃徑祛纖埃穆然待

陛下

右常清靜齋

偶借右軍語高閣俯春苔笑他修禊處翠葆何由來

右騁懷閣

跨水方亭敞衣痕上綠漪百花爭近日擁翠不相離

右花步

九峰如烟鬟可望不可卽列之爲屏障  
重瞳舊曾識

右九鬟閣

賞花而釣魚長廊集鷓侶此中涵

帝澤鱗鬣得其所

右釣魚閒處

嘉蓮生碧藕食之壽萬歲種自西王母再拜獻

皇帝

右藕花灣

子猷偏愛竹風笑也宜人百卉承

天澤檀欒況此君



夢窗詩集卷十五  
五  
右竹笑亭

南榮列翠嶂北牖開藥欄隔水春旗色拂拂紅雲  
端

右含暉堂

貝葉鬢華裏年年祝

聖君遙知停

蹕處一圃蔭慈雲

右佛閣

大椿高其柯環繞盛花萼

天心賞紫薇引之到碧落

右二薇亭

春畦繞樓外野色從東來田事國所重望之窗四  
開

右華黍樓

春雨染紅藥當階爛漫開謝庭曾

駐輦恭進萬年杯

右紅藥山房

扈遊花匝匝彩翠映文漪此日儵魚樂豈惟莊惠  
知

右觀魚檻

揚州歌吹路何似此清嘯嘉葩有丹心太陽每垂  
照



右竹西草堂

奉

命教習庶吉士示館中諸君子

五雲多處舊橫經三十年來鬢已星領袖清班眞  
忝竊楷模羣彥愧儀型官同山嶽千尋峻人到蓬  
萊萬選青莫負

聖朝培養意他年相待上槐廳

二

諸公濟濟盡時英肅拜登堂誼不輕

君命欲儲公輔器師資難副友生情聲華一代文章  
重品詣千秋竹帛明正好三冬窮萬卷休嫌五夜

對孤檠

三

庭前靈鵲噪空枝起倚迴欄有所思共想花開全  
盛日須知釀就最寒時清如冰玉從來冷堅似喬  
松詎可移綸閣巖廊皆舊學何人不憶鳳凰池

四

慧業文人鍊骨仙多從冰雪結因緣能甘寂境才  
方老不坐空山道未堅青簡憑誰堪不朽紫烟有  
路敢爭先他山頑石虛磨礪恰喜初陽氣已旋

題孫望分主政三望圖小照望兮座師孫少  
司空之弟也



幾重烟水幾重山頻遣雙眸不暫閒父母兄兮瞻  
望遠獨徘徊在畫圖間

二

阿堵能將至性傳雲林花鳥總纏綿寸心紙上分  
明說魏國風詩第四篇

三

白雲縹緲失秋旻寂寞鵲原又幾春回首師門添  
悵望流連不但卷中人

辛卯元旦偕揆院長侍

聖駕詣

寧壽宮行慶賀禮頃之

上御太和殿受廷臣朝賀記注官於殿內侍班例也

退至直廬恭紀四首

寧壽宮前問起居東華瑞旭欲升初金鋪將近辭

金輦

玉步徐行上玉除樂奏雖和

天子拜禮隆尊養史臣書七旬

聖母無疆福

大孝從來總不如

二

寶曆新開五十年朝元玉帛慶

堯天彤雲微度觚稜外麗日平臨



黼座前大有四方咸奏報正供率土又  
恩蠲螭頭擬作昇平頌五色祥光照簡編

三

隔歲春歸氣倍和御溝水泮欲生波不須翦綵催  
花放早聽流鶯入樹歌貂錦添溫恩較重獸樽未  
飲色先酖定知上苑韶光滿聞道

鑾輿詰旦過

四

歸田七載謝鴛行又拜

新恩捧

御牀年齒自憐周六甲光華重覲肇三陽細旃鵠立

紅雲裏短髮鳬趨

紫極旁下直蕭然惟一室撥開宿火自焚香

正月上辛

上以祈穀將親祀

先農前三日

回宮致齋元龍偕揆院長暨諸學士齋宿院中紀事

二首

鑾輿凌晨別苑廻齋宮肅穆儼瑤臺侍臣歸院清宵

永羣彥盈堂好月來天上諸星八穀庭中一幄

耀三台

揆院長設行幄於中庭齋宿

春風消息催元夕亭畔方

池鏡已開



二

院鈴聞寂耿珠繩雪後閒庭氣轉澄正好聯吟難  
命酒恐妨皓影不張燈地清更覺春寒峭談久都  
忘夜漏增二十八年翔集處多慚白髮擁青綾

十二日

上親祀

祈穀壇元龍以記注官隨侍恭紀

祿壇親祀出齋宮三日精虔默可通松徑陰濃春  
有露香烟直上夜無風數聲鐘動開閭闔一道霞  
明徹昊穹

降輦步行知禮重豐登預卜萬方同

二

御道櫻茵淨點埃雙燈引處

聖人來

天顏睟穆晨光映

帝座氤氲宿霧開劍佩千官環玉陛工歌九奏儼瑤  
臺上辛風日今朝好三五韶光早又催

上元後一日同年樊崑來司成置酒徵歌邀  
諸同人讌集崑來賦詩見示次韻奉酬

星橋火樹正紛紛綺席招攜舊雁羣鬚鬢相看都  
染雪勳名競起欲凌雲歌筵頻醉情何重燈燄交  
枝氣似薰嘉會良宵寧易得坐遲月午夜平分



二

西川才子思續紛逸氣高懷迥不羣卅載金蘭真  
似漆一時冠蓋喜如雲但聽好句伶人唱豈必朝  
衣侍女薰老我枯腸甘寂寂閒偷春色只三分

是日演邯鄲夢樂府崑來復賦一詩每句用  
春夢二字戲做奉酬

好夢難醒境渺茫春工游戲故教狂今春今夜成  
良會誰夢誰真總隙光人在夢中春較永情隨春  
去夢偏長借他一枕畱春住八尺瓊瑜老夢鄉

伏蒙

恩命擢補吏部侍郎復有

旨兼管翰林院掌院學士事恭紀

審官詔爵重三銓

寵命驚聞錫自天譽豈裴王堪品藻望非顏謝忝陶  
甄署名紙尾難爲異舉扇堂前敢自仙六燕一鴻  
誰得辨却金無愧或差賢

二

玉堂領袖愧羣賢清要兼官悚墜淵自愛神仙流  
品潔何妨風月笑談偏儲才他日成梁棟致主從  
來籍簡編案牘散時歸秘閣琳瑯響處富詩篇

吏部有藤花廳蒞事集此廳中相傳藤花爲  
前代名賢手植時花盛開澤州相國貽詩問



訊花期惓惓不忘因賦二首

東院藤花歷歲年傳聞手植自名賢低垂細葉搖  
疎影密綴羅囊羃紫烟吏散庭中閒竚立月明架  
下擬高眠盤旋老幹經霜古緬想風流一惘然

二

綸閣朝回有所思關情花信更貽詩地因人重封  
嘉樹花藉詩傳憶盛時雜卉只今淆臭味繁枝那  
復辨妍蚩清陰百載還如昔故事流傳尚可師

送前輩許時菴大宗伯予告歸里六首

并序

七十懸車古聞其語三千祖帳今見其人  
南園之鶴蓋將移北闕之驪歌甫唱莫不

仰松喬於碧漢折楊柳於青門依依以戀  
行旌嘖嘖而譚盛事我大宗伯許老先生  
登仕三十年馳聲十五國始鳳儀於冰署  
一代儒宗繼鴻漸於容臺六曹師長望重  
若干尋之山嶽心清如百丈之淵泉共仰  
丰儀識端凝之矩範每持正論見突兀於  
班心上以黼黻太平則

九重倚賴下以津梁後學則百爾步趨舉世方翹首  
於秉鈞先生乃引年而避路抗章請告

優詔勉從吾黨竊疑同朝相告謂賢者不當有憇視  
天下之心而純臣何容有早安泉石之志



寧無繫念遽林下之有人豈曰高風俾朝  
端之失望而先生則謂生逢

明聖克保初終當此昌期宜全晚節此則先憂後樂  
各有其時佚老優賢適逢其會又無不羨  
先生遭際之盛進退得以從容

聖主知遇之隆上下交相體恤彼四明歸剡較此非  
榮而萬石還家方斯却步者也元龍研席  
追隨芝蘭末契後先通籍奉教一堂弟姪  
橫經締交三世誼與年而俱積情較衆而  
彌深乃者循陔子舍余方膺

召重來聯步巖廊公竟乞身先去西湖風月獨岼角

巾東海雲濤未陪鳩杖則當江雨報歸之  
日河橋送遠之時何能不歎羨交加聲情  
迸迫用拈短律莫罄離思同館羣賢繼聲  
競賦謂他年可傳不朽實史冊藉以增光  
而此日共號美談非詠歌無以颺盛盧駱  
之鴻章咸集鄒枚之逸藻爭飛爰剖帙以  
裝池謹合函而持贈夫八座投簪六卿解  
組而囊無一物唯有賜書陸運五車都爲  
載籍益以灞岼贈行之冊雜諸都亭送別  
之篇豈直各言其私抑亦深投所好清風  
可挹去棹如仙疏大夫藉甚班書楊少尹



難爲韓序矣臨行借問香山誰同會之人  
別後相思穎上寄歸田之錄

位高身退古來難樹節酬恩兩欲安泰運不逢千  
載盛令名寧易一人完便離廊廟心非忍穩卧林  
泉夢亦歡五紀昇平多樂事尚書拜表首辭官

二

當代文章賴起衰作人江左有餘思中流砥柱朝  
端重一片冰心

聖主知館閣英賢懷舊學曹司郎掾凜清規先生出  
處關輕重不是河橋惜別私

三

高情真與古人齊後起人才藉品題雲表乍看鴻  
去遠梧枝猶憶鳳初栖先生于同館後進關情甚篤自言此去不能忘者唯  
鳳凰池耳溫公歸洛名逾重潞國還朝事可稽今日玉  
堂羣散直臨岐爭繞綠楊堤

四

肯將畫錦向人誇一種風規萬石家輞水不營新  
卉石午橋只愛舊桑麻忘形老友誰還健識面隣  
農喜欲譁靈壽却扶登陟易太平耆宿在烟霞

五

弱歲追隨硯席尊臯比記得昔時痕青燈師事情  
猶昨紫禁肩隨誼倍敦致政方知吾道在傳家不



愧一經存韓門尚有鵠原痛立雪孫枝矢報恩

六

纔辭魏闕卽蓬山素髮飄飄一鶴閒憐我雌辰緣

未了

余少公十二歲皆生于辰年也

羨公同甲會難攀名堪不朽

輕三錫心可忘機勝九還最憶桑陰春水綠仙舟

欸乃到鄉關

八月初八日聞出撫粵西之

命感遇述懷四首兼柬詞館諸君子

恩深侍從

紫宸前出撫炎荒

命乍宣儒術迂疎慙節鉞山川險異足詩篇田間忽

召真如夢嶺外旋行詎有緣莫笑頭銜今日改中樞

原不讓中銓

余以吏部左侍郎出爲巡撫改授兵部左侍郎故云

二

儒臣老去鎮巖疆擁節真辭翰墨場自是昇平須  
易俗欲將禮樂化蠻方鳳凰池舊情難別獬豸冠  
新換不妨南北東西

君命重敢言報國只文章

余爲吏部侍郎仍兼翰林學士今以兵部侍郎兼右

都御史真改官矣

三

單車不用辦嚴裝檢點殘書也自忙僻好牛腰多  
負累宦情馬首自蒼茫七千里外家逾遠六十平



頭路正長聞道灕江多勝景要畱題句姓名香

四

瀛洲仙侶愛疎頑共擬相畱叩

帝

關翰林諸公羣詣政誰信上清多幻跡何妨吏隱

墮人間湘源洞壑通三島桂海烟霞得九還他日  
歸來難換骨諸公認取舊蒼顏

熱河行宮陞辭恭紀

塞外秋高小殿清

天顏近接喜分明

溫綸鄭重封疆寄奏對從容

聖主情幸際遐方皆偃武莫言儒者不論兵

荷蒙聖諭畱

心操練將士

暫陪院長仍聯步別緒相關問去程

同揆院長

出宮敘別殷殷故云

九日密雲道中

近塞山多氣早涼渾河流自湯湯亂雲飛處環  
危堞淡日斜時照遠岡野店試沽菜酒白官車滿  
載菊花黃途中車載菊花甚多備行宮之用也登高何事增惆悵明  
歲今朝望帝鄉



愛日堂詩卷十六

宜人集一

辛卯至  
甲午

杜少陵詩云五嶺皆炎熱宜人獨桂林韓  
文公有參天帶水翠羽黃柑之語末句乃  
云飛鸞不暇驂范石湖帥廣西因引是詩  
作驂鸞錄余何敢擬於驂鸞而居桂林者  
六年縱攬山川奇秀頗覺風土清淑且時  
和年豐政簡民安與宜人二字相合公餘  
偶吟名曰宜人集

十月二十二日之任桂海出都書懷四首

三十年來侍從臣乍離丹陛意逡巡朝端翊贊資



元老海內昇平託

聖神叱馭敢懷三徑草登車恐負一方民從今回首  
長安遠唯以無疆祝

紫宸

二

東銓兼秩領西清澄品儲才未有成豈意朝端辭  
劍佩却來嶺表擁旂旌槐廳僚友勞相餞藤署曹  
司遠送行如此深情何以報應憐迂拙是平生

三

愛姪遄歸扈從勞牽衣執手對銀膏同朝一載多  
睽隔舍姪時扈從苑中又隨出口雖同官經年聚首不及十旬也話別今宵倍

鬱陶持節馳驅憐我老濡毫供奉藉兒曹吾家最  
荷

君恩重豚犬春風莫濫叨

時稚兒幸捷秋闈戒其讀書三年勿卽與計偕也

四

一身遠去暗銷魂寄語歸鴻仔細論繡佛老妻資  
藥餌青燈弱子慎家門登程莫畏風初冷到日應  
知氣尚溫最是松楸縈夢寐好勤守護在賢孫謂尚也

過邯鄲呂仙祠有感

憶得求榮入夢初殿頭名姓唱鴻臚常攜翰墨隨  
雕輦曾帶弓刀過拂廬清要兼官雙綰綬簡書拜



命獨驅車黃梁未熟頭先白遮莫仙翁一枕餘

方順橋飯畢過柳堤偶占

方順橋頭飯罷時長堤楊柳尚依依陰垂孔道畱  
人憩舞倦西風動客思空羨陶公門可種已嗟張  
緒鬢成絲宦遊蹤跡曾何定折取長條記後期

磁州柳堤

滏陽城外鄴臺西行旅經過意欲迷萬樹垂楊遮  
驛路雙渠流水夾長堤時當木落陰猶在想得荷  
香葉正齊鼓吹旌旗煩導從空教塵土暗清溪

敘九壻下第後同余至安陽縣令叔師魯署  
中告別歸家詩以送之

吾師當代峻龍門萬卷樓高裕後昆清潤我真慙  
愛壻才華爾不愧文孫成名難副家聲重下第何  
妨世澤存歸去蘭陔方介壽冬烘頭腦不須論

二

相送相攜到鄴城停車此夕別君行三冬足用堪  
千古萬里休嫌後一程叔姪尊前談往事舅甥客  
路話離情最憐弱息懷霜鬢風土關心問去旌

武昌謁姊丈葉忠節公祠感舊述懷六十韻  
先生本儒者風雅冠詞場詎意鸞鳳集翻遭枳棘  
傷一朝成節烈千古識綱常遺像重瞻仰音容痛  
渺茫追思肺腑誼忝屬弟兄行師事憐余幼肩隨



怨我狂春風常許坐雅度信難量羸瘦疑昭略魁  
梧失子房花開晨接席燭炧夜聯牀經史縱橫說  
詩篇反覆商清言霏玉屑妙語散珠囊砥行期無  
敦中心誌永藏中間多契濶悵別各相望明月懷  
千里郵筒比七襄百尋山業業萬頃水汪汪世俗  
趨卑下高懷尚慨慷庾塵時命扇徐榻每浮觴託  
興題鸚鵡頻年典鸛鷖鳳池風度峻粉署姓名芳  
著作畱臺閣經綸壓廟廊孝先笥是腹荀令坐畱  
香奉命東西去清名遠近揚五車隨宦轍片石作  
歸裝齷齪人難近風流韻自長貧無生產計閒有  
讀書忙

以上敘公由詞館補授郎署司權西江衡  
文關內自丁未至壬戌十六七年間事

憶昨同京邸遲公下武昌攜家來畫舫迎養慰高  
堂受事增憂惕貽書每激昂獨醒愁見涅同事慮  
更張忽散青天霧旋飛白簡霜

聖

明賢否別公道是非彰解組紛投劾兼官獨舉綱

羣狐都屏逐一鶴自廻翔

以上敘公乙丑冬與余  
同居京邸出爲武昌糧

道逾年而楚撫被論藩臬監司皆牽引去官  
公獨脫然無累諸司皆公一人兼攝時事民敞

方思恤兵驕忽召殃平時疎紀律無事乍披猖呼  
籲軍門閉爭譁衛士創棄城先大吏環署戴忠良  
慰諭毋焚掠從容鎮擾攘夜舟歸老母血筆寫封  
章印是孤臣守身惟一死當佩刀猶在握危坐不  
曾僵賊感紛羅拜民悲盡服喪奏聞



天子悼褒卹史臣光

賜謚揮

宸翰專祠鎮楚疆

以上敘戊辰夏武昌兵變環撫軍署索餉時公在撫軍署中力勸陞

堂召渠魁慰諭之撫軍不從入內自署後遁去亂兵遂入撫署公挺身諭之衆皆曰此廉吏不可傷

擁公至山上願戴爲巡撫公勸撫不從因戒以毋得焚掠三日後當從爾輩之請遂歸署閉門夜令

家人奉太夫人覓小舟潛渡次日刺血草疏并封識印信遣人問道詣京師乃朝服北望稽首升大

堂公猶危坐公座中及近前方知已死因羅拜於地疏至京師上臨軒震悼命禮臣議卹循例贈

少司空廕一子而道臣無與謚之例上親書忠節二字以爲公諡旋立專祠又保民餘惠愛錫福

御書丹心炳冊四字以賜

應祈禳祀典隆昭代忠魂障一方

楚人凡有所求赴公祠虔禱輒

應漢江流渺渺浩氣共洋洋二十餘年事三千隔

故鄉茲來瞻廟貌再拜奠椒漿父老言猶泣諸生

禮共將方知仁者勇善養直能剛本抱蘭荃質偏

餘鐵石腸情牽兒女態淚洒几筵旁憶舊真如夢

招魂問彼蒼來歆還俯笑英爽幾曾亡仙府登丹

籍瑤京侍玉皇佛言空色相老氏等彭殤况復精

靈在長爲頑懦坊送神辭鄂渚奉命泛湖湘願假

雄風便迎流意不忘

武昌江行值余六十初度之辰率賦四首

五千纔半路六十届平頭性拙

恩彌厚年增宦未休桂林新建隼沙渚舊浮鷗笑對

江天濶閒雲任去畱



夢見堂詩卷一  
二  
世路經非少頭銜換已多不求行迅駛只願穩風  
波鼓角迎流上烟雲縱眼過青山羞白髮擁節待  
如何

三

生辰誇宴會徵逐笑人忙客路無塵擾清齋愛日  
長寫經親滌硯啜茗坐焚香曾在蒲團上跏趺意  
未忘

四

長江日夜急遺壘古今空

盛世無英傑儒生有事功壓船千卷重化俗百蠻通

自顧衰顏厚扁舟何日東

獨秀山在桂林城中高十尋四面如削余鼓  
勇循級而上登其絕頂

坤維奠五嶽石根蟠南荒八桂峰若筍茲山爲之  
綱一柱撐青天四壁儼削方皴痕掃蒼蔚黛色堆  
青蒼我來蒞西粵乍見心目張恍如冠佩人爲國  
守濠湟乘暇以命駕徘徊山之陽峭豎絕梯級上  
山如上牆奮勇陟厥椒磴狹屐齒妨回顧笑寮屬  
流汗如流漿俛視郭內外物象何昌昌和風拂炊  
烟繡畦羅稻梁居咤紛熙熙不知爲瘴鄉羣峰萬  
里來趨拱於四旁峩峩獨屹立千仞遙相當



聖化洽遐徼山川皆呈祥茲遊信非偶北望達廟廊  
爲傳山林意播此陽春光

遊隱山六洞

并序

桂林城西二里許有隱山山有六洞唐吳  
武陵韋宗卿各有記狀其嵌空玲瓏棧閣  
盤迴不可殫述又稱南華洞中有泉源深  
不可測流沚積爲池蒙溪之水會焉池因  
山麓繚繞縈迴五六里間方舟蕩漾鳬鷺  
翔泳招提數十處長松夾路陰濃蔽日水  
閣風廊在在皆是而范石湖則言西湖之  
外四山巉巖而隱山則浸湖心繪畫所不

能及勝賞甲於東南然則隱山之得名自  
唐宋以來舊矣予公事之暇問所爲隱山  
六洞者土人不知也或云止有老君洞耳  
予友雲間黃子石牧耽奇嗜古因亟訪之  
至老君洞有鑱石老君像在焉仰視洞口  
拂石見朝陽二字因披蒙茸歷險仄求所  
謂六洞者歸以語予予聞而喜甚會九秋  
風日晴美於重九之良辰作登高之勝會  
遂偕督學太史龔君方伯黃君與守令諸  
君咸集於此共探六洞之奇至北牖洞內  
虛明洞達石磴平坦因布席共飲復登山



巔望遠近山川城郭一一在目唯西湖今  
已成田所云碧玉千峰倒影水面者不可  
得矣而招提亭館亦百無一存者登眺既  
畢感慨係之湖中之田不虞水旱爲負郭  
膏腴且小民廬墓雜其間則西湖已不可  
復若夫松竹垂蔭之美臺榭遊觀之盛則  
昇平歲久風俗饒富華美之觀未必不以  
漸而興也是日得詩三首

偶尋幽勝出城隅招隱風流憶昔儒尚有磨崖畱

北洞

張南軒題招隱二字於北牖洞口石刻尚存

難將鑑水問西湖

隱山

下俯西湖爲唐宋時名勝今湖已成田矣荆榛翦闢遊初到巖徑嵯峨

客倩扶更上幔亭高處望恰逢佳節把茱萸

二

六洞迴環水暗通神仙窟宅自玲瓏秋晴片石跡  
趺穩日照千峰氣象空亭館不須尋往蹟桑田却  
喜及年豐溪邊野老休相避落帽何妨趁晚風

三

啜茗支筇性所安行廚漫爲具珍餐羣賢畢至山  
慙隱大雅同臨石待刊何必高臺煩戲馬暫將遊  
屐比驂鸞茅簷尚映斜暉暖獨秀峰頭掛玉盤

同年張雪書宮允視學粵東事竣北上道出  
桂林枉詩見贈依韻奉酬



卷十六  
珠江風景從來麗桂海涼暄尚未殊下瀨船過奎  
欲聚登高風定雨初濡重九後連日大風猺歌蠻  
舞慙開宴碧玉青羅當畫圖君已化成吾政拙相  
看敢忘舊爲儒

二

庭桂應遲好客來花前話舊每停杯集貽珠玉光  
難掩宮允見示網得珊瑚樹可栽懷古難尋曹鄴  
宅臨岐畏上伏波臺伏波巖下俯灘江爲桂林送客之地還朝寄語  
瀛洲侶天末瞻雲首重回

雁黃和尚貽書有秉鉞擁旄不憶老僧之誚  
余一月前已遣人致書彼未之見也因占一

律寄以代柬

極樂西方在此邦慈雲今日蔭三江聖賢忠恕原  
無妄塵障貪嗔早已降帳外鳴笳同梵唄階前列  
戟是幡幢安禪老衲休相憶驛使應敲定後窗

遊七星巖洞

少讀桂海虞衡志雅慕七星爲名巖六千里外跡  
難到奉詔喜掛灘江帆時清政暇出東郭嵐翠遙  
滴遊春衫棲霞蘭若盛魚罄旁接道院饒松杉恐  
以輿馬妨雅勝且戒僣從無譁誦道士不驚官長  
至白雲鎖洞勞開緘鞠躬而入太昏黑束炬萬點  
明凹嵌人聲隆隆滿一穴且行且坐尊卑咸奇形



詭態目不給如闖海藏搜琅函蚪螭丹黃躍鯁鯉  
狡猊黑白追麀麋普陀現像石髓裂須彌倒掛雲  
根剗瑇瑁席不穩睡櫻桃菱藕難充饞片石罄  
聲詎宮徵一潭水味誰甘鹹古佛低眉黯澹澹美  
人攜手嬌摻摻仙膀大開姓氏寂天門不閉神明  
監廣若射場可馳驟窄若甕牖相吞銜沓呈百幻  
鍾乳結僂行二里苔毛芟良久始漏白日影仙人  
畎澮荒鉏鑱曾公橋外騶吏待洞門一隔還塵凡  
歸路衝霞紫浩浩回眸睇壁青巉巉有句未敢鐫  
雲竇恐褻造化罹譏讒聊補昔賢遊記闕收拾怪  
異藏藤槭

賦得採菊東籬下悠然見南山

秋氣初澄歇衆芳山容洗黛菊舒黃疎籬向暖開  
成陣短袖當風擷滿囊出岫無心供俛仰落英有  
味足徜徉須知寄傲高人意壁立千尋可拒霜

題沈起東觀杏圖小照

倚雲紅杏繫人思有客閒行坐詠詩不是長安無  
伴侶獨遊心事少人知

二

匹馬雙童興不孤紅霞萬樹自踟躕他年孫子瓊  
林罷大父堂前憶此圖

三



卷十六  
遊倦紅塵到嶺西重裝舊照索新題丹青欲浣人  
如昨曾識桃源路未迷

雲間黃子石牧畱荒署一載茲因試事告歸  
畱詩志別依韻酬之

臨岐底事重踟躕萬壑朝宗待遠趨共信處囊終  
脫穎莫嗟伏櫪自傷驚銀蟾春滿從來少紅杏秋  
濃自古無健翮摩空君蚤具因風借便又何須

二

江南羣彥待追隨獨擷驪珠手自持爭羨主司新  
得士笑稱弟子舊爲師三都作賦推平子百粵題  
詩擬退之蕭署從今添韻事他年人說董生帷

三

伏波山畔亂雲飛江號相思却送歸無恙片帆應  
到早有書雙鯉莫教稀歌驪未聽心先遠彈鋏真  
慚客久飢百尺高梧遲鳳集休驚明月悵無依

四

喬松百里翠成林水落瀟湘半尺深桂棹夷猶尋  
往蹟錦囊珍重貯清音滕王閣畔風催宴寇相祠  
前雨是霖嶺外孤吟誰屬和寂寥空繫故園心

爲廣東臨高令樊君題照樊時辭職告歸  
解組蕭然得故吾十年海外宦情孤相思江上相  
逢處坐展瀟湘濯足圖



千秋儋耳有心知數卷蘇公海外詩樊君哀集蘇公海外詩刻  
之一棹湘流清見底冰心交映坐多時

登劉仙巖

閱武南郊外禮畢讌射廳何來遙翠色撲人眉睫  
青云是劉仙巖有仙山則靈驅車一過之幅幅展  
畫屏縈紆陟危磴窈窕開重局道人雙了髻白髭  
飄數莖迎導仙人窩丹竈畱餘馨其左擘峭壁其  
陽構層亭其險可梯霞其高可摘星自謂登絕頂  
呼吸通帝廷豈知半山耳仰望猶冥冥萬仞入雲  
際目逮足未經南眺陽朔山紛作幢戟形烟嵐千

百態吐納窗一櫺憩茲清涼境始覺世味腥謝屐  
朽其齒羊碑沉其銘俛仰已陳迹誰歟保長齡芝  
朮倘可採吾欲窺黃庭

訾家洲

城東南隅雲水濶隔岸亂山堆一撮浮梁如虹轄  
灘水順流而下悍難遏水中橫枕訾家洲劈劃江  
波作兩流柳記尚傳竹木盛裴亭雖往烟霞畱官  
船估舶去不顧唯許僧漁來問渡名勝空藏城市  
間叢祠鐘鼓斜陽暮我來選幽非好奇欲令古事  
今人知賓僚一葉頻載酒莫忘洲邊風月時

壬辰夏日湯西崖銀臺奉使來臨東粵余適



被

命往東會鞠流民追隨浹旬值先生體偶不適思飯

故鄉之冬春陳粟余行笥中僅餘數升輒以相餉余事竣將西行先生出乞米二絕句見

示率和原韻四首

五月蠻花照眼紅炎風瘴雨急流中

時余泊舟江上颶風駭浪

無日無之

新詩讀罷涼生袖冰雪胸襟只有公

二

不貪珍錯前方丈只愛香杭日數匙我亦清臞同調客鄉音鄉味別多時

三

嶺嶠長青海日紅霜稜凜凜一堂中使臣乞米真佳話半幅烏絲繼魯公

四

清風真已高千仞靈藥何妨索數匙形迹莫嫌同薏苡致身正在愛身時

時先生居三水使館局鑰嚴密禁絕供應雖抱恙需

人獲不肯購之省中故未句及之

昨既步原韻奉酬詞不盡意再賦五絕代柬白面書生鬢已霜一身萬里鎮遐荒使旌正悵東西隔却喜因公到一堂

二

使院清嚴局棘同冰心一片答



宸衷諫垣詞館聲名舊此日銀臺望更崇

三

桂林七日下午牂牁繫纜江頭匝月多無數官船憂

駭浪何如釣艇自披簑

時粵東文武大吏以公事畢集三水官船不下數百

余亦停舟於此江水消長日日變遷故云

四

澹泊心情老更長衙齋只愛菜根香冬春自飽迂儒腹也入先生錦繡腸

五

我便西還君尚畱客中送客莫添愁炎方暑月宜珍重猶喜歸程及早秋

題申含吉吾山祀雪圖

三冬農慶已多時預卜明年有所思賢宰先憂心較遠要祈盈尺慰窮黎

二

祈禱衝寒向碧岑衣冠不避曉風侵圖傳祀雪真佳話喜雨還輸隔歲心

三

從來下考爲心勞直道長畱足自豪試望吾山千仞峻令名應共此山高

四

去官滯跡混樵漁父老常依問起居更比甘棠遺



愛久吾山之下有吾廬

定粵寺

琳宮高樹桂山隈定粵當年有渡杯邊微太平今  
已久林巒佳勝此紛來禪門意味餘花雨藩帥勲  
名問劫灰十笏地深塵不染菩提非樹鏡非臺

龍隱洞觀磨崖黨人碑

看山如觀畫遊山如讀史桂州巖穴奇石刻窮秘  
詭豈惟考歲月直可補載紀龍隱一拳石聳倚江  
之沚筇屐久已荒虛竇滴古水宋人題識徧蘚花  
蝕成瘡中有元祐碑所謂黨人是低徊駐遊驂循  
環讀終始起自溫與潞訖王化臣止三百有九人

一一皆君子宋史或未詳茲焉炳名氏磨崖故不  
朽光燄射灘水諸公千載靈呵護洞門裏遂使小  
邱壑重與嵩岱比流連不能去落日促旋軌

重修湘山寺告成

聖人久道化遠覃嵩呼萬歲華祝三湘山撮土出壽  
佛亦弘願力隨朝參小臣巡粵造其地金碧嵯峨  
見遺寺蓮座恭瞻法相奇苔龕肅仰真身闕佛本  
唐朝產楚郴渡人航筏滿珠林琳宮翼翼山容峻  
歷宋元明畱至今巖壑長新祠宇舊規模不稱山  
川秀繪圖入告始集工築堂如雁峰如鷺壽世慈  
廕



御筆書鑿石有光字丈餘

行宮與寺並巍煥好就三乘誦九如此日齋心百吏  
集拜稽之後齊合十紅雲塞路天散花沾到紳裙  
翠嵐濕

癸巳元旦

一夜寒風歲首晴炎荒不信紫貂輕

御牀欲捧瞻

宸極壽域宏開望

帝京臘入新年春較晚雲歸遠岫日初明放衙晝靜  
無公事燕寢凝香萬慮清

二

滿城爆竹慶昇平坐鎮多慚政未成僻地喜無投  
刺客閉門閒有讀書情作人異數催分校課士文  
章與細評

聖壽推恩丹詔近一星南極萬方明

晚晴查太史奉使羊城東西相隔良晤無由  
忽聞枉過喜不自勝晤對之餘出詩八章見  
贈鄭重殷勤讀之不忍釋手余案牘塵埋筆  
硯久廢而情不能已輒依原韻奉和忘其醜  
拙時端午後一日也

庭畔榴花映佛桑紅蕉幾束倚階長一番梅熟千  
番雨東下灘江北下湘令節無詩空命酒懷人有



夢擬寒裳晚來津吏傳芳訊喜極翻疑到遠荒

二

同是丹臺鍊骨仙蘭香下嫁已經年癡頑只合趨  
塵老狡獪何曾對客宣岫日雲遮旋作雨嶺南西  
路別爲天

聖朝德盛鸞凰集臣子何心却學鸛

來詩有暫教鸞鳳作鷹鸛之句

故云

三

秋月高懸物望孚得人報

國是真儒共推藻鑑同冰玉尚有星軺問袴襦鴻雁  
不來民似雁珍珠已盡米如珠泛舟移粟尋常事

慚愧先生問鬢鬚

先生典試粵東得士最盛時粵東米價翔貴飢民肆掠市廛晝

閉先生毅然爲上官痛切言之余方遣官購米楚南募商販運東行先生自府江來見米船蔽江而下爲之狂喜枉詩有不爲吟詩爲憂國年來白盡幾莖鬚之句非余所敢當也

四

風光正值浴蘭時吏退庭空讀楚詞舊雨却逢今  
雨至詩情肯爲宦情移府江山水收吟卷桂管烟  
霞集硯池一條塵襟驅案牘待公乘興共搜奇

五

東西兩粵片帆通千尺飛湍萬點峰僻地難邀青  
雀舫浮槎直上白雲封麤官已作轅中駟仙侶真  
如嶺上松卮酒荒寒情話永隔江古寺乍聞鐘



六

荒署蕭然一榻懸  
破除岑寂得高賢  
三江雨送三  
春景五嶺雲低五月天  
蕪穢開時萌故態  
珠璣散處讀新篇  
借公搖嶽凌滄手  
一掃蠻烟萬里宣

七

性冷何妨地是炎  
虛堂竹影鎮垂簾  
歌樓愛聽三  
聲曼鼓角空勞五夜嚴  
硯壓行裝君已富  
杯傾官釀我何廉  
相看自笑成形穢  
猶有紅牙插架籤

八

井底蛙聲也應雷  
不禁折柳別情催  
採蓮舟過君  
山去解珮人從鄂渚回  
南海羅英真獨盛  
東人慕

化望重來臨岐欲語知何限  
一片冰心絕點埃

喜雨和呂子丹麓韻

閔雨齋居慮百端  
歡聲一片雨隨鞍  
共看雲脚低  
無際喜及苗頭旱未乾

二

鄰封聞說米如珠  
市粟深藏待價沽  
一自連朝霑  
足後衝泥負米不教扶

三

猛易寬難孰較賢

皇仁默感早安全  
莫言萬里流膏遠  
荒服今同尺五天



四

常苦灘江宿霧稠今朝只怕晚烟收窗間嵐翠侵  
書帙竹外荷風潤帶鉤

五

山雨經旬畏怒濤晴明淡月望恩膏祈晴禱雨尋  
常事五嶺神祇也告勞

六

千疊飛雲遮落日數聲畫角殷輕雷趁墟歸洞人

人樂慚愧貪天謝不才

前五月望前苦雨不止余禱晴輒應茲閏五月復苦

旱余虔禱又得雨丹麓作詩六章以美之貪天功以爲已力余滋愧矣

雁黃和尚來遊西粵出舍姪允昇侍御贈行

一律見示卽用韻奉贈

火宅晨涼滿界香乍聞紺馬度朝陽閭浮徧歷寧  
辭遠梵住隨緣不待裝一片閒雲開覺路三明妙  
諦破塵忙莫言瘴海迷人處已飽醍醐鬢未蒼

二

案牘叢中解妙香不將妄念負

當陽旌麾繞座寧成障詩卷懸瓢也累裝遊歷靈山

名自重馳騑慧駕錫何忙

時雁公將之羅浮故云

試看皎月

空無外照盡峰頭萬點蒼

粵西舊無育嬰堂創建告成有作

聖治重仁育保民如保赤矧茲真赤子能不加愛惜



粵土多遺嬰戶口不增籍匪厥父母忍其故在貧  
濟有力能活之無乃長吏責七星巖之陽夷曠地  
多隙捐貲構廣厦可貯兒數百保姆有衣糧醫藥  
有儲積襁褓紛縱橫背負兼臂掖始或啼呱呱繼  
乃笑啞啞一堂皆陽春生氣盎牀席豫知廿年後  
繁庶倍往昔創舉不避勤垂遠有成格作詩告來  
者無視爲陳迹

城中創立義學十七處延師教授余偶晨出  
聞誦讀之聲盈耳喜而有作

始余入粵城寂不聞書聲今余巡粵城絃誦聲已  
盈彷彿身遊鄒魯間不似灘江與桂山問云一十

七處之義塾童冠濟濟講讀無時閒文翁化蜀蜀  
士盛常袞教閩閩俗正人材不擇地而生吾願爾  
粵家家師孔孟

### 重修華掌書院

自古聲教訖桂林隔中原漸摩到李唐二曹始高  
騫前明蔣呂輩登朝領鷺鷥

國初兵燹餘儒雅蕩不存賢哉郝中山闢此書塾門  
義取巨靈擘導引通河源斷續終未振茂草翳頽  
垣今當

右文世文風播乾坤而粵豈無志所賴爲囊軒因者  
易於創遑惜費浩繁學舍廣其楹講堂固其藩購



書充誦習給餼供饗餐紙田與筆稼籽耨期不謬  
譬諸農有秋所獲碩以蕃誰謂珪璋才不足達  
至尊多士莫余負座右銘斯言

愛日堂詩卷十七

宜人集二

乙未丙申  
丁酉

桂林新建萬年倉告成

并序

積貯備荒古今善政西粵土瘠舍米穀外  
無他物產小民仰事俯育以及吉凶之用  
皆于是乎賴冀其耕九餘三也難矣官斯  
土者不爲之計倘歲儉其何以支余才疎  
政拙每思積貯爲第一急務而地苦潮濕  
官無倉廩乃擇城北疊彩巖下高阜創建  
巨倉二百餘間可儲粟二十餘萬石每倉  
五間四面繚以崇墉下以巨木承板去地



五六尺永無上漏下濕之虞既告成工余  
往觀焉爽塏堅固可歷久遠粵民僉云此  
萬年不敝之倉遂名曰萬年倉云

地瘠民貧保赤難綢繆足食寸心殫常籌國事如  
家事但使民安勝已安高廩巍峩千載利香杭滿  
積萬人歡但祈大有年年報長鎖崇墉傍翠巒

閱倉畢至風洞小憩清涼無暑與友手談令  
童子清歌竟日而歸

峰頭石室倚江寒俯瞰平沙氣象寬洞口風來驅  
毒瘴泉聲咽處逼危灘欲眠石磴長忘暑更上重  
樓得大觀一局圍棋相對坐豈知塵世有仙壇

二

公餘載酒暫爲歡却騎支筇上曲盤玉管音飛青  
嶂外珠喉響徹碧雲端千山排列分螺黛萬堞廻  
環作石欄眼界空明神倍爽今朝真不愧驂鸞

疊彩巖下有大寺曰定粵久而將圯寺東禪  
室昨者又不戒於火郡佐黃君請於余謀爲  
修建未數月而梵宇金容勝業重光瞻禮之  
下慨然有作

祇園舊倚桂山隈定粵名傳想劫灰豈是佛心真  
不住從教蘭若亦終頽福田長得慈燈照寶座重  
新滿月開塵縛何年能解脫名香在手更徘徊



夢日堂詩卷一  
送呂子丹麓歸江南

移帳遙爲嶺外行  
匠心雕朽荷深情  
難尋石髓如飴美  
剩有巒光放眼明  
君本雄辰偏晚達  
運回後甲自成名  
相思江上花朝別  
得意秋風聽雁聲

與子皆壬辰生

全州山中產蘭極多  
粵人委之空谷不知愛  
玩也卓叅戎以數十本見  
貽詩以謝之

畹花畱得楚南多  
白雪幽蘭入雅歌  
百本勞將松徑覓  
幾回移向柳營過  
國香滿院分裘帶  
山署迴春壓澗阿  
幸以同心傳嗅味  
折芳爭奈憶君何

二姊葉忠節公夫人以大甥來青太守迎養

羊城畱三年矣憶念家園扁舟歸去又念老年姊弟久不相見  
紆道桂林歡聚浹旬時洲若二甥侍奉言旋於其行也口占二章以誌勗勉

遺書讀罷淚沆瀾  
况是西平繼述難  
欲紹家聲當樹立  
莫嫌年少未爲官  
慈顏白髮欣猶健  
祿養黃堂意尚酸  
越石慶孫應不忝  
荆南老子笑相看

二

紆棹三江到桂林  
天涯姊弟話言深  
三年却鮓裝無賄  
廿載丸熊匣有箴  
執轡迎來賢子意  
扁舟歸去老年心  
瀟湘直下蒲帆穩  
奉母清光照碧潯



葉忠節公有一書記姓楊工詩博學年逾七旬矣隨洲若甥偕來與談往事慨然有贈

五十年來事未忘巋然一老是靈光忠魂天上無書笥遺稿人間有壁藏不壓牛腰胷自富久馴鶴性壽能長江湖遠涉重相見酒惡難逢舊醉狂

題顧子印譜

周籀秦斯久不磨錐刀突過鼠鬚多昌黎未見今名手只辨岐陽石鼓歌

二

鐵筆成花指上開刻苔鏤楮總仙才虎頭雖有通神技此事輸君一絕來

新建阜成書院

粵俗頗樸古臺榭無遊觀棲霞奇絕處蔓草荒烟寒何不設戶牖貯此名勝看廼相背向宜廼措竹石安藩籬借白雲橋梁就清湍有堂曰永譽有亭曰擬蘭有圃可習射有舫可垂竿有廡可觴詠有室可眠餐羅列几案物無一非峰巒僚佐此講肄士民此盤桓幸際

聖

人世浩浩天宇寬俗阜而化成上下同一歡招提况接武雨花撲闌干數椽絕壁下萬古青巒岼

內兄宋澄溪觀察別五年矣去冬以令子亮虞太守迎養來端州夏四月移舟訪余桂林



握手極歡畱二旬別去憶舊言懷率賦四律  
驚湍逆溯到仙舟把臂談心散客愁桂海烟霞慙  
管領灘江風雨爲勾畱娛賓地僻無珍饌望遠心  
空有竹樓四十年來情話永青山何處不凝眸

二

聖朝恩重許投簪

澄溪補神木道引見上以邊塞苦寒非高年所宜特予致仕殊恩

也庭訓猶餘報國心寧樂循陔甘旨便喜聞善政  
酒杯深蒼松骨格千尋嶺海鶴風標百鍊金襪綫  
何曾能補綴快聆玉屑一披襟

三

年少肩隨氣若蘭於今齒髮笑相看功名愧我難

言退事業輸君未可刊跋涉不煩新憲節登臨重  
整舊詩壇林泉便是神仙窟方寸丹成豈煉丹

四

兩粵東西一水通扁舟直破萬山叢雲蒸洞壑遊  
多阻氣斂秋冬勝可窮遲我摩崖開片石待公題  
句鎮穹窿重遊莫負臨期約江上相思對晚風  
九日偕署齋親友至七星巖登高小飲阜成  
書院載侯姪賦紀遊三十韻見示卽用其韻

和之

郊原秋穫後萬壑白雲連令節逢晴日褰帷慶有  
年風高驅瘴氣露湛洗涼天江繞嚴城外峰迴古



寺邊停驂環野老選勝集羣賢玉立千尋壁珠濺  
百曲泉巖花霜未壓澗草晚逾妍性僻從吾好才  
疎稱地偏桃源尋洞口桂棹借漁船欲卧仙人石  
還登天子田山頭有田名天子田娛賓殊款款懷古孰便便  
授簡皆能賦忘機更論禪親知來故里羈絆笑華  
顛最愛秋容澹難期晚節全棊枰消晝永絲竹奏  
風前縱目曾休隘登高力尚堅村中多積廩郭外  
喜添廛客倚茱觴醉花看木末鮮落霞催返轡新  
月皎初弦香飯炊新稻柴門起暮烟旌旗屏擁衛  
童叟聽爭先民氣因時樂

君恩此地專公餘農亦暇人樸意生憐綏輯誠何有

熙恬亦偶然高吟驚座就麗句列星編义手溫輪  
矣嘔心李愧焉酒豪空北海詩律繼西川老我成  
蕪穢閒情未棄捐和章蠻女唱韻事異鄉傳勅吏  
摩崖石畱鐫九日篇

重修斗河天平石斗門告成

興安河渠高下數百尺湘源一瀉無餘澤詎惟舟  
楫阻商旅直使耕耘旱阡陌唐時李渤垂大勞逆  
流橫截天平石築爲斗門三十六導直爲曲延水  
脉黃河之牖體製同灌溉有資艘舶通年深石圯  
水跋扈誰與蓄洩波流中修廢舉墜迺余責慎選  
黃丞董厥工庀材皆以捐橐辦雇役無遣疲民充



工成櫂舟閱新料沿岍歡聲動童叟羣石齒齒白  
似牆一水盈盈綠於酒吁嗟此河楚粵之咽喉所  
利不止貽一州南接灘江北湘水中隔此河居上  
頭不以阨門爲啟閉譬人血脉奚周流從此繕修  
望來哲人力以補天地缺

婁東王冰菴太守別二十餘年矣遠道訪余

桂林枉詩百韻并十律見贈率賦奉酬

平津閣裏記當年歷數知交意惘然

冰菴于丙辰出先外父宋

文恪公之門憶爾時知交親舊大半皆凋謝矣白髮勞人餘我在青山高

卧讓公先

冰菴拂衣林下已二十二年

著書歲月渾忘却往事

烟雲又屢遷今日相逢灘水上遊踪宦跡總前緣

二

扁舟觸暑上瀟湘冰雪盈胷意自涼造物吐奇開  
粵嶺詩人覓句到窮荒松姿鶴性無官好桂棹芒  
鞋托興長洞口仙人相望久貯將靈藥待公嘗

三

風流太守繼微之五馬歸來一卷詩二十餘年槃  
澗樂八千里外剡溪思麤官筆硯塵教滌蠻地盤  
餐俗未移百韻見投驚不夜光芒直上動蛟螭

四

已甘終老卧蒿萊何意炎州擁節來壁立寧須誇  
險怪江清亦自足徘徊笳聲靜後聞歌板塵牘閒



時命酒杯只愧空囊脂秣缺淹畱歸棹莫相催

六月二日暑甚邀同婁東王冰菴太守苕溪  
沈厚餘編修雲間黃石牧苕溪丁靜山諸子  
避暑桂山之風洞小飲竟日沈編修用余題  
壁舊韻賦二詩見示疊韻奉答

塵容骨帶玉霄寒舊侶同遊石室寬不是粵山多  
勝境肯浮吳艇上危灘冰巖雪竇風潛入蘚跡莓  
痕字細觀八韻高吟崖谷響仙壇今日是詩壇

二

炎方逃暑暫爲歡埽石穿藤路幾盤別有烟霞清  
眼界都忘身世入雲端酒傾越釀還停璣客望江

舲更倚闌四座鄉音喧語笑凌虛便擬共乘鸞

丁子靜山復和壁間拙韻枉詩見示倒用前  
韻奉酬

嵌空巖洞舊棲鸞小閣臨江布曲欄石乳琤琮都  
有韻夏雲變幻信無端閒情似鶴歸松嶺好語如  
珠落玉盤江左名流何幸集汲泉烹茗亦成歡

二

憑虛一笑啟吟壇天際真人拭目觀健筆力排千  
丈嶽清思泉涌百重灘風標舊入青霞迥雲翮新  
搏碧漢寬異日致身休愛熱玉堂長似洞天寒

七月七日秋暑頗甚偕署中親友至風洞納



涼竟日再和前韻

暑甚難畱一洞寒秋陽皎皎碧天寬歌聲乍發雲  
生石碁局全輸水下灘禮數豈因吾輩設疎狂任  
作野人觀定知天上新涼好那有炎風到紫壇

二

靈辰好語足爲歡瓜果攜來乞巧盤高處銀河應  
有路飛來烏鵲笑無端莫愁歸路斜暉照再洗清  
尊坐夜闌白髮餘生安老拙天孫不假問青鸞

射圃之旁有小土阜蕪穢不可登因誅茅闢  
徑築竹樓于阜上不日而成

官寮西去射堂東土阜橫斜一望空因地爲樓供

眺望憑高作檻自玲瓏數株老樹陰常滿四面青  
山看不窮莫笑庾公殊草草雕欄畫棟盡虛中

二

伐木深山費斧斨代供杞梓有篔簹剖筒恰稱鴛  
鴦瓦解籜旋成玳瑁梁幾曲欄杆圓箇箇滿樓風  
月色蒼蒼湘簾不卷鋪湘簟竹几蕭疎傍竹牀

三

畫角吹殘散曉烟公餘燕坐擬遊仙乍看雲起山  
容暗又見霞飛翠黛鮮此地陰晴多變幻終朝寒  
暑遞推遷瘴風已避仁風遠待月披襟夜未眠

四



獨秀峰南俯一城四圍環壁列羣英市廛漸喜炊  
烟廣書舍遙聞誦讀聲雨露恩波今浹洽山川氣  
象亦澄清舉頭化日瞻天近每上層樓望

帝京

王冰菴太守將歸賦詩六章畱別依韻酬答  
四十年來事已非華顛轉覺宦情微千重烟水多  
歸棹五度秋風未拂衣文酒追歡朋舊少遐方惜  
別素書稀相思江上離亭樹長挂斜陽一寸暉

二

畱滯高軒待暑清商飈颯颯動離情人從客路殊  
難別心在荒郵每易驚巖竇喜畱詩卷重空囊羞

贈布帆輕銀蟾何事秋偏皎雙照吾曹白髮明

三

鼓角聲中夢已涼粉榆便是白雲鄉詩名一代齊  
摩詰廬舍三間近子光最羨東籬人送酒可容洛  
社我提觴瑤華鄭重因畱別異日相逢話更長

四

林下閒身自古難塵容相對愧相看自憐小草寧  
辭熱爭似喬松久耐寒倚倦輓轡愁汲短棲殘沙  
磧慕巢安物隨所染知何定碌碌浮沉墨子歎

五

問訊鴿原生事疎遺詩在篋痛相如騷人已返清



虛府

謂令兄弘道先生

廉吏惟傳薄笨車才聚一門君不

忝光凝萬丈語非虛婁江老宿知都健來往耆英

接素裾

聞唐東江先生  
嬰鑠如少年

六

芙蓉高豔照深卮冷淡秋蘭又被涯卽景畱題增  
好句因風贈遠慰相思桃源他日尋前渡谷口今  
朝訂後期寄語君家黃閣老午橋花竹待多時

粵花十六首

春蘭黃山谷云一幹一花而香有餘者蘭  
一幹五六花而香不足者蕙花譜稱杭蘭  
爲第一余性愛之故園手種甚多西粵興

安全州山中所產葉更柔潤而莖長花大  
勝于杭蘭土人棄之空谷不知珍賞余因  
公事至湘山因移數十本植小庭中芬芳  
襲人花之幸亦余之幸也

春蘭誇越產手植憶南陔

草堂名

路入湘山好香從

幽谷來停軒頻採佩登盞擬親栽却笑無人賞年  
年空自開

紅繡球樹甚小花如白繡球色大紅花譜

號閩山丹蓋閩粵所產相類

小樹樛如蓋團團簇絳球丹心移白萼赤火奪紅  
榴日烈熏逾燦霞舒爛未收傳聞來海外移植滿



炎州

映山紅枝幹尺許花如杜鵑春初卽開山  
澗中無處無之

低亞纔盈尺新紅類杜鵑自開叢棘畔能占百花  
先湘佩容爲侶緋桃待鬪妍移來軒檻外灑濯倍  
爭鮮

四季桂

最愛天香久經冬又歷春綵幡添桂子金粟薦元  
辰秋月常飄馥韶光別鬪新炎方冰雪少不共歲  
寒論

紅蘭一莖數花無香而嬌紅可愛初夏方

開葉如蘭而色嫩乃草花中之異品也

素淡稱君子紅粧學美人翩躚多逸態彷彿認前  
身葉嫩經春換花容入夏新海棠香有憾作婢許  
相親

夜來香柔藤引蔓花四出淡黃一簇低垂  
至夜發香如桂花佛手旖旎近人

引蔓柔無骨叢花一簇金納涼疑桂馥當暑奪蘭  
心浴罷香初發更殘趣轉深紗帷人未寢幾朶傍  
瑤簪

夜合花樹甚小花白而圓夜合如水晶毬  
香味與脂粉相類



玉琢枝頭潔珠圓葉底藏媚人香自郁斂萼露初  
灑靜夜堪同夢將離枉斷腸嘉名憐惜甚移植近  
蘭房

洋茉莉與平常茉莉相同但千葉耳

賈胡傳異種重葉小荷花

羣芳譜云木本重葉者最貴名寶珠小荷花

玉蕊千層潔冰肌一夜誇晚粧疑佩麝燕寢伴堆

鴉飾鬟來西域還歸阿母家

佛書名髮華謂堪以飾髮也

素馨

綠雲多嫵媚碎玉綴纖纖採擷難盈掬嬌柔絕可

憐浮香宜斗帳蕃植在花田

羊城有花田乃賣花處也

抹麗休

相妬前生別有緣

舊傳劉王有侍女素馨冢上生此花出龜山志

夾竹桃

葉借凌寒勁花開入夏嬌嫣紅長婀娜淺碧自飄

蕭色豔風難爍耐虛態倍饒仙源分別派那復畏

炎歊

佛桑

本名扶桑

名因淨土貴種自日邊來火齊攢生燄珊瑚綴作

堆鶴林堪設供蠶女莫相猜自愛西方好江南未

許栽

美人蕉

紅蕉號美人翠黛點猩唇嫩綠通身軟凝朱一點

春移人爭賞玩易植不知珍重讀冬郎賦

韓偓有紅蕉賦



溫柔倍可親

樹蘭樹高四五尺花如金粟其香馥郁羣芳譜所載伊蘭又名賽蘭卽此楊升菴伊蘭賦序云西域有伊蘭以爲佛供卽漢書所謂伊蒲之供也

翠鬟金粟滿馥郁趁南薰小樹重簾護清香十步聞物沾移本性歲久有餘芬

東粵製香製茶皆用此花

舊說來

西域伊蒲種不羣

荷包花色大紅最豔花如荷包牡丹數穗並垂

炎節方燠赫丹葩發幾株佩囊懸韎鞬瓔珞貫珊

瑚葉似蒲葵展花如繡帶敷易生人不貴空自照庭隅

秋蘭昔人云春蘭夏芷秋蕙冬蓀然離騷初秋蘭以爲佩張衡賦秋蘭被涯則一莖數花當秋而發者亦蘭也閩蘭至秋深不復開花獨始興山中有蘭一種葉潤絕似閩蘭九秋抽芽一莖十餘花莖柔花瘦嫵媚可人花淡綠者香甚紫者稍遜粵人委棄不知貴余亟加賞愛移栽盆盎擬載以歸當落木之蕭辰獨吐香于棐几眞名花也



羣卉深秋靜幽姿吐妙香枝柔常挹露花瘦爲凌  
霜丹桂先分袂黃英共一堂他時同石載江左亦  
流芳

木芙蓉花大而葉瓣圓整曉白午微紅晚  
深紅其色三變老幹高枝挺然尋丈不似  
江南水畔叢生也

秋容偏絕豔十丈錦幃張幹老抽牆外枝柔拂檻  
旁素姿驚曉沐紅暈醉殘粧却笑吳江冷離披號  
拒霜

詠蛺蝶花五絕句

遊戲花叢憶夙因借花重現舊時身飛來飛去原

無定花謝花開未是真

二

粉翅翩跹傍砌陰爲花不負戀花心從教采擷何  
多幸飛上粧臺碧玉簪

三

夢中栩栩欲何之託跡芳叢慰所思畱取嘉名登  
卉譜魂歸不怕晚風吹

四

滕王畫粉未銷磨散入花間伴淺莎一自沾泥飛  
不得三生仍化綠裙羅

五



夢日堂言卷十一  
詩人休詆玉腰奴奴爲多情化錦蕪若解憐奴奴  
不怨莫將花賊舊名呼

內兄宋澄溪觀察從端州將返吳門取道桂  
林貽詩四首畱別依韻奉酬

老去親知鮮故人行旌却喜過江濱升沈休論從  
前事矍鑠相看現在身戀棧駑駘憐受繼翔雲鸞  
鶴羨長伸肩隨貌已頽然矣小草何勞倚大椿

二

吾廬足愛卽瀛洲難賦歸與久滯畱吳苑讓公開  
獨樂瘴烟迷我愧先憂投詩欲奪應徐座送別爭  
誇李郭舟白髮他鄉分手處相思江上水停流

三

片片飛雲斷復連嶺西南路早秋天平原痛飲虛  
東道洛社遄歸比昔賢人在湘江紅樹裏仙來漢  
渚白雲顛遂初倘慰平生願扶杖相隨醉客筵

四

世澤綿綿篤本支相門隻手獨維持

令弟堅齋少司馬蒞洲閣

學相繼謝世外舅文恪門庭藉先生一人維持也

恩

綸疊錫揚忠孝宗祐重新賴典司

外舅祖蒙恩載入祀典先生

此歸專爲建祠之事

五馬庭前三事貴八龍牀下九霄期東

山卧聽遷鶯早雅量難忘折屐私

澄溪明年七十矣自端州來會逢誕日率賦



爲壽

晚節寒香自古難况兼老健與身安林泉卧穩心  
猶壯湖海遊多興未闌已近十洲遲跨鶴謁來二  
粵比驂鸞明年七袞今朝是桂嶺秋光放眼看

二

不愛閒居愛遠遊山川佳處卽丹邱醉餘仙醞恒  
千日載得雲娥共一舟隨地知交爭贊雁縱情登  
陟未扶鳩七星巖洞真奇絕爲借先生二鳥畱

三

意氣如虹亘古今高懷肯受俗塵侵白雲不改青  
山色皓首惟餘赤子心天與精神寧煉藥人期霖

雨漫投簪黃堂懶就循陔養却望吳山憶舊林

四

拙宦疎慵慕隱淪回頭烟水每逡巡逢君雙鑠還  
看劍愧我衰遲未乞身江上紅芙能醉客籬邊黃  
菊解畱人當筵介壽尊無算莫唱驪歌又愴神




--	--	--	--	--	--	--











T5466/7910

7



CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

OCT 4 1960

雙日堂詩卷十八

肆觀集

元龍請入觀荷葉

命旨於丁酉十二月自桂林啓行戊戌三月抵京

聖駕將幸熱河之避暑山莊

恩命隨行仍侍直南書房凡七閱月所得之詩以

觀集

除文前三日自桂林啓行登舟十國有之

所隨行恩諭不其然有所

芝操術術無奇技漫吟詩如魏徵京下詩六首

前讀詩賦謂此有餘無缺矣



愛日堂詩卷十八

肆觀集

戊戌

元龍請入觀荷蒙

俞旨於丁酉十二月自桂林啓行戊戌三月抵京時  
聖駕將幸熱河之避暑山莊

恩命隨行仍侍直南書房凡七閱月所得之詩曰肆

觀集

除夕前三日自桂林啓行登舟士民弁卒夾  
岸隨行慰諭不去慨然有作

漫操儒術撫蠻荒歲稔時和愧德涼子弟只今知  
誦讀村墟漸見有倉箱孤高絕俗吾何敢好惡同

哈佛大學漢和  
圖書館珍藏印



民意未忘此去青山應念我七年贏得鬢如霜

二

人說風光異昔年穀盈高廩市增塵  
斗河已復前賢蹟運道爭來賈客船  
瘠土不憂逢水旱炎方直是好山川  
暫離休戀終須去石壁畱題羃紫烟

三

玉皇香案昔曾依嶺外烟雲隔紫微  
欲乞九天新雨露思瞻雙闕舊光輝  
真虛厚祿容偏瘠相勗勤耕土可肥  
多謝江頭諸父老殷勤相問幾時歸

四

灘江重上木蘭舟載得殘書壓兩頭  
自愛蒼黎環

白髮漫勞將吏擁青油時當休息期  
無擾律轉陽和願有秋豈畏瘴烟思  
遠去清泉怪石尚勾畱

除夕過斗河泊舟興安城外

六年嶺外送殘冬此去朝

天歲又逢舟載輕裝浮斗水聲喧爆  
竹度城墉辛盤莫笑行廚儉官醢無  
煩屬吏供坐待宵分寒轉甚預占豐  
稔慰三農

元旦張幔亭望

闕行九叩禮畢卽解纜直下湘江

野亭拜舞俯江湄便下湘流舟自移  
岸柳含芽遲破臘嶺梅開綻已多時  
東來紫氣雲霄迥西被恩



夢日堂詩卷十八  
二  
膏雨露滋慚愧遠臣心戀

闕蹒跚只恐玷朝儀

之  
柳子靈和送余北上將從江右歸吳詩以送

宦遊嶺外滯蠻烟誰道翩翩客是仙驚見芙蓉初  
日上愛看楊柳曉風前酒杯謝却從吾好棋局敲  
來讓爾先三載相依慙倚玉都忘蓬雪已盈顛

二

風流張緒說當年天與多情是宿緣玉雪爲姿誰  
得染芝蘭竟體自生妍麗詞譜就傳新調妙楷書  
成疊錦牋送我朝

天歸去也湘江倚棹一潸然

三

草色波光別思牽渭城徐唱似珠穿憐余赴

闕寒猶峭念爾歸吳花正然風引布帆千里近樓開

燈蕊一宵圓朝來共倚菱花照不改丰姿記往年

湘陰舟次却寄宋穉佳方伯

相門才子壓羣英南楚雄藩播令名齋閣蕭閒知  
政肅圖書香潔共心清客經樂土烟雲淨春入豐  
年氣象明幸托隣封來嶺表布帆安穩洞庭行

二

入座清芬賦裏生江南春色故鄉情移香入艇添



吟友載豔浮江畏笛聲

稚老以江南盆  
植紅梅見贈

粵嶺嵯峨

常在夢楚天浩渺不知程重來應是梅黃候再向  
平堤聽晚鶯

過邯鄲呂祖祠

度人此地有仙庭古道巍祠淥水渟一枕夢餘仍  
入夢千回醒後幾曾醒漫思換骨求丹藥坐待歌  
筵落曉星歎息黃梁將熟候白頭三度駐行旌  
到京假寓暢春園東偏寺中看老僧灌芍藥  
苑東梵宇倍莊嚴琪樹金花拱法筵近砌每聯卿  
相坐閉門一任比邱眠重來勝地思前度未洗塵  
容聽妙詮最羨滿庭紅芍藥老僧獨坐灌新泉

召對恭紀

并序

臣元龍於三月抄到京時值

孝惠章皇后之喪未滿百日

上不御門接見臣僚有

旨命元龍隨往熱河四月二十日

駐蹕石槽行宮召元龍入見

上一見卽云爾年幾何遠去數年亦覺老矣因

問粵西風土及官方民隱甚悉奏對移時退後蒙

賜御膳傳

旨云爾係內裏舊人到熱河時在南書房伺候朕召  
對亦便恩至渥也



行宮深院百花香

名對移時捧

御牀近仰

龍顏真咫尺親承

天語豈尋常霜顛非昔煩

垂念丹悃徒存愧對揚七載遠離重扈從停鑾慰問

意深長

二

瘴雨蠻烟歲月深許隨

輦後屬車音嶺南炎濕人今老塞北清涼暑不侵正

值還方無事日得抒臣子愛

君心金盤玉膳還分

賜飽德難酬淚不禁

扈從熱河荷蒙

恩旨仍入南書房內直伺候恭紀

塞北無炎暑隨鑾有近臣寧知荒徼吏重伴禁林  
人面目難醫俗圖書自可親依稀趨走地不信舊  
時身

二

別苑依山阜聯裾上直廬風清簾影直日永紙窗  
虛著述羣賢集追陪昔夢餘芻蕘無可獻禁近得  
閒居



三

憶昔陪龍馭曾爲塞上行揮鞭朝侍獵帶月夜歸  
營縻祿成衰老趨朝荷

聖情瘴烟迷昧久到此覺神清

四

不苦三春雨真逢五月寒

粵西三春多雨此地五月尚寒

泉甘知

土厚日近自心安難掃干莖白空餘一寸丹

行宮清切地形穢媿麤官

塞外端午示世南姪

塞外仙源五月涼驚心遠吏自炎方綠蒲採得當  
門挂紅藥開遲滿澗香退食垂鞭亭午出僦居塊

坐令辰長相依猶子忘爲客角黍堆盤一舉觴

勵南湖學士以芍藥花及花津果見貽賦謝

紅藥翻從紫塞傳微涼殿閣憶當年薰風尚是清  
和候絕勝葵榴照眼然

二

垂垂盈掬小金鈴入口能教午夢醒聞說叢生遼

水畔綠萸分餉有餘馨

花津果一名草荔枝味頗相似產于遼左移植內苑

三

名花奇果比雙瓊花記前因果問名珍重香甘全  
沁骨蠻烟人老不勝情

老馬



愛騎欵段緩垂鞭况復知途已有年豈是力疲常  
落後似諳人意不爭先騰驤謝却長鳴志躋迅從  
教汗血鮮應笑主人顏太厚白頭戀棧未歸田

熱河紀事十首

千山環紫塞一水護丹邱土沃風猶古農耕戶已  
稠地靈迎

日馭天意待

宸遊隨蹕重過此清涼五月秋

二

聖德參元化仁風洽九隅嶺南消瘴癘塞北闢膏腴  
遠鎮憐臣老陪遊荷

帝俞都忘炎暑困飽食起衰癯

三

趨走知何地恩教侍直廬昔年慙載筆此日喜聯  
裾海燕重窺壘鷦鷯幸託居香風飄翰墨晝永漏  
聲徐

四

行殿無雕績山原有性情高卑因地勢簡樸自心  
清林壑千重護烟雲四面生寰中新樂土萬載駐  
霓旌

五

官自文章舊



恩因顧問新形真成俗吏人識老儒臣高厚難酬  
主衰殘未乞身摩挲雙眼暗開帙每逡巡

六

壯歲曾從獵廻思二十年山巔看射虎溪畔墮飛  
鳶肥草油侵襪深林棘刺韉於今蒙昧豁樵牧擬  
遊仙

七

川原開繡壤塵市護周垣人訝成都會民歸奉

至尊禁鐘千谷應宮樹十年蕃聞說湯池近流泉氣

尚溫

八

大德自長生人間有玉京山花多異馥古樹不知名

南海來朱鳥西池降白鸚日陪仙侶坐何必問蓬

瀛

九

僦舍三間潔移花一院香新泉烹茗啜野菜入羹

嘗室淺風翻帙牆卑月滿牀七年瘴土夢到此暫

心涼

十

猶子叨供奉年年扈蹕來憐從嶺外老恩許禁中  
陪出入人爭羨扶持日幾回一門中外貴相勗鬢  
毛催



召對之日有

旨諭元龍姪侍讀學士陳邦彥云爾伯父原係內廷舊臣到熱河可同入南書房伺候年老之人爾當加意扶持照管恩意周渥故末首志之

五月二十八日中使宣

口勅與南書房內直諸臣云陳元龍係老翰林趁他在此將御製御定及內中所修之書已完未完查明具奏諸臣隨繕寫

諭旨呈

覽未寫老翰林三字

上硃筆添入後又批云此係溫旨豈可不書蓋禁中

呼老翰林最爲隆重臣何人斯膺此

溫旨感愧悚惶恭紀八絕句

御筆親題老翰林遠臣未改近臣心建牙嶺表趨朝

日慙愧清風滿素襟

二

御筆親題老翰林暫歸禁闥晝深沉蠻方已分成疎  
逃何幸朝朝聽

玉音

三

御筆親題老翰林重來秘府觀球琛

聖朝颺頌皆多事丹扆何勞更獻箴

屢奉明旨凡章疏不得飾頌

美之詞

四



御筆親題老翰林衰顏辜負

主恩深虛縻厚祿真成蚌空抱殘編却愧蟬

五

御筆親題老翰林

溫綸降處舉朝欽蒼顏已換千莖髮赤子空餘一寸

心

六

御筆親題老翰林高名直上壁千尋人惟求舊難希

古壯不如人況是今

七

御筆親題老翰林文章荒落玷華簪迴翔中外誠何

補高厚難酬淚不禁

八

御筆親題老翰林睫前霧暗鬢霜侵只應投劾歸田

去歌詠昇平學蚓吟

聞鐘

禁鐘初動掩柴扉徐度雲霄落翠微響徹黃昏閒  
就枕聲傳清曉亟披衣深山夜靜聽宮漏旅舍風  
多動客幃無暑安眠人倦後錯疑古寺夢依稀

恩賜內製樺皮扇恭紀

扇以樺皮爲面折疊柔軟如  
紙綴以芝胎染色花鳥內製

也

木理輕裁似剡藤含風宛轉膩無稜龍皮豪室何



須貴鶴尾仙家未足矜收盡山中雲萬疊舒開塞  
外雪千層尚方製奪天工巧拜賜涼生感不勝

二

老樹霜皮古色勻芝胎染就綴花新碧桃搖曳隨  
風動紫燕依棲欲舞頻名重琉璃輪樸素畫推蟬  
雀遜天真捧歸披拂

皇仁遠障斷蠻烟轉大均

蔣西谷學士以恭承

御製木紙扇二律索和兼贈倣製椶木紙扇二柄依

韻奉酬

刮木成純質已空真分天巧豈人功光如雲母渾

難辨素壓金花韻不同

崔灝詩水晶簾箔雲母扇  
周太祖賜錢煜金花扇

雨露本饒柔膩性烟霞猶在卷舒中世間物理誰  
能格制作還存太古風

二

不須搥搗學溪藤一幅天然得未曾質蘊華滋雲  
彩煥心藏潔白雪光凝軟隨碧玉樞千轉薄襯青  
筠疊幾層展玩欲書愁點污好將什襲避秋蠅

題蔣西谷學士畫水墨花卉冊

不染風姿本出塵波光還借墨光新須知脂粉非  
真色淺淡生香自有真

二



水晶宮裏乍秋涼  
莫歎紅衰綠漸黃  
描取花神塵外意  
長畱清淨侍空王

右荷花

最愛秋容對淡粧  
更教洗却淺深黃  
蕭疎物外天然韻  
數筆空勾足傲霜

二

已將天冶讓春華  
冷豔何須與俗誇  
自向疎籬貞晚節  
縞衣素袂照明霞

右菊花

如簇繁花笑補之  
暗香清影在疎枝  
何須倒暈爭妍拙  
承旨高情白石思

宋楊補之工畫梅所居有大梅樹花極繁臨摹以進

徽宗戲曰村梅其甥湯正仲亦善畫墨梅出新意爲倒暈

二

吳越梅花天下無  
滇茶點破雪香圖  
兩枝寫出江南景  
何日攜筇得共扶

右梅花山茶

欲識此君真趣味  
高風勁節在毫端  
鐵鉤直逼王摩詰  
好與文蘇共歲寒

二

陸地生蓮挺一絲  
新篁根畔託幽姿  
筆尖鉤勒饒餘勁  
想見風前獨立時

右飛白竹鐵線蓮



夢窗詩集卷一  
三  
豔冶輕盈不自持千般顏色繫人思鉛華洗却仙  
魂淨應是瑤臺證道時

二

美好何常自有真天然風韻是前身含毫意趣超  
塵表不寫花容只寫神

右虞美人

染成霜葉晚秋宜好鳥將棲落照時吾谷丹楓千  
萬樹一枝聊寫故園思

二

獨樹空庭鳥不喧此中佳趣已忘言秋林無限蒼  
涼景收入先生淡墨痕

右丹楓一枝上樓十二紅

目厭繁華自種蔬春畦雨後帶烟鋤只看黃白紛  
相間却較看花味有餘

二

菜畦豆圃老農家滿眼花開也自華此是田園有  
真樂一枝寫就壓羣葩

右菜花豆花

熱河遇阮丈御天自山左奉檄而來阮昔以  
善歌供奉今年七十二矣蒙

恩宣入再試其技口占贈之

嶺表趨朝扈玉驂



行宮門外遇何戡白頭供奉承恩舊紫塞風光好細探

二

我擁高牙誠有忝君沾微祿亦何慚揮毫按板同尋夢握手相看老更慙

三

聖壽長開宇宙春一時都是永年人上卿下吏皆黃耆寧必神仙在隱淪

七月二十四日蒙

恩賜

御書詩扇恭紀

不矜鋒鏑氣和平誠正功夫結構成筆力真堪排巘嶢墨光直入動滄瀛展舒字挾雲霞舞披拂風兼象緯清義畫由來關造化喜占

聖壽萬年亨

二

舊句新題托短章故人在意深長拜摯敢忘恩如海矢報空嗟髮似霜

蒙賜御書扇有故人在重攜手之句傳旨云

此扇詩句鄭重不輕賜人今特賜汝因汝乃舊人也捧日逾時多雨露朝天

歸路帶風光玉樞展處

皇仁遠早有陽和及瘴鄉

咏夜光木

塞外深山朽木歲久生光置暗室中照耀如月光入戶亦異物也



夢覺詩卷十一  
朽木深山謝棟梁精華蘊久發幽光何須照乘珠  
無價好代懸藜夜未央映卷漫勞燈借穴窺人恰  
似月穿窗不才暗室逢珍賞莫妬流螢也入囊

咏內製西瓜燈

綠沉薦罷夜新涼月下高懸碧有光甘液已空明  
肺腑清輝猶得耀皮囊蛾驚珠彩全身去螢妬晶  
毬入草藏妙繪鏤冰詩刻玉上元燈火避寒芒

咏羅察白菜

產于蒙古羅察部落移  
植內園非民間所有也

菜根本是儒家味異種新從絕域移葉似蕉心多  
束縛形同蓮蕊少離披碧毬一掌孤擎重翠幹千  
株獨立奇肥膩如酥鮮奪筍白頭老圃未曾知

咏天然字畫小壺盧

最小壺盧就藤本上用  
字畫刻板夾之使入模

範宛如天成  
甚珍重也

徑寸枯匏楮葉輕法書名畫自天成匠心不費雕  
鏤巧長養都歸矩範精隨意方圓供雜佩不矜瑱  
琤有餘清陶家學士添新樣好乞金丹向玉京

咏塞外花蝶

五彩绚烂勝于內地  
撲取鬻之輒得善價

山頭綵蝶鏡臺珍撲得雙飛價十緡舊產燕支原  
解媚化成粉翅亦生春寶釵好傍翩躚舞翡翠全  
輸意態真若使滕王今日見應添粉本與傳神

熱河中秋四首

并序

先一日



駕幸獵場有

旨同內直翰林諸臣畱熱河以候

回鑾

塞上涼多月倍明中秋獨坐不勝情誰知此地開  
瑤闕也許征夫到玉京露冷山空聞笛響風高人  
靜斷砧聲清光萬里應同照粵嶺吳山接鳳城

余杭

人也而家畱粵署  
兒子又官京師

二

銀海生寒燦鬢銀關山贏得暫閒身從官班裏朝  
天客行殿門前玩月人雲外桂香飄處遠宮中蓮  
漏聽來真未能從獵通宵望玉宇瓊樓若可親

三

前驅萬騎已駸駸許伴詞臣侍禁林風靜綵雲如  
散綺地高笙鶴若聞音清輝玉露情難忘叢桂柴  
門夢可尋三五良朋三五夜廣寒宮外意沈沈

四

未敢狂歌祇細吟漸看清影度墻陰彩雲片片光  
輝爛翠袖重重霧靄深南望京華隨雁字北瞻斗  
極想鸞音素娥莫漫催青女早有寒飈襲短襟

奉和勵南湖學士中秋夜過訪元韻

老去忘情不解愁塞原高處近瓊樓道心已作青  
霞想皓影空增白髮羞明鏡中天千谷曉清商一



夢月堂詩卷十八  
曲萬山秋醉醒都愛今宵好未隋西巖玩肯休

二

嫦娥問我幾多愁橫笛吹殘漫倚樓人老關山塵  
世夢心牽兒女丈夫羞千家玩賞千般思萬里空  
明萬古秋搖落已從今夕始小山何日許歸休

勵南湖學士既和余中秋夜元韻四首又復  
疊和見示因再疊前韻奉酬

天高野曠月偏明自是嫦娥別有情欲照塵心懸  
朗鏡好將仙骨上瑤京歌闌便作逍遙想夜靜全  
無剝啄聲夢裏榮枯誰達曙蓬山喜不隔層城

二

貪尋夜氣辨金銀誰信尊前泡影身險路光明成  
覺路忙人蕭寂卽閒人朱門綺閣都歸妄玉宇瓊  
樓自有真碧落當頭青鳥近便應茅許得相親

三

漫嗟駒隙去駸駸繞樹棲鳥憶故林往事已成千  
日醉前期空笑百年心彩雲乍合終難久花影旋  
移不可尋縱有歡娛無限賞明河欲隋曉星沈

四

唱罷吳歛共越吟雲歸遠岫月移陰青天碧海通  
宵望殘燭風簾獨夜深人世魚龍多幻戲天邊笙  
鶴有清音薰香繡被如追憶恐悞流霞溢素襟



兒子赴熱河定省口占示之

趨朝幸得侍

宸遊暑退涼生又入秋京洛稚兒懷定省塞垣老子  
尚遲畱驅車初識邊關路課業毋貽館閣羞歸去  
三餘須努力

主恩深重恐難酬

塞外閨中秋卽事

萬山蕭寂倚高旻颯颯金風掃暮雲一度良宵逢  
兩度平分秋顥却三分桂花含凍重難放菊蕊先  
時尚斂芬四十年來人事異再經此夕意殷勤

閏八月今  
四十年矣

二

木落霜明月又圓宵寒漏永客誰眠嫦娥有意重  
開鏡羈旅何心更拂牋吹笛關山聲轉咽舉頭沙  
雪淨無烟歡頻怨疊知多少塞外良辰豈偶然

三

穿樓入幕爲情多紫塞重圓喚奈何照徧千門殊  
景象長空萬里間關河寒光入水冰輪潔皓彩漫  
山玉有波偏是閨年饒好夜人生何處不當歌

四

明蟾圓缺幾周巡九十秋光過七旬茱酒讓他三  
度月竹林添我一陳人

內廷諸君子  
符竹林之數

難招嘯詠



樓中客自保衰殘塞上身掩戶披裘還偃卧無情  
白髮負冰輪

戲簡南湖學士

凜秋遙夜響庭柯戶外霜濃想寤歌學士禪袍香  
在否詩人酒盞意如何黑甜不減溫柔趣白罰何  
妨樂聖多塞草已黃頭有雪人生高會莫蹉跎

壽陳鍾庭封翁雪岑先生八十

鐘鼎都荒三徑舊林泉幾見八騶歸盛名高壽公  
兼享濁世真仙古所稀况是絲綸頻寵錫久邀金  
紫拜恩暉八旬却杖春隨屐四世同堂綵作衣遙  
望香山千丈峻思陪洛社寸心違只愁吳苑開樽

日早有徵書問少微

和佟鍾山咏羅漢峰元韻

翠巘森螺髻疑經七寶林化城畱色相趺坐悟禪  
心覺水流泉遠慈雲捧日深誰知靈異境開闢却  
從今

和佟鍾山詠鎚峰元韻

如來懸信鼓槌石亦超羣鈍不干青漢圓能吐白  
雲巨靈何日鍛岸峒此中分渾璞垂終古無須黛  
作文

恭紀

聖恩詩八首

并序



臣元龍草茅微賤樗櫟庸材叨沐

隆恩拔置詞館內登卿貳外任封疆素餐三十四年  
參養之深仁難報遠隔八千餘里犬馬之  
依戀時殷思覲

天顏冀邀

明訓卽蒙

俞允殊切歡忻自愧年齒就衰精力昏耗乃荷我  
皇上洪慈矜宥大德優容聆

天語之溫和恍若陽春浩蕩仰

聖容之睟穆如覩日月光華旣許扈從熱河復  
命趨隨內直兩邀

寶扇之賜再陪

闥苑之遊

溫旨頻宣微忱增惕頃者

親臨遠塞講武時畋未能勉效馳驅復許安居靜候  
主恩深重無可復加

臣

職曠瘝益難自道比聞兵臨

絕域已救遠人於水火之中威懾遊魂行  
登荒服於衽席之上仰

睿謨之指授覲

仁武之光昭

聖躬日益康強

福壽靡有紀極普天頌禱率土歡騰微

臣

何幸躬逢



可勝雀躍惟念忝膺重任久離職司雖戀  
闕有心而曠官滋懼將辭

丹禁難伸捧日之微誠謹綴蕪詞聊志銜環之寸悃

仰冀

慈鑒無任屏營

八千里外遠臣心半載隨鑾戴德深每飲瓊漿依  
玉澗閒尋石髓上瑤岑重霄寥廓神多爽經夏清  
涼暑不侵仙境天開人未識萬年畱待翠華臨

二

侍臣載筆扈

宸游東壁圖書事校讐豈意深恩憐朽木許教外吏

入丹邱宣來

寶訓開蒙昧靜對瑤編仰

聖猷自是

宸心周八極遐方何以副承流

三

右文著述貫天人秘籍琳琅萬卷新

詔許仰窺驚浩瀚

恩教排次愧逡巡治功奕代歸

皇極道法千秋屬

聖神謨典洋洋難盡讀一言一字足書紳

四



每侍

臨軒晝漏長  
考言詢事慎  
官方移時奏  
對聞明訓滿  
袖氤氲捧

御牀文武需才歸

睿鑒廟堂勝算仰  
當陽至誠原與天  
同體悠久無疆本  
自強

五

山莊簡樸水縈紆  
仁智澄懷動靜俱  
瑤草琪花非所貴  
野蔬嘉穎自堪娛  
內園恍覩田家景  
農務常依

帝座隅避暑何曾  
耽玩賞較晴量雨  
廣咨諏

六

弓矢昇平未可橐  
時畋不憚

聖躬勞每因訓武  
陳軍旅豈爲分鮮  
建羽旄輕翼虎騰  
霜氣淨  
飲飛魚麗塞雲高  
執鞭未效慚衰老  
自抱殘編向隰臯

七

飽食安居歷夏秋

主恩優渥愧難酬

宸章寶翰頻邀賜  
闔苑蓬山得再遊  
曠職經年增悚惕  
寸心捧日尚遲留  
敢忘嶺外民依重  
聞說年豐慰噢咻



聖德弘敷宇宙清炎荒瘴氣亦澄明共知日月無遺  
照霑得光華及遠氓鄭重簡書遑自逸瞻依禁闥  
不勝情餘年總是

君王賜何日重來觀玉京

九日卽事

霜鐘金吼報蕭辰菊蕊萸房令節新

行殿曉開因啓事選人鵠立待呈身

天顏罷獵神明煥遠吏觀光怵舞頻却笑高臺空戲  
馬

臨軒朗鑒照羣倫

是日聖駕罷獵初回吏部帶陞選各官引見

二

溪淺沙明落水痕邊秋候早愛晴暄貪尋紅葉迷  
山徑爲訪黃花叩寺門閨歲催寒冬序迫客心無  
賴暮雲屯年芳淪歇隨人老露夕風朝紫塞原  
月選各官引見旣退令閣臣院長試其能文  
與否例也是日以賦得

御製人愛菊花香一句爲題蓋塞外行獵時所作也  
閒坐無事擬賦五律一首

白鹿登仙饌黃英獻壽觴臣心懷晚節

聖意眷寒芳不伴籬邊醉來呈帳殿香超然塵外物  
貞澹侍



垂裳

紙扁鼓

誰飾溪藤代卓音數聲清越按吳吟輕攏好傍紅  
綃袖細擊宜拙碧玉簪應響珠喉愁欲破徐催象  
板韻偏沉洞簫吹徹虛中妙硃牙猶通曲裏心

愛日堂詩卷十九

還朝集一

巳亥庚子  
辛丑

元龍侍從禁庭二十四年出撫粵西者七  
載茲蒙

恩擢補工部尚書重歸朝列因以名集

伏聞擢補大司空之

命感懼恭紀

金甌枚卜降

絲綸豈意連茹及遠臣七載封疆憂任重半年扈從  
沐恩親重趨春殿人非舊忽領冬官秩又新名姓  
未曾登啟事驚聞特簡自



楓宸

時華亭王公以大司空大拜即奉特旨以元龍補授司空不由銓曹開列也

二

翰林老輩漸無人嶺外猶存禁裏身  
暫校圖書成帝典又司水土佐

皇仁台司重地容衰朽兄弟同官接錦茵  
豈獨

君恩難報稱家門貴盛懼逡巡

時實齋家兄官大宗伯

扈從謁

陵回宿薊州邦均之天妃菴入春五日氣已和暖獨

坐無事偶成二絕

隨

鑾十日上

陵回送臘迎春淑氣催漸覺晝長欣有伴清卿學士

後先來

李廷尉薄學士偕至

二

蕭疎白髮愧華裾

恩許肩輿扈屬車借宿僧房逢歲晚一聲清磬夢何

如

二月二十三日聞經筵之

命恭紀

細旃廣廈舊談經三拜

恩綸照汗青

余爲詹事時充經筵講官告歸後召補院長復充今從粵撫入爲正卿又充

蓋拜命者三矣

久隋紅塵辭闥苑重紆玉佩侍宮庭上



卿班直儒臣異啟事頭銜姓氏馨

定例非翰林起家者雖上卿不

得與經筵也

聖德高深何以贊白頭紫綬愧儀型

冬官公署中藤花盛放公事既畢援筆偶成  
錦幄高懸紫綬垂繁英一任好風吹豔當綠暗紅  
稀候開殿春殘夏淺時壓架千枝香不散清陰一  
院影初移曹司且退休唐突我欲花前賦小詩

二

不知移植自何年蔓曲根蟠百丈牽曾向銓曹嗟  
樹老又來水部遇花緣

吏部藤花名最著

當階吏散畱佳

蔭亭午風清動紫烟莫道官寮無韻事公餘欹枕

亦翛然

三

宰相風流憶昔賢藤花問訊有詩篇

余爲少宰時澤州相國貽

詩問藤花消息

花因人重添珍賞人與花期閱變遷密葉

能教風日靜柔枝偏耐雪霜堅平泉潭上文饒句

唐李德裕有憶平泉潭上藤花詩

手植成陰待我眠

四月朔日宿雨微陰出署後至豐臺觀芍藥  
遊宛平相國城南花塢復過老圃夏叟之藻  
野亭距昔遊十餘年矣撫今念舊率賦三首  
城南勝地說豐臺土沃泉甘絕點埃楊柳綠陰微  
雨後花枝紅綻好風來村家是處堪高卧園叟相



逢便舉杯自笑偷閒酬逸興水邊林下暫徘徊

二

紅藥千叢天下無香風十頃舊名區依然綠野花  
如錦記得華筵履盡珠階下轆轤還自汲門前遊  
騎不曾孤侯芭已老重過此歎息庭槐樹欲枯

專指城南花塢

三

載酒曾過老圃家生憎籬舍擅芳華構亭共訂看  
花約題額猶餘醉墨斜藻野風光還似昔同遊朋  
舊漫興嗟人生若慕長行樂只合青門學種瓜

夏叟家多芍藥昔年宋堅齋司馬約同志爲之構亭名曰藻野屬余書之今題額亭子如故而司馬

已久謝人世  
不勝慨然

都市芍藥方盛因購百餘枝徧插座側坐卧  
其間口占四絕

錦帳天成繞座隅嬌紅粉白盡名姝色香豔絕徧  
清絕便老溫柔得似無

二

霞有光華玉有腴柔宜欹側醉宜扶金釵十二來  
俄頃消得豪家百斛珠

三

深下重簾護靚粧勾人意態殢人香巫山雲雨無  
須問坐對忘言已斷腸



四

掃除一室似維摩老去風懷剩幾多誰遣天花來  
供養柔情爭奈道情何

恭和

御製詩元韻四首

并序

康熙五十八年己亥六月

皇上避暑熱河山莊

御製賜老大臣七言律詩一首臣伏讀之下仰見

至德謙冲

淵懷深遠詞旨渾噩格律高閎直同二帝之典謨遠  
駕三唐之風雅且時當炎暑正晝漏之方

長

幾暇臨池運霜毫而不倦瓊牋疊灑寶扇頻書鐵畫  
銀鉤腕有千鈞之力龍蟠鳳翥光騰萬丈  
之芒更徵

天體安和

宸躬康健遙知靈泉瑤草乃天降以助元神舉凡樹  
色巒光皆地出以供靜養臣等葵誠胥慶  
雀躍奚勝至於

念講筵珥筆之臣寓重道崇儒之意俯追曩昔求舊  
情殷眷注高年錫賚恩渥凡屬班聯之僚  
案無不欣慕而奮興况臣身列翰林久依



禁近受

知最早受

恩最深瞻

行殿之恩暉真一言如寶訓讀

御詩而感動更百倍於恒情伏念臣賦質愚魯學殖

空疎幸選列於清華久陪

日講旋出入於中外屢侍

經筵歷今三十餘年曾無尺寸可效捧

天章而諷詠感不能宣遵

元韻而和歌情難自己忘摘詞之固陋敬賦四章勉

染翰而徬徨繕成一冊恭呈

睿覽仰冀

聖誨臣無任感激悚惶之至

聖主恩深念舊人

御屏猶記老儒臣寅恭矢志先衰逼

宵旰如初不息真一日萬幾心獨斷九重四海照如

神白頭備位誠何補長得

君王與笑嚬

二

從來哲后重知人歷試難求一个臣華綬濫膺三  
事貴素絲敢問寸心真交相勗勉憂愆過共享昇  
平藉



聖神時雨露濡農有慶山園黼座翠如嘖

三

文章少壯不如人老更荒蕪愧史臣雖抱力心年  
力暮敢渝赤子性情真庶司分職欽

明訓萬國承流仰化神塞上清涼新樂土薰風歌罷

一含嘖

四

宸章渾噩貫天人寶扇親題賜老臣

聖德光明無粉飾

至誠參贊有清真恭聞

乾健歡愚悃仰覩奎文動

睿神三十五年叨侍從感

恩有淚喜生嘖

三韓李君徵伯向爲粵西之左州牧左州在  
萬山中州守饗餼不給一日來謁袖出金山  
圖并題詩見示不言貧困也旣遷山左郡佐  
復因撫軍一家迴避回京後杜門邨居不願  
補官讀書樂道有古君子之風旣辱見訪又  
荷貽詩依韻答之

嶺外風光別有天宦遊人遠自相憐  
猺蠻革面煩良牧烟瘴銷魂失盛年  
官舍墟邊茅結屋亂山叢裏石爲田  
樂飢仙吏何來者不問朝炊獨賞泉



二

家聲舊逼魁三象治行今推第一流愛石并無舟  
可載貽詩兼有畫俱投鶯遷愁虎頻窺澗雁過懷  
人漫倚樓霖雨相期偏解組惜君才望負宣猷

三

扶杖來過太瘦生孤懷磊落寸心明已甘黃葉村  
中老不向緇塵道上行身隱憂時常廢寢話深憶  
舊不勝情繩牀六尺容高卧蕉鹿紛紛枉自爭

四

我因入覲出炎州憔悴京華又滯留爲戀深恩歸  
未得虛縻厚祿愧何修蕭森畫角催殘夢搖落金

風掃白頭若肯重過懸榻在小庭風月正宜秋

賦得

聖製百花候御輦

林花望幸慶斯辰輦路風光一倍新翠蓋陰中承  
雨露紅英拂處長精神衆香尚斂迎鑾色萬蕊初  
含向日嚬品彙敷榮皆

聖澤近依階砌早廻春

送履仁姪孫之宿桃通判任

羣從才華爾最雄公車屢上阻長風棄繻且作河  
干吏姓氏今朝達

聖聰



二

乘時早展濟川才莫道卑棲佐外臺保障金隄須  
努力終南有路近三台

三

捧檄欣然識子情板輿花下及時迎扁舟北指蕪  
城路取次臨淮好聽鶯

四

嶺外叅軍庾杲蓮相依四載別三年歸朝白髮蕭  
蕭滿送爾登車一愴然

五

平奠洪波藉

聖謨冬官領袖愧衰迂憑君分理多籌畫報績餘光  
及老夫

六

我家門第接華簪贈別惟餘報國心他日史官編  
氏族好將循吏補儒林

中翰王君曾期久侍內廷請假歸祝兩尊人  
八十雙壽

八十齊眉天所私拜恩歸慶遇偏奇雙松並挺凌  
寒節片玉能邀特達知雲護

宸章當碧簡鳳銜

丹詔到瑤池六橋秋月明如晝衣彩騰光上鬢絲



夢見堂言卷十九  
太原甥下第後賦感懷二首頗傷懷抱因依  
韻和之以廣其意

君家自有舊巢痕且對黃花盡此樽要比松筠寒  
挺節不隨桃李暖盈門文章難問千秋事搖落空  
銷一夕魂異日珪璋看特達作人壽考待新恩

二

升沈閱盡自翛然世事烟雲狀萬千畱取高懷寬  
似海何妨績學老如年歸鴻莫漫羞來燕伺雀從  
教喜得蟬官市只今模錫盛囊中珍重一青錢

和太原除夕對雪用東坡韻

瓊花萬點灑輕纖一段清光餞歲嚴桃戶先懸銀

縷勝椒盤倩作水晶鹽臘將盡處封塵陌春未歸  
時壓畫檐白堊何須塗院宇驅邪遙見玉山尖

二

碧天晚霽散宮鴉曲巷泥深斷犢車雙闕觚稜光  
似月千門皓彩眼生花衝寒先掃朝元路高卧應  
輸處士家紀瑞新詩堪別歲衰殘欲和手頻叉

辛丑元旦恭遇

皇上六十年寶曆初周早朝慶賀禮畢偕相國馬公  
松公蕭公太倉王公華亭王公太宰遂寧張  
公大司農陽城田公大宗伯貝公德清蔡公  
大司馬孫公大司寇賴公韓城張公總憲黨



公共十四人詣

乾清門獻壽時華亭年已八十松蕭太倉三相國遂

寧陽城皆年七十以上相國馬公宗伯貝公

司馬孫公司寇賴公總憲黨公及

元龍

年皆

七十宗伯蔡公年六十九司寇張公年六十

八真一時之盛退朝漫賦以紀其事

寶曆初周六十春華簪白髮對丹宸太平

天子真仁壽矍鑠臣工仗

聖神竊祿幸逢全盛日趨朝相慶古稀人耆英不向

林泉老大位高年笑致身

二

老年不寐聽晨鐘移步蹒跚上九重五色雲中王  
子鶴萬年枝下大夫松歲華荏苒春羞問宦海蒼  
茫興已慵朝罷閉門唯愛靜不堪攬鏡照衰容

三

未許懸車又退朝雍雍金紫髮蕭蕭鴛鴦班首列皆  
黃耆虎拜歡聲在絳霄近沐陽和天上坐不知歲  
月暗中銷沍寒未解遲春信徙倚閒庭望斗杓

上元日自苑中歸感寒卧病者數日殊負良

宵感懷偶賦

春歸猶滯十分寒老馬嘶風力已殫燈火千門逢  
景運藥爐一室卧衰殘韶華送老無情去仕宦勾



人有夢闌輸與五陵年少客徵歌逐隊滿城歡

二

連朝微雪氣清澄斗帳圍爐卧乍興萬事難求千  
日酒一年又負上元燈飛騰意氣今何有寂莫情  
懷老自增憶得故園梅已綻杖藜到處是香塍

恭祝

萬年寶曆詩

并序

臣聞聖之至者天地受其範圍誠之至者  
覆載同其悠久正位凝命偕造化而並行  
撫運應期任推遷而益永蓋淵衷涵乎二  
氣而敷政等於四時則干支之環轉無窮

而曆服之綿長亦無盡也欽惟我

皇上體合兩儀德同二曜

聖人作而萬物覩地平天成

元首起而百工熙時雍風動自昔日之

冲齡御極暨今茲之久道化成溯六十載以來常如

一日開憶萬年之曆定於一中修德則與  
日俱新日常升而德彌峻典學則隨時加  
敏時屢易而學愈深明道統如日月之常  
懸定治法如高卑之永奠敬

天昭事三元統會於一元法

祖顯承萬世思成於一世



武功赫濯使無雷出日之境永永不識干戈

文治誕敷俾含齒戴髮之倫世世共遵教化蓋自朝

至是惟無息則無疆愛日惜陰因益勤而

益健

仁者必壽則元氣常亨

寬能有容則太和恒滿一周花甲欣逢辛丑之首春

萬歲曆元再啟壬寅之正朔合斯世之曾高孫子俱

在

一人長養之中仰吾

皇之博厚高明共慶億載昇平之盛在昔炎帝黃帝

位歷百年聿稽天皇地皇祚延萬紀世惟

荒遠史訝傳疑今我

皇上曆數在躬貞元啟運願久安而長治民心卽是

天心秉健順而貞恒理定可知數定則逾千盈萬

寶曆從此始基而咸五登三泰運於今方闢又何必

致疑於太古而獨稱夫陶唐也哉臣等備

員丹禁欣近紫庭久邀恩遇而際昌期思

頌

神功而歌

聖德真如巍巍蕩蕩民無能名覩此裔裔皇皇美難

盡紀竊比蟄虫應候聊同擗管窺天無任

歡忭悚惶之至



聖皇受命自天申甲子廻環第一巡開闢乾坤原並  
永光華日月每增新義皇尚遜長生曆仙佛兼爲  
御世身何事改元頻紀瑞萬年寶號萬年春

二

四千載後三元會六十年來一

聖君辛是日新昭有象丑爲地闢廣無垠太和洋溢  
流雙闕元氣彌綸散五雲德邁唐虞今獨盛史書  
充棟未前聞

三

帝心仁育並施生通復相因仰健行主宰三才操造  
化維持八柱啟昇平洪鈞廣運初周甲壽域弘開

正後庚

御極至今蕃戶口白頭都是向時嬰

四

紀元無盡配乾元世世臣民戴

主恩常轉璣衡環太乙全收版籍到崑崙舒長化日  
人忘老浩蕩春臺氣自溫天意欲看平治久故教  
鳳曆駕軒轅

宋靜溪內兄七十壽

玉曆欣頒六甲旋恰逢國老古稀年早騰弘譽文  
兼武晚謝華簪吏亦仙鳳羽門庭饒宦績龍鱗歲  
月富詩篇遊踪到處籠佳氣南極光芒夜燭天



二

弱歲從遊忝懿親齊年俱已白頭人偏輸桂子過  
三樹又占梅花第一春刺史風流原掩映封君祿  
養更精神朝來央及蓬萊鶴爲寄流霞酌數巡

春風

低拂輕迴淑景移偷寒送暖不多時陌頭搖曳遊  
人袖牆角徐褰處士帷鳥囀深林傳遠韻花香隔  
院引幽思遊絲百尺長條滿蕩漾晴空動碧漪

又和太原韻

吹散餘寒氣漸和總持花信候偏多林間暗度傳  
芳意池面輕迴泛碧渦著處宜人春靉靄憑虛動

物影婆娑怨他紅紫爭妍後萬點飄搖可奈何

華亭王相國八十壽

黃髮皤皤映玉除太平宰相式簪裾臯夔駿譽誠  
無匹燕許鴻詞迥不如槐蔭有三行是首椿齡紀  
八度逢初絲綸閣下薰風滿靜坐調元歲月舒

二

鳳曆迴環祝

御前應期元老是彭錢曲江風度人中傑潞國精神  
地上仙碧藕自調金鼎味班衣還染御爐烟東王  
公指沙堤路栽徧桃花不記年

題蔣西君學士畫



夢日堂詩卷十九  
墨池膏潤長新芽春滿風流學士家手握化工藏  
不住紛紛迸出四時花

二

何用花神取次栽百芳齊向卷中開倚雲和露根  
株貴輕薄封姨不敢來

題友人小照

小院疎花傍雪勻高懷應寄一枝春吟肩獨對寒  
香裏水部揚州是後身  
橫斜瘦影水邊開移取羅浮入畫來索笑巡簷人  
不語賦中誰識廣平才

七十初度述懷

并序

世俗遇生辰齊年輒相餽遺置酒宴會慶  
之也祝之也余謂不然人生於世既讀書  
爲儒而仕於朝必上有裨於國下有益於  
民文章事業卓然可紀則因其壽而慶之  
祝之也固宜若余者淺學尠聞乃歷躋清  
要出入中外俛仰浮沈無所樹立又獲致  
大年若造物獨厚於予而予實有負於造  
物以爲幸則可耳又何慶與祝之有獨坐  
自思追溯生平猶憶年十五入成均應京  
兆試外父宋文恪公時爲司成亟加賞識  
遂締姻焉年二十一中壬子副車就婚於



文恪公之甥館年二十七登本省賢書年三十四中乙丑科進士

殿試一甲入翰林逾年卽膺

特達之知充

日講官記注

起居供奉

內廷已巳扈從

南巡至吳門聞先慈之訃歸家讀禮者三載辛未冬特旨召還從此凡十四年

南巡北征皆扈行官至端尹甲申初夏以老父年高

疏請歸侍蒙

聖恩俯體烏私傳

旨不必候銓曹具覆卽令遄歸兼

命攜所修之書就家纂輯遣家人進呈遂得歸依子

舍者三載丁亥正月先君子見棄喪葬旣

畢服制亦滿自顧愚拙不敢再冀榮進引

疾陳請願在家以修書自效又里居者一

年以爲可遂麋鹿之志矣庚寅五月忽荷

擢補翰林掌院之

命不得已就道次年辛卯二月復擢少宰仍兼院長

之職是秋又奉

命出撫粵西年已六十矣嶺外邊方節鉞重任以老



書生膺之日夕惴惴居七年時和歲豐瘴鄉之民漸有起色幸免罪戾戊戌三月入覲

闕廷卽侍

輦避暑熱河蒙

恩旨仍入內直令合校內府所纂諸書

御筆宣示呼爲老翰林

賜遊賜扇賜食倍邀寵渥是年八月華亭王大司空

大拜

特旨以

元龍

代之謬掌冬官又已三載今且年七十矣自念學問荒陋而早受

主知侍

講筵直禁掖領袖清華極稽古之榮才識短淺而洊

邀柄用秉銓政任封疆入掌邦土膺倚任之重不治家人生產而清白之貽衣食粗足性復疎懶嗜退而伏處田間再荷

徵召皆初願所不及而揣分則已過者今年力就衰

縻祿素餐報効無能乞休未敢中夜徬徨不能成寐率賦述懷十首以謝親知之來慶祝者言鄙詞俚不可言詩也

古稀今日幾曾稀有客先衰未拂衣蒲柳尚延因壽世松筠爲侶借榮輝

在朝諸大老多七十以上者

巖廊協贊



才非分邱壑逍遙願久違

主聖時清當努力敢矜恬退說知幾

二

頭銜贏得一條冰

講幄談經愧早登野性半生甘自放

君恩兩度就家徵封疆館閣誠何補經濟文章詎有能勉策駑駘愁力短寒宵不寐自兢兢

三

迂疎幸遇

聖明時垂老儒臣託

主知濫掌詞頭趨禁近署銜紙尾備曹司冀全晚節

難言退欲報深恩歎已衰未得懸車憂脫輻紅塵  
白髮任風吹

四

甲曆重經已十年童顏一換不迴旋但教赤子心  
無失何必丹砂藥有緣塵夢已迷誰覺悟癡情難  
斷總纏綿五更聽徹晨鐘響又逐輪蹄向紫烟

五

曾賦南陔侍老親

御題日永荷深仁

余甲申請告養親蒙書南陔日永匾額之賜

御教忠已

遂移忠志報國空餘杖國身泉石有懷難遜跡廟  
堂無事漫垂紳上卿豈是優閒地酌酒徬徨問夜



頻

六

庭前風景不曾殊歎息婆娑樹欲枯有限光陰非  
我有無窮歲月與人無事功休問千秋事儒術空  
爲一代儒駒隙頻催莫惆悵閒來斗室且跼跼

七

追歡思逐少年場又恐諸郎樂事妨只有黃花爲  
素友羞將白髮倚紅粧笙歌隊裏形增穢翰墨林  
中業久荒縱是忘情難滅性吟風弄月興偏長

八

雲烟變幻去駸駸倦鳥低飛憶故林學佛求仙嗤

妄境看花度曲惜分陰齒尊談謔誰爲伴宦久榮  
華不動心竹帛鼎鐘身外物何如濁迹任浮沉

九

平生夷險盡經過七十流光一刹那濁鏡生花增  
懵懂鉛刀鈍割亦銷磨酒何曾醉常心醉口不能  
歌愛聽歌紫綬金章輝雪鬢信天得食未蹉跎

十

朝無啟事暫高眠一日閒居一日仙豈有歌姬供  
乞食不尋酒友共逃禪富逾方朔應知足達比蒙  
莊聽自然若荷

聖恩容逸老水邊林下慶餘年



述懷既賦十首欲言未盡再賦十首

蹇驢席帽上長安少小偏思振羽翰潦倒盛年懷  
泣玉扶搖晚達借風搏讀書歎我徒干祿垂老從  
人笑愛官六籍笙簧已無分兔園冊子好重看

二

成均肄業拜昌黎甥館旋邀國士知幔外牽絲思  
往事帳前受業憶師資壻僚尚有譚邢在歸侶空  
懷李郭思他日西州門外過不堪老淚洒清漪

三

疎簾棐几小窗前掃地焚香白晝眠手種花枝親  
抱甕性耽茗椀自烹泉牙籤滿架淫輸蠹墨瀋盈

池彩似烟縱到五雲深處坐終教負却靜中緣

四

寂寥心事有誰知年少多情憶昔時麗句無題常  
有作蠻牋小疊寄相思風流往事慙平叔薄倖虛  
名擬牧之若使蛾眉憐雪鬢願攜檀板按新詞

五

領袖蓬瀛忝令譽承明出入曳華裾曾依玉几揮  
柔翰日傍椒塗校秘書目暗臨池增太息心枯索  
句費躊躇

君恩重許陪供奉只恐顏容玷綺疏

六



從獵從征記壯年揮鞭躍馬漫爭先割鮮毳帳邊  
風勁磨盾沙場塞月圓北斗南瞻忘道里秋霜夏  
降異山川一編紀事殘詩在不信衰翁句浪傳

七

伎求貪吝笑人忙淡泊心情歲月長學介何妨通  
亦學傷廉未敢惠寧傷敝車布被羞虛譽華綬金  
貂負寵光溫飽不營隨分足清風明月照行藏

八

六十爲鰥室已空凝塵有案與誰同徵蘭亦老如  
禪友解佩何緣與夢通酒愛賢人宜小戶丹嗤姹  
女配衰翁心頑形朽成枯木一任窗前落葉風

九

故園魚鳥問歸期竹樹成陰歷歲時倚檻看花輸  
灌叟臨池垂釣讓隣兒畫圖記取溪橋路題詠虛  
摹宴賞詩聾聵終邀

明主棄只愁路鬼笑人癡

十

佛劫仙塵在目前撫今追昔自生憐事同說夢人  
如昨物已成灰意尚牽可惜朝暉都浪擲強畱斜  
日漫俄延榮枯得失君休問且得今宵自在眠



愛日堂詩卷二十

還朝集二 壬寅

奉

命閱視河堤潞河登舟口占

十年不到潞河頭重上吳舡去也畱春水半篙明  
鏡靜柳堤一帶暖烟浮三千歸路原非遠七十懸  
車苦未休何日

君恩身許乞片帆便是赤松遊

閱視王家坂河西務馬家口等處葦壩土堤  
不信葦堤可障川虛能貯土軟能堅沙流遷徙原  
無定水性潞河任自然萬頃田疇資保障千帆食



貨慶駢闐

聖謨指授無遺算運道安瀾億萬年

喜勵滋大世姪館選

鹿鳴歌徹

帝京秋國士韶年第一流世胄兩傳饒鳳羽老成百  
輩讓龍頭論文日下應無敵接武雲衢好並遊會  
看師門詒穀遠蘭芽春雨長瀛洲

喜仲箴內姪補戶部主事

典午家聲嗣相門星郎三世又承恩曹司地重期  
無忝阿閣巢空尚有痕報國丹心緣世澤登朝得  
路識文孫衰年故舊如雲散拭目還看鳳羽騫

題廖

編修使蜀圖小照

文旆搖搖路折盤馬蹄踏徧萬山寒採風太史今  
才子不賦當年蜀道難

二

一片空明絕點埃浣花溪外白皚皚先生心事清  
於雪洞見寒窗錦繡才

三

奉使同爲侍從臣笑他半臂忍寒人  
都從此傳佳話雪裏紅氍走馬身

宋子京在成都事

四

玉堂攜得舊冰壺門下淵雲入楷模爲辦吟鞭行



萬里歸裝只有蜀山圖

送沈子大庶常請假終養

從來仕進少完人名位羈畱笑致身詞館初登歸  
子舍朝班交口重儒臣經綸退養何妨久菽水承  
歡不厭貧三復南陔移報國於君方信讀書真

黃沁安瀾恭紀詩八章

并序

欽惟我

皇上心周八表學貫三才勞心殫慮肝食宵衣者六  
十餘年念造化雨暘之氣數或有不齊方  
輿川瀆之流行或有遷易以致兆民有飢  
溺之憂必思補救而安全之所以參贊化

育而輔相天地也聿自大禹播九河疏九  
川東注之海歷漢唐宋以迄于今轉運必  
通於黃河而河患時聞遷徙已千餘里防  
之未有良策我

皇上至仁如天大智如神不憚勤勞險阻屢次親歷  
河淮指授修防方略遂使運道安瀾民生  
樂業垂四十年至西北內地則潼關孟津  
保德州皆曾渡河閱視遠至口外河套人  
未經行之處從橫城順流而下直達數千  
里舟行二旬有餘所至之處無不畱心詳  
視所以地勢高卑河流脉絡窮源瞭如指



掌昨歲秋八月河南武陟縣黃河泛濫與  
沁河並漲衝決堤岸流入直隸長垣等縣  
直注山東之張秋鎮運河西堤亦多決口  
小民遷避失業漕艘回空阻滯督撫諸臣  
堵塞無策交章入告盈廷集議亦不能仰  
贊一籌我

皇上聖心遠照豫有成算宣召在廷諸臣示以

御製河圖數千里源流曲折之形高下去來之勢如  
在目前指示修防之法各有緩急先後以  
山東運河被冲之堤若卽行堵塞恐水無  
所歸洩而他處有潰決之憂止令略爲修

防以通漕船至武陟縣之決口宜亟乘冬  
月水緩之天時相度上流高峻之地勢速  
行堵塞又築挑水壩以逼大溜開引河以  
分水勢

特遣專官面受

諭旨疾馳而往恪遵修築不及一月而金堤完固洪  
流斷絕於是黎庶數萬人歡呼復業環使  
臣而跪請曰方水勢之初溢也迅速浩瀚  
無所趨避仰賴

皇上昔年所築滎澤縣之大堤奔走棲止於其上以  
保餘生而田廬皆在巨浸中不可問矣乃



未幾而川原如故畝澮依然少壯復耕於  
故土老弱歸棲於舊廬婦子相保作息無  
憂凡此數百萬之生靈皆

聖天子再造之鴻恩也請建碑勒銘以誌

聖德於永永使臣具以輿情上聞一時朝列臣工聞  
大工神速不日告成無不驚異慶忭竊嘗  
考之史籍河之爲患何代無之其最著者  
見於盤庚之書瓠子之詩商王以播遷勸  
其民漢帝以薪槌勞其公卿竭蹶逾時苟  
安一日何其難也然猶著爲詩書以垂後  
世我

皇上聖心默運神謨詳授擇人而委任之乘時而捍

禦之不縻帑不動衆大工速竣大患立除  
雖古聖堯神禹猶有九年八年之久未若  
我

皇上期月而成功之捷也猶有泥行陸行之勞未若

我

皇上存神而奏效之逸也

臣

備官水部叅預河議茲

蒙擢補春官伏思勒碑銘紀功德乃禮臣  
之職而學識淺陋未能頌颺萬一謹竭愚  
殫思撰爲四言詩八章以獻

我



皇神聖天清地寧大河旣翕川后效靈歷四十年狂  
瀾不興瀕河以居安土樂生

二

樂生伊何維

皇之造河伯不仁俄而肆暴挾彼沁水侵及運漕兆  
民震驚守土以告

三

曰彼黃沁肆彼怒流決於馬營達於張秋瀕河之  
民魚鱉是憂瀕河之臣莫展一籌

四

天子曰咨河流孔亟中外臣工唯朕所擇往視張秋

俾民安宅往視馬營是防是塞

五

曷塞曷防

朕熟于河制其上游爲工不多臣拜稽首奉爲金科  
自

天子所往遏其波

六

始往遏之河悍以狂決口呀呀萬夫莫當奉

天子命以隄以防河乃翕然安其故常

七

河之安矣役不逾月民之慶矣永保無決匪直也



民不憂魚鱉亦我運河利之不竭

八

維

皇之造有此神功維禹之績亦莫敢同地平天成  
帝叅其中臣拜稽首紀于秩宗

題畫

紛紛朱碧映誰家無限春風繞徑斜此處紅塵吹  
不到幾竿修竹數枝花

題北山垂綸圖

楓葉蘆花瑟瑟寒偶將心事付綸竿可知海上任  
公子肯戀嚴陵一釣灘

恭題

御書惠迪吉三字

煌煌

宸翰三光麗天禹文山仰義畫乾連順道斯吉堯舜  
心傳

御墨親灑嘉謨益宣鸞翔鳳翥璧合珠聯近臣荷賜  
寶藏萬年

又

景星慶雲日月光華聚爲墨寶散入筆花珥貂珍  
重賜出

天家拜稽瞻仰妙蘊無涯



宸章垂訓昌言是嘉藏同球貝護以金霞

又

大禹作訓聖謨洋洋趨吉在順義味深長我

皇灑翰雲漢爲章游藝亦道臨池不忘用錫侍臣心  
銘手藏九重墨彩萬丈奎光

恭題

御書菩提二字

梵王妙諦

聖主法書兩寶合一如清淨珠貝葉楮映蓮華墨舒  
莊嚴朗潤般若真如近臣膜拜捧出

宸居一心皈禮萬世臨摹

送德清蔡大宗伯假旋四首

舊學高名四十年久叅密勿

主恩專總持秋憲朝綱肅晉領春卿禮教先廷議  
錚錚聞蹇諤風規矯矯壓班聯陳情暫許辭丹闕引  
領鋒車到日邊

二

憶昔追陪侍講筵朝朝衣袂共爐烟典型前輩朝  
端少謨誥鴻文海內傳歸洛溫公遮道擁降麻呂  
相就家宣班迎話舊知非遠漫向青門一惘然  
宋制宰相召自外者令百官班迎之

三



通門兩世亦前緣余壬子出令伯崑賜先生金石之門兒子乙未又出公門

論交豈偶然被旨送公歸賜第癸未冬先生擢少詹賜第苑西時余為詹事特旨遣送先生歸第異數

也惠詩贈我下吳船余甲申夏乞養歸里先生分賦詩四首贈行情極肫摯

攜中外離思切共事班行氣誼堅齒髮先衰歸未

得傾都祖道羨登仙

四

潞水波澄月正圓風晴帆穩下平川賜書滿載騰

奎照晝錦生輝射斗躔入饌正逢香稻熟拒霜偏

愛晚風鮮鄰農不識雲中鶴爭訝清標似盛年

壽蔡宗伯七十

求舊

恩深眷老臣賜閒一載荷

溫綸偶思獨樂園中趣暫作者英會裏人謀國無憂

堪養素衛生有道可全真懸車欲賦鋒車促公望

于今屬大椿

二

身近光華飲太和非關觴祝醉顏酡平津閣畔遲

枚卜履道坊中聽笑歌儕輩漸看林下少高年偏

向日邊多待公喬嶽擎天久容我婆娑老澗阿

題畫二首

粉堆玉琢出花房素面盈盈對晚涼三字小名真



寥自堂詩卷二十  
九  
綽約南中不數夜來香

右晚香玉

翠翹葉葉不勝簪軟盡風前一片心爲鳥爲花渾  
未辨碧欄干外露華深

右翠雀花

題友人小照

仙骨凌風絕俗塵月中對影作三人渠荷徑竹雖  
瀟洒邱壑難分廊廟身

二

逸興遙傳池上篇蒼松白髮與周旋西園雅集蘭  
亭會到處風流讓此賢

題筠圃山莊圖

點染樅川勝輞川江流淼淼數峰邊桑麻雞犬皆  
塵外泉石烟霞到眼前爲有墓田供馬鬣好將手  
澤展龍眠孝思寫得淵源遠莫當溪山粉本傳

華亭王相國以八旬賜器圖屬題卽和自題  
原韻四首

朝端祝嘏賦臺萊內殿親承

渥旨來寶器紛綸天府出奇光爛熳化工裁日華高  
映三公鼎雲液旁分

萬壽杯一路沙堤傳

御賜黃封迎到綺筵開



二

天因平格壽無私世德瑯琊之又之才子承恩衣  
綵服

聖朝崇老賚瓊卮好盛紺雪光騰越滿貯冰桃影陸  
離銘勒更傳圖畫久相門奕葉仰

皇慈

三

君臣一德配無疆錫予便蕃侑舉觴健不人扶看  
虎拜寵由

天語冠鵷行鹽梅調處皆珍膳疊洗斟來是玉漿夏  
鼎商彝輸賜器紀恩詩卷幅加長

四

松比精神鶴並年榮看法物下鈞天東華日彩籠  
黃閣南極星光射紫躔斟雉愈因金鉉重挹漿長  
與斗杓旋麗眉宰輔丹青裏領袖蓬萊不羨仙

千叟宴恭紀十首

并序

康熙六十一年正月初五日奉

旨傳集漢大學士九卿翰林科道等官及文武有職  
官員年六十至八十以上凡一百六十人

賜宴於

乾清宮庭墀宴畢

上御東煖閣



名大學士九卿翰林科道入閣內賜璫命坐

諭曰今日天氣晴和又值封印無事朕躬亦甚安豫可與爾等閒談舊事從來帝王任大責重最爲勞苦享祚綿久者甚少他人不知爲君之難輒以信奉佛釋惑溺仙道荒酒酒色譏之原其所以不盡然也朕自卽位以來實能絕此三者而深知帝王之苦故臨御十年卽不意至二十年二十年至三十四十五十年皆然五十年以後斷不存到六十年之想今已六十一年矣史冊所載人君壽至七十者不過三人朕今年已古稀矣此皆朕之幸也人君以一身臨於上前後左右皆足熒惑其心或

大臣擅權或婦女預政或閹寺專命甚至偏聽私人如天子門生之類此非有英斷之才不能獨持綱領杜絕弊原然每見英斷之主果於殺戮時朝臣不能自保朝夕朕則待下寬恕於諸大臣務期保全矜恤爾等年俱耆耄安享富貴上榮祖父下蔭妻子得以功名終始此時君臣相對鬚鬢蒼然致足樂也朕年少時未免血氣用事自恃膂力過人三百觔大石上復置一石手能舉之馬上馳騁如飛卽馬或顛蹶身躍立於地未嘗沾污泥土今則雄氣已除矣去年欲刻一圖書令翰林等擬字皆不合朕意特用戒之在得四字蓋深知自足耳



夢月堂詩卷二十  
三  
朕臨政年深多經歷大事而於軍旅尤有灼見往  
歲西陲用兵傳言朕欲親征以致劉蔭樞上摺諫  
阻披鱗乃美事而蔭樞所聞不確徒成虛語矣不  
知兵有虛實不可拘泥準噶爾賊騷擾邊外諸番  
議者咸謂只宜守邊夫我兵不能救援諸番則邊  
外部落勢必爲賊所併此時而議守邊容有濟乎  
去年臺灣反叛人頗驚疑朕知皆由地方官平日  
不能撫綏致窮民激變卽發諭旨曉諭解散並未  
下九卿議勦議撫及督提報捷至克復之期不過  
七日間耳先年朕親征噶爾丹時曾作詩云旁人  
莫道行兵遠自有單于首到邊大學士張英奏云

此詩且俟大捷後再宣示于人後噶爾丹授首張  
英歎服云非皇上預有成算不能先道此句也朕  
于河務尤極畱心先年高寶下河一帶地方田畝  
廬舍皆被水湮小民流離困苦之狀目不忍見朕  
六次閱視河工曾于大雨之夜往來高家堰不辭  
泥濘河官皆不能從故于河上情形知之甚悉爾  
時張鵬翮差往河上深懷疑懼朕示以方略且諭  
之云爾但遵吾教河工自成必不累爾身家張鵬  
翮恪遵朕訓黃淮就治果奏安瀾將四十年今人  
幾不知有泛濫之事矣去秋河南武陟縣黃河沁  
水並漲衝決馬營口堤岸自直隸開州長垣流至



山東張秋鎮以致運河堤決漕船阻滯朕深知地勢高下繪圖指示諭令將運河堤岸略加修防不可竟行堵塞其武陟縣決口當於上流築挑水壩使大溜歸入河身易于成功遣官遵旨堵塞不及一月斷流告成百姓皆得安居張伯行議引沁水濟運與朕意適合以爲可行後張鵬翮奏地形高下若引之必有遺患其理甚長遂停前議朕以至公處事初無成見惟言之是者從耳爾諸大臣皆從窮苦中來今已富貴或未能記憶朕從富貴中來唯恐不知小民艱難故於四方之事常常諮詢下至茅簷草舍窮民力耕之苦粒食之艱無不周

知從來上下壅蔽爲患最大朕令各省督撫於地方事務不時奏聞又於他省來人問以經過地方雨晴米價如張伯行巡撫蘇州時所報米價若干浙江來人便可訪問叅伍証之自不敢虛也且令臣下時存一惟恐上聞之念百姓地方受益不淺矣朕教養天下六十餘年官吏兵民感恩戴德者多疆場之上武職効命綠旗兵丁皆奮勇爭先與滿州無異此本朝最好事也朕今所治之天下卽明代之天下所居之宮殿卽明代之宮殿自甲申至朕生甲午之歲相去十年

先皇考十八年朕卽登極時明代遺舊尚多言萬曆



泰昌天啟崇禎四朝事甚詳明時宮監多至數萬人宮女至二萬餘人今朕所使內侍及諸王所用太監不過千七百人宮眷妃嬪年長者已七十餘歲總計使喚之人不過五百人而已宮中如永壽景陽等宮皆空閒無人居也書生評論帝王每多苛刻惟朱子論爲公平書載有人語朱子金世宗行政北人稱爲小堯舜朱子云果如所言卽大堯舜矣又朱子言讀書不要被書欺了此言最妙常見詩賦有云鰲山百尺今太和殿爲至高而地平至頂不過十丈若鰲山百尺安所置乎大凡讀書人多尚虛文又高自位置動云爲人須顏孟以上

無論顏孟斷斷不可及卽其門人亦不可幾今人得如程朱門人亦足稱賢矣前代諸儒惟朱子學問最大性理內釋性命釋鬼神二篇實能囊括釋道全藏其云爲人須盡這箇人的道理此言所包者廣總之誠敬二字盡之實難無論大事小事能盡誠敬必無差悞爲人能存無害人之心存公心存善心自然有福有壽諸大臣俱年七十八十在古雖爲懸車之年但朕與同事日久上下俱不忍相捨諸大臣勿以年老求退今日談深坐久諸老大臣各回家安息諸臣以次而起

上命侍衛扶掖而出次日



御製千叟宴詩七律一首傳

諭與宴諸臣各賦絕句一首臣元龍既賦應制一首

而感

恩紀事欲言未罄續成十首

聖朝崇老會耆英紫殿紅霞白髮明瘴嶺歸來身尚

健忝司禮樂荷殊榮

二

詔許肩輿入禁門扶攜登陞侍兒孫

賜餐授几隆恩禮薄德高官媿達尊是日有旨許坐肩輿入內東

華門直至景運門又許各帶子孫弟姪一人扶掖侍側異數也

三

細鱗遼水大官鯖香飯雕胡飫雉羹玉雪蟠桃如

斗大攜從天上手中擎人賜一桃許各攜歸

四

雪光鬢影爛如銀乍換童顏爲飲醇錫福推恩成

壽世耆英不讓少年人

五

宴罷宣來秘閣深

溫綸賜坐日移陰追論六十年來事無限憂勤識

聖心以下五首專紀閣中召對之事

六

閔農重穀念民依咨詢時勤察隱微今日萬方齊鼓



腹百齡人瑞滿郊圻

七

拯溺安瀾駕禹功久忘

帝力補天工陪巡記得當年事

玉趾親勞櫛沐中

八

柔遠安邊本

至仁非關耀武語諄諄

宸衷早定銷兵策絕域投戈萬里春

九

後宮冗費減前規魚鑰常扃晝漏遲不是

至尊親說與掖庭爭得外人知

十

訓誠拳拳示一中公心善念福來同書紳記取終身

佩咫尺

天顏內殿東

恭和

御製千叟宴詩原韻四首

觚稜積雪曉光妍重老推恩敞

御筵五色祥雲開壽域千羣華髮會高年共霑

聖澤歡無極旣醉仙廚慶永延遙識萬方歌大有扶

鳩鼓腹競摩肩



二

錦衣皓首自端妍齒爵多慙列上筵擬肅禮容襄  
盛典早占雲物祝豐年千耆矍鑠風前舞

萬歲歡呼日影延敢說無能今老矣流霞換骨勉仔  
肩

三

鷺序繽紛鶴遜妍蓬萊深處啟瓊筵生逢

壽主都增算身列仙班不記年

恩勝虞庠分上下典逾周禮並登延盈廷盡是洪厓  
侶拜舞螭頭笑拍肩

四

却笑淮南愛小妍八公今日老登筵千秋盛事羅  
千叟萬國歡心慶萬年漏轉宮壺春正永籌添海  
屋歲長延

天章炳耀慙賡和撚斷霜髭聳瘦肩

題畫三首

國色天香不易描飛來豔影上生綃趙昌院本徐  
熙筆併入毫端別樣嬌

二

百仞喬柯翠不凋胎禽獨立志昂霄松風鶴唳雙  
清絕蓬島仙人近可招

三



嫩柳天桃陌上枝  
銜泥燕子舞差池  
翠烟紅暈凝人夢  
腸斷徐熙點筆時

輓湯西崖院長

鳳城春冷鳳池閒  
仕版儒林失斗山  
已見身騎箕尾去  
但畱文在典謨間  
彪駟學問垂千古  
麟炳功名照六寰  
薤露聲中成永訣  
一時清淚灑鵷班

二

蘭茝交深四十年  
傷心回首倍潸然  
軟塵並馬宮前路  
舊雨聯牀嶺外天  
每羨風流皆玉斂  
還嗟歲晚共霜顛  
故人忽漫歸何處  
哭向瑤京寄一牋

六月初二日有

旨自行在宣問云熱河雨已霑足未知京師得雨否

時

元龍

方禱雨真武廟傳

旨方到卽大沛甘霖喜而有作

聖心夙夜念民依

手詔頻宣下紫微  
甘雨迎鑾先塞上  
密雲隨驛到京畿

御溝水漲驚噴玉  
琳宇烟凝喜潤衣  
最是禮臣邀

邀

帝力朝朝瞻拜有光輝

得雨後曉起焚香畢閒坐殿廡偶作

曉起焚香向翠微  
步虛聲裡坐忘機  
老慙經術思仙術  
懶著朝衣慕羽衣  
繩榻心閒安夢寐  
清齋味



好薄甘肥任天便是長生訣莫歎塵纓與願違

客有賦秋思者寓意閨情旅况撫拾陳言意殊未廣因賦此以廣之

雲斂天高眼乍明孤懷不爲俗情驚花因意淡容都淡人到秋清夢亦清尚有晚香凝玉露更無凡豔伴金英從教搖落隨時換老樹婆娑豈羨榮

二

過眼烟雲事可憎銀河有路許誰登最憐暮色花間蝶盡掃趨炎座上蠅滌穢涼颼欣驟爽鑒人止水喜初澄秋聲秋思無勞賦悟到瑤臺第一層

七月初二日赴熱河啟事自牛郎山啟行大

雨晝夜不止蹊路成河次日冒雨至古北口僕夫憊甚聞晚禾有益農民相慶頓忘行旅沾濕之苦也

連朝積雨竟成秋田父歡欣解客愁萬斛珍珠從嶺瀉千條練帶到關收怒濤橫渡肩輿險濕翠平鋪旅舍浮喜卜有年堪入告行裝沾濕亦蒙庥

初四日雨霽出口滿目秋光與口內涼暄大異

不信秋光至新涼出塞初山多雲變幻溪漲馬蹏躡日色明偏淡風來氣已疏三年重過此衰白意何如




至熱河

翠華駐久自成都翠繞泉飛儼畫圖崇儉山莊無  
彩績重農塞土盡膏腴先迎爽氣風光異已報秋  
收物候殊却笑鎬汾遊賞隘坤輿未闢守方隅











T5466/7910

8



CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

OCT 4 1960



愛日堂詩卷二十一

蘭峪集

壬寅十一月至  
甲辰十一月

哈佛大學漢和  
圖書館珍藏印

康熙六十一年壬寅冬十一月

聖駕駐蹕暢春園伏聞

聖躬違和廷臣日赴苑中請

安十四日四鼓漢官甫出西便門行三里聞

聖駕二鼓時已回宮矣亟回詣正陽門天已曙門未

啟頃之門啟見守卒皆摘帽纓方知我

皇上於十三日黃昏已晏駕矣悲痛填膺呼號詣

乾清門哭臨伏聞

新天子登極羣心方慰既奉移



梓宮於景山之

壽皇殿今

皇上大孝純篤典禮加隆念

陵寢重地舊例止用內務府關防官禮工二部司官

於禮未爲隆重

特命派內大臣公侯滿漢大學士尚書侍郎前往守

視元龍以禮部尚書與焉於次年之三月

隨侍

梓宮而往結茅山麓痛定之餘偶賦短章因所居在  
陵之東偏馬蘭峪因名曰蘭峪集

大行皇帝輓章十二首

蒼昊俄傾隕哀聲動兩間日沈昏不曉龍去杳難  
攀萬國春光慘千門涕淚漣老臣魂已斷匍匐不  
知班

二

功德巍無比唐虞未足論版圖包地軸化育並乾  
元共樂陽和內都忘雨露恩今朝回首望何日睹  
春溫

三

至明無不照寬大體羣工宥過還延賞虛懷更布  
公進賢期慎重眷舊保初終淚雨誰能遏傾朝抱  
一弓



四

補助還蠲賑年年樂利增

帝心通蔀屋大澤沛春塍兆姓今何賴春臺孰與登  
耕農驚釋耜悲極不能興

五

勤政真無逸臨軒每及晨移時承

旨密咫尺庶司親袖惹香烟滿身霑異數頻螭頭今  
寂寂痛殺老儒臣

六

典學開金匱崇儒啟石渠

宸章昭日月綰帙惜居諸禮爲譚經重心因好問虛

傷心書殿側趨走廿年餘

七

巡幸憂昏墊平成邁禹功親臨頻相度方略秉

宸衷壤沃千村阜堤堅萬艘通黃流經過處童叟泣

崆峒

八

行宮無藻績浣濯每躬親宦寺頻裁冗天廚不費

珍

至尊持節儉薄海盡還醇百姓家家足長懷

聖主仁

九



好生逾解網肆青每停刑德化超千聖深仁及萬  
靈有生皆皞皞長夜忽冥冥無限更生輩回心望  
紫庭

十

昇平六十載久在太和中翹首光華隔驚心氣數  
窮黃雲淒淡日白髮咽悲風稽首

丹墀下哀鳴蟄砌蟲

十一

默籌神器久

授受上賓先惟

聖能知

聖承

天本奉

天

宗祧磐石固

遺詔密封傳拭淚還相慶

詒謀卜萬年

十二

嗣皇哀慕切大孝感臣鄰幸戴乾坤主重霑雨露新

憂心瞻

日慰痛惻近

光伸定策安天下千秋頌



聖神

雍正元年癸卯三月二十六日奉移

聖祖仁皇帝梓宮自景山

壽皇殿前詣

景陵

元龍

與大學士蕭公大司農凱公少司寇周公少司空穆公五人皆以文臣奉

命侍奉

山陵是日隨行親知相送者皆含淚悒悒而別以余

辭華臚而就岑寂且歸期難定也余竊念

先皇帝知遇深恩垂四十年倍極隆渥一旦

龍馭上賓攀髯莫及今得身依

園寢日覲

神靈老臣之心實所至願且年踰七旬目昏耳塞值先帝春秋既高引年之請未遂今

皇上繼述方殷素餐之懼彌切恐蹈躓躓益滋罪戾

今得辭案牘專事齋虔月俸仍支品秩如故以衰老之身處優閒之地乃

聖主保全舊臣之大德方感戴之不勝何憂戚之與

有況夫元老同行勳臣共事皆名高望重之耆碩以余迂踈薄劣老書生忝附後塵幸矣至於首邱故土孰不懷歸然自委贄服官以來此身已非吾有位高任重求去愈難所處



之境不同所遇之時各異古今來功成名遂  
榮晝錦而樂林泉者能有幾人嘗見名公卿  
大夫或得時妨用而素車出國門或擯棄無  
聊而老死牖下命實爲之又何暇遠計耶旣  
至

山

陵之麓僦茅屋數間以居隨班叩奠之餘退而掃  
地拭几出敝笥中筆硯陳之意頗自適因追  
憶生平畧述近懷得長句八百一十字却寄  
親知之愛我者當弗苦相憶也

人生天地間百年一夢爾况復壽者希夢短不堪  
紀我夢亦云長追溯如波詭殘漏漸渺茫晨鐘將

豁耳老少須臾間光陰迅激矢世事變幻多指物  
指非指宦海泛洪濤浮沈無窮已擾擾徒苦辛庸  
庸貽笑恥薄俗嫉當門人情每好似舍實而貴名  
愛橘常植枳行濁而言清蕭艾混蓀芷得路氣如  
雲非時播成糝朝露異榮枯泡影分憂喜何術可  
長生無厭疇知止福驟禍已隨得多失相竢巧恒  
讓拙安剛或受柔使勞心計升沈審已昧臧否髮  
短心甚長形衰願彌侈一朝歸北邙萬事付逝水  
何如守我愚造化任遷徙忘機稱道人俟命希君  
子僕本樗櫟材四民漫曰士矻矻窮一經寒窗事  
研揣勉力致青雲曾不悔別趾僥幸登巍科年未



及強仕通籍早受知染翰常稱

旨玉堂久廻翔溫室容徙倚

時巡侍

鑾輿

親征扈

御壘領袖鳳凰池廿年左右史出鎮擁麾旄還朝紆

金紫秩高驚踐斗

恩深愧聽履荏苒齒就衰歲月去何駛尸位昔所譏

縻祿心自鄙

聖壽屆古稀臣年且過此乞身未敢言遲回良有以

鼎湖忽

乘龍攀髯不可企雲低白日昏痛逾喪考妣號泣環

玉階誰人能仰視

嗣皇繼統緒大孝古無比含辛愼典章詳稽而虔庀

往制侍

山陵具官皆近邇

謂當命重臣九列呈名紙老臣奉

詔行哀慕得依恃元老忝聯裾勳舊多接屣朝暮傍

寢園奠酌親雕几月俸羞濫支華簪供拜跪登降白

雲間臥宿深松裏儼乎

在天靈仰瞻近尺咫棲遲鳳山麓結茅聊仳仳階下

羅瓜蔬籬畔畜雞豕披襟步平岡濯足臨小沚長



爲盛世農行將躬耒耜何處訪幽遐卽此遠朝市  
出處途本岐仕隱今相倚撫衷旣已安勞生從此  
弛沒世又何求餘年亦足矣或言去京華門庭冷  
如泚或言遠故鄉歸期未可擬相慰重咨嗟相祝  
迴塵軌余曰試觀天胡爲坐井底鴻飛自冥冥燕  
棲徒靡靡但知炙手榮未識羅雀美閉門任炎涼  
息影逃譽毀不辦公與侯相攜蘇共李物外見雲  
烟道傍觀角抵無慕亦無營有饅兼有醢退藏不  
羨行守此寧易彼襟懷自坦舒渾然一天理况念  
登朝初此身固已委未能別賢愚何暇論生死哀  
哀公與卿招魂返井里遺世得優游古今幾黃綺

首邱孰不思吾寧有定址放懷齊萬物俗慮去倍  
蓰日日對靈山青蔥來邈迤福地卽洞天飲泉可  
洗髓入世夢乍回遊仙夢又始已悟昨日非安知  
今日是烟霞田舍翁塵土當途子栩栩莊周蝶攘  
攘槐安螳堅臥獨醒時說夢披衣起

五日感懷

山陵近處葦門開令節初逢罷舉杯天上松陰懷舊  
澤人間榴火愛新栽扇珍飛白承

恩在葛詠含風拜

賜來奠饌退時衣袂濕強騎老馬重徘徊



地臘年年注盛衰漫勞續命繫朱絲釵符兒女應  
相憶菰黍邨農亦解遺曉起披裘疑遁跡閒來採  
藥擬從師風清山徑無塵到坐愛濃陰覆短籬  
結茅未竣有燕來巢感而有作

結廬山麓覆茆茨甕牖繩樞尚待時錯認杏梁來  
燕子營巢先我已安居

二

來往銜泥亦苦辛低飛雙舞若相親應憐白首新  
遷客記得烏衣舊主人

三

畫堂何處問巢痕飛向

園陵憶舊恩但得安栖卑亦好朱門未必勝柴門

四

不垂簾幕不糊窗待爾將雛未忍妨秋社到時誰  
伴我空畱好語在空梁

新構茅舍既成移居頗適

結茅成宇荻爲垣小院疏簾靜不喧逶迤平岡來  
繞舍婆娑老樹恰當門茶爐先置難忘癖書架旋  
排素所敦掃地焚香忙事畢臨風獨坐可忘言

二

環堵蕭然一草廬白雲深處得幽居木牀穩坐誇  
雕錦窗紙新糊勝綺疏移取山花隨意種愛畱芳



草不教鋤芒鞋竹杖閒行處爲圃爲農樂有餘

三

閒居從此遂吾真寂寞心情嗜懶身抱甕生涯嗤  
運甕張羅門戶笑垂綸清風明月無殊境靜賞高  
眠得幾人豈有德馨安我陋青山那復憶紅塵

四

柴門晝掩小窗明最愛全無剝啄聲試墨迎涼來  
北牖烹泉待月坐南榮不持扇障塵難到未枕溪  
流耳自清天爲迂翁成晚節故教官海作閒人

景陵值宿恭紀

園陵深處白雲封鳳翥龍蟠瑞所鍾氣象高閎涵九

有屏藩拱向列千峰曉趨殿角朱霞燦暮宿松陰  
翠靄濃夢醒遺弓猶在抱層霄恍睹

聖人容

內務府董君與余比鄰新建大廈每言余所  
居卑陋恐值霖雨漏濕不免詩以解嘲

圖書可貯膝能容茅舍三楹一老農猶喜飛翔來  
越燕不愁卑濕是吳儂卜鄰晏子非無意欹枕羲  
皇足自供赤腳蓬頭無粉黛何須局鑰卧烏龍

自入六月陰雨連朝耕農有慶草廬中亦涼  
潤可喜口占三絕句

潤葉津莖入土深鄰農荷鍤喜相尋



山陵近處多膏雨遺澤謳歌繞碧潯

二

羣山浮靄望中迷積水平階乳鷺低宛似江南好  
風景嫩寒薄暝暗前溪

三

几案無塵硯有雲臨窗染翰學書裙晝長自得閒  
中趣一縷爐香細細熏

卜居

山陵之麓自初夏至今凡三閱月風土物產頗足自  
適其勝於京邸者約有十二事一曰泉甘一  
曰塵遠一曰土厚一曰山明一曰晝長一曰

夜靜一曰穀美一曰果鮮一曰無客至一曰  
無市喧一曰當暑清涼一曰望月空曠因分  
爲十二題各系以詩

何必餐蘭露寒泉冽且鮮香添茗椀味色換墨池  
妍鑒貌塵容滌充腸俗慮捐無須愁綆短日汲不  
論錢

京師飲水  
日需錢買

右泉甘

地僻輪蹄少山靈霧靄多天光常朗徹埃壒自消  
磨硯淨浮金彩簾清映碧莎不須頻拂拭皎潔白  
皤皤

右塵遠



山麓多平壤無香勝軟紅未經焚鑿劫尚保發生  
功階下滋葵藿籬邊足韭菘隨宜知土潤觸目見  
芳叢

右土厚

羣峰何窈窕衆壑自廻環林木無陰翳烟霞有往  
還光明疑洞府瀟洒出塵寰斷絕樵蘇徑真仙未  
可攀

右山明

夏日由來永忙人未覺長靜中增晷刻閒處駐流  
光卷帙從容讀茶瓜次第嘗晚風遲落照倚檻足  
徜徉

右晝長

村外無宵柝遙聞古寺鐘山空人寂寂澗冷水淙  
淙月好常畱影風清乍入松高眠夢不擾香霧若  
爲封

右夜靜

上苑曾頒種傳聞丹鳥銜今來餐玉粒有淚濕涼  
衫靡滑憐紅嫩炊香饜老饒躬耕懷舊

賜飽食抱長鑱

去年蒙頒賜御稻穀種今此地所產早稻米色微紅而香頗相似也

右穀美

夏熟多珍果摘來帶露嘗未沾燕市土尚保嶺頭  
香芳潔堆盤美鮮腴入口涼江南盧橘好空待歲



寒藏

右果鮮

熱客無由至衣冠挂壁間一編容尚友雙板喜常  
關味道生佳趣吟詩養靜顏晚來成獨酌袒裸任  
疎頑

右無客至

寄居殊晏子市遠絕喧闐夕碓數聲杵晨炊一縷  
烟趁墟林外散荷簣道傍眠坐聽泉流細涓涓到  
耳邊

右無市喧

別有清涼境炎炎暑不侵好風來遠岫斜照隔疎

林出戶朝披褐挑燈夜擁衾市朝揮汗客偏畏入  
山深

右當暑清涼

三見銀蟾滿光華分外明纖塵無障礙萬里自澄  
清小院通瑤闕凡胎到玉京深宵不成寐端坐待  
參橫

右望月空曠

朱巍成孝廉過訪賦詩見示依韻奉酬

露滿空庭月一房新涼天氣夜初長荒寒醉客無  
清醕香軟充腸有赤梁極目塵遮丹鳳闕舉頭路  
近白雲鄉明朝相送柴門外笑問閒閒十晦桑



遵化州牧毛心齋枉顧有贈

漁陽古郡舊稱雄遺澤于今溯召公地重股肱煩  
偉畧化馴鳥獸識仁風

堯陵舜寢神常鑒胡絹裴牀譽自崇虛白堂開有餘  
暇詠歌還與昔賢同

王小坡少宗伯引年得請將歸明歲適屆七  
旬率賦二律贈別兼以爲祝

講筵聯步侍

先皇四十年來汗簡香往日聲名如泰岱於今風度  
擬靈光告歸得請

新恩重送別追思舊夢長共慶古稀春已近西江明

月待仙航

二

耆舊風流孰比肩優游洛社繼前賢閒能却老身  
彌健退可忘機道益堅得句猶懷天上事持杯真  
是地行仙容臺握手思前日望斷青門暮柳烟

題徐采若林泉高致圖小照

萬竿修竹一溪雲古樹扶疎拂紫氛百道泉聲來  
入耳亭亭獨立意何云

二

當代徐熙絕藝傳

兩朝供奉已多年披圖忽作林泉想物外溪山畫裏



仙

三

藝林盛事憶高情老輩王楊共擅名二十五年縑

素舊蒼顏不改昔時清

此圖畫于已卯爾時宋堅齋少司馬方開局繪南

巡圖諸名手畢集采若與石谷王子野鶴楊子同  
時擅名為京華韻事今二十五年矣風流雲散而  
采若尚畱京邸披圖慨然

自題斗室

茅簷斗室一身藏容膝安居陋不妨布幕周遮逃  
閃電紙窗深護避風狂著書立說憐衰晚學佛求  
仙歎渺茫已過古稀猶健飯天餘歲月足徜徉

茶鑪

茶鑪小築傍窗櫺蟹眼松風靜裏聽滿地冰霜畱  
宿火一甌入口夢初醒

雍正二年甲辰元旦偕諸大臣恭詣

先帝景陵祭祀禮成歸寓率賦二律

鳳嶺瞳矓散紫烟

堯陵肅拜

聖人前

龍顏如在重更曆鵠立瞻依別有天耆舊同班多玉

杖元辰祝健盡華顛祭餘

賜酒金階畔錫福酖顏色尚鮮

二



金貂歸散草廬邊旋換羊裘拂故瓊敢擬香山思  
結侶真同絳縣不知年余年七十三正如絳縣老  
人所言四百有四十五甲  
子而不盤堆瓜菜多禪味門絕輪蹄斷俗緣非野  
非朝是何境

玉皇案側舊稱仙

題垂楊白鷺圖

雪客風標不可緇垂楊堤畔俯清池低昂獨立多  
幽致亂舞狂飛笑柳絲

二

千條拂地漾晴空漢苑隋堤事不同鶯懶鷺忙春

欲去一枝閒坐白頭翁

枝頭有白  
頭公一隻

同邑老友朱三英昨歲屆八旬矣偶爾憶及

賦詩四首寄之

金石論交五十年羨君真是地行仙養身久悟嵇  
生論樂志差同仲子篇歷盡浮華參妙道不求聞  
達得真筌雲烟變幻紅塵暗誰信壺中別有天

二

膝前蘭玉盡能文肘後金丹已易筋小隱還當成  
大隱白雲那復慕青雲喬柯獨挺寧爭豔野鶴孤  
標自不羣晏起早眠行却杖勞勞鍾鼎盡輸君

三

卜築幽居傍碧潯市喧塵事不相侵酒香招共鄰



夢日堂詩卷三十一  
農飲詩就閒教穉子吟濟世有方聊治病救時無  
藥可醫心八旬已過身猶健可許丹臺異日尋

四

功名我愧隳藩籬金紫相牽解脫遲十畝未成歸  
隱計三生追悔坐禪時故園松菊靈光峙渡口桃  
花釣客知只有忘機增歲月百年莫笑俗情癡

題馬侯收綸圖小照

功成身退早知幾漫畫收綸與願違

此圖乃三十年前所畫

老向茅簷高卧足河山帶礪一蓑衣

二

獨破霞關定八閩鯨鯢洗盡海天春臣忠子孝垂

青史笑卷洪濤萬丈綸

三

江海波澄力已殫

先皇恩重乞身難廉頗今日原無用扶杖蹒跚恥據  
鞍

四

柴門閒倚暮雲寒麟閣真同噩夢看何必扁舟湖  
上去

堯陵近處有仙壇

五月下浣自京城返

陵麓泥濘難行舍車策馬避暑宵征研農兄貽書誇



其老健余豈得已哉口占奉答并示京寓諸親友

驅車還潯跨征鞍老馬曾諳行路難徑遶溝塍從  
委曲宵看星斗漸闌跚癡頑總任揶揄鬼顛倒聊  
同泡影觀是處出門多險阻到來借得一枝安

五月之杪大雨三晝夜邨舍傾圯人行斷絕  
余所居草廬幸尚無恙率賦二首

重巒積雨水如潮茅舍繩樞欲動搖地白山浮遮  
畝澹天低雲暗失朝昏炊烟稀處如沈竈行路無  
人爲斷橋有叟安居還飽食危巢相對一鷦鷯

二

我是吳牛愛雨窗熟梅天氣是吾邦硯生雲霧詩  
腸潤爐炷清香俗慮降車馬斷時欣寂寂澗泉入  
耳聽淙淙漁翁若有扁舟便可得浮家萬頃江

雨後遣興

牆傾籬斷接東阡樹色山光近眼前澗底飛湍縈  
素練隴頭低壤俯平川衣冠無用狂追阮豪楮相  
和草學顛贏得閒身添好景風光柔潤似南天

晝寢

晝寢翛然夢境恬雷聲忽送雨纖纖無情却得忘  
情趣不老溫柔老黑甜

寫經偶題



學佛無能但寫經半生沈醉暫時醒齋心已却塵  
凡想盟手終嫌齷齪形硯匣香爐爲伴侶剝藤貝  
葉有晶熒前生早悟無生理又向人間作蠅螟

村中楊耿臣秀才以詩見示援筆和之

一編秋水愛莊蒙明道從來不計功塵世榮枯多  
是夢洪鑪造化任爲工驅炎恰遇連宵雨除濕還  
思滿徑風欹枕未眠人寂靜卧看新月已朦朧

狂言

非朝非野非塵市似出似處亦似禪有官有祿有  
妻子無憂無羨亦無緣高眠飽食誇朝士紆紫拖  
金飾老年仕隱之間中立者他年別傳附殘編

庭中手種瓜蔬頗供朝夕戲成三首

種瓜旣分區藝菜名各殊庭院紛羅列盤飧足自  
娛晨羞方飽腹晚摘又充廚試問廟堂肉何如葵  
藿腴

二

肉食從來鄙素餐亦所譏守園戒奪利

用柳元景事

抱

甕愛無機閔叔誠自苦蘭香羨耐飢菜羹從古好  
不是首陽薇

三

笋美兼萼滑嗟非土所宜元修堪作友張翰漫勞  
思壓架黃蘇熟堆盤白饅肥爲藿畱旨蓄好及歲



寒時

蔬食

聖人言愛物釋氏戒戕生蔬食安儒素清齋近道  
情山廚無宰割茶竈有逢迎澹泊心神爽醍醐是  
菜羹

二

方信周顒語非矜崔瑗清

後漢崔瑗居常食菜羹

香浮七月

菽味薄五侯鯖根齧嗟無齒茄甘滑似餠高人如  
過訪入饌有珍烹

村酒薄甚飲之亦醉戲作

美祿非吾分賢人狎酒翁糟牀嗤杜老種秫笑陶

公麴蘖休相侮杯槍聽屢空清泉新汲好兩腋已  
生風

同年孫莪山偕諸朝官詣

景陵陪祀同在班聯未得把晤却寄

老因交澹更情濃落落晨星近曉鐘久接班聯今  
異轍乍同拜跪不相逢黃塵紫陌空勞憶白飯青  
芻愧未供聚散何常誰健好思君長對嶺頭松  
族姪世賞年近八旬矣長子允衡能文以一  
副車早世允衡之子異三幼孤能讀父書今  
春得列鄉薦喜而有作

弱齡風骨識興宗千卷藏書有一龍

用丁讀廢蓼



我窮學海嘗餘熊膽礪詞峰班誇玉笋真無愧選  
號青錢好就鎔秋水初澄涼月皎詩篇待賦鏡芙  
蓉

用李固  
及第事

二

我是知交大父行荷衣出拜憶書郎白頭相望知  
誰健黃紙名傳喜欲狂有穀詒謀心足慰不求溫  
飽器難量層霄直上丹梯近駟馬高門奕世昌

笥中寶藏

先帝御書金扇一柄乃

元龍

戊戌入覲蒙

恩賜者暑雨恐受潮熱開械展讀詩句有故人好在  
重攜手之句不禁涕泗交流也

宮扇

親揮御墨香詩篇寓意

聖恩長七年珍重傳家寶今日開函淚萬行

同年孫莪山貽詩依韻和答

澹泊生涯吾道存清泉白石亦前因茂陵秋雨勞  
相念贏得閒身學守神

二

金石交情原不易簡繒贈答莫嫌頻敢言懸榻吾  
家事已倩清風爲掃塵

來詩有高榻  
拭塵之句

和詩甫畢聞同年李繩其自遼左擢大司空

疊韻二首



白頭兄弟幾人存遠別生還詎有因今日冬官新  
拜者二年遼海已傷神

二

逆旅通苓何足論樽前惟願笑言頻丹臺得道非  
容易自笑癡頑隔兩塵

今夏炎熱異常立秋驟涼思御綿衣昨日今  
朝寒燠頓異知炎威發泄已盡天道固如是  
也

寒暑分俄頃今朝異昨宵人情懷故絮物意厭珍  
綃樹裏蟬聲靜窗前蝶影嬌清涼驅猛烈萬彙盡  
逍遙

無悶篇

并序

客有言獨居岑寂無以遣悶者因作此以  
廣之

寂寞性所甘塊居恒永日四壁自澄清撫几取容  
膝尚友懷古人隨身富緇帙到處次第陳檢點分  
甲乙經義費研求半解歎愚室史傳汗漫多縱覽  
窺得失裨野足娛情遊心資放逸有時吟長歌間  
或占短律滌硯汲清泉磨墨弄柔筆茗椀手自烹  
爐烟愛回遙談空慕長生寄懷仙與佛度曲辨宮  
商閒情亦所矚庭草見生機灌花水一溢明月共  
畱連清風堪沐櫛當暑就陰涼披裘禦凜冽春固



樂韶華秋亦忘蕭瑟嗜好逐景移樂事滿一室靜  
中亦有忙杜門又何出良朋未易期俗客吾所嫉  
蒲團愛跏趺塵纓畏牽率人世任榮枯不聞可勿  
恤猶恐剝啄聲雙板未嚴密憂喜不相關此中自  
寧謐畏寂由心馳曷若守專壹徵逐徒勞形衰老  
當自佚無悶得真詮息影安且吉

聞同年鄭英玉率二子計偕來京年逾七旬  
強健如昔詩以代柬

宦拙投閒得避喧忽傳芳訊到衡門七旬追憶新  
同館二紀猶懸舊別魂老似寒蛭應退縮喜聞雛  
鳳競續翻京華相望紅塵隔遙聽車音意倍敦

聽鄰家彈琵琶

檀槽一曲夜三更嗚咽奔騰意不平塞上何人悲  
遠別樓頭有客弄新聲

二

迅手更張大小弦一彈再鼓競喧闐絃絃欲絕聲  
聲急鐵撥翻新得幾年

京中廟市菊花一本幾百萼以繁豔爲勝余  
庭中植數枝花少而逸趣天然頗得陶公東  
籬之致適家人自京師捆載十餘本而來爭  
誇繁盛然不若庭中之天真爛漫意味蕭疎  
也感而有賦



數枝弱植傍疎籬  
瀟灑風前又一時  
收比陶公稱寄傲  
幽懷冷趣少人知

二

木落霜明獨自開  
杖藜相對重徘徊  
華堂百本矜繁豔  
局促屏間亦可哀

三

秋容無豔晚香清  
數朶凌霜物外情  
輦致繁花供束縛  
爲人憔悴爲人榮

四

寂寞墻陰獨後時  
離披綠葉少扶持  
金風昨夜澄清速  
畱取寒英一兩枝

玩菊二首

冰霜司令日林木盡凋時  
畱得黃花瘦偏于晚節  
宜成蹊終易散荒徑可相依  
蜂蝶歸何處幽香只自怡

二

五斗誠何戀三杯畏獨醒  
孤懷長耿耿弱幹自亭亭  
媚世無妖豔延年有性靈  
千秋彭澤往空對遠山青

聞朱巍成捷禮闈有寄

秋空健翮好飛騫  
勁節黃花勝杏園  
一第已酬書萬卷  
九重待獻策千言  
功名得路心逾澹  
溫飽無



營道自存理學君家宗海內致身不負聖人門

昨夜二首

昨夜寒威到客牀曉來已見滿庭霜時逢素節多  
搖落人與疎林總澹忘一室退藏何處密千疇拋  
棄亦從荒世間往復尋常事却笑悲秋枉斷腸

二

禦冷何須憶驪驢羊裘短褐足徜徉雁飛碧漢因  
無礙月到寒宵倍有光木落風狂催急景冰堅雪  
厚蘊初陽荻簾深護跣趺坐消息閒看一炷香

十月三十日爲今

天子聖壽偕諸公入京呼嵩先一日入城適值余生

辰親知咸集而余已自忘之也

牛馬生當

聖壽前來京兒女話團圓心情寂寞開樽懶齒髮凋  
殘顧影憐甲子頻添逾絳老光陰漸逝過虞淵交  
親莫訝顏如舊投老空山不記年

十一月初六日冬至祭

陵禮畢歸寓

待漏追趨侍玉陔

堯陵拜罷有餘哀微陽雖報寒灰動沍冷猶遲淑氣  
回燠空有花非月令喬柯無色待春來細推造化  
循環理一綫徐添未可催



愛日堂詩卷二十二

重臨集

甲辰十一月  
至丙午二月

甲辰冬奉

命往粵西經理倉儲行役所經吟詠成帙粵西爲余  
向時出撫之地因名重臨集

臘月六日啟行重赴西粵

并序

粵西地廣而瘠米穀之外無他產民間賣  
穀以資日用廣東山海交錯所產之米僅  
足供半歲之食惟府江一水與廣西相通  
民食又仰給於西省偶遇歲歉則兩省交  
困而廣東濕熱米穀不能久貯故廣西積



夢窗詩集卷三十一  
貯關二省之民命余昔年撫粵貯米百萬  
餘石茲李撫軍請散去之

上不允其請而命

元龍

重往經理慮所貯不實也

爲籌民食九年儲積貯千倉備有餘不與蒼生謀  
可恃翻憂紅腐術何疎重臨經理勞

宸念垂老馳驅逼歲除

聖世邊方無水旱迂儒遠慮悔當初

過方順橋小憩柱石方叟齋中叟與余齊年  
不仕隱居黑髮朱顏無恙因贈二首

杜門高隱者近市亦何妨孔道輪蹄集幽居翰墨  
香問年驚齒髮堅卧看滄桑下榻慙徐穉王程尚

渺茫

二

同甲君猶壯艱辛我已衰故園歸未得驛路去難  
辭相對仙凡異長吁仕隱岐還轅重過此又是隔  
年期

距邯鄲縣三十里地名黃梁夢道左有呂仙  
廟塑盧生像伏枕酣卧

夢境沈酣髮盡絲癡情尚向夢中思回頭便是蓬  
瀛路寧待黃梁飯熟時

二

明知是夢苦相牽夢裏經過每惘然不到夢回誰



覺悟枕中何處去求仙

渡黃河宿滎澤舊城故址

洪河南北亘中州泛溢頻年

聖主憂千里金堤修保障萬家烟火復遷流驅車問  
渡人猶昔下馬觀風景不侔借得一帆風穩便天  
憐衰老不禁愁

過鄭州許州道中三首

渡河南去恰春歸二十一日渡黃河料峭餘寒透客  
衣堤柳漸稀叢竹瘦征塵不動麥苗肥四輪車穩  
驅雙犢數仞墉高塞半扉土沃風淳沿自昔卽今  
民俗未全非

二

道旁積雪滿溝塍日暖泥融氣欲蒸茅舍曉烟凝  
宿霧小橋流水渙春冰雞豚賽社知年盡稊稵盈  
車是歲登羨殺白頭閒父老昇平百載世相承

三

驛路迢迢日向南風光柔潤氣清涵雪晴土暖浮  
膏綠雲散春明見蔚藍沽酒農夫來野店飲牛稚  
子繞清潭嬉遊笑指乘軒者白髮勞勞亦自慙

將至信陽山路崎嶇名九岡十八窪

凋年急景倍蕭森路繞山村日欲沈地氣近南風  
不勁春光破臘暖多陰平岡縣亘中原盡複嶺紆



迴客路深孤鳥不知何處宿倦飛猶未得歸林

除夕冒雪早發至李家寨度歲三首

客路逢年盡山行又雪深疎林排玉樹疊嶂列瑤  
岑隱羨袁難企豪輸戴可尋茫茫不辨徑老馬任  
駸駸

二

聞道雪經旬春歸未見春乾坤渾一色樵牧寂無  
人行旅供圖畫關山有宿因望晴思布暖詰旦是  
元辰

三

守歲投茅舍瑤光入戶明堆盤生菜嫩醉客臘醅

清瓦乍圍商陸銅餅煮玉瑛京華兒女子憶我話  
深更

乙巳元旦雪霽早發行亂山中過武勝關入  
楚境矣

元旦晴舒日一輪四圍疊嶂爛如銀光搖林木圖  
難就春入溪山氣倍新行歷崎嶇分豫楚從來征  
戰舊關津天開好景供吟詠于役無須歎苦辛

二

山村掩戶換桃符老幼歡呶興未孤爲問高軒長  
作客何如負耒不爲儒巒迴徑曲行難盡路滑泥  
融僕已痛且喜新年增暮齒笑沽春酒當屠蘇



人日漢口登舟風順遶行戒舟子半帆稍緩  
停車鼓柁漢江頭便擬乘風溯上游破浪不教孤  
客滯空舟終抱滿帆憂魚鰕賤市風猶昔鹽米高  
騰事不侔三楚由來稱富庶只今撫字藉良籌楚聞  
地去年旱荒繼以水災粟價倍於往時又新  
定鹽價嚴私販而鹽愈少愈貴民甚苦之

初八日曉發遇雨

穩卧扁舟細雨來楚江烟景亦悠哉蓬窗煮茗閒  
開卷漁父披蓑共溯洄汎汎野鳬嬉綠水茸茸岸  
草覆新荻遠山濕翠渾如畫一棹夷猶客抱開

雨中江行二首

江雲楚雨帶風斜帆重舟欹水驛賒高鳥飢飛離

燕雀老龍困卧逐泥沙冥冥晝黑琉璃暗漠漠天  
低翠黛遮舉網得魚來易栗烟波一艇便爲家

二

神女行雲蔽楚天連朝風雨送艤船陰寒巾服微  
生濕歌笑篙師懶罷牽逆浪江聲鳴舵底迴灘雁  
影沒洲前濟川不是衰翁事無恙遄征思渺然

雨中泊舟岳陽城下

洪湖萬頃聳山城噴薄朝昏一望平烟雨混茫迷  
遠岫舳舻環集向神京湖南糧艘畢集人懷賢守今陳迹

謂顧雨若太守事逐滄波又遠行便擬登高憑弔古岳陽  
樓閣已先傾



過洞庭湖晴霽

鄂渚朝看浴日紅君山遙望曉烟中經冬水落沙  
清淺過雨嵐浮氣鬱蔥檣集神鷗行自穩風來少  
女不須雄孤舟免却波濤惡夷險無心賴化工

二

轉蓬身事歎多艱蛟室龍堆復往還帝子千秋愁  
渺渺楚狂一曲水潺潺巨魚有意潛波遠俊鶻無  
聲度水閒遠涉江湖銷歲月強因朱紱悞衰顏

舟中夜雨正月十三日也

孤舟聽雨不成眠汨汨江聲到枕邊殘燭無心空  
有淚餘香有味已無烟戍樓鼓軟隨風咽遠市鐘

微雜水濺雲雨楚天多夢幻月明不照往來船

過湘陰縣

漸離楚澤近湘江硤淺灣多溯激瀧仙蹟渺茫畱

古廟

俗傳許真君召龍處

漁磯斷續接徒杠風吹雨過絲千

縷水破船頭槩一雙只有青山不改色碧螺如畫  
對篷窗

武昌夙號多魚今沿江上下漁人所得皆一  
寸二寸者

舊說武昌魚今來不似初漁舟布網密行客入餐  
虛大澤脂膏竭微鱗吐沫餘開尊聊自慰澗芷共  
山蔬



上元夜泊舟長沙城外

上元風雨到長沙山郭江城靜歲華只有水光沈  
夜月更無燈火照人家寒多漏盡爐銷焰酒罄詩  
成燭吐葩令節都忘非但客孤舟獨繫不愁譁

湘潭易小舟而行尚可容膝戲賦

自笑江湖客浮家小洞房

杜詩舟虛小洞房

雲生侵硯潤

流潔助茶香漸與熏爐近都忘襪被涼白頭行旅  
慣逸興未能忘

十八日早發聞雷驟雨

未分漢殿火已聽楚祠雷亂點船窗震斜侵簷席  
摧遙迷神女霧應發嶺頭梅灘急聲如沸喧呶溯

激洄

晚晴

半月晝冥冥新晴展畫屏水明沙嶼白霞赤暮山  
青春入湘江淨風銷楚澤腥夜深殘月上照我客  
中醒

聞畫眉

岫曲沙紆度碧潯嬌喉宛轉出春林慧心自說幽  
棲樂巧舌翻驚過客心眉似遠山沾秀色聲兼百  
鳥是知音前生應伴張京兆繡閣雕籠取次吟

過衡山縣望南嶽

南嶽巍峩鎮楚天山腰橫截白雲邊炎方半壁神



靈護望秩千秋典禮虔萬丈清光思渴日五峰高  
峙隔非烟青瓊丹籙深藏秘未許凡胎去學仙

湘江舟行

湍駛淨無泥溪迴路欲迷片帆時上下牽纜忽東  
西蘚石波中出春禽竹外啼人家烟霧裏積翠映  
玻璃

二

舟底沙兼石天光霽復陰濕雲常靄靄盪日自沈  
沈綠水好顏色青岑聳碧簪湘妃千載淚遺恨到  
于今

三

岸斷循山脚村荒近水隈片雲旋布雨隔嶺乍聞  
雷蜂趁微暄至鳬隨細浪來羨魚磯上叟終日坐  
莓苔

四

無風淨綺羅輕棹狎盤渦淺瀨金沙軟新春碧草  
多明珠何處採翠羽幾時過照水嗟容槁停橈一  
放歌

衡州江邊有構竹屋于筏上軒窗清雅可居  
喜而賦之

竹屋虛明共筏浮軒窗歷歷在中流不營尺土多  
牽繫長泛清江任去畱錦纜牙檣輸穩卧洞房曲



室愧周遊飛雲捲雨朝還暮好伴仙槎到十洲

漁舟

小艇似長蛇凌波去每斜魚龍常作侶鷗鷺共爲家  
深夜聽湘瑟乘秋接漢槎風濤多習慣撐突不聞譁

二

截江看設網旋轉捷如風盡取誠何厭求多歎屢  
空鳬鷺驚散遠鱸鮓亂流中無意垂綸者閒看逝  
水東

聞鄰舟夜話

暮雨朝雲舊楚天鄰舟有客話當年香腴飯飽長

腰米肥美盤堆縮項鰣估舶迎神喧鼓吹花村賽  
社接炊烟於今寂寞滄江上斜月疎星照客船

夜聞簾櫳

暮宿滄江上吹笳野戍孤水聲同浩渺雲影望模糊  
清角悲春夜邊聲夢老夫中宵不成寐繞樹又啼烏

祁陽縣觀摩崖大唐中興頌

顏書元頌二絕兼千秋萬世垂蒼巖氣開溟滓文  
章古筆挾雷霆體勢嚴鶴峙蛟蟠風凜凜苔侵雨  
剝光炎炎仰觀思作三日卧王程牽率未敢淹

石鏡



蒼崖壁立自生光雨洗雲磨歲月長仁壽殿前誰  
共見咸陽宮裏漫深藏玉瑛曾記東方賦石鏡空  
勞異域航若使肺肝能盡照行人過此亦徬徨

登舟二旬餘無日不雨二十九日晴霽始觀  
瀟湘早春景象喜而有賦

浹旬斷續淒江雨今日澄明見楚天幾簇野花依  
曲澗低飛燕子掠晴川浮雲散盡山容潔積霧初  
消草樹鮮何處春光最清淑瀟湘新霽好遊仙

上灘

危灘亂石水淙淙賈勇篙師不受降涉險瀟江同  
蜀道逆湍楚艇異吳艤青崖夾岸森羅立白浪迎

頭任擊撞一幅畫圖三百里朝朝展卷對篷窗

晴江

江清日暖霧初收畫就溪山任客遊黃鳥縣蠻穿  
雜樹白魚撥刺躍中流小桃修竹圍村舍跨澗懸  
崖見佛樓若向此中長避世漁樵爲侶卽丹邱

過東安復陰雨

一棹紆迴溯碧潯乍晴乍雨晝沈沈白衣蒼狗移  
朝暮翠黛青螺自古今東去源泉常不息西來嶂  
霧每多陰若非王事誰經此垂老重遊與細吟

垂釣

世情思馬翼吾意愛漁竿池沼有時涸江湖羨爾



寬餌香誠可戀鉤曲吐知難浩渺滄波濶深潛去  
去安

隨緣

脫身幽討卽丹邱豈必麒麟最上頭蘭植當門終  
見棄豆荒一頃更何求韝鷹空羨雲中鶴置兔寧  
如水上鷗千古鴟夷誰得學隨緣桂棹任夷猶

二月初七日登湘山重瞻無量壽佛真容

曾禮真容仰佛顏年年祝

聖到湘山重瞻滿月光如舊永慕

騎龍痛不還壽世

宸章慈蔭在孤踪陳迹淚痕斑法雲若肯長垂護火

宅清涼頃刻間

二

十年重得謁琳宮垂白浮沈似轉蓬明鏡拂塵慙  
慧業金篦刮膜歎愚矇山光可挹如吾友野老猶  
知愛此翁細草高松皆有意拈花一笑萬緣空

水車

激水行車自轉輪截筒旋汲萬千巡高陂引灌從  
天降繡隴徐霑布種新自是山川能潤物非關機  
巧可通神江南農父休相羨造物應憐瘠土貧

入粵西境

柳色桃花相與新又逢嶺外一回春山應笑我衰



何甚我愛看山意尚親手版前迎無故吏隴頭歡  
繞有村民十年何事堪重問白石清泉皓首人

全州山中多春蘭土人不知珍愛余昔年官  
于粵移植甚繁此來覓得數本種以瓦缶香  
氣襲人真君子之交也

空谷芳蘭是素心昔年移植費幽尋數枝自發羅

家瑞

晉書羅含致仕回家叢蘭忽放人以爲善人所感

九畹徒滋楚客吟

綺石黃磁無雅供

王維貯蘭必用黃磁斗養以綺石

光風清露有

知音敷榮未肯同蕭艾鄭重相看意自深

十四日至桂林兵民老幼男婦夾岸填街歡  
呼迎迓旣感其意復愧于心率賦二首

重泛扁舟到桂林山川依舊愧棠陰兵民夾道情  
何厚婦子填街意自深豈有餘思仁者政難酬直  
道古人心相看憐我顏如舊慰問停車淚不禁

二

卧理邊方憶舊恩才疎政拙不堪論市人尚說當  
年景碑記猶傳昔日存

余初設義學育嬰堂焚獨院至今碑記尚存

閒

向溪山搜洞穴還將樂利問兒孫青松翠竹都無  
恙伴我蒼顏一笑溫

五日

桂海風光憶故吾炎風暑雨長新蒲客中換節驚  
殊俗老去忘機只守愚知命不須絲縷續無邪寧



用印桃驅暫閒便作長閒想一枕青山得遂無

張憲副惠蘭二盆兼餽盤餐賦謝

重遊嶺表荔枝丹喜得同心臭似蘭雙斗黃磁勞  
遠致三間素壁對更闌芳香不覺情歸淡善氣相  
迎味似禪梗泛都忘身是客世交鄭重累猪肝

二

乍晴乍雨值靈辰夢覺難分獨愴神翠竹蒼松還  
似舊榴花艾葉又更新盤餐拜賜珍羞富詩句都  
荒儉腹貧我是侯生今有幾師門慚愧一陳人

題朱海樵小畫

不逐花開謝對人長自青那知炎共冷莖葉自亭

亭

右墨竹

蒼翠飽經霜迴盤歲月長毫端萬鈞力撐破玉霄  
光

右古松

橫斜隨意放屈曲亦天真淡墨疎香在梨雲夢裏  
身

右墨梅

空谷無人好幽香只自知畫成還獨步凡卉敢相  
依

右叢蘭



疊彩山風洞納涼

天風吹盡世間炎洞口披襟一惘然石室巖居懷  
隱遯冰牀雪被亦因緣身涼誰悟心涼好大隱終  
輸小隱堅辜負白雲畱不得遙聽笙鶴過山巔

首秋出水東門過浮橋遊七星巖之棲霞寺

小憩阜成書院二首

聯舟鐵縷鎖城東靈境巉巖有路通滿目烟霞開  
寶刹往時忠義翊宗風溪流斷續泉聲咽石磴荒  
涼屐迹空躑躅浮漚緣未了重來登陟雨花中

二

珠林西去有書堂講學明農舊事忙壁立青山還

似昔懷中赤子歎如傷

余昔年于寺西建阜成書院爲講學明倫勸農之地

旁建有嬰堂收養棄嬰甚多今漸荒廢

宦遊老去長浮海禪侶前因

想渡航擬向遠公求解縛跣趺雙足一繩牀

是日偕朱子巍成呂子晉東徐壻敘九同遊

巍成賦詩見示疊韻奉和

遣悶聊爲物外遊浮橋穩渡過江頭蒼松翠壁消  
煩暑驟雨飛雲報早秋棋局紛時容袖手酒兵喧  
處聽泉流阜成未竟平生願剩有青山繞一州

二

築堂不是爲閒遊刻石畱題最上頭

余有阜成書院記刻于石

壁之上

尸祝棠陰嗟念舊

粵人設余長生位于堂中見之滋愧孤踪蘋



散又逢秋花村難問當年景澗水長教萬古流蕭  
寺晚鐘催客散滿懷冰雪入炎州

贈全州蔣石塘學士

并序

桂林舊有華掌書院前撫軍郝雪海先生  
所建年久就圯余爲重葺集士子讀書其  
中不忘前賢之遺愛也茲李巨來延石塘  
爲書院之師庭宇如舊而更名之曰宣成  
他年華掌陳迹不可問矣

從來冷性不辭寒澹泊心情歲月寬世嫉名高難  
入世官因人重不求官喬松肯逐羣花豔獨鶴寧  
隨衆鳥歡縱是徵書天上至白雲畱住谷名盤

二

十年曾蒞鄭公鄉今日重來到講堂設帳名賢瞻  
渠範橫經弟子集琳瑯文章直欲凌江左品望相  
期壓廟廊高卧東山多事業先將時雨化維桑

節屆中秋炎暑未消夜半忽聞大風涼甚

金風夜半埽炎氛獵獵疑從塞上聞夢醒未沈窗  
外月曉來盡洗嶺頭雲淒清筆硯凝晨露撿點衣  
冠待夕熏客裏都忘佳節換不知秋色已平分

送司臬白又蘇北上

政平似水德如風息事寧人獄訟空英蕩清名垂  
嶺表繡衣峻望冠寰中三年執法松千尺萬里歸



裝鶴一籠夾道攀轅畱不得棠陰遺愛古今同

朱海樵以粵花皆先時早放巖桂獨遲中秋  
有月無桂因畫桂花一枝題詩見示和韻奉

答

秋花肯與俗爭先莫對冰輪重惘然應畏吳剛多  
斫伐遲開不趁月明天

二

粵嶠吳山月並圓天香不到嶺西天素娥有意遲  
青女畱取幽芳落木前

再題二首

八樹千年事已空一枝遲放避炎風畫圖直奪天

工巧拂拂香飄皓彩中

二

憑將淡墨繪天香金粟氤氲出錦囊招隱叢枝何  
處好廣寒仙子笑人忙

題孫三庾清溪濯足圖

三庾名家子余甥壻也為貧而仕今為思

城土州吏目

薄遊混跡總隨時何必深山托遠思笑指清流供  
濯足陸沈何處不相宜

二

邱壑難忘性自全鑿坏避聘亦拘牽萬鍾五斗皆  
如夢不改青山在眼前



三

折腰暇日卽東籬微祿聊供沽酒資閒到溪頭還  
獨坐一聲長嘯碧雲垂

喜雨

嶺西南路厥土瘠石田如掌依嵯隙高下欹斜灌  
漑艱江流直瀉無大澤浹旬不雨走農夫激行上  
山苦無策大吏憂心契昊蒼致齋步禱精誠格崇  
朝布雲慶滂沱貧鄉到處沾膏液清風德意自洋  
洋戴笠披蓑咸嘖嘖絕壁泉噴似畫圖斗河水溢  
歡行客僕也羈棲澹蕩人祈年閔雨嗟陳迹父老  
猶知愛故人寧同秦越殊今昔客館涼生暑乍消

仰天一笑還浮白

喜晴

連朝霑足懌羣情雨歇雲開又喜晴苗含宿潤迎  
風舞樹帶輕烟向日明土潤暖蒸看吐秀茅簷不  
用愁天漏樵叟行歌度晚暉漁翁晒網娛清晝千  
峯畫障一時開飛鳥遙從澗底來積翠明霞相掩  
映荷香苻帶共縈迴泉源已足堪持久早穫晚收  
走千耦今年風日順人心未到三秋占大有霽色  
涼風自可親窗明几淨喜無塵摩挲老眼重拈筆  
且與田家記苦辛

賦得冰壺秋月十韻



夢窗詩集卷三十一  
天因寒更皎物以潔偏明灝氣澄無滓虛中鑒倍  
清涼宵瞻皓彩素質燦精英幽隱無私照妍媸各  
自呈芒冲千丈峻光射萬靈驚香霧寧能掩浮雲  
未敢縈懸空通八極高朗洞羣情寶器來瑤闕仙  
遊到玉京殊珍誇照乘綺席廢長檠青女明朝至  
丹霄鬪玉璫

賦得秋露如珠

十斛從天降晶熒箇箇圓夜光荷葉動朝飲木蘭  
鮮琢玉應輸活鏤冰亦遜妍月中疑蚌吐樹裏訝  
星懸錯落全無質空明未可聯何須珍照乘甘美  
慶豐年

賦得秋菊有佳色

黃花疎冷獨稱佳數幹凌霜百卉排紅紫妖嬈羞  
作伴松筠勁直意相諧高情只合棲幽谷正色還  
應上玉階老圃秋容珍晚節籬邊好與護根荂

桂林春花皆先時早放秋花獨後朱子海樵  
有中秋無桂重陽無菊之慨率賦二首

平半秋光正好時天香雲外繫人思桂林翦伐無  
多樹桂林皆桂因兵  
燹翦伐已盡瘴海炎蒸更後期金粟成金

嗟物換蠹香貢蠹至今疑漢書尉陀  
王貢桂蠹故園叢放長  
辜負晚節孤芳莫怨遲

右中秋無桂



三徑從荒又九秋黃花寂寂使人愁無霜可傲偏  
遲發粵地無霜有客將餐未許求不共茱萸陪令節相  
依蘭杜隱芳洲樊川笑口憑誰放畱取寒英歲晚  
遊

右重陽無菊

再疊前韻二首

小山招隱豈逢時高潔巖花動遠思金粟應歸天  
上去幽香寧與世間期一枝邴子從誇異八樹神  
經亦可疑木落霜清凡卉盡淮南尋訪未嫌遲

右中秋無桂

叢菊遲開嶺外秋鄉心莫遣少陵愁陶籬何處登

高望酈水無緣入谷遊懶向柴桑尋處士遙看鴻  
雁落汀洲尊前底事增惆悵健好明年記客遊

右重陽無菊

九日四首和杜工部韻

豈是東籬誰送酒遙瞻北闕試登臺忘機白叟寧  
逃厄畏熱黃花任晚開夢斷砧聲衣未換風飄雁  
影客重來休嗟衰謝情懷惡冷淡光陰不我催

二

僻性還尋句無情罷舉杯故園誰是主叢菊不須  
開搖落三秋暮行藏萬里迴炎方今日爽颯颯好  
風來



三

項臺空戲馬滕閣漫誇文凋謝何人在升沈往事  
紛登危心已懶閉戶耳無聞嶺畔奇峰散蕭疎有  
片雲

四

江籬懷楚客此地是湘源粢糗還勞饋棠陰愧尚  
存紫髯無妓席東坡九日戲魯少卿詩笙歌正擁紫髯翁白髮有柴門  
世事空陳迹浮生憶舊痕晚酣陪好友冥漠亦開  
樽杜老何多淚悲歌枉自論

重九之夜風雨大作枕上口占

不去登高爲倦遊夜來風雨響牀頭炎威散處冰

心潔醒眼憐他醉客愁雁字書空從漫滅菊花香  
冷故遲畱世間何處堪逃厄只有溪邊一釣鉤

和杜工部秋興八首元韻

搖落蕭辰客桂林相看松竹尚森森三秋氣暖山  
常翠萬澗雲飛晝每陰倦鳥久迷歸去路喬柯空  
負歲寒心清宵寂寂跣趺穩塞耳休聽月下砧

二

風急天高雁影斜金商司令洗繁華長懷邱壑閒  
披褐敢向雲霄慕泛槎不畏寒侵餘賜被頻催霜  
信怨吹笳晚香自是天工惜有瘴休教放菊花林桂

菊花九  
秋未放



三

高旻新霽愛清暉捲幕攤書對翠微極目江天秋水濶登高山徑亂雲飛冥鴻遠去隨風便豹隱深藏與世違入饌蕪蔬吾已足悔教多病爲甘肥

四

讀殘青史似觀棋何歲無秋枉自悲密葉繁花凋謝處紙窗竹屋晏閒時飽經霜雪松偏久意待清涼菊故遲衰衰長江流不盡浮沈底事繫人思

五

門對清江面面山孤雲飄蕩有無間邊城戍鼓秋偏急陋巷柴門夜不關未卜菟裘歸老地空餘霜

鬢後凋顏世間只有閒居樂千古陶公不可班

六

冷葉殘花笑白頭忘情何事苦傷秋榮華易謝誰能久日月相饒莫滯愁夢到風前成化蝶醒來水畔狎浮鷗青山應怪畱題少重遣詩人滯桂州

七

麒麟閣上漫論功紫闥黃扉昨夢中尚恐潛鱗逢駭浪莫矜健翮倚長風沙頭鷺羽參差白木末芙蓉淺淡紅漁唱樵歌堪作伴久諳蠻語一衰翁

八

溪流遶郭亦逶迤閒把魚竿坐石陂野渡孤舟千



里客山村喬木百年枝破柑登俎霜前摘負稻來  
墟日晚移寒月當窗人不寐坐看河漢已西垂

爲毘陵陳子祖烈題照

喬松偃蓋有清陰獨坐蒼崕物外心一卷蒙莊長  
在手青雲何似白雲深

二

袷衣芒屨自蕭疎到處青山足隱居遊歷都忘身  
是客烟霞佳處卽吾廬

三

廣厦朱門意不畱名山五嶽擬遨遊隨身書卷茶  
鑪便奇景還將好句收

寄老友朱我文八首

甲子廻環萬事非星沈雲散故人稀杏花村裏磻  
溪叟有訣長生是息機

二

澗底孤松久鬱盤不知春豔耐霜寒秋風吹散繁  
華夢畱取清陰醒後看

三

浩浩江流逝可傷一潭止水靜難量桃蹊車馬今  
何在桑柘陰中日月長

四

圖畫麒麟勒鼎鐘風雲易散少從容生來不識天



涯路百歲光陰讓老農

五

茅舍春畦淺水濱  
耦耕獨釣未全貧  
此中便是桃源境  
寧必深山學隱淪

六

二十年來慕遂初

君恩畱滯老尙書  
故園好友勞相問  
多謝喬松憶朽

樗

七

不問榮枯只愛閒  
晚來進德是癡頑  
枯碁一局茶三椀  
到處青山尚可攀

八

小阮同行道義親  
鵠原又促未歸人  
衰翁自愛蒲團好  
爲報先生莫愴神

星沙李子溪濤爲余畫蒲團  
趺坐小照自題二首

七十年前足偶蹉  
化城苦海漫經過  
文章慧業都成妄  
仕宦名心總是魔  
便擬跼趺忘去住  
可憐身世易消磨  
回頭自有三車引  
莫戀人間一角蝸

二

本無一物惹塵埃  
好向蒲團歸去來  
八垢前因空躑躅  
五香舊地意徘徊  
鵲同棲宿寧爲險  
鶴入樊



籠亦可哀茅屋三間雲一塢此中歲月不相催

黃文江撫軍自閩中來重晤于桂林旅次憶

舊言懷率贈二首

才可安邦策濟時六年同事結心知剛嚴性直人  
皆畏愷悌恩深事後思粵嶺屏藩畱政績閩中鎮  
撫仰旌麾相逢慷慨心猶壯莫歎公忠負鬢絲

二

千倉積貯爲邊方不信良籌致名殃水旱無虞公  
論在身家有累寸心臧閒將青史觀前事俯鑒丹  
忱託

聖皇小草新花從吐豔兩枝老樹傲風霜

題畫

五里山塘盡賣花一拳虎阜古今誇清歌響遏千  
人石畫舫山樓靜不譁

虎邱

蒼松翠巘繞琳宮隨步尋芳曲徑通正是春深好  
時節綺羅香雜百花中

支硎

虎山橋亘百重山蕩漾波光浴翠鬟到處種花供  
賦稅早梅晚桂不勝攀

光福

積翠飛巒俯具區上方梵吹徹仙都館娃響屨空  
遺跡千載珠林萬頃湖

靈巖

行春橋下水潺湲一片湖光積翠環鏡面無波聞  
欸乃舟人遙指上方山

石湖



裙屐遊山各有時幽深罕到是天池松高萬壑人  
聲寂拾得溪頭白玉芝

天池

千仞獅山百丈潭疎林宛轉繞烟嵐傳聞勺水能

興雨龍室蛟宮不可探

獅山

虞山風景冠三吳繞郭烟巒近可呼拂水劍門遊

不盡登舟難寫尚湖圖

虞山

長橋百洞水淙淙震澤澄波萬頃降無限布帆來

去穩遙看塔影是吳江

寶帶橋

鴛湖烟雨有無中四望層樓駕遠空波浪不生平

似練扁舟直上水晶宮

鴛湖

題折枝樹蘭佛桑

金粟離離碧玉枝如蘭臭味晚風吹扶桑絳萼欺  
榴火絕豔幽香冠一時

二

天生名卉產炎方長得暄和逞色香移植畏逢青  
女妬嶺南獨自擅芬芳

題折枝佛手荔枝

兜羅綿手燦金光尚帶西天薝蔔香珍果高擎誰  
可伴絳綃囊裏有瓊漿

二

黃金紺玉色香兼巖桂輸芳蜜遜甜閩粵天生同  
夏熟從來霜雪未曾沾



題友人歲寒圖小照

松陰竹嶼見疎梅不爲爭春獨早開一片清香霜雪後此中有味足徘徊

二

蕭疎三友結交深過眼浮雲變古今看盡繁花千萬樹孤高獨抱歲寒心

題沈子安松陰小照

邀遊湖海悔飄蓬過眼繁華夢已空何似清泉環白石松醪引滿聽松風

二

豈關愛酒學劉伶塵世閒身畏獨醒白眼看人非

傲物醜顏半醉自冥冥

丙午元旦

獨著朝衣拜

紫宸賜貂餘暖尚隨身環門禱祝慙遺愛閉戶焚香

擬隱淪冷澹松筠還似舊崢嶸桃柳又更新異鄉

親故攜春酒語昔論今一笑顰

二

賓興二十四迴巡記得髫年應試新

余于前丙午初學觀場今

又丙午科矣

周甲重生能志學雌辰尚齒漫先人桃符

隔歲難司戶樺燭通宵不及晨風雨晝冥催臘盡

閒身高卧待陽春



初三日立春

春雨春風澹蕩春陰寒有意釀芳辰冰霜歷盡松  
仍翠膏露先滋草易新物異早時嘗菜甲廚荒倣  
古薦盤辛扁舟便下三湘去水漲無憂客路迤

是日余登舟粵人遮道追送遣之不去感而  
有作

多情父老擁孤舟冒雨衝泥不肯休德薄豈能留  
惠澤時移誰與障狂流寬仁聞有新持節時汪荇  
洲撫軍  
將愛慕空追舊客遊去去莫憐歸路寂江邊相伴  
有浮鷗

正月十三日夜風雨雷電大作舟子喧呶起

坐口占

電影雷聲震一川高山直下瀉飛泉長年估客喧  
如沸只有漁翁自在眠

二

雨散風收水漸平須臾月出已三更天工變幻曾  
何定坐撥殘爐對短檠

上元永州道中

桂棹蘭橈湘水濱上元佳節客中身迷人錦陌燈  
千樹照我清江月一輪乍雨乍晴風景異半寒半  
暖換衣頻高吟自笑還多事蠟炮香銷一枕親

寓言



暮雨朝雲說楚神時移物換夢中身名花飛作泥  
間絮細草旋爲坐上茵軒冕不營吾自貴簞瓢無  
累信甘貧人生過眼皆陳迹今世休辜後世因

二

空嗟出處寸心違梗泛萍浮未得歸知悔從前難  
寡悔昨非今日亦全非聖賢只是先知命否泰誰  
能早見幾四序推移萬物換百年寧計一身微

江行苦雨

半月春光半日晴滿天雲雨楚江情山巒烟重難  
舒黛草樹寒凝未展萌風惡忽驚如鷁退水添却  
喜送舟行憑將潑墨襄陽手爲寫瀟湘數日程

二

萬壑崩奔客斷魂欲翻江底洗乾坤泯泯水氣兼  
天湧漠漠春陰接地昏鶯入新年寒不語鷺浮激  
浪濕難騫瀟湘本是虛無境杜詩虛無只少對瀟湘烟幕山  
村霧掩門

靜觀

物理人情仔細探浮雲逝水亦何堪紅桃翠竹隨  
心愛綠酒清茶各自甘喧寂光陰何處久醉醒意  
味不相叅洪鑪鑄就難施巧莫問窮通任我憨

二

閒來枯坐更狂歌不向風前喚奈何今日朱門嗤



白屋有時紫綬羨青蓑花開頃刻春如夢酒醉逡  
巡客盡魔只有夜深寒外鏡照人幽獨不須磨

三

繁華工巧不多時天與清光詎有私燈燭焰銷明  
月在笙歌人散漏聲遲靜觀晝夜無停軌悟徹輸  
贏有奕棋用拙守愚心較逸幾先何必問龜著

四

折肱干祿失天機憔悴求歡生意微籠內珍禽違  
本性池邊野鶴幾高飛時來時去從開謝言是言  
非任刺譏學道笑他求不死空靈無累卽全歸

五

雲霧重重蔽遠空青山隱現有無中冠猴軒鶴曾  
何定去馬來牛未許同不辨陰晴分早暮何妨食  
宿各西東虛明景象須叅悟靜裏工夫旭日紅

一艇

一艇向烟波行行意若何敝裘蒙白髮敗絮覆青  
蓑鳴櫓聲聲急哀猿夜夜過停舟休借問怕聽楚  
狂歌

瀟湘雨景

花柳何須苦憶春瀟湘雨景是佳辰滄洲暫得浮  
生趣塵土空嗟未潔身鳥宿林迷堪避弋魚隨水  
逝不愁綸舟中有客增惆悵難戀烟波逐隱淪



二月二日早發湘陰風日恬美頃刻渡洞庭湖喜而有作

風軟湖平曉日懸帆檣高拂白雲邊微茫沙嶼空  
無外蕩漾烟巒別有天畫鷁恍疑霄漢坐飈車欲  
降水宮仙蘭橈不動篙師卧又過巴陵意惘然

過武勝關見山中梅花

巒迴岡複路紆盤乍見梅花半已殘入手餘香驚  
客意空山自潔少人看春風寂寞心常冷宿雨露  
濡蕊未乾瓦缶一枝茅舍供思歸懷隱對君歡

二

開殘驛路自年年不似楊枝有恨牽移植名園誰

得地長依野店遂其天界連楚豫風先暖人過關  
山物屢遷疎影暗香頻入夢江南春事已茫然

榮澤渡河遇景東陽少宗伯假歸嵩雒喜晤  
志別

容臺共事意慙慙道義文章氣若雲連袂經年慚  
倚玉浮踪三載惜離羣遂初如願君何勇乞老優  
賢古所聞進退從容誰得似香山今日繼清芬

二

唐宋名賢洛下多清風餘韻未銷磨歸來著述垂  
金石老去情懷托澗阿諫草循聲青史載名高  
致白雲窩相逢驛路仙凡隔遙望嵩陰憶笑歌




夢日堂詩卷二











T 5466/7910

9



CHINESE JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

OCT 4 1960



愛日堂詩卷二十三

蘭峪後集

丙午丁未

哈佛大學漢和  
圖書館珍藏印

丙午三月返自粵西暫畱京邸仍歸馬蘭

峪所得之詩計二卷名曰蘭峪後集

世南姪寓齋紫藤花放畱連竟日

小庭深護紫羅囊日淡風微晝正長杯酒且謀花  
下醉塵纓暫卻世間忙蕊繁枝弱常依架葉密陰  
多好布牀更愛春寒猶未散狂蜂不觸滿筵香

二

弱蔓初縈本附喬十年枯樹付薪樵

余向以寓  
閱今四十年

矣庭中舊有老樹藤花附可憐柔幹難孤立常向  
之今藤蔓成陰老樹已去



愛日堂詩卷一  
春風蕩小腰幽賞何須羅膾鯉老懷今已慕簞瓢  
中庭翠幕堪高卧不向仙家覓紫綃

去冬秉之姪自山左以牡丹數百本進獻有  
衰殘不入選者兒子姑植之庭中初夏忽發  
數花因邀親知玩賞小飲

滿載名花獻御園可憐憔悴棄孤根移栽寒冱  
無人問不信陽和著意溫淡蕩色香千種外寂寥  
庭院一枝存繁華自古多惆悵繡閣雕欄枉斷魂

二

微雲細雨接朝昏似惜新葩發舊根人對春風思  
豔影花辭故土黯離魂未登上苑羞無色自倚空

階靜不言但得畱題詩句好勝施步障錦爲幃

余賦藤花牡丹各二首諸君子賜和盈帙因  
再疊前韻奉酬共得四章

偶吟遣興擲奚囊賜和驚人各擅長襪線自嗤忘  
穢陋珠璣什襲笑閒忙酬詩難覓珊瑚架倦卧寧  
須玳瑁牀偏憶綠陰花謝後有香人散愛無香

二

老樹休歌南有喬只今已付積薪樵迷途一任雲  
過眼悟後從教雪到腰慧可侍達磨事不飲劉生常荷鍤  
就衰唐子擬投瓢無端故態難忘却又向花前拂  
素綃



三

花市千枝讓野園乍開乍謝未歸根已銷麗景三分盡尚憶餘春一段溫飛絮落紅何處好蒼松翠柏幾枝存遊人莫訝流光換杜宇聲聲早斷魂

四

不辨陰晴每晝昏浮花無蒂亦無根出班固賓戲作金

豈有王陽術漢書王陽好車馬衣服及歸止一囊衣天下服其廉而怪其奢故曰王陽

能作黃金得句難招楚客魂風入濃陰多異響鳥喧醉

客助狂言只應閉戶長枯坐一瓊香燈對佛幡

題張詒孫梧亭讀書圖

年少窮搜萬卷書碧梧亭子愛清虛高情迥出風

塵外滿腹經綸任卷舒

二

棲鳳長畱半畝陰閒庭把卷日初沈文章報國非干祿上下千年自會心

三

文采風流有令譽傳家不負五車書朝青暮紫非吾意寫出冰姿自澹如

四

四十年來大父行喜逢雛鳳在東牀論孫余同年鈞庭之孫今

爲世南姪之壻秋風待展摩雲翮拾取天邊桂子香

題鄭秋浦觀瀾圖



松陰花滿草如茵靜聽溪聲絕點塵坐撚吟髭不  
歸去世間那得此閒人

二

獨倚松根鳥亂啼激湍隔斷武陵溪不知漢晉今  
何世笙鶴相招路未迷

又題聽松圖

松濤入耳洗牢愁枕石無須更枕流天地爲廬茵  
藉草紅塵隔斷卽丹邱

二

胷中邱壑寄毫端過眼雲烟仰卧看世上轅駒嗟  
局促放開懷抱置身寬

題唐六如水村圖畫卷

春流蕩漾繞平堤千樹垂楊綠正齊閒上小樓憑  
眺望好山重疊在村西

二

柳陰深處是吾廬水色雲容四望虛門外小舟長  
不繫晚來隨意狎樵漁

三

粉垣周匝綠堤橫隔斷塵緣水一泓豈必深山堪  
避世湖光照徹寸心明

四

妙繪流傳意自殊水中央住當乘桴清流可漱還



堪枕可許衰容入畫圖

余結廬馬蘭峪之東偏當門有古槐一株亭  
亭獨立行役二載重來而衡門已圯老樹依  
然因憶杜工部獨樹老夫家之句恰相符合  
用爲首句共得五首

獨樹老夫家當門素影斜婆娑猶挺榦搖落似空  
花就蔭眠晨犬歸巢集暮鴉尚餘生意在莫起伸  
文嗟

二

獨樹老夫家山光隔翠霞迎風枝偃蹇浥露葉交  
加團葢張青幕垂陰障碧紗閒來扶杖倚農圃話

生涯

三

獨樹老夫家衡門靜不譁庭空喧鳥雀牆隙補蒹  
葭落日枝頭挂疎星葉底遮徘徊新月上圖畫滿  
平沙

四

獨樹老夫家清陰半畝賒茶鑪依廣蔭衣桁借低  
丫樵叟容高卧隣兒聚笑啞終朝無一事學種故  
侯瓜

五

獨樹老夫家幽居一角蝸風來清響遠雨過暮雲



夢窗詩集卷三  
遮夢幻疑藏穴孤高恥作衙榮枯寧有定天漢待  
浮楂

至日陪祀

景陵大雪恭記

大祀

園陵忝後陪瑤山萬疊積瓊臺絜牲至日因收攬瑞  
雪通宵欲動灰林樹繽紛無蔽晦衣冠縞素有餘  
哀五年趨走空追慕節換頻驚白髮催

客有以小照屬題者黃花覆頂袒衣席地一  
童子攜菊盈筐負笠執杖而立高情恍出塵  
表因題二絕

黃花時節恣遨遊採得盈筐戴滿頭畱取東籬殘  
醉在披襟席地望高秋

二

未必三春勝九秋晚香冷趣箇中收奚童負笠還  
攜杖褫襪忘機好自由

初夏六首

紛紛紅豔已辭枝繫得春光有柳絲正是閒遊好  
風景不寒天氣未炎時

二

池荷初漾小於錢蒲葉平堤柳散綿兩部鼓吹聲  
欲動愁他驚破午窗眠



三

風吹麥浪繞村莊日照深林杏子黃乳鷺欲飛鶯  
已老陌頭畱得野花香

四

紅藥翻階事已非故園櫻筍雨初肥繁花似錦誰  
能戀自愛濃陰覆短扉

五

野插新秧室飼蠶熟梅時節憶江南朝來最愛廉  
纖雨又被狂風散蔚藍

六

敝裘敗絮棄猶憐絺綌新裁出水鮮自是炎涼由

造化不知翻覆幾何年

德若水畫虎歌

并序

若水名德寶滿洲頭等待衛也每從

先帝行獵以善殺虎得名茲同侍

山陵閒輒畫虎凜凜如生因爲作歌以紀之

將軍雄武冠龍驤長弓大箭從

先皇獵塲殪虎如搏豕山谷腥風不敢藏耽耽猛氣

渾見慣潑墨圖成狀非贗懸之素壁走烏龍疑是

仙家牀下叅壯哉奮筆欲畫時趣尚奇偉心自師

鐵尾倒插寒電閃恍聞夜嘯山月迷顧盼騰挈若

震怒驅邪辟惡鎮環堵閉戶且令行旅逢又恐藍



田空沒羽包家父子浪得名虛摹想像笑書生何  
似將軍曾有虎揮毫落紙氣縱橫吁嗟乎戴嵩畫  
牛韓幹馬畜牧丹青粉本假請看此虎儼如生朔  
風凜凜陰山下

近塞山中多產芍藥花潔白單瓣鮮紅紫重  
臺者較京師豐臺所植繁豔不及而柔枝綽  
約清香淡雅過之折取數枝爲餅中清供愛  
玩不已因賦二首

近塞春遲夏日涼名花空谷挺幽芳飽經霜雪無  
瑕玉遠隔塵氛有味香紫殿翻階天上夢楊州舊  
圃古來荒從他寂寞無人賞山雨溪風歲月長

二

豐臺花事舊名區車馬於今問有無載酒何人懷  
綠野趨塵滿擔易青蚨從來豔賞經時歇畱取冰  
姿任我癯寄語野樵相問訊孤根搖曳不教扶

滿洲侍衛安楚庫喜爲詩屢辱佳章率和其  
韻

詩筒珍重往來頻展讀還疑筆有神老愧撚鬚詞  
更拙捷同叉手意偏真翦裁錦繡驚才富潤色溪  
山得句新多謝濠梁能愛客強騎款段作遊人

王子瞻萊以初夏卽事詩見示依韻奉和  
槐陰半畝柳千絲午夢初回未醒時忽聽雷殷風



拔屋乍看電散雨鳴枝發聲出穴螻何慕霑濕營  
巢燕亦癡已謝浮華焚筆硯又牽吟興爲新詩

二

刈麥栽秧出貿絲故園婦子正忙時未成歸計荒  
三徑尚沐餘恩借一枝學佛談空嗟老鈍爲農藝  
圃信頑癡樵歌牛背聲聲樂應勝人間歡喜詩

又和五日元韻

一陰初動值端陽

前一日夏至

靜掩柴荆晝更長續命

絲絲嗤我老懸門艾虎笑人忙村醪可醉浮昌歎  
野藿知甘勝鯉鱠四十三年同一瞬漫誇食肉與  
持梁

用史記  
蔡澤語

山村多捕鳥雀者巢禽不得安生有羣雀集  
余庭中不去似知避者因占二絕句  
羣兒繒繳走東西繞樹巢禽落似泥來集閒庭應  
避弋高飛何似且卑栖

二

差池下上集庭莎此處真成安樂窩勸汝忍饑休  
競噪只今門外盡張羅

初秋積雨遣悶

積潤經旬氣鬱蒸濕雲濃霧疊層層陸沈自喻非  
金馬秋雨生愁似茂陵屋漏流泉漂畫軸垣傾庭  
院接香塍山容淨洗渾難見一夜金風萬里澄



雨中七夕

雙星相望別離多  
今夕年年說渡河  
神女攜將雲雨至  
又添銀漢幾重波

二

天上佳期事渺茫  
人間良夜話偏長  
浮雲遮斷銀河影  
辜負千家萬炷香

葉子映庭授山右定襄令枉顧言別詩以送之

讀書非求官  
縣此詩書澤家世素業儒  
食貧罔敢  
敦弱冠窮經  
笥文壇稱巨擘  
不得於有司  
廼走長  
安陌  
席帽蒙風塵  
饑寒足跛蹇  
辛苦成孝廉  
春官

又落魄一旦綰銅符  
捧檄情相迫  
寧有干祿心已  
受牧民責一騾攜一僮  
行行如孤客  
晉地家多饒  
唐風儉猶昔  
長吏職拊循  
所重在保赤  
國計藉催  
科良法期足額  
升斗及錙銖  
刻意當綜覈  
文網若  
絲糾案牘滋繁劇  
考稽慎審詳  
不容畱一隙  
官燭  
戒勿然官醞  
勿充嗑  
守我舊清貧  
吁嗟保健  
翮飽  
煖豈所營  
聲名恒自惜  
得路自飛騰  
暫時安跼蹐  
別去不勝情  
把臂未能釋  
我甘老山隈  
遲君早報  
績村酒餞君行絮語永今夕

送南衡內姪之永平郡佐任

節操傳家出相門  
英才又見一文孫  
莫嫌佐岳官



非重要識題興望自尊西近京華同臂指東連遼  
海作屏藩呂虔解佩應相待拭目南溟佇化鯤

二

兄弟姻親五十年風流頓盡每潸然長懷老鳳看  
雛鳳不墜前賢賴後賢師儉本無旋馬地之官難  
問辦裝錢山村遺老衰殘甚送爾登車早著鞭

定光屏銘

硯融楮潤筆精墨良法書古帖斐几明窗有生樂  
事端藉文房老眼畏暗就日分光臨池染翰冬日  
秋陽曦暉可愛炫耀慮傷製屏設障闇然益彰下  
畱虛白上取斂藏收視內照體靜用臧定光去霧

伸紙凝霜不憂閃爍可辨毫芒實資利用豈曰面  
牆

孚中姪孫遠寄見懷詩四章依韻和答

久沐恩波日月邊乍醒已聽曉鐘傳浮雲試看崇  
朝換美景何曾十日連文繡膏粱知過分布衣蔬  
食亦隨緣孤松小草殊榮悴一任天工自轉旋

二

鳳臺山下別成州雨露溪巒舊澤畱痛抱遺弓紅  
日掩時瞻享殿紫雲浮閒身悞入遊仙境故里難  
尋望遠樓十二因緣出法華經應漸滅繁華泡影不廻  
頭



三

敢比相如病茂陵式憑靈爽矢兢兢舉頭恍近三  
天路送老唯叅一佛乘染翰懷恩陳綠玉賜硯名  
寒憶舊覆青綾不貪福德無瞋恚一寸心田冷似  
冰

四

農父爲鄰守一廬門前已斷故人車京華僚舊今  
誰在鄉國音書亦任疎贈我詩篇情孔厚問君出  
處意何如朝移暮換需才亟南面還應勝索居  
錢蔗山副憲以禹之鼎所畫松風吹解帶明  
月照彈琴小照屬題因題八絕句

朝端束帶仰光儀忽漫披襟結遠思數樹喬松寒  
作伴腰圍寬處好風吹

二

先憂那敢乞閒身畫裏溪山意自親青史他年傳  
姓氏林泉誰是早歸人

三

暫辭束縛得全形瀟洒儀容見性靈豈厭朝衫耽  
野服少微原近紫微庭

四

坐愛松林月上時酒爐茶竈鎮相隨翛然獨往知  
何處無限雲山任所之



五

塵世謫來非故我道家裝束亦相宜罷琴林壑聞  
清響想見孫登獨嘯時

六

蒼松千尺白雲封仙侶還應月下逢便擬從君添  
一隻畫圖可許狀衰容

七

畫師妙手禹鴻臚松鶴風姿綽有餘今日縱教添  
鬢雪十三年後看如初

此圖乃甲午年所繪今十三年矣

八

圖畫香山與集賢朱顏鶴毳總皆仙

用香山居士寫真詩意

班心突兀須公重尚有蒼生未了緣

樹掛二首

并序

長至前六日晨起庭中見山色朦朧不改  
地無微霰而樹枝皆如積雪枝上多冰條  
垂掛或尺許或數寸至日午始消如此三  
日土人呼爲樹掛又曰掛白爲豐年之兆  
近塞景象目所未見也

非霧亦非烟玲瓏萬木鮮枝枝沾柳絮樹樹著吳  
綿釵腳鏤冰掛藤梢琢玉懸奇觀渾未辨聞道兆  
豐年

二



夢筆堂詩卷三  
但看瓊作樹不見玉爲田潔白非關雪晶明不蔽  
烟鮫人冰縷斷黍谷藕絲牽異景難圖畫還疑小  
有天

重閱北征圖小照自題六首

并序

余於丙子之春偕京江張相國平湖江村  
詹事張隨齋學士胡南荅少司馬五人同  
隨

先皇聖駕北征禹鴻臚之鼎爲余寫照戎裝跨馬而  
行王山人輦補畫塞外景象合成一卷名  
曰北征扈從圖今三十三年矣爾時余年  
四十有五圖中乃白面書生於今髮白齒

落自顧慨然因題卷末

書生弱懦笑戎裝妙手空畱筆墨光畫卷傳家思  
往事共驚神武溯

先皇

二

躍馬從王憶壯年駑駘鼓氣亦爭先可憐髮白顏  
非昔長抱遺弓泣昊天

三

上相名臣一鄙儒五人同日效前驅只今餘我蹒  
跚在日侍

園陵倩杖扶



四

瀚海窮沙日月新六師

親統掃邊塵漢臣誰聽饒歌曲畱得衰翁話  
聖神

五

曳履承恩逼上台素餐備位媿非才畫圖他日誇  
農叟曾從

君王北伐來

六

壯不如人老自哀全生樗木未教摧夢中猶記龍  
沙路雞唱驚從霄漢回

題德若水小照

侍衛德若水向年隨侍

先皇行圍殺虎今年七十餘矣矍鑠如故圖一小照  
據磐石而坐旁列鞍馬弓矢其令子捧殺  
虎槍侍立似獵圍小憩之狀意氣勃然屬  
題五首

倜儻雄風冠虎賁高年氣概尚凌雲獵回據石思  
前事遙望山頭日未曛

二

龍馬精神老益堅挽強七札一時穿吟猿落雁尋  
常事長劍橫空欲倚天



三

滿握長槍鐵作胎排山倒嶽不知回  
荀龍捧立傳家重曾侍

先皇殺虎來

四

昇平閒却老廉頗  
韎革空懸當綠簑  
卧起山邨無一事  
風前盤馬舞婆娑

五

目光如電氣如虹  
賈勇驚看鶴髮翁  
他日長安尋薊子  
手摩銅狄會相逢

臘日

三戌由來說漢家  
從禽祀祖報年華  
凍銷曾說今年暖  
出杜詩寒意偏於近  
塞賒菽乳菜菹安  
我素銀罌翠管任  
人誇衰顏不用香  
膏駐息老遙聞土  
鼓撾

臘月二十五日立春

破臘春先至  
迎年晝漸長  
未聞新曆日  
還是舊風光  
媚竈吾何敢  
祈神俗自忙  
土牛詩未就

蘇東坡臘月二

十五日夜夢作土牛迴文詩

夢醒接青陽

掃雪

當門除道亟白玉  
旋蒙塵豈是沾泥絮  
無妨在涅身  
溪山存皎潔  
朝市踐璘珣  
畱取烹茶好  
高懷未



可論

冬日益內桃花

附熱先矜豔非時奪歲華江梅空耐冷庭柏笑無  
花暖室登瑤席重幃映絳紗却畱三月景讓與野  
人家

除夕 丁未

陽微春漸至寒盡歲當除衣待來朝換糧畱隔宿  
儲冰消天意轉氣暖物情舒莫把癡騃賣因癡得  
泊如 吳中舊俗小兒沿街呼云賣  
騃騃范至能有賣癡騃詩

守歲

紀曆年年舊浮雲旦旦新一宵迎送異千古往來

頻坐守將殘漏相看未換身自添商陸火愚谷笑  
陳人



愛日堂詩卷二十四

蘭峪後集二

戊申

元旦

迎新欣少壯辭舊感衰年夙駕朝

陵後焚香向佛前寒威徐解渙物意待暄妍藍尾誰

同飲清齋早獨眠

二

從來重元日爲慶發生初融雪明高嶺條風到草  
廬驅邪除疫癘和氣得寬舒雨露何時沛田間待  
荷鋤

車中早發夢至家鄉恍聞欵乃之聲起聽則



夢日堂詩卷二十四  
車輪響也慨然有作

鄉國車中夢疑聞欵乃聲短轅何日別柔櫓得相  
迎塵土魂銷盡烟霞性本清白頭畱滯客朱紱悞  
平生

齒落將盡戲作

凋零編貝口無扉長抱空齟似斷碕人笑音訛甘  
守默自嗤嚼廢每吞肥逞銛飽腹功何在保障依  
脣事已非骨鯁先亡柔舌在期期還要慎樞機

二月二日

百花生日說今朝柳眼花鬚尚寂寥撲蝶浴蠶風  
自昔發雷出震候初調山田種晚遲膏雨塞上春

深看斗杓土厚寒多藏蓄久東風徐暖萬千條

探春花

柔梗叢條卻耐寒爭春先試翠琅玕未登花譜邀  
詞藻宜入閨房近綺紈馥郁媚人香奪麝續紛成  
簇玉爲團北人不識梅丰韻錯擬南枝一樣看

杏花

花發催耕到處繁酒家何處自成村江南香靄宜  
春雨冀北暄妍愛曉暎共想清陰藍水上

錢起詩  
愛君藍

水上種杏  
近成村

空傳碎錦午橋園自憐紅杏尚書老

宋

京名紅杏  
杏尚書

欲譜新詞枉斷魂

山村杏花皆放余庭中一老杏獨遲



此杏何年植花開獨後時牆陰離日遠屋角得春  
遲寂寞畱孤榦繁華讓嫩枝却因攀折少漢殿作  
梁宜

無齒歎

昌黎四十五爛飯用匙抄我今七十七當辭炙與  
炮朶頤思染指空口如懸鰆鯨吞苟充腹牛同任  
人嘲園蔬柔且美安用阜爾肴

二

太公八十齒有二我餘五六半斜撐摧堅藉齒齒  
先落知味有舌舌未更敢求苟勗大官酪思學東  
坡玉糝羹軟嚼易消還適口勝飽牛炙腹膨脝雕

蚶鏤蛤今已矣淮南遺製信珍烹

過石家莊僧舍

數間精舍隱山村籬櫨周遮靜掩門滿地落花春  
寂寞一溪流水響潺湲慈雲長護峰巒潤法雨時  
飄草木蕃鐘磬聲闌看抱甕欲遲新月坐黃昏

湯山福泉寺

靈泉別館舊莊嚴紺宇琳宮倚翠巖曲水繞亭源  
不竭方池涌溜氣常炎宮車杳杳仙山遠輦路依  
依細草纖白首老臣重過此瓣香禮佛淚先沾

輓太倉相國

十年調燮善歸



君溫樹何曾子弟聞謨誥贊成功不有密封入告草  
先焚賡揚

聖德彌藏晦旋轉洪鈞慎守文唐書姚崇善應變宋璟善守文還政

堂前星忽隕肅衣再拜上層雲用富鄭公事

二

讀書無負抱丹衷默佐

高深矢竭忠曾觸雷霆因顓直旋邀雨露保初終蒼

生想望畱君實

主眷難辭倚潞公一自

鼎湖悲慟後年年血淚洒西風

三

江左高門相業長後先繩武共流芳憂危心苦關  
宗社忠愛情深鑒昊蒼異代名臣編簡煥他時公  
論日星彰蕭蕭丹旆魂歸處二百年來綠野堂

四

哀深病劇乞殘年豈際

明時忍憊然重荷

新恩畱顧問獨依故邸勉遷延賢郎邊塞歸何日門

館晨星客不前長抱孤忠天上去

先皇相見定相憐

五

烏衣門第舊清貧言介言通任俗人不飾虛名羞



夢筆堂詩卷三十四  
布被有容大度恕汚茵常懸水鏡垂深汲如坐春  
風若飲醇東閣延賢今已矣士林顚顚淚沾巾

六

譚邢舊好又朱陳五十餘年托後塵珥筆趨陪同  
館閣開尊歡笑集交親烟雲散盡成殘夢風雨飄  
搖剩子身遙望靈輻虛執紼幽明相望潞河濱

立夏日客有以送春詩見示者余老矣夢斷  
韶華因卽景書懷以答之

榆錢飄落柳絲颺塞上寒消百草香莫惜繁花春  
已去尚餘清蔭夏初長鈿車寶馬遊入靜箕踞科  
頭客意涼自吸新泉烹茗啜老莊一卷倚繩牀

庭前栽芍藥數枝皆已放花獨坐遣懷

從來名圃記揚州今日燕臺擅勝遊物產豈因今  
昔異栽培人力不相侔

二

殿閣薰風憶昔年平泉勝地滿都傳試看移植疎  
籬畔一種風光別似仙

三

狂香浩態本天然錦幄茅簷各有緣莫向花前嗟  
冷落名花那肯受人憐

四

攜酒徵歌爲賞花散歸爭折觸泥沙何如寂寂無



人賞明月清 護舊芽

五

花名婪尾最繁華寶馬香車樂事賒錦繡滿前春  
忽去清陰畱與野人家

尚肅亭駙馬新構茅堂有贈

結構茅堂勝碧油不開金埒愛西疇一犁春雨看  
蘼蓼四野西風慶滿篝木榻疎窗情簡樸浮巒攬  
翠意清幽鳳凰樓閣臨天漢暫作青山物外遊

溧陽狄雨蒼孝廉館於尚駙馬寓齋屢辱枉

存賦贈

三十年前識半千

謂其令叔祖向濤太史也

公才公望慶緜連

招賢開閣推平叔授簡登樓得仲宣琥珀杯濃供  
醉詠琅玕簟冷任高眠茂陵寂寞憐吾老倚玉臨  
風一惘然

內大臣巴敬齋蒙古元代苗裔也朝夕同事  
頗愛讀書索句有贈

誰信崇階出玉墀蕭然茅舍舊金枝瓊奇嶽峙驚  
英傑儒雅淵渟識令儀自愛官閒農圃近何妨山  
僻牧樵宜翠微當戶攤書卷容我迂疎手共攜

嶧烟之風傳自塞外今中華盛行無不嗜之  
戲詠四首

神農不及見博物幾曾聞似吐仙翁火初疑異草



夢月堂詩卷三  
薰克腸無滓濁出口有氤氲妙趣偏相憶縈喉一朶雲

二

異種來西域流傳入漢家醉人無藉酒欸客未輸  
茶莖合名承露囊應號辟邪閒來頻吐納攝衛比  
餐霞

三

細管通呼吸微噓一縷烟味從無味得情豈有情  
牽益氣驅朝霧清心却晝眠誰知飲食外別有意  
中緣

四

清氣滌昏憒精華任咀含吸虛能化實嘗苦有餘  
甘爇火寒能却長吁意似酣良宵人寂寞藉爾助  
高談

種菊四首

閒來種菊擬東籬寒綠凌風又一時空抱高情身  
未隱此中真意世誰知霜前含蕊遲遲放雨後柔  
枝故故垂秉性靈和兼五美頽齡可制正相宜

二

玉筍升天事渺茫小庭手植愛幽芳兩開杜老羈  
栖淚一束鍾家服食方聞說療疴專尚白相看正  
色獨推黃摘來好共茱萸佩陽九無虞學長房



三

抱甕經時待晚香學成老圃又何妨衰顏羞比花  
枝瘦插帽徒開笑口忙不逐春風爭富貴長依霜  
月共清涼夕餐采采誰能賞畱取餘馨貯隱囊

四

柴桑半畝寄生涯蕭洒無慙處士家自愛香清長  
有味非嗟開盡更無花陶公衣白虛攜酒張氏樵  
青會煮茶眼暗筆欹詩思拙恰如雁字帶風斜

秋夜聞鐘

鯨魚頻叩報更籌鞞鞞鏗鐳動客愁喚醒夢魂驚  
月午飛聲雲表滿天秋霜明金奏通邊塞風勁商

音出戍樓疑是寒山城外寺夜深欵乃蕩扁舟

九日尚肅亭駙馬齋中小集

山清氣爽九秋新高會招攜意自親黃菊又開催  
暮景綠醺無分愧娛賓強扶筇杖登高怯醉倚巾  
車落帽頻坐有鄒枚甘避舍漫題糕字尚巡逡

有江南二友能文

再詠嶧烟二首

虛無恬澹擬三華出入丹田一縷斜何必品茶兼  
頌酒恰如飲露與餐霞納新吐故神能守短吸長  
噓氣似加辟穀未離烟火味難將服食問仙家

二



繚繞喉嚨度玉池醒人春夢殢人思消愁旅館孤  
眠夜乞火荒村未曉時執管談深當麈尾含香意  
倦却瑤卮淡交似水偏能久鎮日相隨手自攜

庭菊爭開尚有含葩未吐者曉霜已降感而  
有作

爭開叢菊趁重陽尚有含葩殿衆芳自是名花偏  
愛冷獨標勁節待凌霜金風吹葉寒逾綠玉露零  
枝晚更香辜負主人珍重意移栽盆盎近藜牀

山頭野燒

野燒峰頭燄燭天草枯風勁勢連綿絳龍天矯雲  
中去赤鯉飛騰澗底旋盡掃荆榛開坦道破除蕪

穢見平川火耕自是山農事却悞行人馬不前

二

赤虹一片亘山頭滿目風烟動客愁焰觸寒雲凝  
不散光搖斜日影俱浮棲禽枝斷將何寄猛獸巢  
空不敢畱好待山空霜月淨牧童樵叟共優游

旅舍

擾擾輪蹄十丈塵壯心未已鬢絲新金羈寶勒高  
軒客何似深村曝背人

二

百歲流光只一宵夢回夢去自遙遙莫嗟逆旅朝  
朝換試看浮雲過碧霄



三

青山不改水長流過客經年未肯休水色山光人  
面目誰新誰舊幾千秋

斗室

茅簷斗室紙糊窗塵障雄心受我降忽漫狂呼驚  
得句洪鐘萬石夜深撞

二

滿牕紅日夢初回尚有餘香在冷灰駟馬朱門誰  
似舊樂天且遣兩眉開

偶題

炎炎昨日問誰家忽見門庭鎖落花途有王孫今

乞食簞瓢陋巷足生涯

二

癭瘤糾盤巧作層笑他杞梓直如繩世間爭尚雕  
鏤妙規矩方員未可憑

三

榮枯代謝不相仍人世空勞羨與矜若是好花開  
不落塵污雨漬也生憎

四

憂貧憂道本相妨恒產恒心未可常牛角掛書堪  
遜跡樂飢無累得徜徉

冬至



夢窗詩集卷二十四  
天意回三極人心望一陽趨塵嫌晝短秉燭愛宵  
長滿目冰山凜微灰玉琯揚細叅來復理讀易自  
焚香

二

書卷三餘樂瓊爐一室春百年爭晷影萬象逐時  
新寒沍消難盡微陽屈漸伸蕭然北壁下偃臥待  
良辰

消寒雜詠十二首

微陽逢建子庶彙得由庚瑾戶宜藏密飛灰驗氣  
亨堅冰行自泮枯樹漸知榮開卷興長歎難教老  
眼明

二

背峽風常滿面山氣更寒舊貂餘暖在鑿牖一身  
寬簾幙葦當戶跣趺草作團隙光添弱線息老自  
爲歡

三

自古幽州域漁陽漢郡東邊關內外異地勢古今  
同白髮江南客青山塞上翁閉門如縮蝟長在一  
壺中

四

小畫牀頭掛叢編枕畔橫天寒宜屋小眼暗就牕  
明硯席茶鐺並香篝紙帳清莫嗟今夕冷已喜一



陽萌

五

性僻耽詞翰閒將歲月磨揮毫寒未輟按拍老能  
歌不醉陶然妙無言奈若何阿奴誠碌碌垂白得  
婆娑

六

牕訝晨曦白爐挑宿火紅披裘冠不整欹枕被猶  
蒙寒氣凝三極風聲入萬空形骸同土木一任鷗  
冠聾

七

朔風吹積雪朝旭散寒暉飄瞥侵牕紙猖狂破瑾

屏簷敲冰筯響院繞玉塵飛陰氣宜驅逐天工故  
作威

八

絮線枝頭掛冰花樹裏開凌晨明旭照當午落奇  
瑰北叟知占驗南人莫浪猜非烟亦非霧眺望自  
徘徊

九

何必求兼味厨中有宿糧新吹雲子白舊蓄菜根  
黃猩穢甘人口清虛適我腸華池常沐浴靜對一  
爐香

十



苦憶家園笋垂垂橘柚香吁嗟成北客夢寐在南  
鄉琢句誰堪共高吟嘆我狂東隣逢老叟農圃好  
商量

十一

醪學蘇公法泉堪陸羽嘗松風欣入耳竹葉漫浮  
觴儋石心常足臬盧興已忘谷神還自守寒沍不  
相妨

十二

我愛元修菜時珍熱洛河以鹿血煎鹿腸名曰熱  
洛河明皇賜哥舒翰安  
山祿愛憎寧異口清濁不同科淡泊安需素虛無食  
太和軟裘兼快馬冰雪任經過

雪後車行

瓊瑤鋪滿地軟滑任車行皎潔修途坦模糊曲澗  
平轉輪深沒軌憑軾靜無聲尚有袁安臥休矜鶴  
氅清

冬至後大雪四首

六出因時降同雲兆歲豐蝗蝻深入地鳥雀苦翔  
空杯煖新篲白爐餘宿火紅書雲還紀瑞何以代  
天工

二

無聲偏有色竟夕已平鋪人跡千門靜炊烟一縷  
孤津途皆坦白蕪穢得模糊若使磨難磷朝朝在



玉壺

三

舍南消見硯舍北舞迴風蹂躪瓊瑤賤沾泥瓦礫  
同烹茶供學士宜麥佑農功不用歌黃竹山中有  
醉翁

四

玉宇迎朝旭清光滿太虛臨牕摩老眼開卷耀吾  
廬滴硯愁相涅濡毫口自噓江梅應已放此景更  
何如

後消寒八首

出門驚虎跡靜坐見鳶飛妙諦參無着浮生畏有

機買山空自哂

深公答支遁曰未聞巢由買山而隱

負釜志終違

楚陸

通負釜而隱

蝸角身堪寄長歌送落暉

二

臨池非好學樂事此中存墨淡嗟毫凍書斜嘆眼  
昏古香懷晉代賸馥守儒門有味因無味閒情孰  
與論

三

無絃知妙理不飲愛醇醪放誕寧師阮孤高已愧  
陶斜飛看奕局變徵聽檀槽尚齒何堪尚勞生且  
息勞

四



夢月堂詩卷三  
永夜千山靜高旻萬籟空冰霜燈影外烟水夢魂  
中野曠風難蔽更殘曙未通有懷成不寐閒眼任  
曹曹

五

蒲柳猶遲萎衰顏豈後彫短檠依臥榻孤枕伴書  
瓢燄烈膏先盡香清薰自燒穿墉來石鼠吾亦欲  
迎貓

六

翠管銀罌舊黃冠草笠新祭詩餘酒脯逐鬼蕪山  
薪冰雪殘年盡烟雲萬事陳何須醉司命夢華錄  
謂之醉司命公道仗明神

七

孔聖嗟川逝禪宗一刹那鬚冰休自撚顏凍笑頻  
摩考古誰爲臘驅邪不用儼射生供卒歲伏獵未  
爲訛

八

寒梅不可見枯柳自相依北鄙無花信東皇布澤  
遲迎年猶舊臘餞歲有新詩陰氣徐消盡陽和慰  
衆思

歲寒雜憶詩

南枝應早放破臘吐霜葩心與香俱遠花隨室共  
遐寒英新節候老樹舊人家乍醒羅浮夢牕前雪



滿沙 早梅

二

白雪休相妒仙姿別樣裝檀心長抱潔磬口自含  
香六出凝崖蜜千苞染額黃閒庭吾臭味別久幾  
迴腸 蠟梅

三

後彫偏吐豔破寂耀英華綠樹凌霜勁丹葩帶雪  
斜高低排碧玉深淺暈紅霞松柏交相顧無花愧  
有花 山茶

四

歲寒宜結子森立老霜柯綠篠堪相並朱櫻未足

多珊瑚懸雜珮火齊作鳴珂鳥雀休相啄雕闌布  
網羅 南天竹

五

仙子凌波至亭亭美且都玲瓏搖翠幹婀娜耀冰  
膚露浥黃金盞香飄白玉盃結根泉石畔斐几舊  
清娛 水仙

六

自古揚州域芳林不渡淮木奴曾自種甘實記藏  
懷楚相空生感江陵願已乖垂垂千萬顆嘉樹老  
空齋 蜜橘

七



夢窗詩集卷三  
細雨曾移植金球已滿枝果繁隨手摘霜熟繫人  
思徐破宜纖手微酣愛蜜脾犀紋香有味傖父未  
曾知香橙

八

清芬滿庭院珍實大於拳團蜜懸枝重鎔金入範  
圓盤承登几案香散廢爐烟密貯經春好餅梅待  
鬪妍香櫟

九

大雅稱嘉餽今誇入饌鮮迸籬金作礪掘土玉爲  
田錦籜重重裹霜芽箇箇圓此中有真味肉食敢  
爭先冬笋

十

冰蕤栽小樹碧葉間金丸香郁堪盈握身輕慣走  
盤琳瑯依錦席璀璨傍雕欄欲採還憐惜深宵秉  
燭看金豆

已酉元旦

元日猶殘臘韶光似早春寒消紫塞嶺暖護白頭  
人文武衣冠舊山川雨露新萬松同鵠立難老百  
年臣

二

正朔開三始

園陵拜



兩朝祥雲環鐵鳳湛露濕金貂世德懷  
先聖衰顏愧後彫舊臣遺一老歲歲拜  
神堯

愛日堂詩卷二十五

黃扉集一

已酉庚戌  
辛亥

政府重地何暇吟詠而感恩紀事有情所  
不能已者偶成短章用誌歲月名曰黃扉  
集

宣麻恭紀

并序

雍正七年己酉正月初十日

臣

元龍偕守

景陵諸大臣入京恭請

聖安十一日

駕幸圓明苑十二日元龍等詣苑中叩辭

上命大學士馬爾賽張廷玉召元龍宣



旨曰爾係

聖祖仁皇帝耆舊大臣守

陵已經六載特授爾爲大學士元龍叩首拜

命頃之中使引元龍入見

勤政殿

上面諭曰朕向居藩邸不與大臣往來爾之爲人未  
及深知朕初登極時隆科多極言爾不可用今數  
年來畱心訪察讒言已悟念爾係

聖祖仁皇帝任用大臣今朝中舊臣已少故特授爾  
爲大學士元龍跪聆

天語感激泣下叩首伏地不能起蒙

溫旨賜璫命坐

問年齒幾何元龍回奏七十八歲

上云已八旬矣又

問有子幾人今居何職元龍回奏止有一子名陳邦  
直係乙未科進士翰林院編脩因做譏錢  
名世之詩不好革職回籍

上愕然曰陳邦直乃爾子耶因年羹堯言其年少輕  
佻故令歸耳

賜藕漿一碗

命坐飲訖復

命中使捧出



御用貂裘貂冠各一卽在

御前穿戴而出伏念元龍才庸年老蒙

聖祖仁皇帝知遇拔擢垂四十載備位正卿未效涓

埃之報幸得出守

山陵縻祿閒居已屬過分乃荷

聖主求舊隆恩以衰朽之餘年膺密勿之重任且蒙  
明旨慰諭示以讒譖之由

日月臨照

高厚生成如夢幻之初覺恍冥路之再生雖捐糜頂  
踵不足矢報萬一也謹賦長句用誌愚悃

聖主殷求舊殊榮逮老臣忽聞黃閣

命注念白頭人跼伏驚疑集滂沱涕泗湮六年離

日遠一旦拜

恩新幸慰呼嵩願猶存擊壤身內官宣召趣

祕殿近光親悚惕徐趨覲歡忻識

聖仁拜稽憐曳踵賜坐席華茵馬齒垂

清問

龍顏仰觀真臣心還似夢

帝語藹如春明示樊蠅汙曾遭箕舌噀浮雲遮已散  
旭照屈當伸瓊液金莖露豐貂內府珍光輝榮被  
體寵錫邁常倫樗朽材何用葵傾志未淪恩深同  
戴嶽任重懼搏輪憶事



先皇久叨遷顯秩頻翰林稱宿老臺閣漫逡巡齷齪容滄海迂疎託大鈞遺弓常痛抱

寢殿自哀呻豈意辭幽谷還來侍

紫宸寧堪調鼎鼐何以贊絲綸

睿哲誰能蔽吹噓詎有因浮沈稀舊侶渠範凜先民一寸堅於石千莖爛比銀已衰餘悃悞終老守忱恂造化方開泰愚蒙亦濟屯位高彌自抑祿厚未全貧端月迎祥候和風布令辰願宣陽德溥長使萬方均

十九日翰林院到任 并序

閣臣拜

命先詣翰林院中堂行到任禮然後入閣視事是日

翰詹坊局諸君子畢集舊制也

別去瀛洲二十年

余于庚辰辛卯爲掌院學士

幾經換骨證仙

緣巢痕猶在人非昔甄影重尋境屢遷弟子於今

成宿彥

余教習兩科庶常今在館中者僅四五人皆成老宿矣

後生可畏揖

羣賢兩朝恩禮何由報危坐中堂意惘然

十六日復蒙

諭旨陳元龍年近八旬止有一子陳邦直尚在家中

著復還編脩原職來京侍奉感

恩恭紀

帝憐獨立是孤根



丹詔重宣喜滿門垂老晨昏煩

聖念不材培植沐春溫教忠愧乏當時訓移孝難酬  
此日恩子職臣心寧有二賞延義重寸丹存

閣中杏花早放

春雨江南繫我思禁廷先發兩三枝青村占候耕  
方始黃閣恩多蕊早滋晝漏漸長風展牘花光斜  
映鳥窺墀自憐紅杏尚書老伴食終朝得委蛇

題吳懸水學士晚香圖小照

何處人間歲月長東籬便是白雲鄉身為我有休  
嫌晚境共心閒久自香祕閣絲綸難勇退故園松  
菊未全荒春風暄暖秋風冷却愛披襟沁骨涼

二

蕭然獨坐對寒花老圃清光未有涯泉石烟霞從  
所好鼎鐘竹帛又何加不貪金盃官廚醞自愛樵  
青竹裏茶側耳松風鸞鶴至仙家原卽在山家

三月初十日以京察大典偕桐城虞山至銓  
曹閱四品以下各官過堂畢退食藤花廳適  
當藤花盛開因憶余爲少宰時日坐此廳今  
相距二十年矣

不到東銓二十年藤花滿架紫含烟清芬依舊人

非昔上相兼官地是仙

桐城兼攝太宰

時雨零濡符

聖澤

是日微雨

洗心精白答蒼天叨陪大興容衰老考績



多慙擬避賢

同年宋嵩南宮允年八十矣遠道遣使貽書  
枉問兼示見懷之什依韻奉酬

同日登瀛五十年仙班散去各隨緣拂衣空谷誰  
能及出岫孤雲亦偶然伴食貽譏從我拙還丹得  
道讓君先尺書鄭重來千里慙愧紅塵隔紫烟

二

皎皎中天散積陰

聖明久鑒老臣心寸丹難敵千莖白綆短愁探萬丈  
深倦翮雁鴻懷草澤後凋松柏在山林羨君著述  
多清暇扶杖行吟俯碧潯

端午前一日蒙

賜貢紗細葛宮扇香囊內製藥物恭紀

寵頒令節沐恩光細葛香羅出尚方貢自鮫人多  
異彩輕如蟬翼自生涼製成章服終身耀畱取傳  
家什襲藏繫臂無須五色線絲絲錫福自

垂裳

二

百和氤氲下九天靈丹上藥荷恩偏展開宮扇仁  
風滿捧得香囊淑氣宣石髓一丸堪辟惡琳腴百  
煉可延年攜歸舉室驚相問滿袖光華自日邊

寄祝師簡五兄八十壽



渤海家聲遠鹽官世澤長興宗懷隱德奕禩踵餘  
慶魏氏珍遺笏王家寶舊箱大儒還間出嘉遜啓  
蕃昌伯仲紛簪紱孫曾列廟廊俗情矜烜赫邁跡  
寄蒼茫憶昔肩隨日相依几席傍短檠寒漏永敝  
帙菜根香異舍承嚴訓同心凜義方弟愚慚虎劣  
兄譽比龍驤才擅無雙美名因第五揚下帷羅載  
籍插架富琳瑯文史三冬足詩篇萬丈芒百家供  
采擷六藝作笙簧月窟天心句書箱腹笥藏科名  
情早淡著述老逾忙騎馬初來鄭銜鱣已兆楊昌  
黎開學舍安定坐塵牀不朽心難滿無求道自臧  
歸來辭苜蓿教子慎膏粱自覺邱園貴寧憂繒繳

傷釣舟隨甫里秋水讀蒙莊攝養青城授生年絳  
縣忘蘭陔人濟濟槐蔭喜洋洋柳父垂風矩荀兒  
習典章傳經齊羽翮詒穀琢珪璋許國皆能效承  
家盡克襄道南文獻重膝下濟時良紫誥酬天爵  
丹書錫壽康七年開鳳曆八袞進霞觴乾卦遲宣  
講尚書待表彰點頷歌燕喜飲乳樂徜徉有客撝  
塵網懷人憶故鄉松楸頻入夢棣萼遠相望伴食  
誠何補叅知不自量

君

恩同海嶽臣意在滄浪骸骨終須乞蓴鱸或可嘗  
徐行愁不逮扶杖擬相將酌酒成三壽追歡聚一  
堂祝兒登百歲游渚更呈祥



虞山蘇幼青故友蘇苞九之孫也以孝廉作  
吏閩海無端被劾茲因制府高君保薦入京  
引見特授福州太守詩以送之

和璧南金席上珍  
刃游盤錯出風塵  
范馨遺硯興  
宗在劉寵攀輪直道伸  
啓事薦賢安海嶠  
英資入  
覲動

楓宸二千石共生民寄拭目遲君報最新

曹奕汪編修尊人六十壽

篤行高風不受縻  
蘇君一著有誰知  
文章進御畱  
鴻跡經術傳家識  
燕詒令子已成公  
輔器先生自  
詠考槃詩養生妙  
得長生訣花甲迴  
環鬢未絲

七月十一日

圓明苑奏事畢

上親揮宸翰賜閣臣各扇一柄恭紀

綠陰深處映晨暉

天語頻宣剖萬幾  
仗下諸司方退食  
寸陰

宸翰又親揮

二

宮扇頒來墨未乾  
內官宣賜不勝歡  
當年藩邸多

清暇舊句新題仔細看

傳旨云扇上之詩乃藩邸舊作也

寄壽同年鄭英玉八十

蹕絕高風數十年  
攀嵇交呂士爭先  
文章典誥畱



夢山堂詩卷三  
中禁詩禮淵源啓後賢無事閒居搔白髮有泉種  
壽出丹田松喬雲漢人皆仰杖國開筵儼是仙

孝廉何履上六十三生子有贈

天錫非凡器先難得晚成仙桃生巨實老蚌育晶  
英採取金環在偷看枕秘驚珠簾隔座處莫蔽乃  
翁名

同邑鄭子秋浦爲余寫照作圖池臺宛轉欄  
檻窈窕蒼松映庭嘉卉咸備左右列數麗人  
彈絲品竹按拍而歌極人生之樂事余老矣  
枯木朽株不堪位置覽圖增慨因題十絕句  
翩翩年少到瀛洲四紀浮沈雪滿頭不信丹臺在

人世生綃一幅畫圖遊

二

身在金階玉殿前夢魂只是繞林泉恩深敢說歸  
休好痼疾烟霞是宿緣

三

手植成陰客未歸池頭閒殺釣魚磯浮生已逐輪  
蹄老猿鶴從教笑我非

四

點綴亭臺簇簇新憑欄獨坐是何人良辰美景非  
容易況得優閒自在身

五



夢日堂詩卷三十五  
九  
老醜衰癯貌已陳生描何處著風神畫師好事憐  
枯寂添箇雲鬟霧鬢人

六

顧曲周郎髮似銀清商入耳尚相親多情已作無  
情叟恍聽雲璈奏幾巡

七

如花佳麗想前因認取當歌一笑嚬解珮自成誰  
實相他年我亦畫中人

八

東山絲竹古來稀謝傅風流不可幾粉本圖成誇  
韻事笑他泡影暫相依

九

名花美女逐時新妙繪流傳世所珍色相都空隨  
夢幻不須疑假更疑真

十

天與癡頑八十春烟雲過眼不須論香山寺裏凌  
烟閣輸與南陽菊水人

題錢主敬編修母夫人夜紡授經圖

寒宵燈火舊清貧捧卷垂髫憶苦辛慈教當年依  
紡績鴻才今日掌絲綸退朝文伯瞻懿範隔幔韋  
家領搢紳八座起居酬寸草鴛湖花下待扶輪  
重九前一日甘雨露足次早詣



圓明苑塵塏盡消秋光倍皎歸路口占

久晴好雨洗秋光曙色微茫入苑牆一夜商飈開  
令節今朝旭照正當陽登高却喜蓬山近避厄無  
須菊酒嘗攜得粉餐

天上賜歸來新月照茱觴

子姪輩闌事既畢招之小飲

羣從來過一舉觴延將好月照空堂盤堆瓜果

天家賜

蒙瓜出以分餉

坐映璠璣雪鬢傍寂寂心情嗟

老去恂恂恭謹喜蕃昌分鑣爭路雲霄闊令節先  
飄桂子香

二

從儉何妨今也純菜羹情話自生春忘機久已安  
吾拙悟妄於今信道真來往烟雲看旅雁浮沈踪  
跡笑秋蘋致身努力非容易混跡紅塵要出塵

重宿馬蘭峪草廬

陪祀膺

新命朝

陵是舊臣戀深忘跋履路熟少逡巡位忝絲綸地天  
畱拜跪身草廬重借問信宿亦前因

二

隣農來問訊相見話枯榮爭訝衰翁健羣歌

聖主明田疇逢屢稔民物慶咸亨舊客同鄉井依依



雞黍情

十一月十三日

聖祖仁皇帝忌辰陪祀

景陵

緇素衣冠叩玉陔今朝萬國有餘哀謳歌善繼懷  
前烈肅拜羣僚憶舊培日照觚稜陽德煥雪殘林  
樹鑒臨開遺弓在抱頻瞻望似挽龍髯霄漢回

二

鼎湖儼在不勝悲禮畢裴徊欲去遲六載

山陵酬

大孝一年綸閣覩

重熙豐碑功德昭千古

寢殿光華奠兩儀白首老臣猶好在報恩難稱盛明  
時

冬至前一日蒙

賜黑狐端罩是日同拜

賜者虞山蔣公長白尹公及元龍三人定例惟閣臣  
得邀異數雖正卿不及也

殊錫名裘寵宰臣黑狐被體自生春貴踰千鎰遐方

貢光壓三英內府珍別示等威昭異數默叨和氣  
轉洪鈞捧持載拜歌

陽德願布餘溫及萬民



孫砥中相公八十壽

碩德耆年晚節香如山如嶽領班行後凋松不矜  
凡豔耐冷梅偏壓衆芳旋馬門庭閒寂寂吐茵氣  
度自洋洋由來帝賚生申甫默贊洪鈞壽命長

二

聖恩眷舊禮加隆中外翹瞻一路公錫賚便蕃踰几  
杖班聯羣集聽歌鐘巖廊峻望人皆仰綸閣清風  
譽更崇百歲還應追衛武一篇懿戒志相同

題景履齋風木圖小照

顯揚身際盛明時列鼎重茵有所思避地永懷三  
釜養興宗不負一枝移白雲在望終身慕紫誥褒

封有穀貽妙手寫心非寫貌圖成一卷蓼莪詩

大臣年七十以上者許乘馬入

紫禁城恩已渥矣茲又

特賜內府肩輿乘坐出入

聖朝佚老殊恩自古所未有也

策馬徐行度禁門朝朝出入感

殊恩又憐雨雪霜蹄滑

特賜肩輿翠幕溫禮邁公侯驚受寵榮加耄耄敢稱  
尊朽株難報栽培德盛事千秋永不諠

除夕偕桐城相國俞穎園張得天二學士齋  
宿院中



齋居偏稱玉堂清隔歲祈年

聖主誠鈴索無聲宮漏近椒觴不設燭花明坐聯元  
輔容疎放談接名賢愛老成破臘春光先布暖夜  
深引領泰階平

二

除夜爲歡畏寂寥心清我自賞今宵俗傳守歲添  
爐火人喜回春驗斗杓伴食無能餘雪鬢肅衣不  
寐愧金貂庭槐知是何年種四紀相看笑未凋

雍正八年庚戌正月初二日辛未

聖駕親祀

天壇大饗殿祈穀禮成恭紀

并序

禮稱上辛祈穀而上辛有與元日相近者  
則用次辛由來久矣茲歲元辰次日卽值  
上辛

皇上敬

天勤民心誠念切特降

諭旨暫停元旦朝賀致齋三日于上辛吉辰

躬親昭事是晨景雲麗空綢繆糾縵條風應律長養

發生占驗可徵豐登有兆

皇上升階行禮樂作風定太和翔洽旭日晴明

聖德格

天羣心胥慶

臣

忝預陪祀之末敬賦里言四首用誌



盛典臣無任歡忭悚惶之至

聖主精誠契

昊天上辛典禮特昭宣後庚先甲宜仍古除夕元辰預告虔善政養民農事重祈年錫福

德音傳紫微太乙光華燦應律條風散曉烟

二

宮庭三日致齋嚴一念誠周億萬年曙色未分移綵仗和風初定裊爐烟

天門降輦

宸容肅

玉步登

壇旭照懸九奏簫韶歌樂歲鳳凰遙度五雲邊

三

欽明峻德與

天通非霧非烟麗碧空

六馭親勞禋祀首萬方共育

聖心中泰階平朗開三始玉燭調和應八風肅穆禮成弘錫嘏長教遐邇慶年豐

四

休徵駢集應昌期

敬畏乾乾讓不居

明德惟馨孚



帝饗保民如子感靈祇永無水旱登仁壽長慶豐亨  
受福釐治統大成開泰運蕩平和樂邁軒義

壽查學菴七十

讀書儒者事通塞不須論釣采名常滿逢時技每  
新問誰心不忤孰是學能醇吾友真君子於今見  
古人家門多貴顯裋褐守清貧少小窮經籍文章  
邁等倫倚天還拔地扛鼎笑扶輪羞樹詞壇幟潛  
懷席上珍五更嫌漏短萬卷愛情親馬帳人皆雋  
龍門士就甄寓公深匿影盛德遠招隣晚達安時  
命登朝任屈伸舍人寒爆直郎署夜准寅薄祿還  
耕硯高才更葺鱗錦窠聲譽貴清廟品題真質直

胷如雪勤勞鬢早銀匪躬心蹇蹇守拙度攸攸奉  
使寧辭遠當官敢惜身丹誠邀

睿

照白首鑒忱恂許遂西疇志爰歸東海濱到家翻

似客久宦不沾塵蔣徑香畦滿陶籬淺水垠神仙  
風骨凜道義貌言淳扶杖閒成趣題詩靜詠仁管  
牀重拂拭梁案話艱辛雛鳳堪誇薛優龍已邁荀  
風規型後進渠範儼先民舍外懸車日江心鑄鏡  
辰延年烹菊飲作佩采蘭紉官醞輸村酒鄰農勝  
貴賓機忘能不老心廣可長春著述筭彌富交遊  
迹已陳香山君獨畫洛社我難掄倦翮丹霄裏枯  
槎碧漢津



恩深歸未得地異夢思頻寄語瑤臺客遐齡托大鈞

題勵南湖司寇老圃秋容圖小照

遠岫喬柯映紫霞蕭然獨坐愛幽遐寒香有味秋  
光澹晚節無華歲月賒三接歸來溪路暗八义詩  
就暮雲遮香山麟閣隨時會鐘鼎林泉本一家

二

一德明良際會難

兩朝三世直金鑿鏡中髮白心彌赤夢裏山青地是  
丹後樂先憂今日事功成身退異時歡畫圖位置  
秋容好對月臨風一笑看

題勵滋大小照

英年文采玉嶙峋擁節爭誇有世臣馬首風行看  
草偃西方時雨作人新

二

芰荷香裏集諸生澄澈冰壺映水明何處衙官門  
外望從教屈宋亦心驚

三

蕭家兒戲學傳呼公望公才襁褓多庭畔翩翩來  
道韞吟成飛絮壓鳴珂

四

夙駕還朝覲紫宸簡書昨又降新綸重臨早樹風  
聲遠鐵面前番白面人



耳聾戲作

六根斷却一根情萬籟都空萬慮清誠可前知寧  
逆億靜中觀物得虛明是非不擾心常定毀譽難  
搖意自平要識洪鈞當大叩蒲牢不受寸莛聲

二

衆中默坐我何知白髮蕭蕭作羽儀聾耳公言存  
直道從他偶語喜忘私塞聰有礙叅無礙返聽無  
疑化有疑寂守虛靈長不昧形骸土木任人嗤

戲詠西瓜燈

瓊漿吸盡碧琉璃照夜光分太乙藜長短燈檠當  
暑徹綠窗交映自相宜

二

絳雪柔肌性本涼心空一點慧燈藏紅消綠暈明  
無滓碧玉玲瓏勝夜光

三

廣寒宮外碧雲天直射光芒一顆圓暑夜照人清  
影靜飛蛾散去不教憐

送許立巖館卿歸里

容臺予告記當時館閣猶傳數卷詩二十年來人

事異青門又復送君歸

辛卯春尊大人以大宗伯告歸余時爲少宰兼掌院

事偕同館賦詩贈行篇什成帙今二十年矣

二



腰金容與一清卿

恩許歸休保令名林下高風承世德亭前手植綠成陰

三

曾開馬帳舊書堂雛鳳聲清棣萼芳君甫勝衣我

弱冠於今鬢髮兩蒼蒼

昔年太宗伯設帳寒舍君甫垂髫偕我峰令兄相隨

肄業余亦方弱冠也

四

硯席青燈六十年同朝喬梓各隨肩

太宗伯長余一紀余亦長

君一紀

八旬一老難言退餞別臨風倍惘然

五

一門三世繼清芬佚老優閒又拜

恩未展經綸應有待鳳池繩武與文孫

送陸儼岩太常歸里

高懷寧澹歲時深攬鏡頻愁鬢雪侵不待陳情

溫旨降

聖恩佚老鑒臣心

二

蕭疎嗜退獨開襟老輩風規衆所欽宗伯司農同

拜

命太常歸去更恩深

錢少宗伯陞太宗伯俞學士陞少司農與太常致仕同日命

下



三

一片冰心孰與同作人嶺表播清風歸裝尚有殘  
書卷掃徑高吟興未空

四

布帆無恙月華明秋水波澄自在行桂楫雙搖人  
不識遊仙並載兩清卿


時許館卿同歸

五

二紀論交道義敦遂初先我獨高騫黃扉豈是優  
閒地雁影難追愧

主恩

題

小照

平津坦腹舊知名公子才華莫與京三十年來成  
昔夢芰荷深處一舟橫

二

甘棠垂蔭鄴城頭無限高情說庾樓妙手傳神畱  
粉本畫圖風月足千秋

壽吳甥維賢六十初度

五斗從來愧一經洪鐘寧屑試微莛不誇奪席曾  
甘冷懶學搯刀似獨醒閉戶靜看苔徑綠攤書自  
對海山青行年已叶三鱸兆好獻謀猷拜大廷

怡賢親王輓章五十韻

乾符凝景命坤德毓元臣名世非凡器



興朝應運人英靈鍾川嶽誕降自星辰帝賚紆  
宵旰天生翊

聖仁金枝資輔弼赤舄本宗親

繼述光華燦調和雨露均臯夔勳不有周名德彌醇  
手足爲心膂鹽梅是鳳麟功成歸碧落力瘁返蒼  
旻無憾人間事全歸天上身匡勳已畢來去亦  
前因而我同朝隔難將哀惻申典型俄萎謝柱石  
孰依循景慕班聯痛吁嗟道路頻友于辭

黼座震悼動

楓宸臨視停

雕輦驚趨集薦紳共將勳業數各就見聞陳已足銘

鐘鼎還堪誌玉珉誰知密勿地默契轉洪鈞歸善

王心慎褒嘉

天語諄退藏箴夙夜追溯布

絲綸盛德今方顯孤衷永不堙子臣皆立極敬愛兩  
俱伸眷自

先皇舊勳因佐命新抒誠能守正竭力尚含辛移孝

忠心篤忘私直道振救幾多獻替獨立少逡巡潔  
白誰能染剛堅詎可磷吐哺期廣益不寐矢惟寅  
變理三階爛陽和六宇春度支籌國用薄賦惠烝  
民俗衛勞兼領干城練絕倫巡行周甸服教稼滿  
河濬澤及生靈徧功將造化隣明通寧有蔽公溥



卷之三  
三  
屆無垠正色消同異和衷絕喜嘆物情咸洞照博訪備

咨詢篤棐終如始勤勞暮及晨書思常贊贊風度自  
閭閻肯負蒼生任都忘玉體珍不求金液煉遽作  
紫陽賓紀頌書頽頽悲思淚浥巾遊仙登絳闕揮  
手謝紅塵月下瞻風馬雲中望羽輪士民思繪像  
童叟泣重闈偉績垂天壤鴻名播海濱千秋崇配  
享萬世肅明禋汗簡光青史豐碑勝大椿風雲環  
兆域金石鑒忱恂奕奕遺忠在長爲佑

國神

伏讀

御書賜怡賢親王忠敬誠直勤慎廉明八字每一字

恭賦一首

天潢同氣一純臣移孝爲忠佐

紫宸金石丹心昭日月冰霜勁節感神人成功不有  
皆歸美盡瘁都忘是致身

列祖相依重慰勞九霄仍舊位星辰

右忠

常存寅畏輔

靈承止敬爲臣久服膺眷篤寵深彌抑抑位高地近  
益兢兢肅容靖獻如憂墜滿腹經綸似不勝進退  
何曾踰尺寸威儀師表想凝丞



夢上言卷三  
三  
右敬

兩儀萬物一誠通上下交孚此志同寤寐致虔非  
飾貌訐謨入告盡由中不欺暗室箴幽獨無愧明  
廷布大公赤紱袞衣天上去精英奕奕仰丹衷

右誠

松喬嶽峙性天成直道匡時託

聖明無隱無欺常獨立不偏不倚自孤行淵懷坦白

人皆仰正色端凝衆盡驚八載立朝風度凜流傳  
百世尚崢嶸

右直

運籌軍國衛蒼生五夜披衣坐待明咨訪周知天

下事措施計及萬年行心勞只恐煩

宸慮力疾如常慰

聖情協贊憂勤身不惜歸朝

天

祖告昇平

右勤

慮始圖終百事宜當幾鄭重慎敷施嘉謨入告先  
焚稿才智超羣更集思常恐勳名來世譽不形聲  
色畏人疑若非

詔旨明宣示密勿何由得仰窺

右慎



風清朱邸肅屏藩澹泊無求志所敦寡欲養心心  
自得不貪爲寶寶常存寵頒金帛猶畱筭餽獻溪  
毛不及門潔白天生誰得似素絲未足比璵璠

右廉

上智由來本大公明周遠邇一心通事幾盡入冰  
壺裏人物都歸水鏡中庶政紛糾徐剖晰一言叅  
決破疑蒙高懸朗鑒如猶在皎月當秋照碧空

右明

爲王天游侍御題贈行花卉畫卷

人事如花不可期移根落實結離思圖成粉本傳  
佳話長憶盈枝澹蕩時

二

露蕊霜葩趣不同秋容何似舊春風憑君一洗鉛  
華色補畫喬松入卷中

送任香谷學士暫假得請歸里葬親

綸閣移忠動

聖情恩光千里繞佳城靖共廿載期無忝錫類今朝  
報所生紫誥丹旌相炳耀素鳩白雀共將迎曲江  
孝感今重見青史他年繼令名

二

過庭遺訓啟鴻騫安定風規憶昔賢國藉訐謨三  
事重文成典誥一經傳楓飄驛路迎歸棹梅發江




城促整鞭老我松楸頻入夢羨君忠孝兩俱全











T5466/7910

10



CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

OCT 4 1960



愛日堂詩卷二十六

黃扉集二

辛亥十月至  
壬子三月

八十述懷詩

并序

哈佛大學漢和  
圖書館珍藏印

歲在辛亥余年已屆八十自顧薄劣廼玷  
大位躋高年負慙滋懼敢自慶乎撫今追  
昔慨然有作得述懷詩十六首

久戀塵凡未了緣  
懣懣不記絳人年  
已嗟往日過  
三萬敢向來朝計  
六千

恩許肩輿登禁地  
免教扶杖去朝天  
殊榮負戴同山

嶽湛露能令朽木鮮

蒙恩旨賜內府肩輿入  
禁門凡遇大朝會免行禮



造物多情厚我生身依日月被華纓已兼齒爵慙  
涼德豈有猷爲報

聖明補過未能愁日短效忠無力暗心驚便思佚老  
非臣分敢學辭家向子平

三

通籍承明五十年鳳凰池上重畱連庭槐依舊欽  
前輩院吏都非訝謫仙少壯風流虛白日衰殘身  
事託青天東華曉直迎晨旭白髮繽紛

玉殿前

四

少時贏得性疎頑掃地焚香只愛閒兩度栖遲辭

禁直再蒙宣召自田間雍容金紫心如水悵望松楸

夢是山身在雲霄常捧日却從天上慕人寰

五

儒術迂疎不足論歷官中外是

君恩廟堂愧乏嘉謨獻嶺表猶餘直道存已斷見聞  
非守拙更無儕輩自稱尊朝朝暮暮成前度比擬  
田家老瓦盆

六

昔日懸車未得懸

鼎湖慟絕白雲邊

重華復覩乾坤朗再造餘生雨露偏六載



夢月堂詩卷三十六  
園陵陪孝享三年綸閣領班聯傾陽只恐葵心槁顧  
影欹斜每自憐

七

禁庭久侍

先皇帝御筆呼爲老翰林舊抱愚誠蒙

眷厚新邀

寵命荷恩深浮雲不改青山色

旭照能明赤子心貝錦南箕緣底事每思

天語淚霑襟

八

獨子中年甫抱孫傳家惟有一經存亡妻廿載遲

同穴老屋三間鎮掩門故里近聞城郭美吾鄉新繕城垣  
舊交誰共笑言溫薄田昨歲多禾稼生計雖微足  
簋飧

九

羽倦飛高傍紫霄迢迢雲路漫逍遙果因苦味翻  
稱碩花不成蹊却有喬便擬辭榮離世網誰能拔  
俗逞仙標衰軀六尺非吾有恐負山頭舉手招

十

染翰臨池浪得名含商嚼徵也關情耳聾按拍聲  
多悞目暗書斜字不成嗜好都空常守默虛靈未  
昧自神清何時謝却人間事無慮無營了此生



十一

刻漏雞聲報五更猶燃殘燭待天明守愚那敢期  
謙益器小常憂已滿盈白首休論青史事丹田自  
想紫烟清香山洛社誰能企可許花村學耦耕

十二

前因髣髴憶獅牀澹泊心情耐久長煖老不求燕  
玉妙克腸自愛菜羹香門前客少蒲團穩卷裏蟬  
多硯席荒抹月批風都已懶公餘獨坐室生光

十三

日暮光陰暗裏催情畱景謝把殘杯語非已久今  
安是往事難追詎有來妄念盡消聊自得道心未

損藉無才衰翁尚有高吟興且向花前笑口開

十四

獨臥匡牀夜及晨蕭然一室自生春黑甜已絕溫  
柔境化蝶看他傀儡人樹立動猷猷還少壯喧呶宴  
樂謝交親全歸造物誠多幸莫認吾生自有身

十五

城西舊圃徑全荒松偃梅欹閉草堂鶴壽自長忘  
我老花枝應瘦笑人忙春秋佳日隨川逝風月閒  
情到枕涼門外小渠通潞水白頭灌叟望歸航

十六

上藥金丹何處尋赤松黃石已沉沉漫思長命空



夢日堂詩卷三  
四  
修道欲保餘年只問心雨足波平魚在沼月明風  
靜鳥歸林忘機便是瀛洲客鸞鶴山頭聽遠音

送王瞻蓼表舅歸吳門

相門才子聚二俊最能文爽氣凌青漢高懷拂紫  
氛弟兄同入雒去住暫離羣親舊憐余老回看冀

北雲

時成季令弟畱都中

二

憶侍

堯陵日山村鮮故人驅車勞慰藉下榻久逡巡風雪  
柴門夜雞豚野市春俄驚五六載不覺往來頻

三

重入紅塵裏期君早致身名高仍濩落才大歷艱  
辛裘敝長安道花濃故里春揮鞭無限意勁翮待  
蕭辰

四

聖朝無棄物廊廟有衰翁館舍青瑣冷盤餐紫蕨充  
鄉心隨砌草客思寄征鴻倘遂歸與願漁磯可許  
同

暮春十一日任少司馬假宛平相國怡園集

館中諸賢會課以賦得花枝照眼句還成爲  
題盛事也聞之故態復萌口占二首

時雨初晴啟令辰催詩花意自相親忘情忽得多



情句不語如逢解語人色射朝霞明欲動香浮綵  
筆字生春午橋舊接瀛洲路授簡登堂盛事新

二

名園不爲尋花去花引詩情欲吐伸紅暈小桃光  
有耀綠垂弱柳淨無塵韶華觸目幽情動景物宜  
人得句新十雨五風春倍好畱題莫遣負良辰

首夏陰雨浹旬喜而有作

北方當首夏少雨每多風

聖澤通元化神膏降昊穹連朝飛霖霖入土潤空濛  
四野知應徧來牟已兆豐

二

玉河橋上過流水聽淙淙馬滑愁南客車遲困北  
僂天街塵不動上苑蔭初濃霑濕歸來好香篝疊  
幾重

三

宛得江鄉趣輕寒白袷宜紅消新沐後綠軟小垂  
時墨潤光生紙香畱細染衣蠶眠梅子熟景物繫  
人思

城南花塢宛平王相國別墅也堂之四面積  
紅藥十餘畝爲都中名勝昔時讌賞頻仍今  
四十餘年矣令嗣恕亭親家守而勿替今夏  
時雨霑足花事尤盛折簡相邀畱連竟日撫



今追昔率賦二首

城南綠野昔頻過三十年來散玉珂黃閣許謨藏  
典冊青郊亭榭隔烟蘿名花含露懷遺澤故笏畱  
牀歎逝波慙愧登庸衣鉢在白頭紅藥共婆娑

二

花塢重遊思不禁百年堂構畫沈沈玉盤盂映人  
如玉金帶圍前品式金時諸郎君咸集玉盤盂槐  
金帶圍皆芍藥花名蔭清深同夏屋井泉甘美憶商霖畱連不覺歸來  
晚馬首斜陽在碧潯

次日曹諤廷庶常依韻屬和趙甥蓼亭復以  
絕句五首見示追述十年前同遊時賓朋觴

詠管絃之盛余已忘之讀其詩恍如昨日再

疊前韻二首

十年陳迹隙駒過載酒徵歌客佩珂紅藥依然開  
步障綠槐深處見懸蘿名園世守重重錦人事遷  
移疊疊波昔日同遊誰好在曲欄倚徧自摩挲

二

滿目繁華意不禁勾畱坐待日西沈千枝直比連  
城壁十畝寧輸布地金繡壤廣延愁抱甕銀牀深  
汲擬甘霖年年花事應如舊羞把衰顏照碧潯

題毘陵楊笠乘江天一笠圖

白練千層一點紅江雲江雨掉頭空半帆安穩中



流坐不羨飛杭逞快風

二

蹋徧香塵十丈紅江頭乍見碧天空一聲高唱公  
無渡盡脫輪蹄拜下風

三

水落波平夕照紅畫船簫鼓過江空好將一笠邀  
明月載得夷光共御風

題汪謹堂編脩雨中趨直圖小照

垂柳陰濃雨滿渠玉牕染翰待應璩衣冠霑濕毫  
端潤揮灑烟雲到直廬

二

九衢人識校書車瀟洒風規畫不如緩步無須乘  
欵段駕轅舊是賈生驢

三

胷中自載汗牛書出入何妨下澤車雲裏觚稜瞻  
咫尺侍臣長在上清居

敝居先人所貽於今已歷百年余久宦離家  
不遑自謀居處漸將傾圯不得已令家人重  
加修葺聞已工竣而塗墍華飾勝於往日非  
余志也因賦二詩畱示後人

百年堂構舊經營不墜詒謀兩板衡庭際原無旋  
馬地室中惟有讀書聲高飛燕雀重來集盡闢蓬



蒿亦自閤門似臣心長向北面城近市足平生

二

君

恩鄭重煥璇題聞說門高恐未宜里號鳴珂吾豈

敢堂開光德意堪師

唐崔鄭居光德里四世同居

美輪美奐驚

華節攸芋攸寧結遠思自笑主人長作客何時扶杖到階墀

購得桂花一枝置室中頗愜幽賞喜而有作

雲外飄來思渺茫涼風吹夢到江鄉一枝遠涉登堂重千蕊徐開隔院香天上奇葩須寶護人間晚節好深藏爐熏屏却羞蘭麝低亞相依几研旁

二

移根入室碧紗籠仙友應憐鶴髮翁金粟不教零玉露玉犀好與避金風連蜷自老空山裏旖旎能容小閣中搖落滿庭君獨秀三開有待護簾櫳

三

故園叢植待何人購得低枝意轉親不向小山招隱士却依上苑伴蕭辰天香寧作塵中客仙品應爲席上珍倚樹無愁風露冷夜深坐對自怡神

四

滿室清芬靜掩門八公可接坐黃昏落英枕畔畱香魄素影燈前誤月痕豈必平泉羅異種相憐寒馥託孤根長沾衣袂誇荀令萬斛休將十日論



九月九日爲桐城相國六十誕辰敘舊言情  
得詩六首以當祝嘏

盛世元臣本大儒承家一德際唐虞運籌帷幄垂  
鐘鼎時塞外用兵先經國文章在典謨無我虛公  
涵萬類有容氣度蓋寰區黑頭今日周花甲四海  
蒼生祝斗樞

二

朝朝三接意翛然夙夜如依

玉几前啟沃不居歸

主聖贊襄何有讓臣賢百僚師表中心悅庶事修明  
奉職虔共飲太和成壽世丹田方寸駐遐年

三

四維八柱一身兼皎皎冰壺不受炎後樂先憂心  
保泰持盈戒滿福隨謙明通似水無遺照凝靜如  
山衆仰瞻澤徧生靈仁者壽不須守默自神恬

四

帝眷公忠倚任勞三銓兼領冠諸曹總持六典平邦  
政陶鑄羣材得譽髦開閣無私秋月皎瞻牆難企  
喬雲高只應仙侶時來過靜聽雙成奏玉璫

五

故事槐廳旋作霖吾師手植已成陰文端公爲院長時于院中  
植槐數十枝儲才本是登庸地育德仍煩上相臨  
今極茂盛



磨琢瑤珉登夾袋飛翔鸞鳳集高岑他年懿戒傳  
中禁百歲還同衛武心先生時兼掌院事

六

濟美調元佐

聖明

兩朝倚眷駕韋平常懷篤素仍師儉善述傳經作宰

衡篤素文端公堂名傳經先生鳳閣何緣陪末座

鯉庭舊識老門生予受文端公教習曲江開宴羣

稱壽好借霞觴慶順成唐時九月九日宴羣臣于曲江

題朱海樵青材昆玉合畫小照圖中兄弟三人  
人乃昔年所畫今伯氏已作故人矣

花萼當年萃一枝三荆四鳥不勝思陸機詩三荆  
悲異披圖莫憶鵠原痛二惠欣看競爽時

二

孔懷天顯是家肥酪乳醍醐世所稀一夕對牀風  
雨共明朝雙鳳見聯飛

三

恭讓家風愷悌思相將法護與僧彌琴堂共被如  
叅佐青綬光輝映白眉陸機兄弟同居叅佐廨中  
材同在署中助理

四

百里休嫌鬢未斑濟時莫便拂衣還馮君大小成



名後歸隱人呼大小山

時海樵頗動休官之興故云

送錢蔗山大宗伯予告歸里

容臺清望古稀年

詔許辭榮秩更遷

特晉崇階隆保傅光生畫錦羨神仙中朝舊德畱難  
遂洛社耆英去獨先正是東籬黃菊綻寒香晚節  
十分妍

二

左掖名臣入鳳池官兼清要荷恩私虛懷下士羣  
情仰霽月光風學者師望繫蒼生遮道擁心縈紫  
闕掛帆遲榮歸恰值懸車日鄉國傾心覩羽儀

特恩賜給封典恭紀四首

并序

雍正七年之冬奉有

恩旨大臣年登八十屆期奏聞茲

臣

元龍八十初度

適值

萬壽元辰先二日具奏以備員閣臣以來祖父未遇  
覃恩爲請卽蒙

聖恩准給一品四世

誥命誠遭逢異數也

兩朝知遇保孤根尚齒還邀

錫類恩一品崇階榮四世

九重寵命愧三尊黃麻久玷官虛位



紫誥垂褒慶滿門臣力已衰何以報抱孫誠子寸丹

存一子服官  
一孫在抱

二

白髮呼嵩拜

紫宸幸登八十荷

恩新生同

華渚流虹日遇豈蟠溪把釣人千叟宴中遺故老

康熙

六十一年正月四日曾陪先帝千叟宴者惟元龍一人存耳萬年枝下未酬身

天書鄭重鸞迴紙捧出黃扉淚滿巾

三

祖德垂床已百年重營舊兆表新阡

先祖浮厝已及百年茲五

兄六弟貽書相訂於今歲臘月就厝地加封安葬恩命到日恰值葬期殊榮降

旨來三殿異代蒙

恩入九泉碑碣生光雲繚繞松楸動色露鮮妍未遑

負土心多疚遙望堂封

寵命宣

四

高曾世受

主恩深重疊貤封煥

玉音太宗伯兄曾封四世元龍官詹事及粵撫時奕會以加級貤封今又晉大學士爲正一品

世永懷移孝志一門共勵教忠心表彰遺澤榮華

哀諷誦清芬守素襟述德賦成難報



國不堪搔首雪霜侵

壬子元日病起言懷

昨宵過八十新曆又重開老去驚年換春遲待病回

恩容高枕卧夢醒早朝催侵曉仍彊起人扶叩北陔

二

衰甚慙陪位

恩深卹老臣洗兵

天佑

聖布澤地皆春用九成功遠餘三舉世仁萬方胥樂土有幸乞閒身

寅文三兄年八十四矣念余去冬亦登八十

枉詩相念依韻寄酬

神仙遺綬冕天爵在山林不受人間責長堅物外心喬松出塵表老鶴入雲深忽憶京華客飛鴻達遠音

二

久宦俄稱耄回頭望故林羨兄難老術憐我未歸心紫閣松楸夢白雲桑柘深倘酬骸骨願好和九臯音

題單升姪試泉圖

清白傳家一寸心江流徹底鑒千尋公餘試酌中



冷水豈爲烹茶意自深

二

曾下瀟湘返故林又勞王事到江潯  
飲泉自抱澄清志百里難忘萬里心

故友曹希文有永安湖上居圖沈恪亭所畫  
也二君各有贈答之詩今二君皆往矣希文  
令郎曉谿以舊圖索題追和原韻四首

歸夢年年慕鏡湖永安山水得如無  
風流雲散知交往歎息人琴展此圖

二

高懷翰墨動寰區硯匣琉璃筆鼠鬚  
歸隱未成名

繪在流傳文采自紛吾

三

偃蓋蒼松百十株長堤宛轉借筇扶  
詩情畫意相酬答想見當年兩哲夫

四

辦成蓑笠有夫須宛在圖中意自殊  
笑我白頭歸未得憶君心老貌先癯

購得小梅一株有作

鄧尉千株香似海西溪古幹畫不如  
追思遊跡渾疑夢覓得卑枝意未虛  
近愛清芬依研席暖融曉日傍窗疏  
花飛人老空相待手植成陰繞舊廬



余昨歲曾賦八十詠懷詩十六首新正病起  
無事再疊前韻亦如其數

浮生難問去來緣獨坐閒吟餞歲年舜日光輝初  
用九堯莫開落已經千華胥大治今非夢兜率重  
生詎有天莫笑衰容飄短髮

聖恩許映錦袍鮮

二

畢世時憂忝所生兢兢容易荷簪纓津塗曾歷烟  
雲幻心迹難遮日月明常恐先人行每後偶逢樂  
事意偏驚殊榮終老誠多幸遭際清時詠太平

三

聖德重華億萬年臣心蹇蹇慶來連呼嵩應集青城

客扶杖羣看紫禁仙

白香山詩名  
慙紫禁仙

敢向然燈思授

記恐先靈運早生天鵲班初散交相祝自笑婆娑

步不前

四

壯不如人老更頑萬緣屏却寸心閒置身暫寄雲  
霄上歸夢常依水石間土木形骸慙紫閣塵埃面  
目愧青山跼踖悟徹無生理一念還應出九寰

五

身世浮沈詎足論負山戴嶽不勝恩室生虛白閒  
情少心剩餘丹浩氣存無裨廟堂空守貴何功鄉



黨自稱尊只應秉耒隨田畯鳥出雕籠花破盆

六

綸綍承宣旭日懸沾恩汪濊浩無邊親聆

天語垂謨典深入人心化黨偏啟事羣僚朝每集作

朋三壽袂常聯孫中堂年八十三尹中堂年七十七素餐備位曾何

補眷舊恩偏

聖主憐

七

落花力盡辭名圃倦翮飛遲憶故林海內謳歌

明主德田間擊壤老臣心日趨殿閣雲霞燦遙望寰

區雨露深退食從容封事少黃扉危坐整衣襟

八

清貧何以蔭兒孫贏得扶筇一綫存得孫甚遲尚在抱也敢

望能文趨上舍且聽洛誦守柴門催花人愛先春

發擁被吾貪到曉溫子姪遠將鄉味美旅中猶得

媚盤飧

九

茫茫身似在丹青回首歸巢路已遙逢閨黃楊終

自短不材樗木亦名喬白頭不稱冠裳美青史還

愁姓氏標夢裏烟霞迷客徑江頭漁父暗相招

十

守拙無能畏飾名塵緣多累爲多情光陰少壯嗟



虛度志氣衰頹事少成退食杜門酬應絕忘機高  
卧夢魂清敢言似水臣心潔何慮何營畢此生

十一

過眼浮雲幾變更寸心不動月常明空枝猶記崇  
朝豔涸澗曾看昨日盈山色經年長不改松陰歷  
久自然清心田莫遣生蕪穢畱取膏腴世世耕

十二

閒來獨自踞匡牀駒隙流光亦自長小戶不求千  
日酒冥心只對一爐香柔翰狼籍難終棄書卷叢  
殘任久荒寒月滿庭窗紙白不教燈火亂清光

十三

春歸臘盡暗相催辭歲家家競舉杯獨惜餘年畱  
不得心驚淑景又重來梅香冷淡花無色鶯語喧  
呶鳥有才最羨山家閒父老柴門永日不曾開

十四

病餘倦卧不知晨爆竹聲中報早春已分衰殘成  
棄物從來進退少全人天街聞說華燈鬧斗室惟  
將藥裹親但使神明長不昧何妨聾聵晦於身

語人晦於身  
神明內腴

十五

守默終朝萬慮荒衣冠土木笑堂堂不謀功利神  
常泰暫假朝叅意不忙三尺空牀千里夢半間煖



室一心涼冰漸解多歸客何異登仙上越航

十六

陳迹年深不可尋閒來獨坐思沈沈榮枯得失崇  
朝事南北東西萬里心才豈鹽梅慙鼎鼎形如木  
石稱山林簷前鵲噪無他喜報我歸歟是好音

雜憶詩三十六首

勞生似我世應稀八十過頭未拂衣試問年華餘  
幾許癯容猶自戀輕肥

二

擾擾輪蹄六十年白頭追溯自生憐家園風景殊  
今昔憶舊疑新一惘然

三

過眼繁華不可期衣麤食淡繫人思吾家儒素相  
傳久脫却朝衣卽舊時

四

侵晨兄弟集書堂漏下挑燈夜未央脫粟布衣相  
砥礪儉勤遺訓未能忘

五

寒栖墨帳夜三更擁被披衣一卷橫記得小樓燈  
火暗書聲隔院雜機聲

先慈率婢僕紡績每至三更

六

雙桂庭前已拂雲童時手植憶嚴君樹猶如此興



長歎寄語家人保護勤

七

生長柴門夢裏尋弟兄師友盡銷沈年年只有堂  
前燕認取巢痕是故林

八

少小觀光入

帝京僦居陋巷貌常羸從人懷刺吾何敢圭竇朝暉  
夜短檠

九

十載成均弟子行文章幾度遇孫陽日沈散去愁  
金鑰策蹇如馳過苑牆

余在雍中最久徐崑山李  
合肥及宋文恪爲司成皆

荷賞  
識

十

寒素無端中雀屏衡文獨賞萬錢青黃扉今日懷  
前輩知已情深淚欲零

宋文恪有國士  
之知因擇爲壻

十一

三上公車六省門青春磨耗欲銷魂

殿頭忽聽高聲唱五十年來未報恩

十二

纔脫青衫拜

紫宸

先皇知遇邁常倫朝朝染翰



夢窗詩集卷二十六  
天顏喜珥筆宮庭出入頻

十三

南巡三度扈

宸遊恩比家人錫賚稠

寶翰寵褒榮故里暫歸子舍許淹留

十四

曾隨

六馭靖龍沙身佩橐鞬暗自誇今日垂鞭乘款段禁  
門咫尺路愁賒

十五

記得陳情

聖主憐循陔三載痛終天自蒙  
徵召恩彌重別去松楸二十年

十六

領袖清華憶昔年迂疎幸不負羣賢于今老輩歸  
何處池上徘徊我獨前

十七

嶺外曾爲鎮撫臣愧無仁政及吾民豈知偃蹇重  
過日萬姓歡呼愛舊人

十八

六載

園陵整素襟瞻



天無限老臣心重來紫禁登黃閣恩重難酬白髮深

十九

素餐何以答

殊恩衰病相侵晝掩門自笑平生底事只應投老  
返花村

二十

生長田間近海涯土饒蔬菜足魚鰕野人滋味從  
吾好牛炙駝羹枉自誇

二十一

依依老屋舊清光卷帙叢殘有半牀少日讀書閒  
種植一花一草未能忘

二十二

繞舍梅花月上時扶疎老幹俯清池此中大有幽  
居趣晚節寒香更待誰

二十三

鵲立亭亭碧玉圍凌寒吐豔號楊妃梅花似雪交  
相映送臘迎春待客歸

二十四

春蘭繞砌一叢叢香逐衣裾任曉風燕市攜來慙  
悴甚強教束縛入筠籠

二十五

玉蘭修挺比高桐滿綴璫瑤二月中應是織塵沾



未得不來冀北鬪春風

二十六

滿架薔薇錦帳垂  
木香亭畔雪紛披  
清芬沁骨妖紅豔  
占取韶華又一時

二十七

翠竹參天暑不侵  
新篁萬个綠陰深  
公餘夢到涼心境  
恍聽琳琅奏好音

二十八

叢桂如林百十株  
香聞數里碎金鋪  
未成招隱人空老  
每對秋風一歎吁

二十九

冬筍春芽迸地生  
隨時掘取勝尊羹  
京師一束千錢重  
輸與園丁飽滿簾

三十

堆盤享客足園蔬  
舉網池頭便得魚  
乞米長安愁局促  
舉杯能不憶吾廬

三十一

楊梅上品是湘湖  
菱芡爭來不用沽  
汲取新泉還雪藕  
蘋婆文杏得如無

三十二

階前橘柚飽經霜  
信手拈來入口嘗  
碧玉玲瓏金絡索  
歲寒獨占滿庭芳



三十三

安平不讓惠山泉新茗烹來色味鮮爲客京華惟  
飲水也應歲費十千錢

三十四

黃雞紫蟹入秋肥新稻登場正授衣有客問余曾  
記否田家風景久相違

三十五

殘軀欲乞尚遲留夢裏難忘是首邱風月烟波皆

聖澤問年量力早宜休

三十六

得歸有幸保閒身農叟猶能識老臣說與

聖朝多德意長教共樂太平春

庶常裘滄曉尊人裘用貞余舊友也年八十  
一矣遠道來京喜晤有作

不信吾生八十過銷磨歲月如矢疾故交雲散曉  
星沈回首追思不堪述去春讀卷得驪珠浩浩千  
言驚綵筆秉燭啓緘家世呈知爲吾友所自出詰  
朝來謁問生平喜聞杖履康且吉雛鳳飛騫老鳳  
來矍鑠枉過八十一兩人相對皆清癯看君雙瞳  
黑如漆雄談能使一座驚衛生詎有東方術從容  
握手數親知高軒駟馬皆陳迹燕市重來憶舊遊  
經過第宅君休詰玉堂清冷桂珠艱祿養翻憂懸



罄室有子已傳韋氏經菽水清貧遙足恤九衢人  
訝地行仙寧必跣趺求學佛雲鶴無羈任去來有  
客倦飛苦牽率湖山待君作主人我欲從過難卜  
日

愛日堂詩卷二十七

黃屏集三

壬子四月至  
癸丑十月

四月十二日以考察大典偕鄂公尹公桐城  
虞山四中堂集吏部藤花廳憶己酉四月過  
此兩度皆值花開距余爲少宰時已二十年  
矣慨然有作

別去藤廳二十年重來兩度曲欄前名賢舊植清  
芬遠古幹猶垂嫩蕊鮮花笑人衰容易老人羞花  
豔不爭妍

君恩有意培枯朽仰報無能祇自憐



夢窗詩集卷二十七  
再逢考績不知還又見花開亦厚顏愧接高賢陪  
末座慙臨羣彥占崇班天畱名卉從人賞風掃空  
枝似我頑得地託根承雨露不教拳曲委深山

葉甥南田曾爲廣州鳳陽太守以呈悞去官  
茲荷

特恩授山左之沂州守詩以送之

褒忠延賞深如海移孝酬恩重似山五馬再臨嗟  
直道一州專領更思艱瑯琊曉日民知樂沂水春  
風俗可還惜別不堪期後會清時努力未衰顏

歸念祖給諫巡察三楚還朝復有

旨再巡一年因以親老乞暫假紆道歸省

恩子兩月之假異數也詩以送之

三楚巡行返繡衣簡書重降理征騑陳情丹陛移  
忠志紆道平江省覲歸

錫類殊恩增壽考潔餐銜命有光輝畱連子舍情何  
限南極星明接紫微

王子重僉憲和余八十述懷詩見寄賦謝

烏臺峻望繼容臺楚國家聲逼上台宿德朝端思  
直道高情林下老仙才八旬獨樂公彌健廿載睽  
違我已頽一幅和章雲外降欲焚布鼓爲聞雷

二

聞道移家爲愛山尚湖大隱隔塵寰官尊碧落初



通籍名在丹臺別有班石室自藏新著述花前長  
駐好容顏杖朝難負

君恩重倘乞閒身擬叩關

滇南李應綬已丑庶常余教習士也出爲藁

城令七載內陞

上嘉其才特簡江右之泰和令詩以送之

官以親民重恩因報

國深再膺劇縣宰特簡

聖皇心異績畿南著新猷嶺北欽莫嫌百里寄廊廟

聽鸞音

二

十載鳳凰池牛刀暫借施政從爲宰始志在澤民  
時楚粵交衝地龔黃遠近知勗哉堅晚節側席待  
肩仔

贈尹子登相國二首

講幄追隨憶昔年英姿粹品壓羣賢別來疑夢雲多  
幻重晤相看雪滿顛黃閣乍登成二老白麻宣降  
越三遷

恩深難報心增惕奉誨周旋得後先

三

文富同登往事傳公真不愧我多愆共推盛德爲  
霖雨况復貽謀可濟川節鉞還朝應隔座耆英入



夢日堂詩卷三  
畫幸隨肩論交四紀情非淺倚玉蒹葭是夙緣

題吳荆山少宰松篁坐嘯圖

小滄浪中一杯雪小滄浪上松篁列開府風流數  
宋公滿堂賓從皆人傑就中作者誰最賢雍容季  
重方盛年一編靜寄絲竹外斗酒酣回水石間虞  
山畫叟稱絕技貌取當年懸榻意燕寢蕭疎別洞  
天青袍澹宕真名士雲龍變化三十載昔日書生  
今少宰獨坐藤廳感舊遊綿津詩格依然在余亦  
藤花舊主人披圖那羨習池賓不嫌衰朽曾前導  
更畫香山社裏身

閣中公政之暇與尹子登相國追溯昔日隨

侍

聖祖皇帝親征沙漠時已三十七年矣歷數滿漢從

官惟吾二人尚存感而有作

記得當年侍

聖皇儒臣結束列戎行從官今有何人在二老猶餘

兩鬢霜

二

一怒安邊絕漠清凱歌聲裏笑書生遺弓在抱思

神武四十年來夢尚驚

三

北斗南瞻路幾千弓刀身佩近中堅而今攜杖同



趨直欵段相依不敢前

四

春風坐我已衰容枯梗長依嶺上松可許香山同  
繪像凌烟圖畫讓荀龍

謂令嗣兩江制府也

送德松如學士往秦中督餉

臨邊上相掃欃槍轉餉還勞學士行

時鄂相國籌先往肅州

畫飽騰軍氣壯指麾凱奏鬼神驚南陔暫遠能移  
孝北斗迴看乍洗兵身畫凌烟歸介壽國恩家慶  
一時并

德君北堂壽高故云

銀州大雪圖爲郝雪海先生謫居時賦卷作  
六月虛堂生凜冽怪底瓊瑤舞天末梨花千樹爛

漫開攜來一卷銀州雪銀州雪片大於掌橫空颯  
颯鷺毛響謫居御史夜深歸燈檠閃爍臨書幌雪  
晴更上龍首山燕山萬疊蒼茫間平明城門獵騎  
出東風搖曳紅旗翻應憶川南草檄時登陴督戰  
羽交馳蔡州未入元濟在雪夜何人赴賊師五花  
却爲蒼生喜鬱屈蛟龍蟠故紙袁公千載欠英雄  
寒玉堆門僵不起

爲沈子

題初卉圖

曉露晶熒日上初菁華滿眼子雲居文心花意交  
相映一榻徐開萬卷書



夢日堂詩卷三  
人事花枝各有時先開已結後凋思紅英綠蕊春  
初好翠竹蒼松歲晚宜

勵滋大鴻臚奉其尊人文恭公之靈歸里庭  
中海棠二株文恭手植也當秋放花潔白如  
雪鄒原褒編修爲繪圖以紀孝感屬題三首  
庭畔紅雲記手栽漢津嘉蔭接中台俄驚樹稼官  
應怕却報山頽木未萎荆公輓魏公詩樹稼曾聞達官怕山頽果見哲人萎  
夾道棠陰思舊德迎門花萼有餘哀郎君珍重勤  
封殖不數當年魏國槐

二

冢臣鵠髮峙朝班精白聲傳九棘間也憶粉榆頻

入夢敢懷松菊請歸山素雲忽歎騎箕去華表空  
傳化鶴還莫把無情嗤草木請看縞袂淚潛潛

三

崢嶸公子盡蘭牙接樾陔南采白華三世桃蹊聯  
舊雨余出文恪公之門與文恭公世好最篤滋大又爲余教習士論交蓋三世矣

兩朝喬木數君家晨傳墓道新生竹午聽黃門又祭  
瓜唐太宗祭和成公事遺愛百年知弗替好憑妙手貌天葩

雲間姚子肩吾年少美才未婚而以選拔入  
成均就京兆試不得意而得一麗人挾之以  
歸姚子向受業於曹諤庭庶常之門諤庭賦  
詩送之攜以見示率筆戲和



妙選羣英得雋才  
桃夭遲待杏園杯  
暗投未損明珠價  
岐路偏逢解珮來  
放誕風流親蕩漿  
有懷明發且循陔  
彩衣舞罷襦新結  
紅袖相依莫浪猜

歲在癸丑余年八十二矣  
昨冬感寒未愈元旦五更入

朝退而困憊偃卧累日不能起因請假調治

上聞之特遣禮部員外鍾元輔視疾鍾以善醫久侍

內廷奉

命而來時傳

恩旨令加意診視用藥復

賜內製金丹病得稍差而年邁氣血將枯十旬不能

出戶鍾每自

御前來具述

清問感極淚零溢於衾枕口占手記不忘再造之

君恩也

大耋興嗟二豎侵

聖明垂念淚盈衾良醫銜

命扶衰質上藥頒來聽

玉音朽木回春歌

帝德素餐高卧疾臣心病餘骸骨誰能保夢裏松楸是故林

四月十九日詣



圓明苑謝

恩

上特命中使扶掖入見

溫旨命坐再賜金丹復

頒珍膳令從容歸寓記

恩一首

病起朝

天畏步趨中官奉

命特教扶

溫綸慰問滋顏汗

賜坐從容恤貌癯再錫金丹如石髓

寵頒珍膳出仙廚

恩波沒齒憂難報敢向

君王乞鑑湖

賦得千潭一月印

水月原無相光明詎有邊高卑同一照俯仰悟當前  
疑假真安在觀空缺本圓澄潭皆是幻碧漢亦非  
仙生滅難分二江河印大千虛明寧障礙搖漾豈  
移遷逐影誠如夢窺天恐未然清輝終不昧月落  
一輪懸

二

冰輪無所住形影漫相猜世界誰能隔光明何處



來萬千皆是幻一二強分開隨處渾同照遙看絕  
點埃異同休測辨俯仰共昭回碧漢無畱迹明珠  
已化胎嫦娥寧有相桂樹不須栽虛妄勞吟詠多  
才愧不才

又七律二首

天心水底好同參多少休將色相探是影是形誰  
得辨不生不滅此中涵照來世界通千萬妄擬光  
明有二三漏盡烏啼人見否湛然一點已忘談  
天上人間覓指南是空是色暗中談窺潭得月原  
非月玩月忘潭已在潭千影無心尋不著一輪有  
意墮何堪光明萬古無盈缺形迹迷人枉自探

寄同年孫峩山銀臺

四十年來歎曉星羨君高卧子雲亭長畱著述堪  
千古不是孤高傲獨醒泉石清幽忘鶴壽雲霄空  
濶任鴻冥自憐大耋身將乞衛水秋風渡小舲

顧景范右銀臺特擢詹事志喜

仙班只合住崑崙詹尹由來德望尊綸閣借才兼  
省寺鳳池依舊近微垣白雲明月瞻風度紫綬銀  
章拜

聖恩忝冒回思三十載玉河東去憶巢痕

顧君起家翰林歷臺

垣省寺而在閣中批紅本今陞詹事仍歸翰林矣  
余爲詹事於今已三十年詹事府在玉河橋之東  
故云孔稚珪讓詹事表云自非器上白雲韻同  
明月何以延芳芝畹插羽瓊條宋書詹事紫綬銀



章擬尚  
書令

虞山言

七十壽子游之後裔也

吳國門牆蓋代中歸然一老溯先公承家文學

熙朝澤化俗絃歌舊巷風

邑有子游巷

手籍祭田頻渡海

穀貽孫子更從東七旬身世真無忝秫酒應須百  
盞空

夏景

百尺梧陰六月涼湘簾宛轉繞迴廊風穿修竹笙  
簧奏雲入喬松綺繡張數畝芰荷浮曲沼千莖蘭  
蕊近匡牀閉門不問人間事據案披襟讀老莊

二

院宇深深俯碧流好風徐度霽雲收晨興空曠林  
香遠午夢清涼樹影稠染翰攤書人寂靜吟詩度  
曲客勾畱蟬聲忽噪斜陽外泛月移樽上小舟

三

竹徑蕭疎水檻清垂楊堤畔釣竿橫偶逢石磴當  
風坐閒步溪橋倚杖平浴罷鷺鷥臨水立歸來鳥  
雀入林鳴蓮房菱角呼童採更得池魚勝大烹

四

驟雨輕雷過柳塘冷然風到曲欄旁桃笙淨展全  
無暑草樹陰濃自有香碧玉盤中珠瀉急綠紗窗  
外燕歸忙日沈雲散冰輪上又聽簫聲度短牆



題鍾竹園郎中小照

春官清望重空同調變興居護

聖躬

鍾以善醫侍內廷

端爲先生能護國仙姿歲歲羨如童


東 二

扶杖婆娑話別餘  
筌庭握卷幾躊躇  
勞君一索珊瑚枕  
可有淮南鴻寶書

題姚範治庶常小照

空庭擁梧竹雅韻徹天際  
誰歟理瑤琴澹泊太古  
味有美家龍眠山清復水麗  
放眼窮縹緲曠懷寫  
高寄花甌春日永甥館秋雨細  
姚子爲桐城相國館甥一唱  
而三喟蕭然負清氣老夫脫朝衫  
檮散息里第何

不抱琴來共此圖中意

陽城田相國贈公於明季逃避  
闖賊當急難  
時棄其幼子負孤姪入山谷間  
及賊去所棄  
幼子在草澤間無恙天也文孫  
追紀其  
事屬賦

棄子存孤意凜然割慈成義感蒼天  
宗祧念切非  
關忍默佑神扶却雨全世仰高門  
追隱德祥開台  
鼎啓名賢文孫授簡昭遺澤青史千秋逸事傳

歸田紀

恩詩八首

并序

臣元龍海濱下士草野庸材昔荷

聖祖仁皇帝拔置上第授官翰林旋侍



內廷卽登

講幄

時巡每扈屬車之末

北伐亦隨豹尾之班告歸者再蒙

特召於田間循級而升遂游登於卿貳出領封疆而

授節鉞入歸廊廟而踐星辰

知遇之恩重逾山嶽效忠之誼未報涓埃痛

龍馭之上賓徒攀髯而無及懸車之期雖屆致身之

義未終侍奉

園陵者六年思抱遺弓以終老乃蒙

皇上大孝推恩登庸求舊眷茲黃髮宣麻丹地兢惕

五載荏苒八旬膺

殊寵而難勝日就衰而欲躡伏念歷事

兩朝服官四紀方嗟大耋恐玷綸扉雖戀

闕何忍乞身而素餐懼滋覆餗不得已於雍正十一

年七月初三日冒昧具疏陳情奉

旨卿老成練達學問優長奉職多年宣勞中外朕念

聖祖仁皇帝簡用舊臣晉秩綸扉俾承恩眷今以年

逾八旬具疏乞休情詞懇切朕勉從所請着加太

子太傅銜以原官致仕令伊子翰林院編修陳邦

直隨歸侍養其南旋時着沿途官弁迎送盡禮該

部知道欽此隨於初七日詣



卷三十一  
三  
圓明苑宮門奏謝

天恩蒙

皇上特賜召見賜坐備聆

聖訓又

賜恩廕給與幼孫

問何日啟行回奏稍待秋涼乘舟南下八月二十日

治裝已具詣

圓明苑宮門奏辭

皇上又賜召見賜坐

溫諭移時元龍奏明欲從通州詣

聖祖景陵叩辭

上曰爾年老恐不勝跋涉不必去元龍叩首固請

上曰壽皇殿供奉

聖祖御容從不許外人入內爾有此心可至壽皇殿  
瞻仰叩辭勝於遠詣

景陵也隨

面賜

御書冰泉耆碩四大字扁額

御書大堂幅二軸對聯二副內府香爐香盒花餅硯

山寶硯水丞織牙扇鼻烟壺茶盃酒琖等  
數十種金盤珍果四盤乳餅製果乾脯四

匣



皇上親拊其肩解

御用素珠加其項

諭曰朕六十歲可再來相見二十二日詣景山

壽皇殿前九叩首畢內侍引入殿內啓帷瞻仰

聖祖御容又下階九叩首而出啟行前一日

遣中使就家賜宴酒醴茶茗膳羞果品餅餌羅列滿

室二十五日就道公卿大臣奉

命出餞於郊官吏弁士沿途迎送元龍感激涕零慙

悚汗浹竊思引年致政雖有常經佚老退

休實辜臣分

皇上垂鑒其誠俯俞所請已爲厚幸永戴

弘慈乃蒙

天語褒嘉

優詔降答晉秩宮傳備位公孤

曲體衰老之心俾令循陔有子

俯恤小臣之隱勿使陟屺興懷廕及幼孫賞延後嗣

昭回

宸翰炳煥

天章錫與林泉不啻鑑湖之賜

褒稱耆碩倍增洛社之光分

秘殿之文房寶玩清暉遠照於私家頒

天廚之玉饌瓊漿飽飫下逮於舉室祖餞東門傾朝



咸集送迎驛路夾道傳呼似此非分之殊  
榮從古未有之異數聞

命自天而降寵極禮隆感

恩無地自容心驚魂悸生生世世矢銜結而莫罄愚

誠子子孫永捐頂踵而難酬

高厚謹賦短什以示來茲永歌

聖德共勵臣心也

大耄抽簪退已遲

兩朝知遇不勝思歷官清要慙尸素叅預

絲綸愧翼爲

孝治推恩重錫命舊臣歸老荷榮施心依

玉几難言去九叩

堯階有涕洟

二

承明出入沐恩深守拙浮沈鬢雪侵四紀廟廊

明主德六年

陵寢老臣心衰容力盡驚華袞

聖世身閒保素襟海宇清寧歌愷澤扶筇隴畔聽謳

吟

三

有子登朝愧世臣廿年珥筆玷蓬瀛更憐鳩杖成  
孤往俯體烏私與令名教孝思忠



綸綍重特恩將父綵衣榮賞延三世承簪紱襁褓孩提荷

聖情

四

天語重申後見期呼萬再許上彤墀青山歲月皆君賜絳縣春秋不自知食德飲和仁壽世錫齡養老盛明時寸丹寧乞金丹換一點葵誠永未移

五

異數便蕃下

九重就家錫宴湛恩濃珍羞捧賜天廚膳仙果頒從上苑供

溫旨宣傳傾碧醞中官鄭重啟黃封  
寵行恩禮驚殊渥銜結生生矢寸胸

六

詔命公卿與餞行東門祖帳下車驚就衰一老辜殊寵憑仗諸君佐

聖明麗日當空原自近紫雲回首不勝情從今便是漁樵侶候吏何勞到處迎

七

秋風莫道片帆輕萬丈

恩光在客旌文玩盈牀懷寶重秘書滿載射奎明林泉



賜與青山永耆碩

褒稱白髮榮驛路爭看歌

聖德萬年有道泰階平

八

君是唐堯稷高臣歸以長作太平人多稔多黍調元

化言孝言慈戴

聖仁

宸翰光華明畫鷁贈言情重壓空簾詩甚多此身久

致非吾有今日田間幸有身

潞河登舟

扁舟今日遂初衣烟水茫茫隔紫微不是成全

明主德肯教疎放老臣歸篷窗容與閒欹枕桂棹夷

猶笑息機重泛潞河三十載沙汀葦岸尚依依

二

波光坐照白頭明夾岸驚看有送迎

聖意不教成隱晦臣心猶畏未辭榮商飈隨艦帆無

恙秋水平堤浪不生重九都忘佳節過故人持贈

有黃英

新安查翁天行久客天津年七十矣新構一

園曰水西園辱招遊賞停舟竟日賦謝

衆流歸海下津門攬勝名區萃一園林木千章藏

曲折烟波萬頃變朝昏棹歌帆影穿雲度田舍村



墟擊壤喧山徑登高叢菊滿茱萸重插爲開樽時值

重九次日

二

停舟話舊暫淹留把臂相看兩白頭湖海寓公成大隱冰霜勞客遂三休徵歌曲罷聞吳詠投轄情殷滯衛流坐倚軒窗還惜別鳳城不遠有丹邱

沿途軍弁列幟護行悚愧有作

恩敎保護老臣歸鼓角聲中列翠旂岸有弓刀勞擁衛舟餘書卷沐光輝夜深擊柝烟波靜曉發揚帆日影微父老欣聞榮一老扶攜爭上釣魚磯

今歲秋霖較多畿南沿河卑窪之地有被淹

者州縣吏奉

命散賑皆已被澤安全水退種麥不悞春耕沿途皆呼

萬壽經過不勝喜慰

卑區偶患旁流溢

聖澤旋施造化仁無限窮黎飽官粟已看蔀屋返流民隔年種麥春耕足高壤登場積穀新補救頓令忘歲歉吾

皇大德轉洪鈞

贈嚴養雲主政嚴爲存菴少宗伯之子由翰林左遷告假南歸令嗣桐峰編修以送親得



請偕行聯舟並發辱詩見貽賦此酬之

省中磐石憶風規瓌類才名冠鳳池入夢松楸今  
得慰歸舟萊綵喜相隨雲移帆影聯歸棹月滿波  
心惠好詩我老長辭 是去蓴鱸莫戀

聖明時

二

乞身歸老荷

殊恩伴食貽羞詎足論展卷漫勞推獎重隔船近接  
笑言溫寒花歲晚香浮徑舊第霜清客到門稻熟  
釀成爭介壽徵書又恐促乘軒

十月十一夜宿瑤灣口嚴君養雲來過以舟

離岸遠不得登舟悵然有作

月皎波澄浸遠天停橈夜宿浮無烟遙看彼岸來  
相引又隔微塵不得前

二

吳舲銜尾鎮相依曉發隨風欲見稀佇立船頭頻  
悵望夜深霜露恐霑衣











